

鹤林集

吴泳

文硕阁

wenshuoge.com

目录

关于我们	4
提要	6
卷一	7
卷二	14
卷三	19
卷四	28
卷五	39
卷六	46
卷七	53
卷八	62
卷九	70
卷十	77
卷十一	87
卷十二	94
卷十三	101
卷十四	106
卷十五	113
卷十六	122
卷十七	130
卷十八	135
卷十九	141
卷二十	147
卷二十一	153
卷二十二	160
卷二十三	165
卷二十四	172
卷二十五	180
卷二十六	185
卷二十七	191
卷二十八	197
卷二十九	203
卷三十	208
卷三十一	213
卷三十二	221
卷三十三	227
卷三十四	232

卷三十五		238
卷三十六		244
卷三十七		250
卷三十八		257
卷三十九		262
卷四十		268

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

提要

鹤林集四十卷 别集类三【宋】

【臣】等谨案鹤林集四十卷宋吴泳撰泳字叔永潼川人嘉定二年进士理宗朝历官起居舍人兼直学士院权刑部尚书终宝章阁学士知泉州事蹟具宋史本传史称所着有鹤林集而不详卷数艺文志亦不着録惟永乐大典各韵中颇散见其诗文谨裒辑编次厘为四十卷放佚之余篇什尚夥亦可见其著作之富矣泳当南宋末造正权奸在位国势日蹙之时独能正色昌言力折史弥远之锋无所回屈可谓古之遗直至当时边防废弛泳于山川阨塞筹画了如慷慨敷陈悉中窍要本传所载诸疏简略未详今以本集考之如绍定二年上西陲八议五年疏四失三忧及保蜀三策端平二年言元兵先通川路後会江南不可不固上流三年乞预储蜀帅又论坏蜀四证及救蜀五策大抵于西川形势言之最晰良由南宋以蜀为後户於形势最为冲要泳又蜀人深知地利故所言切中窾会非揣摩臆断者比实可以补史所未备其他章疏表奏明辨骏发亦颇有眉山苏氏之风在西蜀文士中继魏了翁鹤山集後固无多让也乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

鹤林集卷一 宋 吴泳 撰五言古体诗

拟西北有高楼

高楼何迢峩一柱西北隅横当子午道峻直参井墟曲琼卷飞霞僊僊人居上通三重阶下？十二衢傍楼玉箫女织翠纷华裾僊人顾之笑授以青琅书邈言欲从之媒拙而理疎丹梯目成久须凭大垂手

夫远征

采繁浴春蚕夫婿今远离贫无金钗别愁有玉筯垂朝同火伴去莫独衾裯随百夫十夫长千里万里期去期日已远征郎不顾返生理日就贫岁年亦云晚虽有乳下男不能充夫丁昨日府帖下籍已书其名官军独备北颇恤东西民勿言征钱轻抽徼将到人

采葛行

黄葛溪上生青条谷中垂薄言采其丝缉彼綌与絺缝作公子裳远寄闺人思絺兮凄以风不值当暑时轻鲜未及御弃置忽若遗虽则遭弃捐肯为风雨移朝暮蒙楚中采采以慰饥君看葛妇歌尝胆味若饴

桂

南之山丛丛桂树生也直朱华自成林不杂衆芳植上有青鸾栖因之为羽翼移根上林苑零露滋晓色岂不罹凝寒高标竦孤特丹心能自渥身性不加饰所以离骚词嘉其秉炎德相观穹壤间人统形气识阳根为刚明陰质为闇塞灵均莫能招聊与花辩惑

都大华文监丞权府事之明年天子诏将直禁近邦之人有以三瑞为献者曰双莲曰岐麦曰九穗禾皆斯世之上瑞而萃於一时人目之以为盛遂采民谣集成歌颂曲三首以纪其美【阙二】

短短菰蒲洲陰陰葭莼陂有斐嘉芙蓉双蒂媚涟漪如龙舒两娥如沅湘二妃岂伊玉池种而乃生污泥斑然烂云锦袭人芳菲菲两美谅必合佳人制为衣下承朝露滋上戴夕日辉驾言折芳馨归以遗所思

咏怀

何草秋不枯何叶秋不黄白露以润之凝凝含晶光幽兰自华滋时菊仍菲芳粲粲园中葵亦得曦朝阳被恩有如此後时果何伤惟有警夜鹤庭前独旁皇岂不欲九臯翺翎莫能长湛湛被露斯幽吟遂成章

送新蓬州程倅

美人其犹龙渴饮金泉水水狭又飞去一息蓬池耳是时天气清衆緑事盥洗遐征溘埃风长袂蹶螭尾天阶甫一尺民社犹千里还须手帝泽为俗洗疮痍余力裁新诗或可代封匭

宛宛黄柳丝锥锥杂花垂柳解织别愁花能送春归思君远行迈游子心依依有弦不解挥有镜不复治岂是真不能持此欲遗谁河梁此时曲泪为生别滋但期如水萍所寄良不移

送陈和仲常博倅嘉禾

柳色媚别驾桐花夹行舟慈湖一片心不上富贵鉤擎却云雾窗分渠月波楼但有月长清何妨波漫流俗士骑户限痴官摸床唇名节与官爵岂以全畀人子方贵良贵我亦仁景仁终始议论间但保一色醇未及与君别先歌送君诗浙西数年来风景非昔时红蚕不上箔青麦空生陂六经政之本无用别出奇

送长儿盘赴金陵典斛

皤皤六十翁碌碌三男子阿柴冠尚痴阿?醉欲死盘也年未强早为贫出仕家庭所训诲仕亦当念此敬则能莅官敏则能决事事长如严师择交必端士僮亦人子耳勿以盛气使只效龙伯高芳名播青史

悲莫悲生离老至悲转切阿爹领宾送诸母持酒别大妇前致辞忽忽顔不悦归来眎季女一夕亦永诀人事长如此有怀向谁说泪缘亲爱滋心以忧患折去去勿重陈秦淮对明月

仕历四千石官聯六尚书耕无田二顷居无宅一区余岂不念子皇皇事田庐多藏损其志厚殖益尔愚贫乃好消息此言诚不迂子官视庾氏俸廩颇有余疎花会结果小水长通渠

援以书戒子子竟不若翁陶以诗责儿儿只如顽童房公岂不智集此书屏风堂基未及构手泽俱成空乃知贵胄门美业真难终子虽有良质须用磨琢功射御亦是学不妨随元戎

玄云拖榆塞白露涂枫林靡靡秋未夕边马已南侵子方从军去川陆迴且深虎兕嗥旷野猩猱啸高岑独见金城外迎人柳陰陰主人敬爱客秉义如断金好将少年行转作节妇吟

寿魏鹤山

人生瀛海内中气胚肱之真元会清淑间代储英奇扶摇六月息濯羽於咸池冰壶贮虚明璧玉含清辉阿阁引凤巢小山结桂枝肯遗金门步乞取青藜归要福不椒醕延年不琼糜至仁弥尔性纯嘏无穷期

濂溪雅爱莲程子乐观鱼生机不停息天理原平铺美人湖上来挹绣天东隅清气荡喧浊德风振纖枯人酣鸞花国雨满菜豆区肯縻尔好爵而夺渠贞符鷹鷃好弹击乃谓鸾凤疎愿言崇明德永作国璠璣

壽邹都大

大仪斡四运环转当初阳天根起自复气踵生以黄卓然五陰中标示君子祥芳芸岂不馥硕果终自香有开南国彦气稟惟纯刚况逢子之半弧矢射四方浩然祖邹人清介如道乡源流义理熟滋养苗脉长自登蜀道来玉节明於霜潢池有佩犊紫逻无羝羊星回参井间草木烂以光种善如种禾去恶如去稂只从一念中垌野皆斯臧玉不用餐石髓不用尝台背而儿齿好德自尔康笑渠役役者日景以线量

壽杨崇庆二首

英英赤文凤生此岷之阳览辉孤竹根振翼千仞冈德音乃鸞鷟下引鵷与凰承旗从华盖吹玉朝紫皇顾瞻朱丘深殆似阿阁长肯以令仪渠而使繒弋伤集须集桐花食不食藻梁竚看发丹珠舜殿歌明康

清露团火旻素月分白道三湖足秋色天以赐贺老红蕖正酣酣翠簷方稍稍闲情观池鱼生意玩庭草旨酒常在壶瑶琴弗离抱灵台悦清明岂不长壽考方朔谩窃桃安期苦尝枣愿言西风时眠食常健好

壽范漕

春山蕨方芽春院桐始华暄风荡红紫还似綠幄遮老僊坐鹿园净眼阅岁华会须乘五羊结佩凌飞霞豫章富人物山谷人中豪虽从老坡来颇服春陵高泰和善鼓琴涪水不拟骚安知百世士於此还一遭入窻月疎疎满坐春盎盎事机尽盘错收入经济藏鱼方在沸鼎独以裒沃涨静言平寇功当置裴李上鷹鷃好弹击自谓居使之凤凰不鷲搏羣狡亦莫欺但使德意多何用风采为西台十六州人自春熙熙方朔谩窃桃安期苦尝枣世间长生诀自致元有道硕果终是香灵根不曾老作诗颂僖公俾尔弥壽考

拟古三章留别果山同官

边马思北依晨风思北飞役役会有还之子胡不归欲归又北征适与风马期忧端来无方人则莫之知不伤道里远所惜光景移肯以兰桂心化作秋草萎行道各努力吾亦从此辞

巴之水泠泠青山复成围含晖排户来颇若有所思谓云为无心终日长不飞谓草非有情盍为乎忘归凡物各有系余岂縻於斯俯川观鱼泳仰空看鹏垂一笑有会心钓弋何所施

同门二三友星弁尝蝉聯一日两会面三日一共筵花时暮声里雨夜诗筹前斗酒相为娱余欢则陶然永言怀及兹余愁浩如山未别已足惜别後谁慰顔陆扬未可俟寄声断鸿边

用葵轩送定叟平峇兄弟间首句送季永弟赴省

平峇兄弟间如友相箴?每於和顺中切切而惓惓笔砚三十年风雨无停披草衣而粝食穴坯而败帷子文实胜仆而我先子飞子不?脱获便废锄与犁有文绩如丝有锋利如锥拓开大规櫪不作小干枝果然昇春官粗慙心所期对床味可永今又征行西此别固不惜岂无深长思庭萱日就芜门户一线微子若不努力谁与相扶持文章但平易毋?骄出之共登青云程了此一段奇却归坐北牕脱去名利羈於皇太极蘊力与求真知

送李鴈湖大参赴遂宁

拍拍鴈湖水深深归鴈亭鴈归三四年相伴湖水清燕私岂不乐国尔终含情龙章倏夜下惊赴鸕鹭汀鸿雁双翥翰眷焉乃东征载辞龙鹄椒复问鷖花程輶轩鹭华轂高盖罗翠旌康屯岂无学销暴不以兵蔚蓝旧草木再色新威明寄声受?者明府如父兄

恢恢大仪中扶立惟三纲国风怨以怒王道荡无章栖栖鲁东家秉笔修天常廉陛不乱纪冠履不易方斯今世运颓礼义维楫亡三边且病痲羣盜方鸕张兵如溃堤螳民甚頼尾魴厉阶倘不夷零露将侵裳李侯世柱史识此治乱防挥袂别广筵振衣登高冈愿言茂远猷挽河洒天狼

刘园九日燕同寮效陶谢体

霜林剪生绡烟树织晴绮万宝新告成百工亦休止嘉辰属南山胜事如栗里谬为陶长官宁惜此中醉良朋况知心健会不论齿鸕夷自挈携猩笔漫游戏清欢别有趣真乐本无味菊花之隐逸亦欲妃君子独於萧艾中保此生色睟凉颼忽吹衣白露皓如洗兑随数至剥剥落从此始拟将九九节便作阳月纪

九日闲居读陶诗有怀

天盖不住旋日车不停驰西风下木叶那复有静时造物尚尔劳人生能无为我於大化中纵浪何所羈倦则熟午睡饥则爱晨炊既无大患及亦无好爵縻但得长如此乐焉复何疑

虬龙能负熊行雨云霄间犁牛不执鼠野性长在山才者常苦劳拙者常得闲静中阅物理役役会有还所以陶徵君猛歇名利关书不求甚解褐不求常完是有真意此外无戚顔怀哉

千载人卷书一长叹

闲意不在远吾庐自成趣竹陰混午醉菜甲疏晓露庭草更不除树禽日相语每繙架上帙旋读辄忘去佳友或会心往往谈至莫以兹率为常弥觉太多事却思对床眠寻味所乐处

天地大庐舍谁使渠滔滔拟如原卜居卷屋皆波涛又思囚山赋匪虎吾狴牢独惟安乐窝邵子差雄豪驾言欲问津蔽吾以蓬蒿颇思振衣起浊酒且自陶一生任运耳目送冥鸿高

壽范洁斋二首

明河耿高树素月流澄瀛嫋嫋来金风秋意浩以盈美人自西方鍾此一气清如潭贮皎洁如室生虚灵姱节丽有晖高情澹无营昔含鸡舌香曾以凤咮鸣不登金张馆尝抱箕濮情倏焉冰山销揭若黄道明衆星已牢落太白犹光荧英风自骨鯁心事元夷平会须朝紫皇提笔福苍生

玉山一何高堂与青云齐上连宝台峻下瞰金壁低中有二老僊驾鹤俱不归苔封箕山碣雾湿太史题岂期芸省郎再析侯藩珪芳猷绍前印英气截云霓理乱如理绳牧民如牧羝燕开登南楼就以云作梯喜年玩秋稼抚物观春萸不贪老氏宝不秘庄生倪至仁弥尔性壽齿今复覩

题承天心老万佛阁

我闻谿禅师断薪接绳床扬岐初住岑撒雪满屋堂庭松下法子餅水注道浆看来古佛心不为屋有亡心公自别宗眼碧髭又霜更接十千衆建此新道场梯空挿璇题会海结珞方自营不住心每唱无底囊如明珠走盘如利刀截肪?兹衆生故苦为诸佛忙寥寥一贞境渺渺万法航泥空竟成着堕有终是盲青灯落檐花吾道千丈光【世言安期本策士而不识心公为经世之才其时拓开潮沟大建佛阁直是有滋衆活人手段余不作诗久矣故书此戏之】

和赵尚书无辯诗

夫子动以易孟轲性其天或毁或沮之於我何加焉天地犹有憾伊人得无言笑彼徇人者区区欲求全热不栖恶木渴不饮盗泉佳兵不祥器只为名使然孔明桑百株杨子田一?静乐岂无此行藏却由天獬犬吠汉月黄云塞江天江淮我家门守地何择焉妇尝劝减竈苦口为母言早使言得行家门更安全词人工为文瀑瀑如飞泉辩士说利害焰焰火始然浮华不经实胡取三百?吾生信拙尔道胜还诸天

程顺子升斋

雨养焦谷芽清晨勃然兴风入春笋节一夕长数层地道元敏树生意实可徵一息不滋长枯

菱莽丘陵所以务学者进德长如登礼义所封植忠和所薰蒸湛然清明气於此中夜存德盛仁既熟始如日之升今人废下学乃以高自矜譬之凌霄花霄竟不可凌子归且近思从下观上腾谦谦以自牧洞洞如不胜舜顔亦人耳母谓人鲜能

和曹宪金华山韵上李鴈湖

楚台快谈风梁园骋歌雪滥觞起九章流波到七发雕空竟何事如以纸帖月巽岩锦褰衣鴈湖木霏屑百卉冬具腓乔松立霜雪老枝自擎重既晚逾秀发劲挺真大臣回邪走妖月金非百链刚那不因翠屑浮名镜边尘骄气炉上雪胡为认而有引满犹不发有怀东方人书眼高照月纾徐如行云去就不尔屑奔鲸甫息波獅子还吠雪忧端压不住耿耿及明发师费辄千金粮储亡三月智哉陶士行先贮头与屑椅梧未成琴修干埋积雪嶰竹断成律其窍春自发所遇时使然谁与指標月仙翁急抽关乞我云母屑

七夕闻鹊

凍雨略洗车炎晖复如礲桃笙眠未熟屋角乾鹊噪借问鹊何来下上音载好此声固非恶枉为闲者告适情便为喜喜不繇汝报用静则为吉吉不缘汝召萧牋尚我踈行人为谁到劝子莫饶舌移语朱门道

黄姑西不娶织女东未嫔绦河咫尺间可望不可亲欲遣乌作使乌黠言未驯欲诏凤为媒凤老味不灵独有雕陵鹊造梁河之濬频年事填河头秃弗爱身胡然此今夕疆疆语依人熠燿渡机石鹭鸕窥汉津鹊昔号神女至此不复神缅思成桥事谩语抑不伦直须明河水尽洗千秋尘

变欧阳子秋声

银河耿高树璧月流中庭有声西南来厥闻浩以盈或泠泠为风或殷殷如霆元戎啸中军猛士赴敌营但闻人马行弗省金铁鸣天地始气肃乾坤亦尘清岂有一草木而不知秋声

和虞沧江见寄宴坐闻秋香

春芳如丽人骄色不肯除秋芳如高士一味甘恬虚我閤本洞然香风来虚徐滋兰露承掌延桂月满裾门巷柳濯濯林塘竹疎疎真意俨分列远心更庄舒庭前两好鹤知几年岁余或睨立倚窻或饮於清渠常恐緇尘染回视根性初蹇余沧江人人岂不鹤如起寻月中句遥睇花外车八表方云昏尚无返庄庐

塞鴈

鸳鸯在鱼梁在在能戢翼黄鸟止丘隅止止得所息相彼鴈与鸿胡然生塞北城暗候火惊云

低空弦逼官军夜击鼓奴或告之亟师老粮莫支健儿恐烹食哀鸣号穷边莽是狐兔窟天地生为心曷使至此极所以周宣诗矜人要安集

送游景仁夔漕分韵得喜字

桐花繁欲垂柳色澹如洗深谷舣行舟忽忽春莫矣庐山蕨已肥荆渚鱼正美提携赤藤杖炊煮白粲米佳处有会心岁月不须纪系船且夷犹却待荻花水江平风浪澄再与歌至喜

送鲜于漕

文字微妙诀到底元平夷词人不能工变怪生崛奇汶上大夫者得法灵均师修辞滋其平不怒出之白云自多态流水长清漪作者云已往知者其为谁九诵的子孙八鸾行康逵天将赳其声复见风骚遗

树德必欲滋去疾必欲除世人亡分明蒿兰同一锄凤兮德之美谁不相称誉翻鞬下霜云义盖非鹞如煌煌绣衣彩炯炯清水壶衣以将直指冰以励廉隅持此踰二年相眎如一初去去登乌府昏鸦遶林呼

蹇应叔自宜兴寄近诗和马字韵

仲连本策士元亮非隐者举世莫知我悬车息其马舣船阳羡头停策计山下山水自娱人无烦丝竹写吾老百世休辍书学耕者祈年占土牛喜雪掘玉马海鯨带卤烧谿蓴和豉下却忆古蚕丛晤言莫能写

卷二

钦定四库全书

鹤林集卷二 宋 吴泳 撰七言古体诗

天马引

陇西之野龙驹骧追风脇月坤为裳竚云亭亭广颡直夹镜炯炯双瞳光饭以玉山禾饮以瑶池浆自成骨格异赭白活出神采遗玄黄三千牝十二闲俛眎但觉皮毛凡饮江曾濡六轡湿致远又逐双旌扬牧则在垺野贡则归天潢写图仍上穆天子跋蹙但笑羣觝羊

拟湖边采莲妇

短裙纈渠衣制荷采莲女儿凭船歌歌酣弭棹解尘鞅微步演迤凌寒波薄言采采湖之沚买镜无钱贱生理遥知浪水不可照只仗清流作知己荪为桡桂为棹脉脉环湖翠烟草急归掩关中夜思欲致美人伊有道

促促词

促促复促促急柱危弦无好曲乐日常少苦日多男耕女桑长不足麦方在场缁在轴里正登门田吏趣东隣女儿当窻看西家阿?阑道哭闲时输官犹自可况是兵符急如火近闻官家榜村路运粮多要人夫去妾贫犹足备晨炊不愿身为泰山妇

兽之穷

兽之穷逼我墙韩卢走兔无窟藏江麋假息尚扑朔穴鼠无技犹张皇我 岂不甘我纓岂不长狸步张侯虎为落 未及献弓先亡兽之穷莫抵当泽虞不戒专诸忙春蒐犹禁塞榆白秋战不耐泾水黄昔闻养鹰志在逐无使饱食栖平冈

梁父吟

梁父吟维山高高维水深白石烂兮饭牛曲沧浪清兮鼓枻音艾薪岂不贤反被妻子瘖投笔岂不壮交友不谅心用则宗彝在东序不用土缶埋汾陰梁父吟问梁父青史功名在何处长须旨酒置高堂莫使青葵委零露临风恹恹歌一曲凤舞鸾翔应箫玉

汉中行

汉中有昔称梁州墜腴壤沃人烟稠稻畦连陂翠相属花树遶屋香不收年年二月春风尾户

户浇花压醪子长裙濶袖低盖头首饰金翘竞奢侈自从铁骑落武休胜事扫迹随江流道傍人荒鸟灭没独有梨花伴寒食君不见当年劫火然携老扶幼奔南山又不见拗项桥边事七八千兵同日死死则义魄犹有归存则偷生漫如此三人共一椀灯通夜纺绩衣鬢髻八口同半间屋煮?椎水常不足家粮一石五券钱一半入口一半官男担军装出边去女荷畚鍤填濠还官知民贫当爱惜兵者卫民贫不恤且如今年春又经征战苦风尘未动力已罢殆以饥羊饲豺虎梁山奕奕水汤汤知他见几玉节郎昨日汉川过香气夹道花成行还挝青鼉鼓复拥白鹄旗帐犀殿後车悬鸱营中闻之暖挟纊尽道节制吾父师东军本皆孝顺儿好在良牧绥牧之太清鱼不蕃太缓琴不理师中有吉当自求度外无功更谁喜秋风淅淅吹芙蓉山童唤我歌汉中中欲歌兮可奈何为语前途胡秘阁莫使兵贫复如昨【谓安抚兵部秘阁胡公?也】

堰上行上周宪

堰上行桃花灼灼春水生水才一石泥数斗弥漫漉池浸渠口树以淇园竹蓄以汉堤石石填竹落知几丁驾作青霓千百尺一夫拏菱前一夫荷插去旋烧香纸祭水庸更酌村醪赛田祖鹿头北海眼西绵洛一带填?肥苧麻沔池禾稻长虽有旱暵无凶饥今年狼头窥井络罗堰九星几缺角匪天十风五日雨陆海将贫水维浊上帝悯下民亲遣苍水使西门骖前白渠後指画田塍若鳞次新堰举旧堰修野媪含笑谿童讴自言春种皆茁土桔槔长闲卧畦圃明朝百役非所知且乐丰年踏车舞燕泥新湿花雨斑四牡趣向东郊还地平天成九功叙今秋都筑沙堤路

赠星翁郭若水

月临南斗退之惧宫直南箕苏子忧片文只字不经世赤口白舌空招尤我生之初函二气地则五行天五纬罗计二宿括半天太陰一星宅肯位郭生本是郭璞徒推步太精言转迂按图只说万言锦经野未辨天官书大游正照参井乡蚩尤不斂旗方张瞥将巧历莫推算为我占取我眉太白何时康

游大玲珑小玲珑

小玲珑大玲珑平林突起羣玉峰霜鋤剪取碧琬?雷斧凿破青嵌崆自有此山生此石鬼削天劖更无迹泗滨浮出瑞玉磬周庙横陈古苍壁苍官俨冠劔翠官披琅玕好风吹月来光动九琳轩守庵道人形野倨白领方袍草为屨颇奇二士入洞来引向高亭最幽处他山岂无石弄假不似真平泉马鹿迹何在南墅甲乙名灰尘说真辩假无时了山童隔竹敲茶臼

洪都病中梦与太白同登峨嵋亭有赋

翠浮天宇两眉修不着尘寰半点愁锦袍仙人去不返乘月忽作斯亭游月悬水底不受捉牛渚矶翻酒星落气涌如山白浪掀声悲动地终风作我思吊古登翠微点检旧题无白诗生平

白眼睨力士焉肯妩媚歌峨嵋杨林渡头采石口一处风寒几兵守寄语中流把舵翁莫使江山落人手

壽范翁

辛夷如雪芳事阑飞絮卷地春风酣连陂和云割青麦隔坞趁日燥红蚕今年夏气清较早雨後西山翠如扫女儿负笈男带锄夸说皇华使家好使家天上一角麟手握雨露呵星辰綠林无风草木静紫塞有备烟尘靖鹿园镇日长徙倚心事如平一池水荪兰不惜手种植萧艾依前力锄薙槐龙影转花又黄造化乃为诸生忙春闱灋细靡罅缝选吏亲校如秤量老僊自是文盟主曾抱长蛟着繁露好将鼻祖三昧法直向金华讲经去有香不炷旃林香有酒不酌瑶池觴愿公岁岁常壽考賸寄诗筒祝难老

西湖访梅

欲休不休岁垂晚似冷不冷霜复晴起撑湖船访梅去一点两点藏林垧主林无神花气薄树影庚庚香漠漠谁能细玩复与临静处测破梅花心桥西水北弄明月酹酒独对青山斟自有此山无此客富有他花无此格西湖处士不可招鸦点孤村暮云碧

祁山歌上制师闻敌退清水县作

祁山之西当太白战士弯弓抱明月散烧烟火夜宿兵遥见狼头一星灭明朝探骑前来报为言敌死秦川道牌使前呼大队回鹅车炮坐埋青草黄河口清水头水声呜咽河不流军中遗言更惨酷灵夏名王亦屠戮中间被掠边丁苦牧放牛羊食禾黍牛羊得食人转饥日想南朝拜降去朝廷有道督府雄三关之险风不通健儿长枪及马腹壮士劲弩当心胸帐犀前把石门隘遥望红旗围尽解舆师等第喝银帛三将同时赐金带凯还吹落桃花风捷书屡奏甘泉宫纶巾萧然羽扇净一字不说平夷功离鸿迤邐集中泽鸦噪山田忙种麦七方新堡高插云腐鼠何能更相吓书生每夕繙青史争战场中看千古狸亡虎?自有期天道何尝厌中土夹城云赤戈劒明通衢夜白钟鼓清更待公归戮力就太平

壽梁漕

维日在娄春事殷维桐始华天气新乱红遶树綠幄均櫻笋又荐冰盘珍知是燕胎协卜牛宿会辰绣衣立当霄汉春骊驾飞度天河津帕中玉屑粮未陈镜里宝月光逼真廉如一条冰照人健如九臯鹤离羣舌根不道烟火尘鼻端那受富贵熏手探囊方皆术神袖出荐纸生烟云兕觥只酌春酒醇衣佩更取秋兰纫民居安安鸿鴈宾吏胆帖帖乌鸢驯王母之桃庄生椿宁如洙泗一字仁愿言福星当紫宸光照邻女长无贫

送李伯勇分教阆州

明王不兴威风衰直笔无传老麟死春秋大谊炳如日读者昏昏视为史濂溪之後伊川程文字虽少源流真抉开珞藏得胡子一洗纸上千秋尘伯兮有勇弗可遏高阁诸儒祖河洛羣玉洞见标月指衆醉醒闻候风铎当年进书一布衣能取天上清名归秋澄讲幄玉色动春拂祕馆芸香霏红尘不踏东华路緑绮还携阆风去舟行若上离堆山莫把鲁公雄文劲笔埋没苍苔间

瑞麦歌

爰采麦矣岷之阳麦秀蘄兮登我场岐岐而生自天产两两而并维星祥我行其野逢鄮长鄮长忻然持穗往自言此穗实秀时六稻俱垂惟麦仰晋之四稷唐六岐虽有其物无其时我君圣武绥万邦我侯骏德为藩维君臣尧舜禹十风五日雨干戈偃息将兆和拍手齐唱崆峒歌

同程季予游李园和张仁溥

顽云不雨风称雄扫花晚坐蓬莱宫幅巾野服才相逢华茵解下金线絨人道青田双鹤平輿二龙笑揖羣彦时一中百寮之山直丛丛回廊窈窕庭陰浓园禽语变春事空水花色静天机融归来笑傲掀短篷溪澄月白闻笙鸿

赋半斋送张清卿分教嘉定

斗城将军半段枪汉宫美人半额粧碧眼禅僧坐空室花雨半床云半窗道如大路皆可遵不间不界难为人卓哉圣人门犹惜二三子冉求只向中道画季路仅及升堂止穷山必到嵩华颠穷水必极崑仑源若非身心实造诣未免口耳空啾喧子归试取羣书读饱秣吾驹饭吾仆却将全体为渠说荡出峨眉半轮月

八月十四夜神泉官满再别同官

有客有客白其马日倚垂杨问行者式微式微胡不归未归满耳闻别诗断弦再续情绪恶别酒重稔味如蜡袖中虽有金错刀满镜愁云莫能割是时月露秋平分庭前唤月月不膺就令唤得山头月照我离筵越愁絶陶靖节潘安仁种秫满畦花满城潘花陶酒總陈迹不如昭文氏之琴不鼓无亏成芭蕉漱漱连夜雨桂子纷纷落庭户旅鴈无俦顾影单明朝且向龙岩去

送毅夫总领淮西

莫沽金陵酒莫折金城柳但观二十四桥月夜夜凄凉照淮口孤壖不下兵转饥河水浅狭红贼窥就今秋高不饮马安得会有休兵时赤云烧空秋岸濶雨少潮低运沟涸莫从局外鑒全胜紧向碁心寻活着昨夜归来闻好语大儿踏歌小儿舞喜言边敌归故巢且省沿边转般苦边民之苦自古然其媪荷锄翁戍边老翁无力助王国但愿主圣羣公贤上卿奉使亦奇事肯为边氓劳抚字酒酣拂劒歌皇华柁楼红湿汀蓼花

新江行壽张宪亨泉

君不见尧时伯禹作司空应龙尾画江道通又不见秦时李冰作太守犀牛厌胜水晶走蜀江
开凿四万八千载二后英灵俨如在虽然陵谷有变迁水向东流不曾改西岷山南溷崖神营
化造如划开蜀人好恠漫弗省龙岂能智犀岂能禳蓄年来江塞崖据险水束三川激如箭阳
侯吸哦佛不灵黑蛎磨牙蚌吐焰五月尾六月头瓜蔓水退矾山水流中间青沫最湍驶风雨
瞬息能湛舟蛟人渊客弗敢睨而况商妇能无愁怀哉古人智如此胡不铲尽白险直使平如
洲使家河源来弭节青衣国横槎展拓万里天力浚江南障江北百夫荷锺千夫荷锄号召海
若同凿疏经营不越四弦望白练剪出澄江图轻轺晨兴亦劳苦绣烂衣明湿烟雨不惟佛滩
之耻可湔雪名与离堆传之万万古乃知天地间靡事不可为若鸟兽草木驱虎豹象犀藏冰
盼冰凌人掌出火内火烜氏司吾身代天事到手那得辞决川道海亦常理竈门老婢不惯骇
且疑好将新江水都为一洗之浮云空宝监净公之壽兮如江之永不妨桂棹木兰船陶写流
光入觴咏花泉有客空抱弦曾拊三叠逢胎僊寄诗孤云断鸿边

卷三

<集部,别集类,南宋建炎至德佑,鹤林集>

钦定四库全书

鹤林集卷三 宋 吴泳 撰五言律诗

和李宪使

关上青牛去林间白鹤归月函书味澹霜浸道根肥草树连生色鱼梁閤杀机晚年偏好易落处是麻衣比岁兵戈息山民幸有秋麦畦翻雨种瓜圃带霜收堦户夕熏鼠荷蓑晨饭牛使家廉到骨清议在锄耰春日成都寺桐华一院芳窻踈红卷跋焙煖雪吹香论事惟三代评诗宗晚唐开编疑未莹今欲扣山房

送杨子達入国学

鸾凤久束味贤关时一鸣子今观上国志岂为浮名母线丝丝直爷诗字字情别离非所惜回看锦衣荣

雪夜

云蒸黄野润月莹皓庭清夜静悄人迹溪流皆雪声帐吹灯彩暗炉扑火花明遥想鷄人误鸣歌报六更

霅溪舟中读唐人诗

大雅声才息骚人词竞兴语工终离道味泊祇如僧霜夜杜荀鹤秋风张季鹰抚编吟魄动飞雨洒船灯

冬至

闲居罕人事慵把历头开雷自地中复风从天未来綈緼初熟酒的皤未开梅道尽真光景尧夫好秀才

挽罗宗卿

晓月璿源澹春风璧水香一条冰透骨五色凤鸣岗翳彼菟裘老伤哉宝监亡囊封尚生意今与日争光

挽郑文昌

何代无豪杰惟公气独刚束身同绞紵遗训辟緇黄定力老逾壮英魂凛不忘蜀名省科调犹说郑文昌

别岁

故乡於此时酿熟岁猪肥骨董羹延客屠酥酒饷兕觥涂醉司命门贴画鍾馗多少伤怀事溪云带梦归

和制垣金泉山

昔日南充县卑栖枳棘鸾道根随境悟屐齿过桥寒梦觉松花白重来鹤顶丹僊翁梨枣熟亦欲傳修翰

小雪

卧病连三月起来几半人腕柔妨草圣目眩隔花神颓魄岂常望残芳不再晨徘徊盼庭树犹喜小阳春

壽李鴈湖

间气生贤喆斯文擅正宗味鸣直是凤时见恍犹龙信史传緇简元勲在鼎钟惟存霜後节景仰彼高松往在黄枢府璇题护两扉剪除当路棘纫补坐朝衣风急操舟济江空掷钓归年年湖上鴈旭旦望南飞起从通德里出守巽岩州上相先声到凶徒悍气柔鸿居新劳徕鸟户旧绸缪已筑沙堤路归欤赞大猷金碧苍岩下神光射斗箕豆灰浮琯後梅蘤破冰时正是生申日谁为壽卯诗今年真六一说与醉翁知

和晏子忠

天地肇开辟江山谁主盟岸深沙走白石秀水含清鱼自春来美猿虽晓不惊汀洲生杜若薄欲采其英每逢耆旧问夸说太平年橘柚三冬富荷花万顷聯断岩书姓氏胜迹已蹄筌羣盗方如蝟渠鞭恐着先我往才秋莫君来恰岁寒离鸿书落莫归马路平寬白社论心易文坛出手难近来诗思澁风雪立雕鞍

出关

晓带鷄星出春从鸟道餐雾漫旗彩坏霜落劒花寒天险今虽在人谋昔所难临关能虎眈一亮亢曹瞞

冬日

四时平似準冬日颇伤暄暖骤狂花坼霜轻野草繁林鸢饥跼水山鬼暗窥垣便拟悬车计无人为买园

霜朝

欸乃湖歌断珑 晚色归鹭翹窥水镜鸥冻泊垣衣密坐悬书帐清吟刮砚澌岁寒谁耐久独有翠兄知【唐人以竹为翠兄】

壽胡兴元三首

几代贞元会还生忠简孙清风拔薤本爱日护葵根疋马驰周道分公翰蜀门保安桥上路手涤瘴云昏皂盖开藩日黄河洗甲时柳陰承羽葆花气扑旌麾兵悍须柔止民暑莫胜之麦头如得雪来岁可休师耿耿三秋别悠悠四月余菊潭闻上壽梅驿急驰书簇藹红成阵骈筵翠曳裾封侯平四十前路尽寬舒

壽丞相庆七十五首

几代贞元会重逢上相生阅人冰监净遇事玉衡平日月黄扉永风尘紫逻清勋名兼壽考何必会耆英昨夜闻宣鎖虚皇注意深三师分汉制一尺泻商霖未白忧边髮仍丹报国心黄封留壽酒且把斗杓斟渤海兵戈静全淮版籍归红纁蚕蠶大紫擘蠨螋肥柳港添生色榆关閤杀机君王新御殿莫使諫书稀诞日逢今日新年胜故年良风宜望岁甲雨不妨田漶米多堪采京交渐直钱隆兴须再见人道鲁公贤自辟翹材馆才随数路求兰茗和露摘橘柚带霜收味适方调鼎装轻不驾舟有怀吟未尽独鹤远山头

和张周玉访别

白露下百草年光惊易徂邮亭人折柳别浦鴈衔芦社瓮应藏酒秋盘好斫鲈贤渠陶靖节晚岁觉迷涂

挽李寺丞

文献中原旧箕裘户部清官终一麾守事历五廷评挂壁琴无谱传家砚有名东风吹画翬溪上若为情

挽李郎中

少日声名伟中年学问腴气缘经事老形为爱民癯吭引朝阳凤魂惊古冢狐遗忠摠不尽英

爽射匡庐河洛辍微响朱张传古心世随人影落君向路头寻蔓草侵山径柔荑死树林良朋更能几百感集孤斟

挽青阳俞夫人

彼美宜家室之媛友瑟琴漆园歌未歇澧浦佩还沉懿范貽彤管佳铭得藁砧卧龙山下路风雨乱愁心

挽贵平大夫

介介汝谿叟青衫三十年澹如彭泽柳廉过石门泉漫仕曾无意遗文竟有传浮山读书处定跨玉蜍仙

挽王夫人

婉婉嫺诗画僮僮被典章有齐先祭洁薄澣展衣香唁卫心虽切伤周义不忘勉哉君子正彤管尚遗芳

挽郑夫人

淑行繇真履慈根自夙知性情诗调适内外礼维持春合青苹乱秋原白木悲只今哀窈窕手线授衣时

挽雍处士

折柳诗名远滋兰德本深挹禽能起孝训鲤只平心半夜酒星落千山薤露吟芭蕉溪上水呜咽不堪斟

挽游监簿

好汉三巴杰危言九陛忠王前留孟子国尔念周公日驭龙堆出天昏虎踞雄收声诸老尽铭有後谿翁昔上金泉去翁方玉局闲橘中春响甌壶里晓行山迢叟空扶杖坡仙不赐环每思生处所壮泪为公潜

五言长律诗

塞下

黄云连陇树红日下溪榆毡帐三千里蜂屯十万夫鲁刍肥廐马汉粟遗城狐虎馘空涵月犀

渠半网蛛游军声勃岑巡徼语咙胡柳脆藩篱薄桑乾塹垒孤突炎将及燕逋尾又侵乌曲引
梅花落謠闻小麦枯将军金腰褭轻侠绣螯弧十二营田利知谁上此图

壽安宣相

磊落堪輿气峥嵘社稷身地倾曾镇静天造要经纶仓首怀公辅中原仗老臣纶扬申命宠渥
照午桥新司马还辞洛汾阳再入秦乾坤重拆洗?县细缝纫汰击鲸波浊风清虎穴尘緑林戡
大盗紫逻息罢民魴尾喁喁活龙骧帖帖驯按行光弼垒斜岸武侯巾究宅歌鸿鴈参谋集凤
麟星营罗粲粲雷穀隐鳞鳞飞挽通关表耕屯集渭滨军容俄再色威令复重信烽火闲荆楚
尘沙卷劒岷马腾云陇月土饱雪山春来石非无杰平江亦有人誓功俱不再方德信谁邻弓
矢宜专晋钩膺遂锡申鹖衔凌井钺龙节压参神卫幙论功盛韦门送喜频河阳分镇日许国
授弓辰勲业当如此恩荣实迈伦一忠摩皜日二节贯苍旻绩伟官难报天高德最亲丹书名
澣澣黄色喜津津咸颂僖公柏谁言庄氏椿永为民立命长秉国之钧信作三朋壽都由一字
仁东归知不远香信已浮银

七言律诗

壬辰恭和御制闻喜宴诗

清问諄諄许尽言以书为辙道为轩监观万古知成法条析羣疑见大原櫻苑近颁天上句燕
杯新带雨边恩燃藜夜取云章读照乘骊珠炳若存

乙未恭和御制闻喜宴诗

圣学希天善牖民风霆鼓舞气如神转回姚姒文章古作起殷周礼乐新有限科名非究竟无
穷经术要纷纶事君自昔无他道不有其身是致身

谿亭春日

不必寻芳出远郊八分春尽属亭臯漫波緑皱一溪水暖日红蒸千树桃乌遶屋檐呈卦兆鹤
窥庭户听离骚静中识得生生意堂下蘼芜更不

春事无边着语难得逢佳处辄停骖河豚渐美夸梅十芳草如屏说柳三小韵作诗防跌宕浅
杯斟酒怕沉酣买山那得青钱在只欲花间结小庵

又和洪司令春日

房湖曾别苦吟身两度东风似一尘柳外游丝难系日麦边驯雉亦惊春玄都君子皆通贵栗
里先生只一贫珍重龙阳贤太守时将诗句恼陈人

送成都添倅李微之分韵得巫字

本住陵阳处士庐不妨名字落青都题舆带阁添新号抱史还山只故吾秀水稳宜眠夏簟惠泉香可煮秋菰劝君莫动骚人曲椰叶蘼花降女巫

湖亭酌王史君纪事并呈看花诸君子

红雨斑斑点嫩苔朱轮轧轧碾轻埃园公不作橘中隐康节肯从花外来莺啖树林添道韵鸥分江色献诗材篮舆便载春归去谁管酴醾芍药开

王巽堂三十年不到湖亭丙戌春再来非旧矣用前韵以俟後游

庭院深深鎖緑苔扫花无帚半尘埃红霞满树刘郎去青子垂枝杜牧来乍可放闲寛酒地不能随俗贮香材醉翁自有山间乐更取林霏手斫开

老将

一从十五长边城少见兵戈日太平代马依风都护道飞鸢熏雾伏波营红雕腊软君王赐青兕裘轻子女情昨夜点行新部曲铁衣偏奏苦寒声

永嘉鹿鸣宴

人间富贵易浮沈只有斯文无古今义理工夫元坦易圣贤言语不艰深莫随近世诸儒辙要识开山一祖心待得了他科举债梅花月下听瑶琴

和张亨泉宴鹿鸣

平生湖海独元龙门作丹梯倚太空还我蛾眉千顷月借渠羊角一帆风文随脚迹机难活学到源头理自通何代不生田表圣诸君切在敏前功

宣城鹿鸣宴

儒臣簪笔典州麾重为江山缉旧仪宴序古来元有礼鹿鸣废後更无诗科名到手还须耐文字当场莫好奇更尽工歌筵一曲明年春洒上林枝

至日示诸甥侄

莫风浩荡忽吹葭一室阳春病已差把酒认为天一水见梅题作玉真花燕常会族宁随俭祭则从先不尚华过此肥冬疆事静亦呼盘也早还家

题望湖亭

祥云宫殿半荒芜独有亭基下瞰湖水气淼茫吞八极地形磬礴跨三吴一轮红日射铜阙数点青山浮玉壶欲问湖边诸澳长长洲盗贼已平无

和季永弟赋袁尊固海棠

洛阳牡丹蜀海棠方谓之花余皆草木也唐郑谷於浣花谿上罗村路边俱为海棠赋然谓子美无情为发扬又谓堪恨路长移不到则误矣重於锦官者即此诗也植於锦榭者即此本也月卿尊固曾侍先大参魏公帅蜀以其兄弟与红萼为乡人置酒高堂烧烛其下相与道花屋闲话慨流光之易失怅乐事之难追懽戚婴怀饮少辄醉後一日季永弟赋五十六言识之坐中诸贤赓和殆徧某辄续貂於其後

麝薰声中气序过谿头燕子又归窠清涵夜色花无睡翠洗晨粧脸半酡红萼尚怀乡国旧锦心空抱客愁多饮酣乐极翻成感泪湿臙脂雪满坡

张仁溥寄游沧浪诗用韵一首非为沧浪作也

卉木萋萋二月寒杏垂红雨涕浪浪无司花女太幽絕有索酒郎多醉狂弄影莫陪张子野断肠空忆贺横塘春来亦欲寻诗社却怕诗工与道妨

读黄子实诗卷

香山居士读张文昌诗编以乐府词为工雪堂老僊读孟东野诗祇爱铜斗歌为近古昔之以诗名世者盖不尽好也子实以诗卷托同幕转似一编之中粲莫可耘而其闲游有云賸攜尊酒斟蓝尾惜不杯羹荐墨头则属辞之工也题丰都云履痕莫辨陰王迹敢去多题汉晋年则致趣之远也十二峯下月穿篷席罽风轧舵牙声巴东县旅梦难安枕村酤不满瓶则混之晚唐集中莫辨也某既不能徧和亦岂可无以奉答珍贖辄书五十六言於其後命之曰读黄子实诗卷

唐人漫自说金华山谷云孙自当家玄色酿成真一酒别机织出象生花缅怀友义留巫峡难割闺情下汉嘉看彻一编酬未得夜深窻月净笼纱

壽李鴈湖

当年指李记生辰柱史疑为法报身鱼鸟泳飞南阁晓风花经纬石林春手繙万轴谈无底曾着千年汲愈新试看乔松霜雪後凜然一节照时人

自卷朝衣濯鴈湖勲名籍籍在黄枢时闻走卒称司马犹有羣儿问大苏赴陇尺书驰鹤板起

家万石绾麟符宵衣炯炯思黄髮正藉元勲出手扶

汹汹风涛卒未清便提小队按行营一言刑省朝歌盗单骑恩怀渤海兵丰德自应通緑籍长年何必饭黄精劝公剩压兰英酒为作涪川小太平

身驾青牛老子车行云来去自纾徐精神健好充黄野骨法清真贯玉庐六十二年康节咏五千余卷玉川书石林莫作盘居计黄纸看看又诏除

壽范漕

粲粲桐花昨夜风吹香还到鹿园中前生出处黄山谷後代风流范蜀公洒落一襟涵霁月精神满面贯晴虹直须整顿坤维了归侍祥云一朵红

自从绣纓解麒麟一片忠诚只为民涪水竹枝秋送客汉嘉火树夜迎神玄蜂赤螳三垂静白黍黄鸡万井春尽使蜀人翻覆看皇华礼乐只如新

伏波老子缚长虬典护兰闱更两秋学问只从苗脉看辞章不向语言求俱称脚迹门生好无复顔行执事羞夹袋中间富人物更须为国贡琳球

福星一点夜堂深藻泮花泉共照临歌咏春风曾点瑟体当生意宓君琴乔松已作参天色寸草犹持报主心但翼斯文扶壽脉年年一穗熟犀沉

客中和程丞相雪

萧萧客岁澹如家耿耿青灯冻不花窓外晓添梅意韵田间春透麦精华书来颇复怀归鴈杯散何繇覓画蛇明日雪晴乡社去辛盘随俗点春茶

和杜枢密雪

紫宸朝动鸡人唱一片天光接绦河花樣绣鞦冲晓去囊铺球路带春多边无疋马比宁地土有遗蝗奈冻何繁重玉龙犹未老莫将图画写披蓑

一自金銮陡下坡更无津可问明河云蒸黄野风寒薄雪皎皓庭幽思多高艳未能攀屈宋寒灰聊复拨陰何聚星堂上如相问竟日长鑱对短蓑

和赵西里赋雪

谬守无奇只靠天一编周易一炉烟抽毫难出相如右覓句敢居灵运前酒酌山羊方餞腊龠鸣土鼓又祈年何时独放扁舟往淡月西村古柳边

和张仁溥赋雪

北风声熄南山微谁息风雅呼於时歌黄三章未纯古叙白一段空爱奇台高皆美雨花落檐短独愁冰柱垂墨客如林笔如塚莫於诗上更题诗

清晓踏雪送季武博

送客陵阳第一峯临分莫遏顺帆风人行水驿梅花外诗在昭亭雪界中破屋但留黄蘖老高风难覓紫芝翁【寺有黄蘖禅师像山有周紫芝诗】笋舆访别惊回首无数寒鸦点碧空嘉熙丁酉七月上泮游大涤题住山龚冲妙良泓轩

旧与清泉白石盟身闲方作洞霄行青山延客元无锁碧涧流花似有情古洞欲随仙隐去高冈终待凤来鸣道人唤我松间饮坐拂寒云月未生

卷四

钦定四库全书

鹤林集卷四 宋 吴泳 撰七言律诗

壽张亨泉提刑三首

莲花峯下发源深
胷次淳涵几古今
事苟及民须着手
文非为道不关心
扶持世界归儒效
转斡天机自笔箴
主静工夫人不识
火阳五月正根陰

二年烟雨汉臯亭
玉节西来照雪明
慷慨报君浑是胆
驰驱将母莫非诚
稻禾水足青畴润
烽火宵闲紫逻清
鸾凤莫将鹰隼看
及时须为国家鸣

末学纷纷竞为人
公能康济自家身
形躯元备人间世
肝肺尽收天下春
观我自应知爱重
识心须会起经纶
壽觥难着皇华语
抱取峨眉月半轮

壽崔侍郎三首

天开碧落洗云扉
暂辍僊郎下紫微
独有素琴随从橐
更无侍史护朝衣
霜清潦淨荣名薄
枣熟花香道力肥
列炬照空还岁晚
明年仍傍火城归

胷次知蟠几监书
事随天理只平铺
来从京兆德星社
揽取西峨明月湖
民岂无衣须补绽
极元有柱要撑扶
欲知天授西平意
绣?临戎为万夫

小队元戎未弭旌
羣飞鹤鴈已充庭
【富郑公生母梦旗鹤降庭】
只缘匹马修途健
唤起三刀昨梦醒
【崔帅曾梦入蜀】
犀塵自挥坤?静
鲸风不涨海波停
牛头袞袞春无际
捻出三诗壽蜀星

壽周提刑二首

分得濂溪一派清
皇皇仁义不贪名
金华学道行持到
禹穴题輿去就轻
一节以趋何简易
十年不调转光明
匡时富有经纶在
若木华边缓轡行

自乞银符守汉嘉
就持汉节问梅花
庭扉讼少闲徽棘
堰水流多沍麻论
击回邪抵触角化
销强暴鼠无牙更
看植杖扶犁叟清
议依前说使家

壽史石泉二首

曾次玻瓈湛不摇高风炯炯揭水条崑墟已浔南轩????蜀贡犹传北斗杓问学有源天一水文
章无尽海门潮三滩五渡多人物难得公家月指标

露洗秋容一片清远山高与雪争明贤侯元是岳神降上相先从佛腊生画戟不妨当燕寝白
囊无复到鸡城新来连日西郊雨还作山间小太平

壽某翁

当日麻衣抑未猜贵公元自有僊材文辞敏妙真星魄学问沈潜是圣胎黄石授兵非有意红
旗破贼却归来阿同且共玻瓈饮源上桃花想未开

壽范洁斋

合下金相气质浑更参诸老徧宗门箕山再得顏回媚荣国还生孔子孙学问不趋岐路径文
章祇好古壘尊至今尚得诗书力一气清明中夜存

青袍朝士走红尘公独纫兰结佩绅不事王侯嫌炙手岂除御史更呈身寒花秋後看名节乔
木霜中见本真吾道天寬连地大羊沟那得系麒麟

泸水风涛七载还今年赢得在家山临流领客清溪上滴露抄书翠竹间晚计作堂应未晚闲
居成赋恐难闲云昏八表边烽息须得伊人护玉关

忆昨薰风会面时犹龙老子亶冲夷忠文晚节三年过上相生辰十日迟内景两篇时点检中
庸一卷晓行持朝来泮水鶡音好目注西山拟壽时

送洪司令

经年分月伴西清又佐戎钲勇北征下马必能书檄草从军元是擅诗名熙丰作俑能无过元
佑操舟却要平局面既新棊势别消详专在幕中评

夏日曾随别驾归朔风还作送公诗行军司马自文采祭酒诸生亡崛奇国事急忙中着手边
筹闲暇处开眉嘉陵想已波涛落风雨无忘泊岸时

送梁漕东归

四年一节蜀山间父子重来世所艰镜月澄心寒吏胆条冰濯魄映儒冠孤清自古知谁似遗
爱于今愈耐看归去光明嬴一着笑渠袖手直旁观

皎皎从来世不容平平未足与言功介言西事何妨谪洵着权书竟是忠祗为边民忧自北卷

将吾道载而东分明自有天知己趣檄行看骑火红

和张周玉峨眉山行

搯筇更上最高峯浮出修眉翠扫空雪汁半消岩路口苔衣倒挂树林中异禽语已非人世香
草名应系国风晚色渐侵衣袂冷恍疑身在蕊珠宫

出郊怀汪尚中代简

一春烟雨尽愁端晴日郊行尚怕寒芳草被堤风信过杂英满甸雪泥乾刘郎去後花无恙杜
牧来迟春渐阑明日为君开社瓮莫教人倚玉栏看

和虞沧江饯腊观梅

买断江天不用除弦琴觴咏乐无涯年深屡见巢添鹤春到还知未放花时有诗情窥洛社断
无书尺到京华面前杨柳风来处豪岸依然属富家

饯岁江梅老树边每逢佳处辄犁然吟风弄月成劳绩种药移花当质迂心事细评无此日春
风长健有明年更期人日连头去酬此青苹木末天

和韵谢惠提干约观梅不赴

才看花回晚日明停杯不饮槃空横羨君洒落方成趣笑我虺隤不及盟但向舍南窻北看浑
如林下水边清自来太素先羣物枉被山矾唤作兄

宣城劝农

一分东作五分春相汝耕夫更在勤七月诗成种田法庶人章作劝农文祈蚕必使蚕如瓮卜
稼须观稼似云老守别无新治行只将丰岁答吾君

永嘉劝农归舟中

使君每爱读豳诗稼事艰难亦粗知水冻未闻秧布野年饥且喜麦生岐坐间白叟真堪贵眼
底朱衣总是痴趣刺画船呼客语春风已满劝农旗

赠乡僧祖元

僧祖元本里中秀才厌世事尘劳翻然出家因游鴈峰遂断一指誓不复还乡人目之为一指
头禅盖讥笑之也自後南行学益长又有能诗声予爱其勇猛精进漫作数语挑之

挑包不住鴈边峰万里来参琰澗翁刀割万缘随指断镜磨诸漏着身空不从贝叶鑽陈迹只向蒲团下钝工结习依然销未尽有时诗语学琴聪

壽邹都大

石虹缭绕气如云中有胎僊字卯神大宅寬平春满面一条莹彻玉为人细看火後交梨熟不及霜中硕果新六十二年无一事尧夫端的是前身

易言来复甚昭昭须识陰阳动静交乾德衆贤当首画建炎诸老得中爻水波已动龙难蛰时运方清风合巢会得生生无尽意不须詹尹揲琼茅

梅花又是隔年看节节光明雪照山赤螳玄蜂边徼外黄鸡白黍野田间鹄头久已书丹版燕额仍须护玉关独有檀沈烟一稊明年还遶属车斑

嶰竹吹香子气分苍苍有意瑞斯文已从嵩岳生申伯复向西山壽卯君鲐背自宜当职任虎头曾已策功勲壶中日月春长在且试犀沈一瓣薰

端平改元阳月同弟某自南山过龙井山僧饶舌话辩才近事且以某兄弟为坡颖当有所识因赋

一百年前老辩才复褰绦带下山来松杉溜雨惊龙起篁竹生风唤鹤回戒行净通林水观语言香落宝花台更看坡颖留诗处月堕山空眼豁开

宣城宴六县宰

本是词林翰墨臣诏书特遣牧宣城使君只办平平政令尹无要赫赫名犹苟得情须近恕财如足用莫求赢荻花风起江防急秋阅应令弩手精

寄题蒋湾效尧夫体

刚把西湖卖与邻卜园新得蒋湾春半荒亭树景偏老欲压溪桥花更真漫赋莫教诗过好浅斟时要酒轻醇若能会得闲中趣便是羲皇向上人

送范仁叟解褐西归并简定叟

子馆於予恰九春临分更欲问云津良心易放当持敬精义无穷要汲新刍狗科名应是梦貂蝉宦业竟成尘世间公议难磨灭第一还须作好人

壽安宣相

晶然老子本冲夷起为苍生护北陲边吏皆能问司马市人曾不识安期拊摩鲐背应耆艾舒卷龙韬自崛奇九老图中张白後合添同甲一篇诗

梅花又是隔年看节节光明雪照山百万虎貔?劒外三千騾牝寸田间鹤头捧诏从天陞鸡舌含香趣晓班富有春秋洪愿力宅家那得放公闲

上谓无官可报卿延登左棘倍恩荣勲存社稷身俱泰志在生灵物转轻平蜀以前谁磊落渡江而後独光明蚤令不作湘潭梦料得中原已扫清

文俗诸儒恋局中何曾度外看英雄连鸡纵不能资夏捕鹿何妨暂掎戎静抚时机渔者得遥观敌运兽之穷书生準拟浯溪石明写中兴第一功

用韵谢帅机惠春盘

梅柳陰中漫寄家闲如翠鴒立晴沙瘦藤罇内抄松子行玉盘中?蕨芽犹有乡风餐白啖更无春梦草黄麻郊行莫待芳菲月花未开时好看花

再用韵呈帅机就寄仁溥

少学东坡颇爱奇夜抄灯疏爇松脂老随年度几弦瑟愁怕月窥双鬓丝蚕市已非吾故国菜园犹得子新诗闲人不管东风鬧麦饭枯鱼着顿炊

病中有怀

二年多病少佳怀酒落杯中见影猜青女降霜溪屋冷白姑记日命宫灾柳州解崇崇频作孙子逐店店转来就使新春年运吉钝庚难拨马头开

洪都病中口占

去年輿疾上洪州百感婴怀又怕秋病体不因衰後觉宦情谁向死前休乞身已晚荒三径葬子无期负一丘造物傥从心所欲乐天知命更何求

送洪司令赴阙

曾记嘉陵共舫舟江风又是荻花秋三年长别不一见十事欲言还九休頼聘交驰淮水浊行程不定陇云愁凤鸣已向朝阳去飞雨残霞湿柁楼

寒食

芳树啼莺絮乱飞疾风吹雨送愁归梨花落莫还乡梦麦粥凄凉展墓仪倦客忍听谿上曲游人犹习水边嬉西瞻太白家何在拟托征鸿寄我衣

黄漕祠堂

古谊寥寥千载间却从宾主得窥斑道同元不分穷达礼重何妨尚往还拄杖过桥声易识壁纱笼墨句难攀篝灯试取丰碑读名压三犀石更顽

径山留赠无準

十载京华少得闲兹游浑似梦中山僧行古道元无径云掩重扉更不关夜语浓时花簇簇禅机漏处月湾湾东坡妙喜无人识往往神游在世间

试院和李湛谿韵

呵叱星辰赋远游更提水镜着中流读书有眼月千里爱士无方春九州论及养生浑是道时因主试却关愁武夷不作逢溪老亦欲临风助击鸥

沔州和李长孺

朔风吹雨湿征衣卿月西昇伴紫微出塞未经榆眼白宿师先喜麦头肥宝刀尚可屠龙去锦字何缘寄鴈归犹学骚人工索句品题香草咏菲菲

和洪舜俞太一宫韵

祠事归来夜向晨仰瞻天宇肃无尘鉶搗金井辘轳晓钟撼茅山幡影春傍水且栽梅半树扫檐莫使雪横陈栢台近日清无酒赢得吟诗分外新

谢尊固送茶

闲居早是宾俦寡有弟山行访鸟窠黄卷渐成迓叟僻朱颜不似美人酤诗因怕事吟偏少酒为看花饮辄多珍重山园芳茗饒犹胜乡国赵家坡

春寒病痞痛用古砭法以砖熨之忽一夕帐烟塞满火自下炎上焚衣被之半有感赋之

怕寒不暇解衣眠偪塞蒸成帐顶烟学士砖头因火灼尚书履下透衾然洞存玉性真刚汉焚却禅身笑浪僊收斂道心中夜坐室虚窻白月如弦

挽李寺丞

世人谈利析锱铢汲义如君此道孤无地起楼怜寇老有园和契遗尧夫西山别後常怀子东国归来已弃子自昔祖风高挂剑愧无佳语润黄垆

和洪司令九日观阅

猎猎西风九月寒元戎缓带抚斋坛士腰弓箭翻云去人拥旌旄夹道看振旅阵酣金柝静从军诗落玉蜍乾南山不谓无嘉节深惜诸贤玩燕安

劒花弓月几秋寒宿将凋零更不坛师衆弗於先事戒蒐田祇作具文看戍还黎雅魂方定箭洗褒斜血未乾为报道傍泥饮者尹来遗汝百年安

五言絕句

用晦翁十梅诗韵酬张伯修孙子直

幽人履贞吉采藻南涧滨所采一物微所思万物春柳丝不禁梳桃毳不耐雪梅残剪春绡永日霏不絕椒櫨充佩帙孤芳处幽絕当年老虬枝岂为风雨折最後黄香根纖裳粲黄里能以色事人空博一时喜看花须看神折花莫折残但使花骨清岂畏花地寒老瓦莫厌麓奚童莫嫌小及时不为乐顷刻芳事了圣涯浩无边人乃揭其浅安知舍瑟中道味益深远浮名镜边尘骄气炉上雪年来如木鷄我肱已三折书消燕日长棊遣花院寂何羨山人餐霞拾橡实为花能工诗不如赋拙赋珍重春陵翁能寻所乐处

七言絕句

果山春郊即事七首

晴岚扑扑染人衣酥意溶溶接岸陞春事平铺都放着不应祇认小桃枝

梅事忽忽半雨残李粧羞澁尚春寒人情只道花时好花未开时正耐看

野寺藏春不一奇静机还有动机随幽寻往往行终日未信东风属酒旗

花含别墅无边思水放长渠自在流别是一般闲富贵田家那肯让公侯

檐花夜落晓还晴应为农祥一展颺慙愧青裙南亩妇犁头能得几多春

官事无穷类海潮寸肠忍使自煎炮橐駝种树安心法且并闲功子细抄

酒灯棊雨忆昏黄那得佳朋话此肠豪气已随烟柳折未能除得作诗狂

郾县春日吟

去年春日百花斑今岁逢春万竹间花靚竹香宜细看春风不会一朝闲
无穷官事日装怀甫及芳时略放开骚?编排诗社去酪奴勾管醉乡来
後霜庭草芳犹茁承露林花翠欲欹体认乾元何处是初春天气早晨时
雨脚垂垂未肯休舍东流满舍西流八分春种胚胎了新水才来便彻头
不寒不暖杏花天争看蚕丛古寺边旧日尚留耕雨具新年难得买花钱
树桑五亩育鸡豚器用匏尊老瓦盆旧礼诸儒都坏尽西家却有典型存
暖暖人村翠树连鷖拖野色度晴川新诗无限来供眼才涉思量又不圆
醉骑花影少年间谑弄风光古将坛渐觉年来无补益祇将春贮在脾肝
素丝五緘咏羔羊且是公余燕日长黄你味甘逢孔圣黑甜睡美谒羲皇
旧谷才登幼妇场新蚕复出小姑忙书生却弄闲针线枉学明河织女襄
和洪司令梅花

结绮临春贮丽华吹香偶到野人家霜明月白纱窗净但见梅诗不见花
杼云新卷雪泥乾剪剪轻风薄薄寒莫遣水龙吹别调放教春在玉栏干
和虞沧江赋梅

素肌香骨水为寒曲树斜枝木作酸百匝遶花看未足庭空参斗夜阑干
衣分水洁佩琼瑰笑斂溪头月下杯岁晏得朋真乐在不须青女作行媒
青蒲翠草望秋零乱絮迷春困不醒林下水边时一见对人应是眼中青
每对梅花辄解顔瑶林孤絶迴难攀拟将和靖横枝句掬入离骚大小山
吟成亟取夜钟敲淡月笼窗昏晓交真态莫将形色看当如相马得蒲梢

万山春到直丛丛谁省东皇有化功
生意溶溶呈露处看随葵麦荡摇风
不御铅华别是花丰神高洁自成家
含章不解春风意犹倚残粧隔绡纱
交花煜煜露生香一味清来浣我肠
文字语言今落去聊吹别调作醒狂

安西马

月脇霜飞镜夹瞳龙媒扫尽朔庭空
沙丘尚有真骊牡端自方臯一顾中

蜡梅

若得西湖处士疑如何顔色到鹅儿
清香全与江梅似只欠横斜照水枝

登罗浮山

要闲终是不曾闲猛歇当头名利关
揩洗一双清浄眼稻花雨里看浮山
海山半夜失蓬莱微带云根雨脚来
元是道家清絶境世间妄指作阳台
玉蟾奔月竈炉乾老鹤巢松殿宇寒
里面看山山不见不如只向外边看

琵琶

锦调巴音祗四弦倚门空抱向谁怜
主人一自知音後传入王孙绮玳筵

桂

团团玉叶振天芳清澈琼楼午夜光
元是小山分种去移来西蜀作甘棠

玉川茶

一旗初试蜀山春团鑊谁论蔡与丁
更出苦言浇谏味世间醉梦合俱醒

病中宿白水

触热山行陡顿余急携拄杖息禅居
老僧不惜山中宝持出银函贝叶书

中峯

连空阁道结飞霞
衲子云游少住家
问讯两仙呼不应
鸟啼惊落一岩花

和张宪登乌尤山

燕台爱士拔其尤
彻去藩篱客与骄
藻翰宿春题品徧
青青无复土山焦

世涂偃仄动逢尤
山似高人色颇骄
寸碧亭亭还緑遶
知音不待?桐焦

放怀物外亦何尤
便谓游遨士也骄
西日下来崑际宿
别尊难啗嚼皆焦

子知天分不人尤
岂若纷纷式屡骄
旧见已知霜叶脱
新知才似谷牙焦

天戈何日戮蚩尤
省得营屯戍卒骄
事会无穷人物眇
坳杯莫救釜中焦

椒丘徐步不离尤
结驷朱门易养骄
宁似木鷄甘用拙
弗如龟策以灵焦

和观碁

七雄虎鬪着难下
三季蛭蟠石不磨
蚩触纷纷无了日
青秧白水弄?柯

华严寺

才上华严第一山
倚天双阙不曾关
白花紫栢漫山路
犹觉桃源在世间

上峯顶

一峯骆驼岭突兀
万级胡孙梯屈盘
佛法岂无平易处
怕人只作等闲看

光相寺

云气巃嵒羃晓山
晴曦倒影射阑干
须臾变态还空寂
水接天光一片寒

牛心寺

青莲两两照山开
道是金僊手自栽
人与金牛俱不见
更从何处覓心来

和李鴈湖晚春即事八首

琴书澹泊古羲轩
花木幽闲汉绮园
碧落青嵩无用买
湖光一曲道真浑

纷纷花片落车茵点点苔钱衬屐痕造化生机浑不尽又将新绿转春温
蔼蔼停云八表昏终风吹雨泊天门系船东港缘壕去落日牛羊下远村
避人不必武陵源荡有芙蓉谿有荪弄水浇花心自远何妨酌客两三尊
长鲸须向海波翻泽雉何由肯畜樊步障连空鞋一屋不如萧散半山园
丰神玉雪更清温胷次涵濡七泽吞闻道晚年偏好易手探月窟足天根
庭草如茵鹿养茸体当生意属僊翁游龙不作千岩雨却卷云根向洞中
杏花漠漠柳阴阴髣髴前年礼殿深赖有诗书缘不尽青灯细雨短长吟

卷五

<集部,别集类,南宋建炎至德佑,鹤林集>

钦定四库全书

鹤林集卷五 宋 吴泳 撰内制

明堂奏告祝文

天地

伏以丕厘景命奄宅嘉师惟泰元尊每荷溥临之赐其坤道顺实资敏植之恩用涓万宝告成之时爰秩九筵合祭之礼率由彝典敢告前期

宗庙

伏以获承洪绪宏济多艰爰熙紫坛练时卜日於穆清庙尊祖敬宗祇率彝章预伸洁告

社稷

伏以古者载芟而祈良耜而报各以歌乐告於神明矧当祭祀之秋宜致恭先之荐

太乙

伏以明堂度九尺之筵靡神不举太乙开入通之道降福孔夷用卜季辛敢伸昭告

天庆观报恩观

伏以天无声无臭惟道可凭祭有报有祈以时为大顾慙菲薄获奉粢盛坛於丙地之阳卜以辛日之荐尚祈昭鉴相我熙成

诸陵攢宫

伏以将祀世室载瞻崇丘未陈牺牲珪币之恭先致祖考神祇之告尚祈来格以相熙成

四渎五岳四海

伏以昭於天地方严陟配之文望于山川具有秩祭之典季辛穆卜先申告忱

岳渎海路通去处

伏以明堂孔阳方议合祠之典宗伯辨位乃陈四望之仪秩於山川沿于江海靡神不举先事告忱

迁神主

伏以爰熙紫坛聿严禋祀於穆清庙式谨缮修庀工方新奉主有恪用涓吉日?告明神

明堂赦文

朕嗣宅丕后保綏受民上帝临汝无贰尔心敢不尽灵承之事先王惟时懋敬厥德未尝忘裸飧之忱每夙夜以惟勤庶神天之克典顾德不类遭时多艰兵氛未澄星纪弗静京畿邦之根本而淫雨害于粢盛汉岷国之咽喉而蠹贼摇我边鄙战士被介冑不得卧丁夫罢转饷不得休瘼兹下民靡所宁宇念天地以好生为德徧覆包含而无殊而祖宗以兼爱为仁聪明神武而不杀岂亲接三才之奥亡哀矜庶狱之心盖尝以干戈省厥躬以袞象救其政虽承宇之霏开霁未还时和岁稔之风虽侵疆之骑倏回宁保地净水寒之日若匪吁苍旻而洁告其何措方夏於阜安爰刺六经之文更规五室之制有秩礼罔有严颂堂奉牲以告不在牲而在民力之普存更币以祈不惟币而惟国用之均节凭至诚之洞属荐明德之馨香於是登彝闋宫奠璧清庙夙驾斋辂亲祠总章袞龙作绘而五采施鍤玉鸣诗而九歌应多士显相陟降在庭百工佂从左右厥辟瞻和气之薰浹俨神光之陆离岂惟钟喤喤筦鏘鏘如见旗容容骑沓沓盖上天日监王者之处曾咫尺之不违而庶民是近天子之光宜始终之若保既荷灵嫫之来燕岂应餽惠之不均乃御端闈式盼大号嘉与函生之衆共迎景贶之新於戏崇周官九尺之筵精意已通於肸鬯肆吕命五刑之赦湛恩斯徧於埏垓尚赖奋庸亮采之臣秉德陪祠之彦烈文羣辟孔武六师永肩励翼之忠宏济丕平之业

明堂册文

景灵宫

明明我祖道峻於天濯濯厥灵其基明辟犹木有本犹水有源肆台小子既受帝祉季秋之月宗祀明堂其日用辛工祝致告丕厘景命於万斯年

太庙

於穆清庙世有哲王德厚流光必百世祀台恐德弗类遏前人光是用孝飧入太室裸洞洞属属苾苾芬芬来燕来宁俾缉熙於纯嘏

昊天上帝

倬彼昊天皇矣上帝亲德飨道监观四方施予冲子绥受兹命服大裘而冕祀乎明堂高高在上无日不显以祈福祥以弭灾兵乂我受民永寅念于祀

皇地祇

惟王建国掌邦地祇瘞埋泰圻有册有典今冲子嗣主名山川相其陰阳居明堂左个礼以黄琮祀用黝牲土谷惟修庶草蕃庀万邦咸休敬拜下土之灵

太祖皇帝

天作之君神武不杀肇造区夏启迪後人以予小子夙夜毖祀是用大飨帝度九尺之筵筮豆静嘉牲牷肥腍格于艺祖克配彼天永言孝思无坠宝命

太宗

天造草昧文王康之始基矣嗣武受之耆定尔功布昭圣武天下为一百世不迁今文子文孙敬宗尊祖我将我享王者之堂洁尔牛羊与其黍稷神保是格日靖四方

明堂礼成奏谢

景灵宫万壽观会圣宫太乙宫

伏以祇奉瑄玉肃临坛垓考妣庭肆类之文崇姬室九筵之制列圣降祉三神蕃厘岂凉德之克堪实上皇之显相用伸昭报庶永延休【太乙宫改上皇作上灵字】

诸陵攢宫

伏以迪循彝典寅祀总章上帝时歆垂恩若风雨而下百神既飨降福如冈陵之增载瞻桥山实迓秦望爰遣明馨之荐以将昭报之忱尚赫厥灵垂裕乃後

五岳二海四渎

伏以大飨合宫沆成熙事祀于天地既荷博临望于山川敢迟昭报尚冀威灵之假允臻福祿之来

诸陵

伏以总章沆祀熙事告成事天之明坚一忱而罔闲衰时之对与万国以咸休荷烈祖之顾歆瞻崇丘而控谢

南海南渎南岳

伏以顷者宗祀徧于羣神乔岳之灵沧海之漚相予熙事永臻厥成神之格思敢不昭报

南镇会稽山

节彼南山维禹甸之顷以牺牲祀于阳馆既荷帝祉神来宴娯熙事备成敢忘昭报

改元诸陵奏告

伏以创业垂统烈祖之休继天奉元一王之法合两朝之懿榘更首岁之嘉名载瞻崇丘用伸洁告

孝宗皇帝修换?宫文

奉先思孝瞻彼上宫揆日庀工动乎下土敢告于庙以宁其神

光宗皇帝修换?宫文

伏以菑庙之严明神所宅陰虬阳马岁月久深松桷旅楹风雨侵蚀属庀工而揆日敢移御以告安

宁宗皇帝?宫文

伏以景彼崇丘恤其閼宇龙輶既远虬柱斯倾属鸠僦功敢告移御

昭慈圣献皇后等奉安神御文

伏以柏宫恤净历岁月已深松桷延长为风雨所薄既竣徒役复妥灵旂

恭圣攢殿修整奏告文

伏以菑庙之严风雨所薄旅楹倾剥涓日缮修顾瞻慈灵不敢不告

恭淑皇后修整攢宫殿文

伏以慈灵在天邃殿於穆其门有伉积岁不修涓日既良鸠工是告

外制

与芮除武康军节度使制

门下朕穆叙宗盟迪稽周典建之藩屏首推曾孙王发之仁分以旗旌爰锡孟侯弟封之宠粲亲亲之恩意肃暨暨之戎容扬于大庭诏尔羣辟具官某气韶质美德粹行恭蕴藉诗书进止必由其度沈潜学问奇袤不接於心旣登神京蔼有芳闻钱冠在列宛如青袍朝士之癯奉壁陪祠弗类赤社亲王之贵每阅起居之奏屡殫忠益之箴实毗皇家式壮宗翰朕方裂地以分诸镇即坛而拜元戎凡沾横草之功亦被建旗之命矧贵介弟非他人昆外虽欲得腹心爪牙之臣内岂可无骨肉本根之辅用是辍留台之务进而升将钺之坛鉅毂高幢奄宅洋川之澳真祠采食仍陪魏阙之班以光桐叶之封以广常华之覆於戏仁祖锡允良之节尚云宠不期骄孝宗彻伯圭之田犹曰卑以自牧盖相友睦者所以教诸侯之悌而胥训诲者所以示万世之公惟汝念闻则予以悻

贵谦除保康军节度使制

门下继世以立诸侯固王者尚贤之谊建旗以封同姓乃圣人笃近之仁矧予贵介之英维国宗孳之瑞涓辰授钺涣号扬庭具官某躬信厚之姿秉祗庸之德宿邸惟谨奉朝滋恭性雅好儒能嗣北海靖王之後日勤为善弗贪东平邑国之封重惟宁考之初元每笃沂王之深爱和快乐根於天性有常华韡韡之风锡与异於他人无杜叶菁菁之刺始畀之以斋坛之节复开之以青社之茅一时荣怀百代鲜俪盖自庆元至于嘉泰常宠数之便蕃兹繇宝庆迄于端平尚情文之希阔爰举建旌之典载疏友弟之恩爵尔上公信已孚於麟趾与之多邑班仍在於龙墀於戏汉启九国而交独好修唐册五王而宪尤谨度母游于逸然後可以保高位母居于贵然後可以全令名勉图淑声祇服先训

谢奕昌保宁军节度使制

门下周首二南之化所以着夫妇之经汉疏四姓之封所以袭衣冠之盛兹衍中闈之庆用推左戚之恩粤从廉车超授斋钺敷以明纶之告肃于会弁之瞻具官某柔嘉而明缜栗而润进止合威仪之制话言循德义之闲鸿渐周行蔼有淑均之誉退居私第恬无华竞之心径从文石之清换授武阶之峻为社稷卫属鞬黼座之南与宾客言束带紫宸之北虽多仪之济济常自牧以谦谦况保衡曾劬相於我家而太姒实助修於陰教久矣宫闈之正位方兹寢庙之告成桂栋斯芬既定毖祠之所禕衣有烂聿严归谒之仪岂於常棣之华不施葛覃之祉爰即金华之壤俾分葺纛之辉佚以琳宫丰之采邑於戏孝庙眷成肃之弟爵已列於横班宁皇褒恭圣之兄宠复隆於一品酌两朝之中典焕昭代之弥文往承于休益茂而戒

谢奕礼保康军节度使制

门下国风之系周南率本人伦之厚大雅之褒申伯实由寢庙之成倦我戚藩生於相闕爰出丝纶之宠并加节钺之崇卜以刚辰谕于列位具官某甚德而度大盈若冲温恭有韦布之风澹泊无绮襦之习嫺聯椒掖元侯之陰德尚存秀擢芝庭太傅之芳猷未远方晋登于华路乃

屈就于彝章径自郎闈式共武服东阁西阁之序秩视从班长君少君之贤人推世美朕方考先代已行之典修后家归谒之仪神祇安乐之已毕享静嘉之荐兄弟相好矣讵可无蕃锡之恩彻土上庸出节少府鹖衔绶带有严上将之坛鹤驭云轩乃奉真仙之馆爰晋盼於腴赋庸昭示於龙光於戏四姓之列爲小侯虽衣冠之代有二卿之称於鉅鹿常名誉之难全惟忠谨可以褫身惟勤俭可以保位往祇明训益茂淑声

郑清之加恩制

门下朕获执珪币恪恭神人畏天之威常若承祀齐明之日哀时之对敢忘在廷奔走之臣矧予元台式是百辟既与合宫之显相岂容餽惠之後施具官某俊德爽邦懿文纬国秉蹇蹇王臣之节持谦谦君子之心粤惟宁人遗我哲辅会六龙於潜跃之始盖不缘肖象而求作霖雨於蒼蔚之余曾不以片言而悟初辅端平之治庶跻元佑之风调娱万几政不寬而不猛收采衆善道无陂以无偏比因迅烈之灾力上退闲之请华之书殿賁以经帷虽云鼓枻以絕江犹冀朝宗之在望而况亲陪宗祀董正上仪合加进律之恩庸广受厘之意以开井赋以实畚租於戲衍以旧相居河阳尚侈大礼庆成之赐浩繇师臣侍经幄特疏明禋采邑之封盖不归福於朕者上之仁而能责难於君者臣之义尚宏鸿施益罄嘉猷

杨谷加恩制

门下朕聿祇旧章称秩宗祀使宰孔赐齐侯胙所以旌祭事之劳命召公彻申伯田所以隆采邑之宠式褒懿戚诞告羣工具官某质粹而外和量閎而中裕宝书在几居无华竞之风玉带趋朝动中折旋之度早疏荣於斋钺晚避宠於师垣身贵而心愈谦年高而行弥谨每怀恭圣之保佑常念母家之典刑兹以明禋俾共使事领内廷之卫辑虎士以无譁相中坛之仪粲貂冠而有耀既德馨之上达宜餽泽之下盼爰即旧封载陪新食於戲我将我享既能歛福锡庶民维戚维贤先以贺礼亲异姓有嘉耄老母用训词

师弥加恩制

门下明王分宝玉以展亲特厚戚贤之爱大宗执珪瓚而亚裸每崇祭祀之伦矧备享於明堂既相成於熙事合加徽数诞告治朝具官某属近而行尊年耆而德邵世縻高爵已疏白茅青社之荣班立长身颇称玉带金鱼之樣恪奉秀园之祀董司周室之盟肃然仪形藹有誉处属三载举亲祠之典而九筵严并侑之仪当輶路之初晴导驾已劳於扈从逮斋居之将雨历阶逾重於降陞四体有庄舒之容一毫无惰慢之气既辑涓成之庆式敷餽惠之休賁以爰田增之贞赋於戏作鲁公之册盖繇於入裸太室之余益东平之封实起於定义南郊之後尚绥素履以答灵娛

思正加恩制

门下周封同姓五十国义莫重於展亲汉召助祭九百人恩独隆於赐爵朕参稽旧典蒐举明

禮儀禮成而三神顧歆需澤下而四方丕享矧於仲父宜錫慶条具官某禋身有儀樂善无斁承諸姬之後不以富貴而驕人襲二獻之風頗能博雅而好古朱邱共推於賢譽青旌雙拥於節旄素嫺朝會之容克相祀禮之禮龍旗耳耳周旋乎法駕之間麟趾振振進退以先王之度迨揚烟之竣事廣餽惠以旌勞衍以爰田華其巨鎮於戲望祀不祈其福朕常懷畏威時保之心居寵必思其危爾其懋作德日休之戒更圖勵翼以答熙成

不擅加恩制

門下昔在成周厚於同姓命史佚作伯禽冊當太室既禋之時使石尚歸魯國牒在諸侯助祭之後矧秩肇禮之典實共相祀之班盍考彝章亟盼餽惠具官某溫恭而信厚閑雅而裕和藹有詩書之風泊无富貴之習文王之昭武王之穆循禮度於二南莊公之子周公之孫奉蒸嘗於百世自賜先王之履首陪重屋之祠結綰入齋能將洞屬之敬展軫從蹕不憚駿奔之勞熙事備成靈娛來燕既出濮園之胄宜均宣室之厘加以采田實其圭賦於戲飡帝而臣受職已昭明德之馨香篤親則民興仁宜溥湛恩之汪?綏而壽祉強我本支

謝奕昌加恩制

門下朕獲奉嘉牲瑄玉以歆上帝明神穆穆周筵儼諸侯之助祭煌煌漢殿偉四姓之侍祠既畢飡於合宮當疏榮於戚畹特敷制綍以諭朝倫具官某韻宇象賢氣姿竟爽一家詩禮雅有好修之稱奕叶簪纓泊无富貴之累身虽被渥云之澤門不停流水之車比因寢廟之成竝建雙旌之美恂恂德行每居大而能謙抑抑威儀常率履而不越有韜瑞節有秉介圭典領營屯恪共使事相我上儀之盛訖于熙禮之成歛福以錫庶民既廣十倫之澤賜級以勞伯舅仍加五等之封於戲先民有言君子所履思襲紫傳龜之所以盛鑑重侯累將之所以微往懋淑声永綏多祉

卷六

钦定四库全书

鹤林集卷六 宋 吴泳 撰

外制

善晷换授皇叔祖太子右监率府率制

勅具官某朕追惟沂邸诞正名称旣于宝玉之亲赍厥丝纶之宠尔肺腑亲也外庸久试合应褒迁擢居南内之班俾掌东宫之率益思励翼以对休光可

善晷授州防御使制

勅具官某濮王诸孙一迁官元丰成宪宗室十年一磨勘绍兴旧章尔安懿裔孙行尊属近虽至鼎贵蔼然癯儒奉朝既阅於十春戎使合跻於一秩往承异渥益远乃猷可

师谿授知南外宗正事制

勅周命司仪以大辑同姓展亲也汉置京师以纠察公族尚贤也盖敬不可不隆於上训不可不严于下此宗正之职所以辅人主之教化其重有如此欵具官某器远质茂属尊行高奉璧而朝进退不改其度分璜而处奇袞不接於心虽云公爵之既崇詎可祠庭之均佚仍将使节俾长宗盟经不云乎子率以正孰敢不正率正之道又自尔躬始其勉之哉可

希?授知南外宗正事制

勅国家西南两京置外宗正其来旧矣中兴渡江於温陵长乐各选其亲贤一人典司其事犹两京之旧也具官某赋姿谨恪制行淑均服诗书之勤进退弗改其度阅义理之熟纷华不流於心久燕祠庭之闲未符公族之望式资纠正咸俾训齐昔仲尼有言子率以正孰敢不正率正之道又自尔躬始其勉之哉可

希?可改知西外宗正事制

勅朕绍帝统绪思皇本支展亲以恩所以示推崇之典合族而教所以严纠正之官辍卿南班长我西外具官某以属则仲父以官则上公敬谨有仪多阅天下之理纷华不竞能读河间之书靖惟汉朝元始之间迄至我宋崇宁之际或选用德义以使之考察或精择才贤以俾之训齐勉思前猷钦服休命可

自明换授皇叔太子右内率府副率制

勅具官某宗子之换授南班自景佑始矧尔厚陵诸孙吴益二王之後福唐观察使多誉之子於朕则叔父也卓尔大雅藹於宗盟东宫率府之副朕何爱之而不以官汝耶时庸展亲往服休命可

希丞换授皇叔右监门卫大将军高州刺史提举佑神观免奉朝请制

勅具官某周封三叔而伯不获是分惟不尚年盖昭德也尔信厚世济温文性成於宗属为亲於荣邸为近於朕则父党也而克自抑畏不期侈骄既多淑声宜有异数於是以尔内领诸卫外牧方州佚以真祠免其朝请朕之展亲至矣敬服王命益懋乃庸可

希丞授蕲州防御使仍提举佑神观制

勅朕绍帝统绪思皇本支凡隶亲贤率跻尊显具官某出高明之胄履忧恂之德於属则近於文恭为兄於朕则父党也曩分遥刺既廩祠官今秩军防仍免朝请朕之所以待汝者亦厚矣汝其思禄位之难称念燕安之易怀庶於宗盟可永终誉可

希邇授【阙】军承宣使制

勅三载考绩三岁计吏施於在服厥有典彝独惟宗藩率十年一进秩盖艰其进者乃所以厚其亲也具官某属尊而行高器远而识茂炳禹穴之秀蔚有好修之称读河间之书泊无负贵之累既积劳於累岁遂晋典於留台仍疏采邑之封复继祠庭之廩同姓曰叔父岂於朕而敢私任官惟贤才必其人而後可往钦渥命永迪善猷可

希謚授州防御使依前皇叔提举佑神观制

勅具官某端肃嗣秀王於属为近而尔於王为子於朕则父党也王不幸即世遗奏一官阅十年而後陈请朕甚悯焉落环卫之阶正军防之任尔宜敬谨勿坠家声可

希謚降授右监门卫大将军蕲州防御使制

勅周厚宗盟而议亲之辟不废汉宗同姓而酎金之罚必行傥出礼以入刑难以恩而掩义具官某於宗葶为近于父党为尊开国而奉祠庭当自知於止足捐资而求廉使又未免於侥觊寻被人言难逃邦宪朕犹念璇源实同其派葛藟犹庇其根姑镌一阶庶别异姓帝家之驹虽逸尚能施礼义之闲屋上之鼠不薰詎可使本支之削可

希謚复和州防御使致仕制

勅朕惟天官操驭贵之权司寇典议亲之辟法行惟义甄叙以仁具官某秀邸亲支和王的裔居中而奉朝请方一洗於丹书望外而求廉车遂再污於白简兴言及此姑示薄惩既坐阅於岁华当复还於故职体予德意勉尔令猷可

尹甫换授皇弟太子右内率府副率制

勅具官某国家设十阶以待公族然非属之近者不以换授也尔胄出神明动循法度率履保氏之教不替亲贤之彝宗族称焉朕心乐只合掌东宫之副率仍聯南内之华班惟忠孝可以裨身惟诗书可以永誉益思淑谨以对宠光可

与?换授太子右监门率府副率制

勅具官某朕遹祇先猷笃叙邦族循景佑换授之典疏治平广亲之恩盖隆本支以壮磐石尔天潢之岳宗属之星既闲于仪式厚厥典用掌东宫之率仍居南内之班其励忠勤以答休宠可

与荪换授皇弟太子右监门率府率制

勅具官某若昔厚陵睦叙公族时濮王子与鲁王孙迁官一等皆举亲也矧子近属可缓徽恩尔胄出神明动循法度率履保氏之教不替荣王之彝宗党称焉朕心乐只俾掌东宫之率仍居南内之班惟忠孝可以裨身惟诗书可以永誉益思祇谨式对宠光可

与芮换授扬州观察使提举佑神观仍奉朝请制

勅朕维周隆母弟之亲入为卿士唐笃诸王之爱迭处京师懿我熙朝兼此异数况申之以换文之典而优之以锡觐之恩非曰尔私实维予翼具官某出神明之胄躬儒素之风端介不扰于中甚德而度纷华无夺于外大盈若冲朕尝追惟荣邸之生因笃亲支之友故自太宗而陞繕监繇少理而擢西厢凡所屡迁亦云殊宠然仁人之於弟当循法度之公而君子之於亲不以姑息之爱用易廉车之节仍供真馆之祠若曰孟侯毋慢家人之训其维吉士永陪京室之朝可

与芮授武康军承宣使依旧提举佑神观制

勅朕监观烈祖厚睦宗盟谓濮王之属当序迁黜矣英宗之识以皇弟之恩不可杀懿哉神考之谟岂予亲支援此缙典具官某气韶而质美行介而知良有芳斯猷不倨于贵出则干于侯方惟汝翼入则仪于朝序惟汝嘉遂超廉使之华径典留台之重仍祠真馆日奉便朝朕其弟封既已笃广亲之爱命作册毕尚其需疏爵之荣毋逸有邦毋懈于位可

与爽换授吉州刺史提举佑神观仍奉朝请制

勅具官某麟趾之诗作而周家盛鸿宝之书成而汉祚隆宗孳得人磐石增壮而天潢之秀禹穴之英令於容台丞于棘寺既闲礼法矣国家换授有典故以庐陵遥刺命之俾奉会朝仍畀祠廩体予睦族之意懋乃维城之庸可

乔行简授特进左丞相兼枢密使进封萧国公制

门下大臣君所体貌进退以示天下之公丞相朕之股肱眷留以为朝廷之重方此时机之交急岂应揆席之久虚仪图旧弼之英宅正元台之位式颁温綍诞告羣工具官某博大而宏明端廉而庄静学问粹正实源流於圣贤訢谟忠嘉皆根本於仁义盖自黄耇凋零之後独闻朱弦清越之音践扬三朝夷险一节既登庸於次辅尝避远於要权调娱万机犹负鼎适中和之济扶植衆正犹宰舟无轻重之偏小人得其欲而又安君子有所恃而宗主顾思人物之妙尤见相才之难矧今百度未厘三维弗靖邦材当裕未有均节之方军纪当修莫闻申警之实在廷则狃於议论多而行事少在边则伤於意见异而谋国疎凡职所忧靡知所届每当馈而太息曾命龟而旁求然安石未起於东山而伯夷尚居於北海遂即延英之邃晋升上袞之华以康时屯以穆天綍兹一儒既用於鲁宜侵疆之复归若二老共来於周则赤子之焉往肆疏公爵兼典神枢於戯去国而遄召王曾同列竞推於首相侍经而勉留赵鼎阅旬乃拜於昭文予欲燮和四序汝为予欲纲纪万方汝翼惟黜陟公而後足以彰善瘅恶必经纶密而後足以绥远折冲宣乃之猷期予于治

真德秀授参知政事制

勅朕载眡治朝畴咨近辅真儒无敌天下夙高一代之名吉士勋相我家允穆四方之望蔽于朕志涣以纶言具官某德粹而行方望严而气裕词章则日光玉洁问学则涌泉流雅度寬夷能任大臣之重至诚惻怛笃行君子之恭粤我先皇暨予初服秉孤忠而不貳阅万变而弗渝居则善道嘉言有惓惓爱主之意出则仁声义闻有恳恳忧民之心自长乐之还归喜宣室之召见所陈者先民为学之要所述者往圣传心之微欲以眇躬进於大道国人望之如岁雅宜陪公辅之班学者仰之如山亦欲借斯文之润既司俊造之选即峻疑丞之除予欲调娱万务惟汝谐予欲厘飭羣工惟汝翼叠颁异数以望本朝噫臣修繇内相而参秉事机公着自经筵而擢丞政府惟忠嘉可以名世惟弘毅可以济时式祈斯猷往复於采可

陈卓授端明殿学士同签书枢密院事制

勅朕仰宪乾文俯经皇武六子之运元气共成赞化之功四辅之环极枢增重本兵之选爰颁涣号式倚时髦具官某柔嘉而明文雅而介躬循法度曾无越礼之思世掌丝纶深得代言之体风节素闻於嘉定铨衡不挠於端平从容两朝清白一意靖惟万事之统莫重五兵之权惟除戎可以戒不虞惟选将可以征不义矧今疆场未靖羽符尚骚丁夫供馈饷不得休战士被甲胄弗得息倘匪藉羣贤之力孰能折万里之冲盖茸裘须衆腋之扶而善室非一工之聚用陞端殿俾翊鸿枢噫治平以宣徽命郭逵建炎以资政除颐浩兼此文武之柄付之耆喆之儒庶单厥心同底于治可

李?授守吏部尚书兼给事中兼修国史实录修撰制

勅中台总天下之枢法度修明则百官正左省主朝廷之命纪纲峻整则万目张若稽前代之彝必倚宿儒之重用颁涣号以穆师言具官某秀?岷峨名满宇宙通今博古家传太史之书正国致君躬备大人之事夷险一节典刑四朝朕更弦以飭万几加璧以致诸老儒者在位必强本朝忠言逆心斯迪朕德岂衆正并登於政路而耆英犹侍於甘泉盖典铨必毛玠而後可以厉廉隅批勅必李藩而後足以裁贵幸永监明则流品肃衿喉谨则政令严兹曰汝谐庶期予治下紫宸之拜曾何筋力之拘询黄髮之猷尚竚腹心之告更勤励翼毋曰遄归可

余铸授权兵部尚书制

勅文昌之聯八座皆古纳言之官武部之掌五兵实周司马之职欲重兹选必惟其人具官某端良而才廉正而辩典刑诸老言有物行有恒经综百为澄不清挠不浊出入禁涂者三载弥纶省闕者七年善无近名谋有忠益朕方修总核之政择经术之贤指画山川厄塞之图口占屯兵将校之数弗资文献曷济事功仍从东府之游晋典西曹之务惟柔而栗而後可整军经武惟毅而弘而後可绥远折冲更殫厥心同底于治可

何炳授权户部侍郎兼同详定勅令官制

勅朕惟更化如更瑟缓之则胶而难调治财如治丝急之则棼而无绪故随弊事而补不若清其源流而弊自除腴民力而征不若节以制度而民自裕能尽变通之利必须详练之才爰颁赞书以式版部具官某有爽邦之智有综物之能出总赋舆谙人情之利病入卿农扈了国计之盈虚矧方制用於多艰莫若求才於已试就陞禁橐晋貳民曹惟仁能爱本根惟公能清奸弊惟勤能通壅滯惟敏能拨剧繁兹惟汝能以称朕命可赵立夫授权户部侍郎兼同详定兼知临安府制

勅朕据四方之极以官人才总八政之经以裕邦用出入壅底源流浩穰用谂尹厘以式版部具官某汉世良吏周家吉人三为列卿再典京兆财之有不给不贍汝能通之民之有不惠不迪汝能正之着於显庸简在朕意肆从右翊之长晋貳左民之曹必生而不伤厚而不困而後根本丰必为之者疾用之者舒而後经制定克遵乃训往祇厥官可

赵彦呐授权兵部侍郎依旧四川安抚制置使制

勅朕荷天西顾全畀余有家谋帅坤维莫如我同姓比览筹边之奏式嘉破敌之勲弗躋禁涂曷重制府具官某望严而气裕志大而几沈早从兵间蔚有义闻夔门讨贼其勇足以夺三军之心岷郡扞城其谋足以制千里之难中更蜀道之扰慨想宗臣之忠故拔之於积毁孤危之余而任之於败军诒溃之际二矛置传每兴用晚之嗟专钺出征终畀为真之命提虎旅於仙原之北荡敌人於花峡之西燕及巩城亦归王土肆颁春日之诏俾亚夏卿之聯毋扭於既胜而骄士心毋恃其不来而弛边备更思长策以励後图可

洪咨夔授试中书舍人制

勅朕式观人文灼见天运二典三谟之书既远六誓七诰之旨不传汉制诏犹有尔雅之风唐宏词直类俳优之作皇宋受命五星聚奎天圣明道其气浑熙宁元佑其词达一变西崑俚语之陋养成南渡诸贤之英今复百年岂无名世具官某性从敏悟学以博闻刚大直方不改山林之操温纯深润能为廊庙之文顷司南台晋掌西掖悼大道之久郁须嘉言之孔彰必为章如云汉而後足以见王者之心必出令如风雷而後足以鼓天下之动庶几治古复见斯今可

许应龙授试国子祭酒依旧兼权直舍人院制

勅具官某朕若稽成周祗式旧典师氏掌教国子则今校官之长也内史掌书王命则今省官之贰也非得守道秉文之士曷兼明伦演诰之司尔以闽山宿儒端靖夷雅词章緼白贲之饰学问得黄离之中草奏南宫论说东序朕观之审矣贤关系风化之张本词掖乃纪纲之命脉故使汝长之直之以究其成若会讲礼肃如元和祭酒封还职举如熙宁舍人则予汝嘉可

郑寅授左司郎中兼枢密副都丞旨制

勅具官某都司纪纲之地非习知台阁故事不在兹选朕率是道以官其人矧尔父侨在淳熙间出入二省凡先朝之典宪往哲之言行灿然开陈如指诸掌汝实闻而习之具在家法用是命汝董正左曹寅纳密命亦犹元佑用范纯礼之意也往其钦哉可

袁申儒授秘书省著作佐郎兼权考功郎官制

勅具官某汉有着作庭晋有着作省元康间始置佐著作郎於是迁者非淹洽之才不以轻畀尔耆儒之彦既博既文雋书西崑涉笔东观不朞月之间一命再命於汝亦华矣荣名止于一时直笔定於万世往佐而长垂宪方来可

杨恢授兵部郎中制

勅具官某襄淮之形胜三峴山首也合肥腰也维扬承楚至尾之势也而就其中言之则运掉腰势者其任为尤重尔岷峨之英富于儒学虽冲澹如幽人洁白如处子而胷中所贮数万甲兵足以鼓三军之士而夺其气当北兵横溃时以疲弊之孤城亢日滋之銳卒亦已奇矣襄州缺守命汝兼之西淮缺帅命汝傅之镇于黄岗郎于武部盖将以大用也尔其勿狃于和勿轻于战思古人所以安边保胜之策朕将有赖焉可

虞衡授户部郎中许纶授刑部郎中制

勅具官某等郎曹古六卿之属也而地官掌邦用秋官掌邦刑於国脉民命所系尤重尔衡将指广东夙着风力尔纶持麾湖外亦有美最朕皆委之往正棘寺矣今命衡佐民曹纶司刑属

其思禁民为非之义味哀矜勿喜之言俾邦财裕而谏狱平则予汝嘉可

游倡授宗正少卿制

勅具官某朕更化以来録前言之曾忤权贵者聚之本朝以宏直士之气尔以端重鲠介挺有父风当绍定辛卯间首上封章言火灾事锄奸厉贪读者缩颈朕甚伟之出使既还遂长武监庀官未几复贰宗籍朕固知卿非爱官职也直言国之华善人国之纪以此望汝尚其懋哉可

监察御史王定授大理少卿制

勅具官某执宪南台明刑北寺均于治天下之平也尔年耆行高智敏才瞻见闻之接诸老尚有典刑仕宦而陞中都不畏强御辍从宰士之要分典台纲之清曾未浹旬贰于卿谏朕之所以待汝亦厚矣尔其谨于庶言庶狱稽用中德尚朕钦恤之意可

赵崇健授大理寺正制

勅具官某王制狱辞之成正听之以告于大司寇则棘寺有正其来尚矣尔天宗之秀明习条章三入为廷评谏议惟克允出分半刺蔚有民庸兹赐汝环俾正寺事其味周书审克之旨体汉吏持平之心监兹祥刑嗣有明陟可

李韶吕延年并授太府寺丞制

勅具官某等列寺有丞职清事简惟外府掌金谷之藏司出纳之权号为繁剧非才之良者不畀尔韶经学淹该端廉而静持麾有嘉最尔延年家学渊邃才美而文转藩有令闻今予诏还俾参厘寺事各忠乃职用宏兹休可

陈瓘授司农寺丞制

勅具官某唐置农寺丞六人掌寺事凡邦国委积诸州稟秸皆阅而纳之至国朝则省为二矣尔疏明而文廉辨而直衣绣持斧为盗所憎既畀之以词矣朕寤寐英才每有一长者皆不遐弃故复命汝贰我寺事尔其敬体此意不懈于位可

卷七

<集部,别集类,南宋建炎至德佑,鹤林集,卷六>

钦定四库全书

鹤林集卷七 宋 吴泳 撰外制

李性传授权刑部侍郎兼侍讲制

勅成周以太史掌刑书先汉以明经决疑狱盖谙识宪章而後足以辨八法之情伪精通义理而後可以权诸罚之重轻必惟其人始称是选具官某缜密而栗从容以和弓冶父子之良遂於六学埶簪弟兄之乐博极羣书自绍定之登朝既端平之更化曲台议礼亡所依阿文陛记言数多论建肆侍石渠之讲晋紬金匱之藏重惟祥刑当酌古谊过轻则几纵有罪过重则恐伤无辜朕方体列圣之好生尔宜念先民之弼教期予于治时乃之休可

徐侨授工部侍郎依旧兼国子祭酒兼侍讲制

勅御事罔耆壽俊何以造周朝臣无骨鯁儒莫能兴汉朕永惟治统之缺每叹人才之难今得耆英宜寘近列具官某端信而诚慤直清而澹夷在野则布衣躬耕在朝则端冕敬色学如可乐弗违顔子之仁道或未行不易下惠之介剴切曲台之议从容劝讲之箴朕虽苑囿服御无所增奇技淫巧无所作实凭宿望以重版曹职简事清无妨执艺以谏道尊德贵岂以飭材为工若曰归哉非所望也可

赵汝谈授吏部侍郎直学士院兼侍讲制

勅朕眡朝南面图任东曹藹藹王多吉人既选于衆番番我有良士则惟其能用盼纶言以望禁橐具官某文物河间之彦风流江左之英擢从丘园寘彼朝宁辞章古雅如升堂而闻正音气貌冲夷如入国而望乔木乃睠甘泉之地久虚法从之班非白首耆艾则不足以羽仪周行非黄目清明则不足以鉴裁流品晋侍金华之殿陞直玉堂之庐若卿能砥节奉公则朕亦清心省事往祇厥叙益务起哉可

赵彥懌授权兵部侍郎兼说书制

勅朕更化以来亲贤为务畴咨羣辟亡踰於老臣晋貳五兵莫如我同姓爰涣出纶之命以华簪笔之班具官某肃义端庄澹夷温雅其践修则言行邃於坛宇其讲习则师友渐乎渊源白驹之在空谷者累年威凤之翔高冈者千仞自还朝着喜见仪刑皓白而伟衣冠惟恨识卿之晚赫咥而如圭璧尚嘉迪朕之勤径从蓬山遡陟荷橐览安边之议信儒者之知兵献补阙之书尚宗臣之报国益新厥业宏对兹休可

蒋重珍授守起居郎依旧兼说书袁甫授起居舍人兼说书兼国史编修实录检讨官制

勅具官某等国家擢用魁才必更记注蔡齐端雅之品被遇於仁宗汝砺忠嘉之猷简知於哲庙盖名高则知所自爱而地近则可以昌言今斯百年始得二士尔重珍气刚而识粹尔甫貌肃而心庄一则崇论说言不避权奸之势一则仁声义闻能廉贪懦之风鸿远弋兮高飞凤览辉兮翔集迨兹亲政为朕偕来母曰朝亡阙政而莫弼予违母曰圣有训谟而弗书吾过左记言右记事职所当思上克明下克忠邦其用乂往祇并命式迈前修可

度正授试礼部侍郎兼侍读制

勅朕临御路朝顾瞻法从商耆成人之训久迪予闻周官宗伯之仪曾共乃事爰畴已试之效即峻为真之除具官某笃厚而靖夷端庄而和裕衣深带博蔚有大儒之风词赡理精真得讲官之体笃守师说以沃朕心朕尝谓达於乐而不达於礼谓之偏达於礼而不达於乐谓之素兼古夔夷之任畀今鸿硕之贤尔宜导君臣之和明上下之分使会盟可以却莱兵之暴而尊俎可以折晋国之强母弃尔成益祇厥叙可

李?授兼侍读制

勅朕鼎新化原晋用儒雅谓万事之统犹阙询兹黄髮则罔愆虽六经之道同归学於古训乃有获式资鸿宿之望俾侍燕闲之游具官某一代耆英四朝旧德徽言善道源流尚接於乾淳全节高名夷险弗渝於泰定逮诸老收声之尽屹孤忠贯日之明补纫犀倾扶立鳌断每念尔身之在外孰如以道而事君精神可以折冲故范镇有趣还之诏筋力不以为礼故次膺加母拜之文矧圣政之一书实高皇之钜典非得博古通今之士岂当明师劝诵之筵天下达尊三尔尚式陈於猷训九经行者一予其弗替於箴言母曰遄归庶期共治可

鍾震授兼侍读制

勅朕以眇躬学于古训六经之义何上莫窥往圣之心正月之吉始和首遴鸿儒之选庶裨实政母作美观具官某以文雅擢先儒之英以淹通擅良史之誉簪笔扈从亦既有年侍燕清闲屡闻入告爰即延英之席用升进读之华究观前朝厥有成监范祖禹进帝学八卷色和而气平吕公着列时议十条义明而词约盖於诵说之际傳以箴规之词无俾二人专美元佑可

度正授兼侍读制

勅易大传谓圣人以此洗心吉凶与民同患大学谓天子至庶人壹是皆以修身为本修身治心之学通上下一理也而说者例曰人主之学与经生学士不同朕则未喻具官某行粹而古识醇而明当学禁方严羸粮撰屨不远数千里从游於武夷之下其趣尚盖已高矣易有本义大学有或问析疑辨惑皆所习闻今自劝讲陞之进读其以得之心体之身者为朕悉之究之熟之复之庶几交修克迈乃训可

郑性之授兼侍读制

勅汉儒以明经擢谏议大夫唐旧典以谏议入乾符门讲读谏诤经术之相须其来旧矣至国朝绍兴以後始有兼官之称具官某凝远而靖深端方而简重壮年射策曾驰汉庭鯁直之声幼学从师尽得考亭精微之蕴入居保氏之职晋侍迓英之游朕之不明不敏尔康正之朕之弗念弗庸尔辅弼之先民有言朝无争臣则不知过国无达士则不闻善尔其交修朕将有望焉可

魏了翁授兼侍读制

勅朕惟大学失传微言辍响以愈之博闻明辨言修身治国而遗致知之一章以光之真践笃行能诚意正心而误格物之二字惟程颢弟兄次其简编於始而朱熹师友为之章句於终义方着明功在讲贯具官某高明荡乎宇宙正学源乎圣贤去国十年不改孤忠之洁白谪居七载尽研六籍之精微深惟孔氏之遗书能究先王之成法肆班法从劝读经帷三在一篇之纲汝敷畅之六母十章之旨汝切磋之如行道之有程如耘田之有畔师在前讲在後勿托空言化於口笔於书仍输忠告庶乎闻大道之要可以开太平之基可

李鸣复授兼侍读制

勅朕躬宅天命位在德元正月之吉始和布治方新於历象六经之义何上尊王莫善於春秋式涣纶言俾升诏读具官某气刚方而沈涵之以厚量閎肆而密察之以文横榻二年陞华八座当其论事肯言诸老之未言既於谈经能发先儒之未发爰即冬官之序晋陪春诵之班本孟子为纲明义当师於安国以鲁论为说知言宜祖於九成庶殫厥心同底于治可

洪咨夔授兼侍读制

勅朕惟正月之吉始和顾六经之义何上大易有圣人之道四既撒臯比中庸言天下之德三盍陈龟监爰即延英之席特陞劝读之班具官某风猷浚明议论坚正词垣缴奏率皆彰善瘅恶之辞经幄进陈莫非格王正事之训用正夕郎之拜俾承冬读之书静惟孔氏心法之传莫若朱熹章句之备精粗辨析脉络贯通三谓一篇之纲大无外小无内七诗末章之要费而隐显而微宜演绎於微言以发挥於圣道庶几冲菲允蹈中和可

游侣授兼侍讲制

勅具官某学不专不足以明道诚不积不足以感人朕以卿秉心有常持论不诡故寘之金华相与共学顾乃援程颐旧比以告且谓营营於职事纷纷其思虑则不能以感动上心子之辞承旨而请以宗少执经似矣然春秋大义数十炳如日星奥旨微辞隐而难见此又颐之所究心也试为朕发明之可

徐清叟授兼侍讲制

勅具官某昔之守道至高而秉法至严者莫如孟子然谏不受而去则以为小丈夫之无知言未行而迎则以为古君子之可就孟子岂干泽濡滞者哉爱君故也尔学自孟氏好是正直据经援古不阿当世比出宪府而累章欲退岂朕所以望卿者耶盖尝旁午遣使趣对延英谓尔曾为讲官故复以其官召则亲近儒生之意可见矣更宜研精为我说易可

李宗勉授兼侍讲制

勅具官某朕御大昕之朝百官献臣进见引对习容輝如率顷刻而罢谏议大夫伏青蒲殿中执法奉白简亦不过一月一论事至若昼访夕问从容献纳得以学术辅佐人主而进之以唐虞治国之道惟金华讲官始为亲且近也尔风猷峻整议论粹正更践台省素以直闻然论谏救失於已往劝讲闲邪於未形汝宜尽规朕所深望可

赵汝谈授兼侍讲制

勅朕获承圣绪涉道未深嘉与宿儒讲论经理具官某国之宗老年耆德明当开禧宝庆时出入风议挺有直节翳然林木之间又十数载更化召归须鬓华皓相见虽晚精明不衰朕临朝而叹曰真讲官也金华未久进而陞之礼不云乎不讲之以学犹种而弗耨汉儒亦谓学之不讲则所识日亡益尊所闻以辅吾志可

李大同授兼侍讲制

勅具官某昔我先王春诵诗以太师诏之秋学礼以执礼者诏之居礼乐之官而以礼乐之书劝讲犹古意也尔游东莱之门撰武夷之屨学问苗脉所从来久每还英入侍皓首伟衣冠敷畅厥旨能使朕於言语讽道之间油然心悟金华再入不愆於仪朕尝閱国史见祖禹讲王制祭祀以牺牲币帛粢盛皆出於民力旨哉渊乎岂但为元佑鉴哉其诵所闻无愧祖禹可

李宗勉授兼侍讲制

勅具官某周以保氏掌谏恶必兼六艺之教汉谏议大夫掌论议率用明经之儒盖谏者所以辅拂於王躬而讲者所以薰陶於德性奋乎百世之下而蔚然有三代两汉之风者实难其人也尔以经生久居宪府内涵性德如蘊藏金玉之渊时草奏书有鼓舞风霆之妙既擢登於骑省复密侍於延英朕之德有不迪汝交修之朕之政有不懋汝康翼之使随事有剪桐之规而过为无折檻之迹则若汝予嘉可

赵彥幟授兼侍讲制

勅朕以眇躬郁於大道谓仲尼如代明之日月百世所师而论语乃六艺之喉衿一言难尽用

晋登於讲席俾温绎於遗经具官某年耆而明行粹而古林泉七载不竞声华之途糟粕羣书自寻名教之乐朕以冰霜其操金玉其音故隆之以紫橐之班而贲之以金华之宠挾圣人之精意大义当如安国之佑我仁宗述夫子之善行嘉言当若尹焞之辅予高庙度讲论唐虞之地有雍容洙泗之风可

徐清叟授兼侍讲制

勅具官某朕闻台纲扶天下之脉经术养君心之源隆兴乾道间以殿中执法共贰劝讲固不乏人而学问名节照映一时者盖难其选尔高明而融直谅而益说书金华殿曾谏五兵之贪珥笔古栢台力扶六学之正朕尝语诸大夫曰真御史也然论奏特救失於既往讲磨能格非於未形况加之以知命之年而莹之以穷理之学进阳爻退陰位当如昭素之辨乾龙辟君子阖小人必若冯元之推泰象庶几易道咸在朕躬可

李鸣复授兼侍讲制

勅具官某宪府兼经筵自国朝庆历始淳熙而後以台端入侍讲幄凡十有九人虽其间人品固有不齐然论事主乎忠厚劝讲贵乎明白祖宗所以命官之意则无以异也尔质直而义忠和而仁拔诸西蜀之珍畀以南台之重曾亡期月又侍延英朕之眷汝亦厚矣春秋大义炳如日星一经始终尔所明习朕意若曰有国者而不知乎此则内华外夷之分不明有位者而不知乎此则尊君卑臣之礼弗辨或隐其义或微其文尔宜开陈以辅吾志可

度正授兼侍讲制

勅在昔寧考有臣朱熹擢陞金华入侍经幄如程颐之於元佑如尹焞之於绍兴训辞星日之烂垂师友渊源之不坠具官某气淳质茂精识博闻撰先生之履以从游险夷不变闻夫子之言而笃信细大弗遗矧跻从橐之崇兼侍延英之邃六经之义何上虽各专官五常之道为原莫先说易以发天地施生之蘊以明陰阳消长之机庶单厥心同底于道可

李性传授兼侍讲制

勅具官某在昔泰陵有臣祖禹方侍延英之日首陈帝学之书以宪道稽德为言以敬祖亲贤为法经术讲论蔚为当时第一朕方崇向往籍敷求正人博古通今无如性传者是用升之讲幄以备谘访夫祖禹亦蜀人也益櫛乃猷惟前人是似可

张虑授兼侍讲制

勅具官某朕闻之书曰即我御事罔或者壽俊在厥服予则罔克盖简在王庭者不可亡白首耆艾之士也矧迓英之地哉尔儒之夙望有德有年聘从乡闾长我庠校士知所模楷矣是用晋登讲筵以引以翼尔其据经守正弼予于治则予亦一话一言永惟成德之彦是信其往欽

哉可

洪咨夔授兼侍讲制

勅朕闻六经统天地之心八卦通神明之德讲乾龙於便殿艺祖所以眷昭素之深说泰象於路门真宗所以待冯元之宠虽曰洁静精微之旨难加语言训诂之繁然非明经何以见易具官某行介如石节清於水直道事君深得静而方之体英词纬国自成奇而法之文虽眎草已极儒生之荣非横经莫称侍臣之选肆升劝讲俾对延英靖惟两仪四象之分一君二民之辨进阳爻而退陰位辟君子而闔小人粲然一书萃此衆理宜於密勿雍容之顷时以忧虞失得为言庶几吾身浑是易道可

陈公益授兼侍讲制

勅具官某朕获承圣绪涉道未明乃正月始和博求儒雅以待劝讲思所以开太平章缉熙也尔史于柱下经明行修每侍清闲敷畅厥旨俾予廸兹古训乃有获昔贾昌朝於景佑元年说书崇政四年侍讲天章阁盖以其诵说明白耳母俾昌朝专美景佑可

徐侨授兼侍讲制

勅具官某古我先民尊尚论语挾圣人之精意大义安国所以被遇於仁宗绎孔子之善行嘉言尹焞所以受知於高庙皆以是书之蘊敷於劝讲之筵具有前彝何拘近比尔经粹行古年耆德明疏饭曲肱不改山林之趣玄端章甫能为宗庙之容朕方举贤而远不仁修己以安百姓悼大道之湮郁必耆儒之发挥如卿笃诚斯可感悟鲁论二十既陞六艺之科曲礼三千徐订诸儒之议庶讲论唐虞之地如从容洙泗之间不徒空言同底实治可

赵彥幟授试秘书监兼崇政殿说书制

勅具官某汉以宗儒典校册府自大夫向平望侯穀始至国朝中兴以来英才相望然领袖蓬山者犹未之见也尔行粹学古色爽气和召归周行明眉皓首朕已用之晚矣朕有美官号羣玉府非国壽隍曷使长之用是盼此除命尔其玩学如不及之语观属辞比事之训以其所师传者而表仪俊游则朕之望也可

徐清叟授军器少监依旧兼司封兼崇政殿说书制

勅具官某易象除戎器以戒不虞周官掌兵器以待邦用天下无一事一物非儒者之所当为也尔今之闻人古之遗直经术文雅风节议论盖如兑之戈垂之竹矢大弓越棘人共宝之辍从佐着往服少事盖高一级也虽然尔之谏佳兵者是矣而易礼明训又焉可忘职思其忧母替朕命可

袁甫授起居郎兼权中书舍人依旧兼说书制

勅具官某若昔成周分命二史曰太史友则执册书今记言之任也曰内史友则掌王命今代言之官也苟非全材曷共贰事尔世以儒名好是正直自擢第先朝暨予更化几二纪于兹扶善嫉邪无所回挠斯士林之冠冕吾道之羽翼也擢陞左坳仍典右掖岂但取之以科目哉记注之失有四汝其刊之修之王言之制有七汝其究之复之使直笔足以垂万世之法而英辞足以鼓天下之动则予汝嘉可

徐清叟授朝奉郎黄朴授承议郎制

勅具官某等器车与河图并传弘璧与大训俱显富哉天地之藏无书焉未足以为宝也矧阜陵之训欤尔清叟直道足以康时尔朴英风足以励俗俱自册府说书金华随事而言不徒陈折柳之诚指兵而谏亦屡进杀羔之箴至论格言薰聒予听者盖不少矣彻章第赏兹亦典彝益单厥心以答扬我祖之休烈可

蔡仲龙以魏惠宪王府讲毛诗彻章授朝散郎制

勅具官某朕祖宗朝诸宫院教授率用朴学醇儒充尔愿慤而纯端方而静横经宫邸议礼曲台盖敏於行而讷於言者今藩房授道讽诵言语皆不易情性之正彻章转秩自宜旌汝若诵诗三百而无忠信诚慤之心以莅之虽多亦奚以为可

李炜特授朝请大夫周文虎特授朝散郎制

勅具官某等周以岁会考四国汉立殿最课郡县我孝皇帝设臧否考察郡守事实皆良法也朕捐四蜀之赋供饷西师日告匱乏尔炜乃能拘核郡计持其赢以裨军饷之缺尔文虎亦能检催经赋时其入以应军期之会王人最书来上何惜一官不旌汝耶可

陈埙以庄文府讲毛诗彻章授朝奉郎制

勅具官某汉毛萇以诗学为河间献王博士後之为宫僚而说诗者盖昉乎此尔以开爽之资负崛奇之气其性情咏歌言语兴道盖能使人有兴起感动之意朕常命汝授诗藩房矣彻章转秩岂以内外为间耶勉图淑声以称嘉宠可

蔡仲龙授朝请郎袁商授朝奉郎制

勅具官某等汉左氏不立学官独赵人贯公以所授传训为河间献王博士王邸之习读左传其来尚矣尔仲龙靖厚锺於气稟尔商淳方得於家传自为宫僚颇通艺业比既以说诗受赏矣丘明亲授经於圣人训艳而富义幽而章又得尔等为之发挥其裨益岂少哉彻章转官用酬稽古之力可

杨师谦以景献府讲春秋彻章授朝奉大夫制

勅具官某祖宗朝诸宫院教授率用朴学醇儒充盖遴其选也尔生长淮堧笃於履行其质朴矣究心经学粹於修辞其文醇矣掌教官邸谁曰不宜然春秋大义数十炳然者易见微妙者难知今赖汝发挥既终篇矣则何惜一官不以尊显之耶尔其茂承之可

蔡仲龙授朝奉大夫袁商授朝请郎制

勅具官某等比岁以汝等诵诗卒章转秩矣寻又以读左氏终篇益一秩矣今复絶韦编而第赏是三也昔汉桓荣经学成毕陈车马印绶以夸示诸生曰今日所蒙稽古之力然则一岁三迁官岂不盛於荣哉母谓官爵如探囊中物可

张文用授随龙武经大夫王伦授保义郎董有恭授武翼郎制

勅具官某等阜陵之书如天球弘璧历代宝之以为大训经筵进读今已终篇恩光所沾下逮而属既优既渥矣尔其敬谨于仪往祗厥事母曰一官可以幸得也可王迈授秘书省正字江万里授秘书省正字制

勅具官某等兰台给笔札试颂自汉始逮我先朝犹试词赋治平末昉策以经史世务贵实材也尔迈奋身甲科尔万里擢秀璧水直气不挠浩浩沛乎词源古心自鞭奇奇见于笔力既览北门之对肆偕东观之游朕之所以命汝岂但订鲁鱼亥豕之谬哉益恢儒猷以赞文治可

家演授校书郎兼景献府教授制

勅具官某昔欧阳修谓馆阁取人之路有三进士高科其一也尔类省抡魁经明行饬议论挺挺早有直声今则养益厚而器益闳矣肆繇是正陞之校雖非以序迁也金华絶出之业朕将可待焉可

刁起授宗学谕兼景献府教授奉议郎戴杰授武学谕制

勅具官某等古者师氏教人以事而谕诸德国家之学校置谕犹古意也尔起年耆德劭尔杰才老意新俱有闻于时朕谓起掌教外宗故命之训迪宗庠谓杰常分教天府故命之诱诲右序尔其茂明嘉学招诸生而教之俾属籍之英乐为善而不倨于贵鶡冠之士崇诗书而不专于武则予汝嘉可

郑起潜授太学博士赵发授国子正制

勅具官某等博士古秦官也国子置正录与太学官分掌教导昉於大观尔起潜璧水之彦尔发鼎科之英士之有迪与不迪尔身率之才之有良或不良尔纠正之各观尔成母懈于位可

免解进士曾三异年七十该庆典授承务郎差监潭州南岳庙制

勅具官某人贵老者为其近於亲也贵有德者为其近於道也尔邦之壽隲有德有年该综羣书冲静恬退方东朝庆壽七十同里之士乃哀其行谊以闻吾安得不尊显之官以京秩廩以岳祠勉尔遯思服此休命可齐仲甫授额外翰林医官沈仲龄授额外翰林医官制

勅具官某人等礼曰执技以事上者不貳事不移官尔等固医官也给事东朝岁月滋久近以祔于太室各进一阶阶可升也官不可移也往其懋承之可

邹淮授挈壶正制

勅某挈壶之职咏於诗载於周官由来尚矣尔乞职清台洞晓乾象且能会萃历代灾祥之占为一书用是迁汝壶正其共乃事使朝廷无东方未明之刺则惟汝嘉可

卷八

钦定四库全书

鹤林集卷八 宋 吴泳 撰外制

谢奕昌授知合门事兼客省四方馆事制

勅朕爵以驭其贵仁以笃於亲戚晚不除侍臣固曰至公之无党合门仍眎从橐未尝宠数之不优申锡明纶式昭异渥具官某履恂恂之行修抑抑之仪雅称谢庭诸子之佳不有窦氏长君之贵周旋朝序之久进止礼容之娴用解右韃陞华上合况典掌宾胪之事而阅稽天仗之藏朕之待卿亦已厚矣尔其念宠恩之难报思高禄之易盈尚循素风式迪忱训可

谢奕礼知合门事兼客省四方馆事制

勅朕疏荣贵戚迪简良材长君少君之贤夙推望族东合西合之序联上清班虽曰示恩未尝挠法具官某仁行义处礼习诗明居上相之乡籍甚家声之着入小侯之学薰然德性之良素富贵而不以富贵自骄见纷华而不以纷华为悦寧屈文阶之峻式共武卫之严太微之座既明载囊矢箠谒者之星有烂俾赞宾胪母愆於仪母贰乃行庶几承尔祖之烈可以教天下之嫺可谢奕礼换授眉州防御使带御器械兼干办皇城司制

勅后族戚里不除文臣从官建炎诏也朕何敢逾具官某松阁故家椒房懿属而能被服诗礼鑠藉典刑盖尝升诸月卿之清宠以书殿之邃尚循法度控避职名贵而能谦於汝见矣通义兵防之任禁庭韃佩之班典司皇居悉以命汝汝其思名器之不易惟文献之自持保此宠光以永终誉可

谢奕昌换授和州防御使带御器械兼干办皇城司制

勅祖宗之法后族戚里无得任文臣班法从也虽有济美之才亦屈换授之典具官某气资闳爽性行淑均生於上相之门克谨厥德贵以倪天之妹不愆于仪自擢實于周行已平跻於华路而乃辞书殿之邃易武阶之崇晋秩扞防属韃左右朕之待汝义弗敢私薄氏以仁善保家马侯以清约守位尚终令誉无替前猷可谢采伯换授蕲州防御使提举佑神观免奉朝请制

勅东汉后族不过九卿国朝戚里不除侍从虽服文雅必换武资盖公法也具官某履行孝谨稟资温纯出王谢之故家为邓陰之尊属而不有贵胄蔚然儒风进女诫以奉坤仪缉圣謨而裨乙览肆予嘉叹示以优恩擢从戎监之班对授兵防之任非特私于名器亦庸宠乎才良益茂先猷以俟甄擢可

谢采伯授州观察使仍旧提举佑神观免奉朝请制

勅朕维先王建国亲诸侯何分异姓伯舅加劳赐一级当有殊恩矧伊近戚之尊岂爱懋官之宠具官某器怀竞爽儒雅扶轮虽胄出相闕而不以相闕自高虽嫺连掖庭而不以掖庭致贵每说学於縉绅之囿曾争名于俊造之場固曰汝能当为朕屈昔野王以德显尚难陪与於列卿而樊侯以经名不过徙封于东国爰览摠章之上既知典故之详仍啓男邦进升廉察母曰尔身之在外尚思忠德之辅君往承之休以辅予治可

俞朴授权知合门事兼客省四方馆事兼干办皇城司制

勅具官某朕惟朱华之二合当太微之法宫非得英流不在兹选尔戎容武毅材略伟闕沂王肺腑亲也属鞬帝右祗事端门宾礼朝章素所諳熟今命汝总知馆事其句传明命纠正官聯俾廉陞之间肃莫敢犯则予汝嘉可

韦兴宗授州防御使依旧知合门事制

勅昔我孝宗皇帝书老氏三去之戒赐尔父璞明训具在世服儒素澹如也具官某王孙之贤后族之彦飭身自警循礼义之中被服不华絶贵游之习属鞬左右阅岁滋多近已晋长朱阁矣解带卫之劳秩军防之峻尚共乃事母忝厥考可

韦兴宗授州观察使依旧知阁门事制

勅朕永怀沂邸诞正官名既于内外之亲锡以褒迁之宠具官某显仁茂族平乐诸孙於靖惠亦近属也稟性闓爽受才敏宏画自警之图藹有仁贤之誉守三去之戒更无奢丽之风自董朝仪不愆宾礼用辍州防之旧兼陞廉使之华尚对恩荣益肩忠报可

杨凤孙换授福州观察使知合门事制

勅朕尝观国朝佐戚之制无任文臣侍从之官虽负英才亦屈彝宪具官某生高明之胄蹈夷雅之风自官中都蔚然嘉誉既烦之以外府受藏之冗又佚之以西厢奉祠之清而乃执德谦冲露章控免尔之辞其职则是矣朕每念思齐大任之德未报不显申伯之功弗酬既乎支孙积有余庆寧换观风之印仍知上合之班束带与宾客言尚无越礼升车有澄清志犹可泽民往懋淑声迪忱猷训可

杨凤孙授中大夫杨蕃孙授朝奉大夫杨衍孙授朝请郎杨纘授朝请郎制

勅具官某等昔我文母保佑朕躬有大功於天下今升自闕宫祔于太室戚畹内外嘉与推恩盖报其亲者不敢弗尽也尔等生自高华素于富贵有敬谨威仪之度无康好佚豫之失并升一秩宜懋厥官母曰居宠而不思危也可

许堪授合门宣赞舍人差充京湖制司计议官兼发遣枣阳军制

勅具官某京西为上流重镇而枣阳又京西重戍也尔奋自右科素有才具兹命乘障带上合之班计元模之议非但华之以美职尔边上吏士宜厚抚摩勿太察勿太懦使人人皆兵为我之用则惟汝嘉可

张澂授合门宣赞舍人制

勅具官某合门荣眠馆职宣赞旧隶西台选亦华矣尔黜臣之後秀谨而腴顷以父忧解官亦既三载率礼不越以终其丧可为笃孝夫孝於事亲必能忠於事君其就故官以承新命可

葛忱授合门宣赞舍人制

勅具官某合门眎馆职宣赞又在言语之科国家不轻畀也尔仪范谨饬辞令闲华故命汝束带与宾客言汝母曰此官可以格法授也可

林柘授合门宣赞舍人制

勅具官某宣麻舍人清视馆职尔开爽敏给右科自奋顷将明命只谒寝园成礼而还法当酬赏兹越候班之秩径升宾赞之阶可谓闲华往其钦谨可

张槩授合门祗候制

勅具官某看班熟识仪数历五年然後祗事上合此熙寧旧典也尔槩恪谨渠度习嫻朝容岁月未深乃援郎陞引彝比以请朕勉从之若夫躋升弗已则有馭幸之法在可

郑焕宗授武德郎依旧合门宣赞舍人制

勅具官某宣麻舍人共职五载则与转官嘉泰令典也尔进趋闲华音吐鸿畅赞命上合已及七年亦可谓劳矣何靳一官不以华汝耶益单忠勤对扬休宠可

王师石授合门祗候制

勅具官某合门乃祖宗储才之地而只候之班在文臣为馆职其选严矣尔生自将门通于儒学其在定远以孤城抗敌宰资兴以一身当寇仁者之勇也祗事上合径点清班朕盖以功授往共厥服益励乃猷可

何嗣武授合门祗候仍知滁州制

勅具官某赤也可束带立于朝则使之主宾由也可千乘之国则使之治赋知効一官事不貳适古之道也尔为滁阳守治兵理财岂不足以壮吾藩屏顾乃屡请欲带合职以行是主兵治

赋合而一之也姑华尔躬朕之所望盖不在此可

孟琳授合门祇候制

勅具官某东西上合门礼均法从而祇候清眎馆职祖宗朝非谙识典章者不轻畀也尔以时髦娴於朝度既辍祥琴之御欲还束带之班朕方以孝治天下岂惜故官不以命汝可

房应龙授合门祇候仍旧干办御前忠佐军头引见司制

勅具官某合门眎文臣为馆职其选重矣尔精明敏达和风祇修干于御营厥有成绩故命汝祇事上合束带与宾客言益懋其勤往共厥事可

陈圻差充合门祇候制

勅具官某合门祇候在文臣为馆职岂可责以求财此司马光之言也尔仕於筦库欲干禄者也非求财者也洁彼冗浊寘之清华亦何戾宪章之有可

辛?特授州防御使依旧知合门事制

勅横阶非殊恩不迁遥郡非显庸不转兹褒阁使难徇彝章具官某生长将门习嫻宾礼逮事寧考既于冲人左右囊鞬久领内庭之直句牖殿陛遂司朱合之仪爰推解带之恩特畀州防之任祇承宠数益懋忠勤可辛?授知合门事兼客省四方馆事兼干办皇城司制

勅朕惟东西上二合当太微法官之北涖职其间非才不畀具官某韞气沈毅受材敏閎生于将家晓畅军务逮事寧考嫻于朝章兹擢自於属鞬俾统司於宾谒尔其句传明命纠正官聯俾堂陛之仪肃莫敢犯则予一人以忭可

吴潜授秘阁修撰兼江西路计度运副制

勅具官某朕爱护人才如植嘉木息之以夜气润之以膏雨皆所以养其根而俟其实也尔顷使江东蔚有治状一从家食朕每念之今复以江西漕餉起家矣兵盗之余民食为急辑疲氓戢贪吏使西人如饥之望岁亦犹东人之去後见思则汝之此行始为称指可

顏颐仲授直秘阁两浙运副制

勅具官某二浙素号剧部凡领转输者率为尹京之储绍旧典也尔闾爽而智敏强而能假守桐庐蔚有善状曾未满岁俾丞大农畀之畿甸之漕亦可谓越彝比矣仲尼有言敏则有功公则悦务持其敏而首奉乎公朕深有望焉可

侯忠信授左武大夫依旧宫观制

勅朕闻先王以立武为善经中国以除戎为大事傥能称职何爱赏官具官某沈鸷而有谋朴忠而能勇秉麾海道驰驱戎马之间唤伏合门服习礼文之内虽在祠庭之均佚每遇武库之前劳比缘控陈兹用褒擢因之以戎圉之任华之以左武之阶往其钦承服此嘉命可罗晟以广西擒捕海寇授朝奉大夫制

勅具官某汉列侯受封以职饷居野战略地之右尔守合浦当海濒盗弄之冲能使军有流钱士无後顾以底成绩非区画之善不能也揆诸汉典岂在诸将下增秩二阶用劝来者可

赵师楷授江淮荆浙福建广南路都大提点坑冶铸钱公事制

勅具官某周外府掌邦布之入出以待邦之用布即泉也货泉之司而以丞於外府者掌之尚周人遗意也矧尔宗莩之英吏干之敏使乎广右曾以最闻今举九路百八州之计并于一大有司汝其为朕扼弊奸集公利使宝冶之藏饶美圉府之法流通则国家深有赖焉可赵胜特转某州防御使除主管殿前司公事制

勅周公恤兹虎贲而立政之书作祈父转予爪士而小雅之刺兴凡典我王旅爱人抚士能使周庐内外温如挟纩则朕亦何爱爵赏不以褒宠之耶具官某召从淮浦来扈殿岩恂恂有古良将之风介介为士君子之行异时羽林天仗卒多不葺而汝能修之三衙赤籍皆以赂补而汝能革之戎容精明军务厘飭是用迁以兵防之秩正以连帅之名不但荣其身而已也倚仗言事尚竭告猷可

王安行特授州防御使依旧提举宫观制

勅横班序爵固存定法之常解带迁官或出特恩之异具官某韬藏武略晓畅戎情筑定远之城以一身而护塞调安封之卒不踰月而擒渠右韃之赏未酬左武之阶犹旧爰念勤劳之久肆升扞御之班仍秩祠庭式对宸渥可

王橐授州防御使制

勅朕宅丕后遙祇先猷广厦对儒臣之英路门彻皇祖之训恩荣所被内外惟均具官某淑谨有仪勤明寡过服于貂省之事在朕龙潜之时属燕清闲精思典学顾瞻殿宇名以缉熙汝则承之以宣朕旨令既终篇第赏何爱一官益赫其勤往服休命可

赵立夫授守太府卿兼删修勅令官兼知临安府制

勅具官某京师王化之首严者以察为威儒者不敏於事皆非朕所尚也尔谨厚而密柔嘉而明蚤为九卿尹正畿甸虽不为灼灼之名如顾少连不求赫赫之誉如魏少游而上下相安咸

以为便然朕之所以望汝者又非前日比也俗流化敝汝其正之官邪吏偷汝其威之若能体十二条之训守之勿坠则邦畿千里朕可以无虑矣可

林景衡权发遣德庆府制

勅具官某束带立于朝与治千乘之国职守固自不同也然德庆为郡其民蠢其俗野非嫺於礼者莫能治之尔右庠诸生策名进士祇事上合进止舒徐可以为良二千石朕方仰法孝宗于所不闻知处留意尔毋谓广远皇明不及也可

许堪权发遣德安府制

勅具官某德安为郡竟陵接其西棘阳介其北重镇也尔气姿闳爽谙晓戎情曾未踰年历守三郡仍赞中权之画且聯上合之班今事任亦不轻矣尔其申讨军实葺厚城堡使托里之计密而风寒不侵则朕将有赖焉可

曹顺权发遣应天府制

勅具官某睢阳古郡会也唐守之以遮蔽江淮国家因之以肇基王业沦胥之久再归版图牧守之任实艰其选尔沈鸞善谋忠勇寡二摄承边障亦几一年军务民政已着嘉绩今会汝为真往哉毋弃尔成可

孙应龙权发遣德庆府制

勅具官某德庆古康州中兴潜藩也郡将之任每难其人尔奋身右科屡乘边障民庸戎事晓畅谙悉故命汝分左符以往远乃猷裕乃事俾内外粗定则予汝嘉可

毕衍权发遣德庆府制

勅具官某德庆古康州也朕以中兴潜邸不轻畀其人尔练更民庸晓畅戎事绥御内外必能得情用是委汝共理我孝宗尝曰于所不闻知处留意汝毋谓广远皇明所不烛也可

朝散郎直华文阁权知兴元府主管利路安抚司事陈隆之授朝奉大夫制

勅具官某往岁北骑驰蹂闾中握兵之将貔虎熊黑之士哀凶煽逆助寇为声势者不但一贼珍耳尔以参谋勇於赴难手锄元恶卒涣其羣制府以状闻朕何爱爵秩不以旌汝然常胜者兵家之所虑数幸者往哲之所戒汝其谨之重之周之密之毋希功滋事可

郝容权发遣均州军州兼管内安抚京西路兵马钤辖均金房达州兵甲事制

勅具官某武当在盛时为山水郡往岁北兵闯署关涉均水繇襄邓以蹙残金遂为上流重镇出总边琐实难其人尔稟姿骁雄洞识机略命为郡将兼总兵钤以卮金达房陵之冲其思练民丁严斥堠镇压一面以宽朕西顾忧可

繆梦达权发遣琼州琼管安抚制

勅具官某琼山在海中洲居控扼生熟黎峒一百二十聚落广南要地也郡将之任盖难其人尔沈鸷而明果艺以达专城之任今以命汝惟恩威并用可以使将士惟忠信素孚可以行蛮貊念兹鉴兹俾朕无南顾之忧可

繆梦达权发遣宜州兼广西兵马都监制

勅具官某宜城控牂牁诸部岭南要冲也郡将之选盖难其人尔沈鸷而明果毅而达专城之任今以命卿惟恩威并用可以使将士惟忠信素孚可以行蛮貊念兹鉴兹俾朕无南顾之忧可

王霆改知光州主管蔡州安抚司事制

勅光古弋阳襟带淮甸当蔡息道接界边疆具官某宽而强勇而义牧人御众有翼有严边陲方骚赤羽如日沟河勺水一苇可杭故从濠梁易填兹土仍秩右武就分左符勉图康功以答隆遇可

尤焞授淮南路运判兼权知庐州主管淮南西路安抚司公事制

勅具官某朕爱护人才如护嘉木长短小大各裁其偏而器使之盖欲以待材用之宅也尔乾道淳熙名臣之孙浚明而文淹洽而辨一摛七载才益老气益坚悍抵掌谈功名益不衰朕尝试之枢掾矣淮淝重镇帅事久虚是用辍汝将输共贰其事尔其念食者生民之命兵者不祥之器谨之重之毋使佳兵而食不足则惟汝嘉可

张可大授武显大夫添差淮南西路马步副总管依旧知壽春府制

勅具官某壽阳前控陈颍後蔽光丰寔今南北重镇尔忠忱果毅为诸将所推往乘其障於诸叛连衡之冲乃能修筑城堡调壹归附独隐若一敌国焉亦可嘉矣何惜一阶不以旌汝益壮尔猷嗣有褒用可

李虎授左武大夫依旧达州刺史知淮安州制

勅赵苞对阵之语孰如徐庶之思念其亲温峤絕裾之风岂若冯勤之贵显其母不图薄俗复见斯人具官某胄出山西声驰漠北段枪而刺元恶顿清淮海之尘尺箠而鞭羣凶尽拔高邮

之帙功虽高于李愬义弗背于张飞嫪言諉草之怀用有翟茆之请载披柔牒特晋崇阶求忠臣于孝子之门既膺妙简令刺史居牧伯之位仍懋显庸多而战功光我休命可

李大声授武节郎游击军统制制

勅具官某结髮从军累能办贼戍濠备塞以鸷勇闻今又进秩而陞于制府矣沿江千里吏阨如黑虎当道朕何忧可

赵汝擢授州刺史权知德安军府制

勅具官某唐制州刺史即郡太守也国朝以遥刺典藩名称少异汝以宗英曾守淮郡扞城御侮厥有成绩朕已增秩因任矣德安古郢子国仍以使名賁之州绂往懋乃功可

江显授常州刺史充亲从第三指挥都指挥使制

勅具官某古者天子必有亲军今之亲事亲从是也尔沈勇忠实夙夜有劳比及三年实应迁格仍都使号兼绾州符勉竭勋勤以报荣遇可

袁晟授湖州刺史充殿前指挥使左班都虞候依旧押行门祇应制

勅具官某朕有熊罴之士掌先後王以虞度眎候为职其选严矣尔纠纠武夫之勇番番良士之忠比及三年厥有成绩肆升华于州刺仍祇事于行门思懋厥修少寛予恤可

王亨授忠州刺史制

勅具官某武臣副使非有功效显着不帶遥郡令格也尔沈鸷善谋忠勇寡二控扼睢口已跨一年扞城之功实冠诸将兹秩彝比陞刺望州体予异恩懋尔嘉绩可刘廷美授秉义郎开州刺史充京西路兵钤制

勅具官某襄州上流重镇迺者叛贼嘯凶墮我金城虽握兵之将貔虎熊罴之士弗能扞尔以樊城土豪乃能獎率义旅驱贼徒而殲之昔人称一寨户之勇过于禁兵百人子之谓矣捷书夜闻朕用嘉叹陞华遥刺俾总兵钤尚有功见知之意可

卷九

<集部,别集类,南宋建炎至德佑,鹤林集>

钦定四库全书

鹤林集卷九 宋 吴泳 撰外制

陈洵益授随龙右武大夫庆州团练使制

勅朕惟太仆之道王闻於礼?御之忧国见於诗给事官省之臣傥能旦夕承辟左右宣劳则朕亦何爱官爵不以荣宠之耶具官某专良而慧敬谨而能留代邸者有年潜跃皆随於龙驭居王朝者累载缉熙常侍于燕闲属解职於内庭遂转归於铨部载囊御器仍典戎团尔其服诗礼之箴佩忠信之胄毋嫉庄士毋进侧言各率其属惟正直是与则予汝嘉可

叶俊授郴州团练使充亲从亲事官都指挥使制

勅具官某羽林天之壁垒武卫王之爪牙地禁职严盍遴其选尔老於亲从擢自都将忠勇勋力皆有可称畀之州团服我休命可

蔡兴授州团练使提举宫观制

勅祈父之诗曰王之爪牙胡转予于恤夫不转于忧恤而转于安佚者是固六军之士所深望也具官某沈毅而勇淑均而良神策诸军既共武卫濠梁大郡久带戎团今旅力既愆矣式正使名畀休禁务尚体闵劳之意可

李实授同州团练使庆元府兵马总管制

勅汉虎贲宿卫积久必迁唐神策正官依资改授今之三岁转员尚其制也具官某以拳勇选以忠实着既掌先後王之旅又兼左右厢之屯比及三年厥有劳効进戎团之任陞总府之华兹盖优恩尔尚迪果毅以对休宠可

李载授州团练使依旧带御器械制

勅具官某国朝以皇城使比文臣为亚卿其选重矣每三岁一迁厥有彝比尔才毅而武机沈而雄躬佩囊鞬日侍左右亦既有劳矣落遥刺之阶进戎团之任尚仍故职往服新休可

辛?授州团练使依旧带御器械制

勅唐旧典皇城宫殿诸门命官赏其开阖之节奉其管钥而出纳之谓之城门郎今之皇城司是也然非横行御带不领其事具官某才毅而武机沈而雄躬佩囊鞬日侍左右亦既三年矣落遥刺之阶进戎团之秩尚仍故职往服新休可

倪祖常授军器监主簿制

勅具官某见乔木而思世臣爱甘棠而思召伯昔嘉定更化尔考思为侍从之臣立朝有渠度论事有风槩朕尝思得若人而用之以尔实世其家擢司奏邸兹又属戎监以官其能若厥父菑厥子乃弗肯播则非朕之所闻也可

朱复之授军器监主簿兼权知惠州制

勅具官某惠阳於东广为望郡比者戎兵煽乱跨州连邑皆吾牧守不能绥御之遂干我王略尔经济之才器识宏迈光泽讨贼曾上首功儒者之知兵子之谓矣博罗新毁尔出长之武监旧官尔薄正之尚其一乃力宣乃猷母谓广远於人所不闻知处留意以答扬孝祖之光训朕将有望焉可

黄梦龙特补修职郎差权万安军陵水县主簿兼县事制

勅具官某黎人之为陵水患久矣尔父奋不顾身采入其阻仅能复所侵邑竟死王室朕念功未已任汝以官尔宜裕乃父功长于新邑可

康守正授容州观察使特改添差两浙西路马步军都总管临安府驻劄不厘务制

勅朕修文德以来远人弃细故而阶大道凡列藩卫并为王臣具官某生长殊邻扳援贵胄截我淮浦岂无婴城拒守之私归予齐疆终有慕义来宾之意昔涖抚于属国今召趋于阙庭涵濡华风密迓皇化既擢升于廉使仍典总于戎旃朕方弘孝庙之规模尔宜効萧巴之恭顺往祗明命嗣有宠休可

王温补忠训郎差充忠勇诸军统制应天府驻劄王亨授武翼郎差充应天府兵马钤辖制

勅具官某等朕抚有方夏悉主悉臣尔本吾编氓久隔王化挈下邳而归顺控濰口以扞边备罄忠劳合加宠数用峻跻于武爵仍总率于新军益懋厥功嗣有褒用可

张天纲授武翼郎添差隆兴府兵马钤辖制

勅某春秋书潞子之爵汉史纪阳侯之封既曰来庭讵无锡宠矧尔仕於伪国隔絶中华天讨所临穷而归我朕以天地为心靡不含覆如守者挈属内附尚冠带而臣妾之则汝天纲何惜武爵戎钤不以畀汝可

王克谦起服淮西安抚司准备差遣制

勅具官某銓未试而筮仕丧未终而入官皆非古也尔甫受一阶遘丁家难淮堧阡帅请以驱驰用颁夺情之恩宜服移忠之训可

邹公銳起复添差东南第二副将制

勅具官某子墨纁經礼之变也後世夺情之典实仿乎此尔奋身右庠晓畅军务遭忧之久朕惜其才起而用之尚求忠臣於孝子之门可

张应珙起复差充建康府都统制司干办公事制

勅具官某三年之丧天下之达礼也春秋以来有墨而从军者焉尔身都戎幕适值内艰矧当多垒之秋盍用夺情之典其还旧次移孝为忠可

赵葵降授中奉大夫依旧兵侍兼淮东制置使制

勅褚裒指泗口以出征咸谓中原之可复彦之得河南而不守坐隳成业以空还每思古人深惜事会具官某志非不勇才亦长雄戮鲸鲵于淮甸之东共推忠壮将貔虎于涣河之北自许驰驱既收应天复捣清汴所宜抚新附吊遗黎峙糗粮而足军强士马以待用而贪功向洛值寇突防九畿之藉既归旋闻再失两军之士未愍亦复俱犇总戎若斯为国何赖姑正二阶之罚以符衆论之公傥能思过於箕谷不戒之初尚可图功於殽师既败之後可

赵葵叙复太中大夫依旧兵侍淮东制置使知扬州制

勅秦不以孟明于殽之败而复其政晋不以林父于邲之刼而复其官矧有道之清朝无弃人之絶法具官某以熊罴之帅握龙虎之韬自城维扬常志漠北仗钺以清河洛之境志气甚雄班师而回毫泗之墟威名稍减虽胜负兵家之常势然刑赏王国之大权有过则镌以劳而叙况边声之靡定而国步之斯频所在兵骄因之财匱弟兄相友二龙既共卧於辕门将士贵和两虎岂宜鬪於私室各摅忠愤协济艰难可

范用吉叙复武翼郎高州刺史制

勅具官某赏罚军国之纪纲迹者洛师之败坐视弗救尔之过也久任边面仗义来归尔之功也功过不相掩庸威不偏用朕何心哉甄叙元阶勉思来効可

王夬亨叙复通直郎差充沿江制机制

勅具官某观远臣以其所主向者尔倅合肥控於吏议今沿江帅臣谨简机幄而以习知疆事

闻观其所主则其人可知矣甄叙元阶往裨密议可

颜戮叙复通直郎知琼州乐会县制

勅具官某观远臣以其所主尔向者试邑广右绥御黎人能服其心咸以父事前经略使胡槻以其议论弗同而劾之後经略司丁黼等以其筹略可采而进之观其所主而其人可知矣甄叙元阶仍宰故邑固欲安之也可

夏全叙复武功郎特添差京西路马步军副总管襄阳府驻劄制

勅具官某山东义旅本皆孝子顺孙逆雏背恩相挺为乱至使尔等舍乐郊而北去尔既回心向顺矣国朝春育海涵念其穷而归我特叙元阶仍总军政彼死安用尚与节度若汝能生立奇功则高官厚禄朕又何爱焉可

全子材降授朝散大夫落直秘阁差知随州制

勅淮西安抚使全子材始躬率戎士繇淮堧渡淝水登北狼山涉项城胡子之国转战数千里遂臻汴都尔亦自谓一世之雄也而轻於向洛仓猝遣军敌之兵刃方交我之师心已溃春秋责帅尔尚何辞其上四阶降为汉东太守可

黄孟先降授朝奉大夫周汝霖降授朝请郎制

勅具官某等昔陆余庆罢魏州有车一乘图书半之此士大夫去官法也尔孟先提舶广南尔汝霖司臬湖右不能酌贪泉以自励而乃总货宝以自丰被论得祠宜发深省又复航琛輶軿以归私室视余庆岂不腼顔乎各镌二秩以惩百吏可

马执中降授朝奉大夫虞方简降授通奉大夫高泰叔降授朝议大夫鲜于光降授朝请郎制

勅具官某等周以岁会考四国汉以殿最课郡县我孝宗皇帝以臧否考察郡守事实皆良法也朕捐四蜀之赋供饷西师日告匱乏尔等不思庚癸之呼而纲解稽违动失期会王人课殿来上岂容不少惩以存体统可蔡廙降授朝请大夫方淙降授朝请郎落阁职制

勅具官某等行轻则招辜扬雄所戒进銳其退速孟氏所讥尔廙少年入仕足高志扬尔淙蚤岁登科神躁心荡坐享丰腴连典名郡弗自谨飭贿赂章闻其所以致此者轻与銳成之也台评屡上朕不敢私各上一阶罢祠褫职庶几德薄而位尊者亦知所警也可

赵汝楫降授朝散大夫黄汉章降授宣教郎制

勅具官某等科举之法自唐已弊矣若士以正应有司以公取则法虽弊而人犹未弊也今言

者谓汝楫之请托汉章之徇私则有弊人矣朕方革去旧习以新美多士则汝等一阶之罚尚何辞可

郭伯良降授朝奉大夫杨垓仲降授朝散郎制

勅具官某等周官以岁会考岁成以诏废置此殿最法也尔等仕於闽中既以殿闻罚其可追哉各镌一秩以警慢官可

邹应龙落徽猷阁学士制

勅黯能极言以补禁闕之缺而居官亡以瘳人城能引谊以辩忠臣之诬而为政率书下考今有仕为侍从中外践更直声夙着於朝端治行弗闻於州里是不可以一眚而废其德也具官某蚤擅抡魁之望偏仪华序之清三仕於朝独行其道在嘉定时则有封駁皇子之疏在宝庆时则有留行侍臣之书风节之高搢绅所重岂期去国之後曾乏好仁之称居乡无睦婣任恤之声治郡无岂弟循廉之誉纷台章之交上凜王度之靡容肆从公言姑寢新命尔其充仪朝之德美以善俗励事君之节操以表民勉图令猷以俟褒诏可

吴潜落秘阁修撰制

勅朕惟祖宗旧典举进士第一必历三司盐铁使王蔡诸人尤其显者虽荣贵素定而必烦之以财赋之任盖所以老其才也尔以抡魁之彦出都赋輿当军饷急迫中乃能捐民租至八十余万可以为难矣朕方擢承密旨以旌其劳而言者谓汝违道干誉朕亦安得庇汝耶虽然往蹇所以来硕习坎所以维亨尔其再思以俟复用可

吴渊落右文殿修撰制

勅具官某左丘明谓元凯为才子扬雄谓公仪仲舒为人才之首才固未尝不善也而过用其才则咎之招也尔名父之子朕敏好修寘之省闕见谓才选而乃不自韬晦好多上人纪纲之地不以心兢而以力争汝安得无过欤落书殿罢宝冶所以玉汝傥能思牝牛之为吉知木鸡之为全则用之未晚也可

吴愈落焕章阁待制制

勅朕闻长江备风寒不过数处尤重武昌元帅閱礼乐使将中军何拘文法若身谋之太甚亦邦宪之靡容具官某奋自儒家骤升朝列舒徐和缓雅宜豹尾之班福厚奇龐似有虎头之相然而色庄而胆薄志广而材疎蒙冲坏而不修卒乘单而不补金刀龟具不以资国用而以厚橐装竹屑木头不以备军需而以营第宅但有问舍求田之志曾无誓江击楫之风以若所为难胜其任爰览抨弹之疏遂从褫罢之文尚为宽恩庶发深省可

卫朴降授朝请郎赵汝扞落阁职制

勅具官某等监司列郡之仪表而京漕又诸路监司之仪表也尔朴名父之子轻儼疎爽尔汝扞天族之支机巧健决亦号治辩观风畿甸不务廉平以风四方而卷公府之金以自丰事鞭靴之馈以媒进使人人累数其过於有司朕岂得庇汝耶贬秩罢祠肃傲羣慝可

翟朝宗降授州团练使制

勅朕闻周礼有馭臣之柄春秋存责帅之文苟戾纲常曷逃宪法具官某曩从领合出典维扬以轻儼之资当重大之寄边人有警既不能援桴鼓以出征戎帐无筹但只欲歛金帛以求好爰观吏议合寘严诛尚念尝侍轩墀弥历岁月姑削停于祠廩仍降授于戎团是曰寬恩勉图来効可

荆世显降授中官正周奕降授春官正制

勅具官某等以圭测景日官职也夏政典以先时不及时者无赦矧国有大事分陰不容以毫厘紊尔尸厥官藐焉视之不职甚矣其下一阶以戒食焉而怠其事者可

沈杰降授保章正制

勅具官某昏迷于天象古有常宪尔相我文母山陵之事而圭测不?晷度差舛失职甚矣姑镌一级以警旷官可

刘燧可特授拱卫大夫依旧和州防御使致仕制

勅束带立于朝服劳滋久安车致其事敷奏甚勤具官某端粹而靖夷肃庄而嫺雅从容二合周閱两星与宾客言方喜仪章之慎慎劳侍从事乃祈心志之休休遂升拱卫之班仍领扞防之秩庶华而老以广朕恩可着作佐郎兼权屯田兼崇政殿说书叶味道特授朝奉郎致仕制

勅具官某朕承先帝圣绪涉道未深嘉与四方耆隲之士讲论经理而师意指殊圣真未一惟尔行谊纯淑源流深长熹之四书洞究精蘊朕方以为得师而遽致其事寧不怵然今燔已议礼饬终干亦欲尊名赐諡况汝日侍金华亲相启沃则晋一阶以华其後尚何爱焉可王用亨授武翼郎合门宣赞舍人致仕制

勅具官某亲亲贤贤此周家享国之道也尔敬谨祇恪廩乎祠官厥疾弗瘳欲挂冠神武门外朕以其为荣王戚属岂不念之晋陟一阶宾赞上阁以致其事可

鍾武授武经郎致仕制

勅具官某少而陈其力病而养其衰固人情之所欲也况尔沈毅而勇练通而明以淮南副戎贰郡东海拊麾安集备着勤劳今以病闻乞致其事朕心悯焉陞之一秩以华其退宜专辅养期以永年可

翟朝宗叙复潭州观察使致仕制

勅朕惟明哲保身诗人之至戒见险知止易卦之格言矧惟擢胄之臣亦识垂车之义露情如此抚奏惻然具官某本以中才班於上阁束带而语宾客进若有文据鞍而问甲兵退如不武虽忝熊罴之帅曾无虎兕之防人得致疑朕难废法尔今駸駸加病惓惓输衷欲思末路之免愆乞以前官而上事乌哀鸣於将死谁闵厥勤鹄无毁於卒荼复还其旧庶几没齿仍戴宽恩可

张鎡追复奉议郎致仕制

勅具官某国家以法绳士大夫而以恩绥之未有终身放焉而不齿者也尔勲臣裔孙逮事先帝文雅才艺殊无将家之风一愤二纪遂死瘴乡士之不幸亦可悯矣尽复元官泽及後嗣焄蒿如在光宠知歆可

卷十

钦定四库全书

鹤林集卷十 宋 吴泳 撰外制

皇叔祖多谟父居端赠太师制

勅明堂祀上帝已迎申命之休斂福锡庶民式霈漏泉之泽眷言近属申贲祔宫具官某故父某英祖之支吴王之裔甚德而度不讐朝会之仪大盈若冲弗倨留台之贵虽抱才而未究然积庆之有传是生嗣贤相我熙事用袞大享之佑以为幽局之荣太师维垣位既跻於一品季授土封仍袭於大邦营魂有知服命无斁可

皇叔祖多谟母任氏魏国夫人制

勅朕宗祀明堂均庆宇内睠予同姓之老可後显亲之恩用遵旧章申锡愍綏具官某母某氏稟性柔惠处身俭慈出自德门嫔于天族是生令子相我肇禋鸿霈诞敷易函秦之旧壤龙光叠被开全魏之新封尚其淑灵歆此休命可

皇叔祖多谟妻闻人氏封齐安郡夫人制

勅朕受厘祉均庆公卿大夫之家而况宗妇之懿夫尊於朝者乎具官某妻某生自华胄嫔於德门饰珩璜象服之仪躬沼沚采繁之荐见之内助藹有芳猷兹熙事之展成宜麗恩之覃被正二品小君之位启齐安大郡之封兹谓徽章勉服休命可

皇叔祖多谟赠开府仪同三司追封崇国公制

勅朕磐石奠国宝玉展亲生则累茵列鼎以疏荣歿则綏印蜜章而广孝可无愍饰式贲营魂具官某躬雅静之姿肖神明之胄读河间之书而道之以学履江夏之贵而守之以谦久持节钺以奉朝乃畀祠庭而主祭天胡不憖人遽云亡永怀同姓之宗特广漏泉之泽既秩之以仪同之礼复胙之以崇国之封兹谓徽章祗服休命可

皇伯希瑛赠开府仪同三司杞国公制

勅仁莫厚於睦亲义莫隆於追远朕率是道以绥有邦虽云属籍之疎亦懋饰终之典具官某躬有常之行居不竞之途敬谨威仪弗恃廉车之贵缘饰儒雅藹如素士之风曾不遐年奄至大故仪台视秩胙国启封知无及於生前尚有光於身後灵而不昧式克歆承可

皇伯希?父师钊赠和州防御使制

朕躬执瑄币祇见泰坛式袞帝休均庆有位肆予助祭之老可後显亲之恩具官某蔚为宗英綽有雅度自秉靖共之操习亡礼义之愆官不满能报在其子用进兵防之秩以为泉户之华营魂有知膺受亡斁可

皇叔希 贈少师追封咸宁郡王制

朕遙祇先猷笃叙同姓生则展宝玉之爱歿则裂茅土而封爰锡愍书以贲幽壤具官某肖神明之胄躬雅静之姿读河间之书甚德而度履江夏之贵大盈若冲久持节钺以奉朝乃畀祠庭而佚老云何不淑罹此凶永怀死丧之威特异哀荣之数冠之以左棘孤卿之位疏之以蜜章三襚之恩尚其英灵歆此休宠可

皇叔希 贈少师追封郡王制

勅三雍宫之赐对汉河间以儒雅称五原塞之耀兵唐江夏以功名著若匪一时之显擢则将没世以无闻朕於宗族之贤不以死生而间锡兹愍册贲若幽局具官某帝胄之潢天孙之岳被服儒素蚤有能文之声奋身仕林泊无负贵之习而况夙闲戎务屡罄嘉言方提军以遏峒寇之披猖真儒者之勇将谢事而论禁兵之单弱尚宗臣之心朕於初潜之时属尔大雅之望云何不淑罹此凶既生不能胙土之封则歿当有蜜章之襚爵隆五社秩冠孤卿岂独慰九泉之思盖将劝庶邦之义可

故巴陵县公竑追复少保宁武军节度使济王食邑四千户食实封一千五百户制

勅朕惟昔我太宗友於秦邸貶涪陵之秩不能废天下之大公追王爵之封於以笃人伦之至爰周公之圣所未及文帝之仁所不如肆予冲人式是祖训具官某?分天属职重宗藩以梁爵之亲方受食国居官之宠若东平之乐庶坚处家为善之思事有不然人所共叹遽以一朝之变迫於羣狡之谋州无谨备盗贼之臣府无康正礼义之傳竟底於戾如痾乃身朕尝谓仁人无藏怒宿怨之私王者有因心则友之爱还锡青旌之节仍疏赤社之封贲以孤卿胙之采邑孝悌之教不改予其昭示於本心死丧之威孔怀尔尚式歆於异数可

皇伯希?妻郑氏特封郡夫人制

勅朕惠綏邦族燕及家人班视袞章既愍元侯之贈荣加翟茀载疏宗妇之封越诸丕彝华以异数具妻某氏秉心婉孌率履端良生於德门姆训不越作配天属栖范有严合賡偕老之诗俄赋栢舟之什朕兴嗟既往加劳生存用覃石窆之恩特畀小君之宠服予休命保尔壽祺可

毛氏以皇后谒家庙恩特封国夫人制

勅朕遙祇先猷嘉惠左戚拥翟车而归谒既遵乾道之彝疏纶诰以展亲率用绍兴之典推本庆源之自宜加宠数之隆具位某氏性德柔嘉丰仪燕婉不愆於履尚闻松阁之清风有淑其

声肆衍椒涂之芳润用循故实载畀恩章久荒大国之封兹锡嘉名之宠承予异渥燕尔壽祺可

皇叔希邇故妻石氏赠硕人制

勅合宫备享熙事汔成厥有同姓之卿实修助祭之职可无骏惠贲及私庭具官某妻某懿范出於名家柔风着於中樞式相其事亦云有年既不诵君子偕老之诗则宜受硕人其硕之祉尚其盼矚来服宠灵可

赵氏改封东平郡主赵氏改封文安郡主制

勅妇从夫爵古之谊也惟内女之妇者则爵邑不系於其夫具官某妻某氏素含柔风率用祇德饬珩璜之佩不愆於仪共苹藻之羞动合乎礼永惟文母班祔皇姑用疏戚畹之恩仍开汤邑之宠尔其思贵名之难保戒宠禄之易骄则於有家永其无斁可

同知枢密安丙赐諡忠定制

勅班超数征西域而生不过定远之封葛亮时出秦川而死仅加忠武之号能兼二美代不数人具官某本以儒瀛荷兹戎重其魁奇足以开物成务其沈毅足以御侮折冲奉诏而讨元凶几白忧时之髮奋身而诛羣盜益丹报国之心烂然殊勲载在盟府朕每念宁考图功之志若稽先朝恤往之恩义莫重於辍朝仁莫荣於诏葬独惟諡典扼以柄臣属多垒之未清拊遗忠而慨叹蔽自朕志锡之尊名以旌虑国之劳以示安民之灋噫咸平之於张咏曾着徽称嘉定之於汝愚亦昭异数盖存则有勲劳於四蜀而歿焉无愧忤於九泉以此谥卿庶几称德可

史弥坚赐諡忠宣制

勅朕惟汉以共节諡韦贤韦成而弘之行不显於世唐以正宪諡苏瓌苏颋而诔之名不闻於时今有父为忠定兄为忠献而抱元身之直处翁季之间生不失天下之令名死复都朝廷之美号兹岂韦苏之门所可望哉具官史某以八行之家居四明之望逮事宁考曾为从臣机神足以爽邦文雅足以饰治入则戎冠簪笔谋猷于内惟汝嘉出则握节秉麾左右有民惟汝翼虽洵更中外之任尝力避权势之嫌在熙宁则不党於熙宁如安国之於安石在元佑则不趋於元佑如大临之於大防虽锺和乐之情不替箴警之义肆予嗣服恨弗即庸至一纪之投闲竟九原之弗起嗟无及矣痛莫甚焉既疏之以资殿之荣复秩之以仪同之典仁莫先於追远哀恻已刻於蜜章义莫重於易名尊显复厥於匱諡不待颂台之议特加亲劄之褒噫惟纯仁之忧国爱君始膺异数惟洪皓之衔命仗节方称嘉名母俾两贤独专二美可

赵方赐諡忠肃制

勅朕闻真才之生宇内疾没世而无称公论之在人心至闔棺而始定弗诏徽号曷昭元勋具

官某磊磊人中之豪奇奇塞上之宝逮事寧考作镇襄州由唐邓以图中原无与贼俱生之志援江淮而连巴蜀有鞠躬尽死之心勤劳十年忠恪一意奈规恢之未半忽殄瘁之兴悲朕方听鼓鼙而思将臣閱礼乐而谋元帅每嗟一老恨不同时涕连南岷之碑爰及西平之子虽不壮行不铭墓固往哲之高风然以壹惠以尊名尚先王之成宪肆举饰终之典用彰成德之休夫虑国忘家之谓忠正已摄下之谓肃合兹二美贲於九原噫执爵以怀羊太傅之功托旒以着杨荆州之诔尚旌既往以励方来可

郑性之曾祖已贈太子太保制

勅立公设辅惟其人尤重副枢之选自仁率亲至于祖莫如皇考之尊既钦四邻式贲三庙具官某曾祖具官某鍾全闽之秀袭大郑之芳蕴德未施流光在後诗书浸灌登唐朝童子之科议论深长策汉世名儒之第今以辅臣宠数追远蜜章进储宫上保之官为宗庙不祧之祖英灵如在彷彿其承可

郑性之曾祖母陈氏贈太宁郡夫人制

勅生珠之渊必深栖凤之冈斯远庆流三叶积岂一朝具官某曾祖母陈氏躬嫔令仪世载淑闻系以北陈之谱不显其光嫔于南郑之门克昌厥後参我右府实其曾孙易以大郡之封仍以小君之号吁其盛矣尚克嘉之可

郑性之祖獎封太子太傅制

勅郑康成以经术名世而小同官至侍中郑余庆以文学致身而从党位登辅相均以诸姬之後至于再世而昌遗风甚高千载如在具官某祖具官某植道淳固立心裕和语言文字之香远追作者翰墨笺题之妙自成一家眎轩冕如傖来期门闻之必大伟哉孙子时我宝贤诞疏西府之恩晋陟东宫之傳申命有宠尚其知荣可

郑性之祖母陈氏贈文安郡夫人制

勅朕诵莫莫葛藟之诗观离离桐椅之什一则原世德之自起一则喻孙枝之既蕃若非栽培何以貽燕具官某祖母陈氏淑谨恭俭宜其室家硕大光明茈在後裔推迹施于之祉载流烝畀之荣前则鱼轩象揅以新石窀之封今则蜜印丝言以大任丘之宠用昭愍饰式慰孝思可

郑性之父汝永贈太子太师制

勅乡之善士斯友善士既培积庆之源子为大夫祭以大夫允重显亲之义肆登近辅申贲衮官具官某父具官某在约而平寬居家而敬谨乘下泽御欵段不好矜持崇高节抗浮云每安冲澹能教其子克昌斯文菜与阶齐卒兆龙头之选木临匣口竟占枢字之祥嘉其义方式是恩宠仍进宫师之秩永为泉隧之光可

郑性之母黄氏赠和政郡夫人制

勅朕闻教顺由亲始当推六行之原积善以家言盖匪一人之力瞻言贤辅实自母仪具官某母黄氏齐明靓庄淑婉循嫔奉姑以柔嘉之则教子以忠孝之言终有令名为吾良佐虽生不逮釜锤之养而歿犹疏汤沐之封古岷大邦象服休命尚尔泉丘之秘知吾渥泽之临可

郑性之妻潘氏赠平原郡夫人制

勅朕惟夫尊於朝妇贵於室今古一道死生同荣具官某妻潘氏笄珈象服之美以宜其夫筥釜潢污之清以相其祀中馈尔职嘉嫔尔共方当夫人之起家亦念君子之偕老命之不淑荣弗逮躬载言翟茀之空莫睹鸿枢之贵晋封名郡用贲笄台庶几兰荪之共芳不与草木而俱尽可

陈卓曾祖嘉谟赠太子少保制

勅朕惟太微四星天枢为近大夫三庙皇考实尊既膺基命之荣当衍曾门之庆具官某秉哲迪义为时闻人抱道而不永于年守官而不究其用蔚有善行施于曾孙为吾宗工晋登宥府载举饰幽之典以伸追远之思班之宫寮华尔泉窆尚其营魄知享宠休可

陈卓曾祖妣黄氏赠上饶郡夫人制

勅朕妙柬耆儒进登密席异数絶百寮之表愍章疏三世之恩某氏嫔于德门懿彼闾范淑谨恭俭宜其家人硕大光明流于後裔集有曾孙之庆出为二府之臣种德之功其报不远载锡小君之命仍疏大郡之封灵如有知歆我殊宠可

陈卓祖膏赠太子太傅制

勅朕惟陈钦以议法名世而宠至司空陈实以好学致身而羣为辅相均曰有勗之後至于再世而昌遗风甚高千载如在某植道淳固立心裕和漫仕周行班甫升於卿月退居里社光已铲於德星独留手泽之芳衍作孙枝之秀陞华宥府为时名臣是用伸其尊祖之心需我漏泉之泽特进居文阶之首虽衍旧封太傅极官臣之荣载加新命是为异数以发幽光可

陈卓祖母汪氏赠鲁郡夫人制

勅朕惟流之长者其源深叶之茂者其光沃矧方崇尚孝治登庸枢臣肆以施于之恩饰其絜畀之典某氏躬有懿行嫔于名卿其在母家则克勤女工其相君子则蔼着梱范可以为仁矣是宜有後哉故生文孙作我近辅用赐周公之宇以华小君之封?然宠光慰此柔魄可

陈卓祖母蔡氏赠魏郡夫人制

勅朕畴庸硕辅推本庆门徂赉孝孙则惟其贤烝畀祖妣则饰以礼诞颁愍册追贲幽局某氏云仍上蔡之家天合有妣之後滋植德本有开後昆是为枢臣参我国柄仍小君之旧号开大名之新封尚惟淑灵其克嘉享可

陈卓父居仁赠太师制

勅朕惟事君以道父所以教忠扬父之美君所以教孝矧予禁从之老载陟枢密之庭率循旧章追贲祔庙具官某器资端亮才识敏明自着武於清班遡跻华於要路在孝宗时则入侍甘泉之橐在光庙时则出分元帅之麾王言如丝出如纶凤衔密命大蕃为屏宗为翰虎踞上游官未满能晚而谢事庆流哲嗣晋陟洪枢弘化貳公虽积承於愍册维垣极品兹加贲於蜜章尚其幽局歆我明命可

陈卓嫡母王氏赠镇国夫人制

勅国以贤为基母以子而贵矧予近辅晋翊鸿机既颁异恩以隆陟謁之报可无愍册以慰凯风之思具官某故嫡母具官某氏女德妇功为世闾范有光彤管之训不愧采蘋之诗即其宜家是以有子因陟枢庭之始载疏石窀之荣爰易郡封奄受方国尚其柔魄歆我休光可

陈卓所生母俞氏赠新安郡夫人制

勅春秋之义母以子贵今吾阁老登进宥密之庭岂忘綈章慰其劬劳之感具位某氏淑婉有仪恭勤不懈辅佐君子极於显荣载生名贤汔至鼎贵是用循国家之旧典易小君之新封尚惟淑灵歆我休命可

陈卓妻林氏赠信安郡夫人制

勅朕畴咨公望登进儒臣书殿隆名既畀以机密之柄綈章异数又伸其伉俪之私具官某氏以嘉定从橐之家淳熙侍臣之子克谨妇道相成夫君曾未赉偕老之诗先已赋悼亡之什鸿枢之荣不见象服之礼未宜兹吾辅臣盖有遗憾小君示宠大郡启封倘逝者而有知尚服之而无斁可

沂王夫人俞氏父俞治赠潭州观察使制

勅朕惟若昔厚陵加惠濮邸凡仙游之若父若母皆与封赠盖先制也矧沂王夫人之亲其可缓愍章耶具官某稟姿端醇与物和裕蚤缘姻娅逮事先朝朱合通班夙着舍人之样戎团分总歿跻诸使之荣兹诞霈於隆恩复陞华於廉察九原有识尚克知歆可

沂王夫人母刘氏赠惠国夫人制

勅朕【云云同前】盖先制也矧予近戚可缓愍章耶具官某妻某氏性稟柔嘉躬履慈俭藹有闾范以昌德門是生淑媛妃我沂邸茲覃异渥用贲幽局仍小君之旧封开大国之新命淑灵未泯宠数钦承可

何进特赠节度使右金吾卫上将军制

勅朕收图书而知厄塞之处每严蜀道之防听鼓鼙而思将帅之臣必及山西之彦云何中道忽丧元身具官某朴忠而有谋真勇而无敌身鏖百战曾收荡寇之勲义激三军时有灭讐之志当北骑溃防之日正王师思奋之秋而功力常分於备多事机屡失於遥制遂賫忠愤竟死封疆昔李广之歿而三子为郎张巡之亡而百世庙祀朕之恤汝无愧於斯更加双节之荣复班二品之贵以甄壮烈以励贪夫可

赵传夫弟伉夫父彦轼赠特进制

勅朕躬执瑱币只见泰坛虽当恭默思道之时不废齐明承祀之典嘉与文武之士均其神天之休具官某蔚为宗英绰有雅度抱才自处官不满能积庆所鍾报在其子或践武阶之峻或登禁橐之清推迹本原用彰愍饰进其位叙特以上公是为泉壤之华且慰霜露之感可

赵传夫母段氏赠定襄郡夫人制

勅朕读蓼莪衔恤之诗观閼宫燕喜之颂一以不得终养为戚一以既受多祉为荣推原人情是有赠典具位某母段氏柔嘉淑谨式是闾仪温敬齐庄共于典祀命之不淑没有余哀用开大国之封仍正小君之号不但慰思亲之望庶几广教化之仁可

赵传夫母连氏赠秦宁郡夫人制

勅严父配天国之大典以子贵母古之彝章矧兹禁从之官相我明庭之祀尚何爱於爵赏不以成其孝思具位某母连氏淑谨有仪柔嘉维则亲执錡宫恭俭以相其夫笃好图书仁爱以昌其後生不终养没有余哀载疏大国之封庸正小君之号九原虽邈不显其承可翟朝宗弟崇故父显赠保康军节度使制

勅朕躬执瑱币祇见泰坛喜与文武之臣均共神天之庆用袞祭泽申贲祔官具官某以武发身以仁裕後戎容暨暨生不侯封蜜印煌煌没以子贵茲因宗祀重衍庆条再颁鹖绶之华益侈蠡封之宠灵如未泯休克歆承可

翟朝宗嫡母杜氏赠信安郡夫人制

勅朕惟严父配天国之大典以子贵母古之彝章用敷享帝之休爰霈漏泉之泽具官某母某氏挺生望族来嫔庆门均其鳴鳩之仁毓我熊黑之士茲汔成於熙事宜申锡於愍书正位小

君启封大郡柔魂未泯茂渥其承可

邓彭年赠节度使制

勅朕惟爵禄天下之公器也劝功懋赏未尝以私?之爱而妄加送往貤恩亦不以近习之嫌而终废具官某褫身谨饬植志忠勤粤自淳熙已服劳於南内讫于嘉定遂参领於北司久矣投闲奄其沦谢朕念先朝之簪履特颁内府之节旄用招嘉魂式賁泉路灵如有识尚克祇歆可

李大昌加赠武康军节度使制

勅国朝旧制非勲绩显着者不除节钺渡江而後稍寬矣若赠官则所不吝也具官某忠实敬谨谙於吏道事朕初潜历年滋久以攀附之勤当享遐福命之不淑遂至云亡则亦可伤矣赐之旌纛姑示饰终之典可

麻申特赠武功大夫遥郡刺史制

勅具官某朕置武功之赏以宠战士听鼓鼙之声而思将臣既陷元身可无愍典尔本山西之杰驰漠北之名破敌旗边曾着先锋之号受降城畔更无匹马之还方北骑之窥关拥白丁而赴敌但知报国不惜捐躯虽一门之死者数人而劲敌之退者三舍勲名如此岂不伟欤立岑彭之祠官李广之子朕於何进既率用厥典矣尔进之俦也则甄録二阶追封遥刺朕又何爱焉可

李虎母高氏特封咸安郡夫人制

勅昔张辽进爵乡侯厥母亦蕃锡车马诸屯将吏悉罗拜道周史册书之以为荣观今有身都大将亲号小君较之前闻无所与逊岂不两尽其美哉具官某母某氏仪家以正守节而坚为人谋而忠烈何慚於伏劒与子言於孝劳不止於断机庆绵後昆官至刺史积五年之恩数貤一秩於慈闈朕之锡汝之受皆宜也上承天宠下慰子心可

鍾震弟霖父将之赠宣奉大夫制

勅君子思孝笃於亲而民仁圣人广恩敬其父则子悦式袞祭泽申賁衎宫具官某父某擯儒之英蹈道之正勤於讲学撰先生之履以从游志在济民易大夫之箴而後已仕皆由礼爵不满能是鍾禁橐之贤来相明庭之祀既合棣华之韡韡宜加蜜印之煌煌上崇二品之阶下漏九泉之泽灵其不昧式克歆承可

鍾震妻邓氏赠硕人制

勅朕合宫汔享熙事备成厥有秉文之臣实修助祭之职可无骏惠賁及私庭具官某故妻具

位某氏清范出於名家柔风着於中樞式相其事亦云有年既不诵君子偕老之诗则宜膺硕人其顾之报尚其盼矍来顾宠灵可

冯氏封硕人制

勅读闕宫之诗曰鲁侯燕喜令妻壽母夫既不能以养亲为壽而仅得以宜家为喜者亦人之情也具官某妻冯氏生自华胄嫔於德門鼓琴瑟和乐之音粲珩佩委蛇之度供大夫之祭既享於成衣硕人之衣实称其服益思谨淑以保尔有家可

刘芥贈武功大夫某州刺史制

勅朕闻春秋书潞子之爵汉史纪弓高之封既曰来臣何爱饰典具官某生於异壤慕我中华方关河怀赴之秋有唐邓来归之报迎王师以簞食诚出本心解辮髻以衣冠欲沾圣化方报功之未几遽掩骼以云亡爰贈武功并陞遥刺以示纳降之典以恢怀远之仁英魂有知尚式时享可

葛氏封宜人制

勅具官某妻某氏朕修文德以来远人不间臣妾尔生自异域嫔於贵臣慕义来归亦期偕老岂图中道忽殒良人宜疏命妇之封以示皇恩之渥可

李复明贈忠州刺史制

勅具官某北兵慢防奄薄荆渚尔以统兵官愤敌深入出鬪於城闐之西武功虽多而元身亦殒可谓死於义矣陞刺望藩往旌毅魄可

俞东贈修武郎制

勅具官某朕追惟藩邸嘉惠近亲生锡异恩死彰愍饰尔亦肺腑亲也降年弗永官不满能载陞八品之阶式漏九泉之泽尚其营魄歆此休光可

冯履特贈直秘阁制

勅具官某昔邵子雍闻鶯鸟之声而占气运因木叶之动而起时数声音之学盖与造化相流通非深於易者不能知也尔蚤以爽邦之英邃於先天之数声文韵法尤所究心当权侂用事时课历之差议祭之变推测虹见之咎了然如指诸掌至於进退不以吉凶行违不以忧乐则又在於经世图外惜乎此道孤行无有褒表之者朕用盼愍典俾真秘丘尚庶几丰道植教之意可

王氏封硕人制

勅朕肇禋国阳均福方外属我臣妾一视同仁具官某妻王氏生自殊邻嫔於贵胄能佐而长慕义来朝车书既同冠带不异则疏硕人之宠以对廉使之华亦其宜也母貳尔心相勉以义可

赵氏赠安人制

勅某氏妇从夫爵死生一也国有湛恩於是有不从夫而封赠者焉尔荣王近亲有淑其行降年不永至於云亡再疏命妇之封庸侈泉扃之宠柔魂未泯尚克知歆可

傅宗道母陈氏封孺人制

勅具官某母某氏朕宗祀明堂均庆宇内凡我小大之臣举得以宠绥其父母焉尔积善蕴仁年过九十在官有子际此异恩用贲徽封益恢壽嘏可

吴洪道父权授保义郎母陈氏封孺人制

勅具官某父母某汉礼高年九十者已为异数矧父母之年又加於九十者欵尔绍兴遗民蕴仁积善年耆德明至於偕老是宜日有秩也初品之封尔其笃受可

赠高年制

勅王制以五载存问百年国朝三岁大礼应士庶年百岁而上特与补初品官尚三代遗意也尔积善於身享仁者壽吾何爱一秩不以慰而子孙其承宠休以燕遐福可

赠妇人高年制

勅王制以五载存问百年国朝三岁大礼应士庶年百岁而上特与疏封尚三代遗意也尔齿於编氓独享上壽非慈仁好善何以登兹锡之嘉号以慰而子孙可

卷十一

<集部,别集类,南宋建炎至德佑,鹤林集>

钦定四库全书

鹤林集卷十一 宋 吴泳 撰外制

池州青阳县协济庙封惠显灵应昭泽普济公制

勅具某神九华之山神人宅焉其崑幽故其神宅其鬼灵故其德盛当农畴告旱田毛欲槁环邑之士奔走其祠而祷焉鞭池龙为霖嘘圣水为雨顷刻之间泽满四野亦可谓有功烈於民矣已建上公再加美号神其懋承之可

临安府余杭县洞霄宫龙神封灵泽公祠制

勅具某神昔景德画龙以祠雨天圣塑龙于会灵观亦雨绘像尚尔况真龙哉方旱魃为灾百神徧走而未应兴自朕怀以默祠祷中使未还而甘泽已滂沱矣建尔上公对予光命可

忠州功显庙神封广佑灵济公制

勅具某神朕闻祷祀於黄河故鸟乌之声乐而齐师遁求助於鍾山故草木皆人形而秦师潜赫然灵光载在往牒尔显於西土宅我生民顷因北敌之鸱张加以溃兵之豕突植红旗於山上朔骑自奔拖白雾於江中凶渠斂戢需章来上朕用叹嘉命载衍於旧封肆登加於新号尚裒陰施以对休光可

印州依政县惠显庙神封博济灵应孚佑公制

勅具某神古者国有水旱之灾则祭於神为民事也矧兹有庙宅彼曲山惠绥一方载在往牒亢旱槁苗则雨应淫潦伤稼则晴舒灵绩上闻钦叹无斃用视上公之秩益增徽号之荣尚迪威灵裒对休宠可

潼川府通泉县孚惠庙神封应济普惠灵润公制

勅具某神通泉古县也山明而水秀地瘠而人稠神宅其间民以为命往因西师亡絕溃入中州黄旗章章熊虎奋怒贼弗敢近民赖以宁发谕灵威济登燬号尚迪休宠永绥遐方可

顺庆府西充县利应庙神封忠显公制

勅具某神先王制祭祀五以死勤事与能扞大患尤为有功於民尔奋身多难之街奉使叵测之域一介行李周旋磁相移民於城转粟於庾亦无负州人矣高皇知之而磁之人有不能尽知者元身既歿英爽如生以忠介公显於东土北兵临江不敢犯则斯二事岂不应祀典欤进爵上公肇封忠显尚朕所以纘承高皇之意可

两佐神封翼惠公助顺公制

勅具某神等河神请纓而楚国之师燔山鬼返璧而祖龙之魄丧尔二将於昭其武有赫厥声从汉祖入关勲烈已垂於千祀佐粤王平寇威灵复振於七闽繇其功盛以化神莫不户祠而家祝式哀显迹庸建上公庶几长乐二将之祠不减睢阳双庙之盛可

威州康佑庙神封显佑灵泽孚烈威济公制

勅具某神朕敬共明神厥有常祀至於幽赞国家光於上下又当褒表之以为黔首则尔庙食西土功施於民顷者诸番侵我汉地神赫斯怒卒能殄歼乃讐其如出雨兴云反风灭火特其迹也爰秩灵休衍加徽号尚其歆享可

雅州严道县顺应庙神封忠烈公制

勅具某神佑直助顺幽明之理惟均褒德表功神之祀不废尔奋自越嵩来游蔡蒙杀伪守以庇民一扫美新之习指真人而纳贡不忘思汉之心生为千里之依歿作一方之主陰扞边境默司雨阳有赫厥灵彻于朕听用建上公之爵肇开忠烈之封永绥遐方寬朕西顾可

临安府昌化县灵惠庙百丈神封显应侯城隍神封顺应侯柳湘神封灵应侯制

勅具某神等朕以功诏爵以敬事神凡能保佑於民不废褒表之典尔等鼎力幽潜山民依怙旱乾之祷随应札瘥之患不生虽京师衆大之区亦蒙灵润兹肇封於侯爵庸慰答於輿言尚祗明恩益远灵施可

南康军都昌县英佑庙神封威烈惠利侯制

勅具某神佑直助顺幽明之理惟均褒德表功神之祀不废尔仕东晋董督八州庙食都昌绵历千载一方宝祠不但水旱疾疫之祷而已顷者峒寇猖獗陰兵逆防红旗章章贼遂宵遁惟神明鉴犹往日击杜弢斩苏峻平王敦之心也增锡嘉名尚先王宗功秩祀之意可建宁府瓯宁县灵佑庙神封孚济昭应广利嘉惠侯广惠利泽显应侯制

勅具某神朕遙祇宗祀咸秩百神凡领於祝官载在祀典者靡不封爵有差尔等庙于瓯宁垂二百禩御灾扞患灵蹟彰闻虎不敢渡河盜不敢入境实惟侯之烈各因旧封申锡二字一曰嘉惠以昭其德一曰显应以赫厥灵神其懋承之可

徽州英烈庙钱鏐封惠显侯惠济侯制

勅具某神昔仲尼有言纲纪天下曰神方建炎辛亥敌马饮江荡摇二浙尔兄弟无尺寸兵在手乃能仗义率乡丁战乌珠於桐庐下如挈舟礪石敌几不能支遂遁去推较功烈当与刘韩并驱而史佚其事朕甚悼焉既列庙祠又班侯爵尚其子孙世笃忠正以休於前功可

施州永福县嘉惠侯封灵应惠侯制

勅具某神汉破匈奴而风雨之声皆神兵晋败苻秦而草木之状皆勅敌方敌兵犯顺边马慢防云安夔子之间军声未震神赫厥灵幽赞冥讨彼望见朱旗汗马惊遁溺死遄就招安若尔威灵弗加褒宠殆非所以重依人尊受职也用览漕臣之奏申锡美号神其懋承之可建宁府建安县神应庙神封昭惠显应灵助侯昭佑显济灵顺侯制

勅具某神河神受玉以济晋师山鬼持璧以遮秦使昔疑其事今悟兹理方盗起汀邵间州县长吏不能安之神赫厥灵幽赞冥讨邦民夜半时闻有甲马声此岂足为异耶贼平而益封尚朕报功之典可

处州丽水县协应庙神封显应周泽惠济昭佑侯显济嘉贶利泽孚佑侯制

勅具某神等山林川谷能出云为风雨皆曰神矧庙於丽水宅於风门又能嘘石罅之雷以鞭羣动则旱乾之禱而甘泽随霑盖其所也旧为彻侯增都显号示朕所以重祠之意可

龙山真圣观灵感大权尊圣招宝七郎封助灵侯制

勅具某神朕以神皋衆大旱魃为虐并走羣望以祈甘霑惟神率迪朕命触石为云曾不崇朝雨徧畿甸其为施博矣爰锡嘉名封之彻侯以见朕先勤民而致力於神之意可

冲佑观护法神封协济侯制

勅具某神朕以旱魃为虐望奔武夷曾不崇朝雨徧天下山灵仙伯亦既尊显之矣有司谓尔实护道门霑泽之功与有陰相封之彻侯其懋承之永以无斁可西和州武显庙神封灵佑孚惠广应侯制

勅具某神大兵之後继以凶年何边州之不幸也尔迈迹西土宅祠古岷驱敌而风霆奔禱雨而云雾滃人孰不曰幽赞之助用嘉尔绩申锡侯封侯其懋承之永以无斁可

临安府浙江顺济庙神封灵佑显应公神次子封助宁佑顺侯制

勅具某神以劳定国则祀之为道水之功设也迺者恭圣发引水道湮塞潮回沙涌不可以舟

凭神威灵驱叱海若安流顺波顷刻而济祐恩载颁有司以益封请朕用申锡美号神其懋承之可

南劔州尤溪县惠泽庙神封孚应灵顺侯制

勅具某神朕君临四海礼馭百神悦有功烈於民何爱封爵於我矧兹劔浦屹彼丛祠能出云雨於鸿蒙之间能驱盗贼於俶扰之日爰锡再命用增侯封其懋承之永以无斁可

眉州彭山县英惠庙神封嘉应侯制

勅具某神神也者气之盛者也其气发扬乎上为阳为刚为昭明为忠义神故汉将军岑謐曰壮侯者庙於武阳国朝淳乾嘉绍间幽赞讨贼夜半时闻有甲马声今未尝亡也锡命彻侯用甄壮烈可

佐神封英惠赞烈协应侯制

勅具某神佐神某神六子乾坤之佐也五帝太一之佐也凡尊位乎两间者莫不有物焉赞之尔左右明神功相东土御灾扞患厥有灵光益衍侯封以绥庙食可太学土地特赐灵通庙额封正显侯制

勅具某神古我先王各因其方以祠后土示有主也矧司我首善之地而不褒表之欤方绍兴建学尔以聪明正直妥灵其间凡鼓篋而入解褐而出莫不骏奔走在庙用物宏多厥灵炳着不但呵星妖叱鬼怪而烝我髦士发挥斯文以为邦光亦有陰助焉矣锡之彻侯都以美号尚庶几敬祭重祠之意可

饶州德兴县思惠庙神封文昭清孝正烈侯制

勅具某神桐乡之爱朱邑而祀於桐乡石室之慕文翁而祠於石室悦有功於仕国宜与享於祝官尔仁明而庄正直而壹设学官於邑户有隆山之书行义役於民家藏县令之谱生则班於循吏歿则典於明神英魂所之昭答如响矧翦凶徒於洲浒复驱厉鬼於山阿爰酌輿言再都美号蕙肴蒸兮兰藉想清德之犹芳荔子丹兮蕉黄尚灵旂之来下可

神次子李兵部道传封文惠侯制

勅具某神朕闻人者鬼神之会也生而为英歿而为灵其气发扬而为昭明其体魄降而为百物之精况夫贤者又万灵之一秀则命之曰神岂不足以为黔首则哉尔坤维可珍隆山之子江东仓庾氏之使其事君则鯁鯁諤諤以直谅闻其治民则??惻惻以廉平着德兴旧有李长官祠东人德汝遗爱亦复以汝侑食於县爵为通侯賁以文惠尚士与民嘉魂合莫之意可

忠佑庙神封英济忠应灵惠侯制

勅具某神朕尝谓将军有大忠于汉而功不入表行不立传史氏失之当刘项相距京索间兴亡之几不能以守而侯乃诈乘黄屋诳羽军荣阳启炎汉四百年亦可谓奇矣县故有丛祠水旱必祷贼兵睨之不敢近非神遗风余烈有以动悟之而何载视彻侯申锡美号庶几扶龙之人世世子孙毖明祀可

庆元府鄞县贺成庙神封灵济侯制

勅具某神崧高之诗曰维岳降神生甫及申天地扶舆之气盘结而生人物於其间未有无神焉佑之也尔庙食于鄞自建炎初灵迹已着挺生硕辅勋相我家将以纪纲天下岂但时其雨阳而已哉载都庙号肇锡侯封俾海滨之民世世子孙毖明祀可

安吉州归安县善利庙神封威济侯制

勅具某神龙津以双劒发祥涪陵以刁斗肇祀天地间昭明刚正之气盖有鍾於物而为神者矧元和相国奉命征讨宿师之地以矢志之自唐迄宋灵异濯濯其能却饮江之戎马去害稼之螟螣皆矢之余也肇封彻侯以诏嘉德可

龙州江油县牛心山显济庙神封显应忠惠王制

勅朕闻之仲尼曰山川之神足以纲纪天下盖不但为能出云雨设也具某神昭明而体物正直而依人相彼江油宅於岩屋发纵指示溃卒就擒鸣鼓张旗丑夷自北凡蜀道底宁之効亦尔神幽赞之功朕用嘉之申锡徽号王其益侈宏休以佑吾民民亦将世世奉王无怠可

静江府义宁县惠宁庙神封英济王制

勅朕闻之仲尼曰山川之神足以纲纪天下盖非但为兴云致雨设也具神某昭明而体物正直而依人乃眷桂林实控岭海徭丁出役省地绎骚若非幽赞於神明安得永清於郡邑昔也建上公之爵既极显荣今焉即真王之封益昭徽数尚其英爽不昧钦承可

衡州茶陵县福清庙神封孚佑昭应英惠王制

勅琼玉不畀而楚师燬草木皆兵而苻秦败国有山川封守之神非但兴云致雨也具某神昭明体物正直依人荡定水波屡济漕舟之厄陰驱甲马汔收平盗之功朕用嘉之申锡徽号尚凭宠命益懋灵厘可

信州贵谿县自鸣山孚惠神庙封威德英济忠惠圣烈王制

勅汉破王邑於昆阳雷风撼屋晋败苻坚於淝水草木皆兵大而却敌小而平贼幽冥之间岂无神物之助耶具某神兴自典午垂八百年用物精多灵迹特异方盜起三衢官军未集神赫厥灵幽赞冥讨人望见其赭袍汗马罗列而拜未几而渠魁就戮岂非倚神之力耶王旧有封兹易二字事无不通曰圣民无不安曰惠益懋显德以承宠光可

成都府永怀庙神封忠烈广福仁佑文惠王制

勅昔汉宣帝闻益州金马碧鷄之神遣使持节求之今载祀典领于祠官者又不但金马碧鷄之神以忠义而祠於眉者二孟昭图之於墓颐津花敬定之於东馆镇是也具神某英风盖世勇略过人当子璋僭叛时卿特成都一牙将耳乃能手锄元凶以五六州挈还唐之职方使高祖当此时必不兴猛士之叹孝文当此时必不起良将之思其明威义烈亘万古而如在所谓镇蕃部擒溃贼特其细也爰即旧封再加美号尚时式享以奠四方可

佐神封灵佑王制

勅古者至敬不坛今庙貌像设徧於州县不可谓智然礼缘人情凡可以义起者亦所不废也具佐神某神能赞而长功於民扞患御菑式克顾享申锡王封用答扬尔烈尔其懋承之可

抚州崇仁县梅仙封灵虚妙隐真人栾仙灵纪妙济真人邓仙灵一妙应真人叶仙灵白妙通真人制

勅具某真人等朕闻真人恬漠独与道息而犹假封号焉不可谓知然灵迹之着远近彰闻驱蝗而蝗不为菑施药而药能疗死则祀之亦人情之所不能废也其诏祠官增崇徽号永垂道以庇邦民可

永康军青城县冲妙观何中仙封灵惠真人制

勅具某神汉作飞廉桂馆以求神仙自求多福而已非为民也尔以诗鸣蜀賁于宝园生则德行道义之望无不钦歿则水旱疫厉之禱无不应祠而祝之亦人情之所不容废也用锡徽名永宏道可

隆州井研县宅真观蔡真人封仁格真人制

勅具某神朕闻真人恬漠独与道息又岂假封号之荣哉然纪功崇祀亦国之所不废也尔灵异之迹着于三隅扞水而涨不为灾驱蝗而物无疵疠凡以诚禱如响斯答朕安得不汝嘉其诏祠官载锡徽号苟能用力於仁则报功之典无斁可

冲佑观仙女胡氏封普应真人李氏慈应真人鱼氏顺应真人鱼氏助应真人制

勅具某仙等朕闻真人恬漠独与道息然心诚求之则未有不感通者也尔等灵异之迹着於武夷生则保形链气于岩之隈歿则驾风驱霆以雨徧天下朕用嘉之载锡徽名永宏道可

冲佑观真人封冲妙孚惠真人仙人张湛显应真人孙绰灵应真人赵元奇妙应真人彭令昭冲应真人刘景嘉应真人顾思远静应真人白石善应真人马鸣生惠应真人制

勅具某仙等汉作飞廉桂馆以求神仙为己也非有志於求民也属者旱魃为虐靡神不宗以武夷之巔神人所萃望走洞府以祈甘霑不崇朝之间触石而雨朕安得不嘉之爰锡徽名以宏道力可

卷十二

钦定四库全书

鹤林集卷十二 宋 吴泳 撰诏

皇帝赐皇后明堂贺表答诏

朕祇迪旧章邇严宗祀黻冕之美皆出亲蚕之共豆笾之嘉实絜流苻之助清明鬯矣福履绥之载披庆函式獎勤意

赐贵妃明堂贺表答诏

朕出祿清庙入熙紫坛凡泰元神媪之顾歆皆月后星妃之协助甫还诏躋首阅露封颂禱既廑叹嘉弗已

赐美人明堂贺表答诏

朕肃蠲刚日祇见合宫璧玉华光笙鏞纯绎荷苍灵之来格覲熙事之备成载阅露封良深嘉叹

端平三年罪己诏

勅门下朕以寡德君于万邦惟皇天既付中国民实任宠绥之托予小子不替上帝命欲图绍复之功岂期轻动於师干反以激成於边祸至延强敌荐食神州?刘我西陲蹂躪我襄土近至淮堧之地亦成戎马之场宅里墟於青烟甲卒屠於白刃凡三百年之生聚教训与数十郡之城郭封疆凭陵无厌荼毒甚惨斩桑伐枣破屋流离之状朕既不得而见慈父幼子寡妇哭泣之声朕亦不得而闻其如关头溃散之军塞外畔亡之将或者抚循之失道因而怵迫以从夷序言其情谁执斯咎皆繇朕责治太速知人不明误信佳兵之言弗思常武之戒拊心若厉欲悔何追朕今退自省躬益皇敬德念三军暴露之久悯百姓转输之劳敕不?之吏以赈新阡捐不急之费以资战士问伤吊死録善弃瑕庶几与子同仇之人咸奋敌王所忾之志以遏絶寇虐以攘除奸凶降服而哭殽函之师尚增修於国政下诏以陈轮台之悔益申儆於边防凡怀忠良各励勲业故兹诏示想宜知悉

赐魏了翁督视江淮便宜施行诏

朕以皇天畀予有家惧德弗荷比年戎寇迭我边陲赤囊屡闻旰食靡暇爰简枢庭之望俾督诸道之师南连江淮北抵襄汉尽护诸将以张皇威师徒之有不惠不懋汝训齐之师乘之有不辑不和汝调一之益张乃猷毋失其统然而事从中则难度帅稟命则不威必进厥良率其

不良而後可以作兴人材必赏用命戮不用命而後可以激励将士爰考绍兴之彝典式颁臣浚之诏书悉听便宜毋拘文法庶几帅友邦之衆可以成敌忾之功故兹开谕想宜知悉

赐郑清之以久雨乞上丞相印不允诏

省所奏具悉朕亲政之初考谨辅相以卿抱道守正冲澹宏雅退然有古君子之风是用畴咨使宅百揆端平以来图事揆策既与卿共焦劳矣未曾一日共其逸也乃者蠹贼内讧霪潦为沴岂天所以大警予耶昔乾道间淫雨不止首相颺乞罢政表至再上圣谕丁宁且曰不必如此此皆朕失皇祖有训卿尚何辞所请宜不允赐乔行简以久积霪雨乞解丞相不允诏

省所奏具悉当尧之时洪水泛滥尧不以责诸臣而曰儆予春秋之季天作淫雨宋公不以尤诸人而曰孤实不敬以灾异策免三公汉末世事也矧卿寿隲之彦年耆德明朕以万几至繁故命置诸右相与调燮佐理入秋以来积雨伤稼方欲询兹黄发以免所愆而卿尚得以尧佐年高为言耶传不云乎肃时雨若不肃则其罚常雨君臣上下以作肃之道相警毋费辞所请宜不允赐乔行简以久积霪雨连旬再乞罢归不允诏

省所奏具悉顷者夏五月入毕太史占之谓为雨淫水溢之象已而连月不止不但予一人以为忧二三执政亦莫不共忧之也卿佐理陰阳再疏乞上丞相印绶朕岂不悉但稽之先朝陈康伯朱倬以久雨待罪高宗曰罪在朕躬岂可移过大臣魏杞叶颺以霪雨不止乞罢政孝宗曰实朕不德方赖卿等克修庶政以致消弭朕但知常雨之罚弗加於大臣而已卿所援彝章却不为此所请宜不允

赐乔行简等以星雷示异乞退不允诏

省所奏具悉昔昭王不以赤云之异移於司马孔子以为知道景公不以荧惑之变移於相子韦以为知言春秋列国之君犹能克己就义不寘其咎於股肱矧雷君令也而朕又焉敢移之以震恐惧修省以益迁善改过朕方欲回怒渝以帅彼天常则亦赖卿等燮和赞理懋德奋庸汔济乃辟于乂顾援汉末世策免之文欲上丞相印归丘园朕所不取所请宜不允

赐乔行简辞免加恩不允诏

省所奏具悉朕获执牺牲珪币以承上下神只荐鬯之夕昊天降威以示谴告何敢专咎股肱况卿次辅也秉德陪朕而乃援故实祈解印绶殆非朕志召还东第入侍经幄恩礼既与宰臣等则侍祠锡祉自有孝皇赐浩典册在又何逊所辞宜不允

赐郑性之以台章乞赐罢黜不允诏

夫御史天子耳目岂容蔽耳目而不言执政犹吾股肱安可废股肱而独运朕已勉谕卿毋牢辞

赐赵彦懌辞免除权书不允诏

卿明足以别羣材之监平足以持四选之衡自摄二卿总理微密予夺一出於公朕不欲迁之他官者破吏奸也所辞宜不允

赐许应龙辞吏部兼侍读不允诏

以卿履行纯淑色气和平劝讲路门敕绎诗训其於朕进德修省抑有助矣昔刘拱以供奉翰林摄周必大以掌选部陞乾淳之风比迹三代卿欲固辞则是不以乾淳望朕也所辞宜不允

赐李?辞同知四川宣抚不允诏

治民如治乱绳朕固无拘於文法望君如望慈母尔其思慰於国人亟往于宣母宜多逊

赐崔与立辞免右丞相不允诏

乐君子之乐固无轩冕之情忧天下之忧犹有君臣之义盍云来止毋勉遁思

勅

辛息授防御使勅

韬藏武略晓畅戎情筑定远之城以一身而护塞调安丰之卒不踰月而殲渠爰念勤劳之久肆升扞御之班

王霆授武功大夫勅

奋自右科优於将略出则荷戈与殳蹈厉而发扬入则束带立朝雍容而闲雅宁辍九宾俾授一障

钱纂权发遣容州勅

容州控维百蛮襟带五管汉唐以来重镇也命汝为容浦太守宜靖绥阔蜚俾无南顾之忧

陈卓授正议大夫勅

卿行介而和气庄而肃能典朕礼蔚有寅清之风其代予言实存温厚之体

赐保宁军官吏军民僧道耆寿等勅

朕以谢奕昌胄出相门嫺连戚畹恂恂德行尚存小侯入学之风暨暨戎容蔚有大将登坛之望眷言星婺实屏神京班虽在于龙墀威已信于虎钺提封所暨赞善惟均

赐保康军官吏军民僧道耆寿等勅

朕以谢奕礼敬尔威仪嫺於诗礼宣麻帝殿已蕃褒纪之恩授钺将坛益迈戍申之士相彼古庸之地烂其双节之临若毫若倪而兵而吏想逖闻于成命咸大慰于輿情

赐资政殿学士新知潭州魏了翁夏药银合百两勅

勅某视师江上未酬叙府之劳作镇湘中复冒畏涂之暑颁冰在候赐药以彝式广上恩更谂民瘼

赐资政殿学士新知眉州李?夏药银合百两勅

勅以卿故乡之怀远道于役冒六月之暑如憺如焚邇三峡之涛如震如怒可无尚药之赐以示宗工之思赐宝章阁学士淮西制使兼沿江制副知鄂州史嵩之夏药银合勅

勅遐念制臣宏开边阨韬藏龙虎甫息精神野宿貔貅宁无暴露爰即颁冰之候式分上药之珍其溥恩光永蠲袪渴

赐四川制置使赵彥呐夏药银合勅

勅申宅南交正于炎序乃眷西顾怀我宗臣矧更原上之久劳冒人间之执热式颁良剂往示优恩

赐权工侍四川安抚制副丁黼夏药银合勅

勅卿以诗书之望而帅三军以寿隼之贤而在远服属此南讹之候轸于西顾之恩爰锡温纶式颁良剂赐兵侍淮安抚制置使赵葵夏药银合勅

勅眷我制臣久于淮甸饮冰持糒岂不思将士之载饥铄石流金亦曾念边氓之执热爱锡上衮之剂式昭中宸之恩穆如清风绥尔有衆

赐工侍沿江制使兼江东安抚知建康兼行宫留守陈韓夏药银合勅

勅久以威名劳于牧御麟符居守当江上之风寒羽扇麾军冒人间之炎热式颁上剂昭示惓怀

赐秘阁修撰知江陵府兼京西湖北路安抚制副别之杰夏药银合勅

勅朕国倚西门重踰於诸镇日行南陆热倍於常年图任旧人式颁新剂庶品尝於药石以身作於金汤赐焕章阁知庆元兼沿海制司职事赵与□夏药银合勅

勅朕临遣帅臣控扼海道属兹瘴暑眷彼遐征式颁药剂之珍以助节宣之用

赐兼权侍卫马军行司公事知黄州孟珙并诸路都统制夏药银合勅

勅朕身居殿阁心运边陲眷予守圉扞敌之臣咸有执戈卫社之志久于暴露加以炎歊升糒半冰劳苦想同於卒伍宝奁珍剂清冷首及於军门

赐保康军官吏军民僧道耆寿等勅

朕以贵谦魏王之孙沂邸之子分璜佩玉既久典於留台植节建旄宜宏开於钜屏遂即上庸之壤式昭半楚之封遥想吏民悉陶风化

赐武康军官吏军民僧道耆寿等勅

朕以与芮鲁卫之穆开平之贤宣文德之麻既懋展亲之典授武康之钺仍疏胙土之恩若吏若民而兵而士想闻嘉命式慰輿情

口宣

赐谢奕昌除节钺口宣

卿相门之彦戚畹之良兹特举於涣恩俾专持於节钺往祇明命允迪令猷

赐谢奕礼除节钺口宣

卿谱系大相源流小侯久联宾阁之华兹畀节楼之宠往祇予训图懋厥官

赐邹得龙除佾书兼参政口宣

卿雅以人望蔚为儒家晋典鸿枢仍参大政宜祇承於涣命母教废於需章

赐郑性之除参政口宣

基命斗枢之庭参谋鼎铉之府蔽自朕志谐于佾言亟祇涣纶母赞谦牒

赐李宗勉除同佥书口宣

阜直谏之囊出从骑省筦神兵之务入典鸿枢已沐师言毋烦撝牍

赐洪咨夔内翰口宣

禁闼萃臣词林鸿笔久视奎坡之草兹陞学士之真宣召有严式承光命

赐李鸣复除参枢口宣

文昌王之喉舌言论既孚北斗天之枢机訏谟惟允岂宜控避往亟钦承

圣节赐三省官乳香口宣

虹生华渚适逢正月之和鹭集明庭咸祝万年之永爰颁宝篆以贲法筵

赐右丞相崔与之不允辞口宣

卿清德瑞时忠勳贯日来伯夷於北海岂应林壑之留起安石於东山实倚庙堂之望毋容隐蔽宜疾驰驱

赐与芮永断来章口宣

卿以亲屏周以德辅汉出节旄於少府播纶綍於大庭往钦茂恩毋忘忠报

赐杨谷加恩口宣

朕宗祀明堂飧亲事帝受厘宣室左戚右贤盍增采邑之华祗服纶言之宠

批答

赐邹应龙上表辞佥书不允批答

卿历践词垣直青琐闼动阅三四十载英名高节朕知其有廊庙之器久矣借筹密席参贰宰涂尚恨其晚复何以辞

赐郑性之辞参政不允永断来章批答

今天下大政岂无所当先者卿其以所闻於师者正身正君以正朝廷百官则天下之事无不

纲举矣

赐乔行简特进左相不允辞批答

维师尚父年九十杖钺睿圣武公越九十有五入相丹书烂然懿戒勤甚此所以作周孚先也

赐李端懿让恩命批答

卿联国懿戚惟时茂才久居留使之权俾委将麾之任允孚舆论毋执撝谦

卷十三

<集部,别集类,南宋建炎至德佑,鹤林集>

钦定四库全书

鹤林集卷十三 宋 吴泳 撰祝文

皇帝祈晴设罗天醮一千二百分位祝文

伏以星殷仲秋甫转金行之度天作淫雨致貽宝穰之灾禾且穗矣而烂於场田皆污矣而堙於水脱有边烽之告警凜乎国计之莫支祓除邃殿之严繙閱冲科之秘伏愿开豁乾象划蠲云根杲日既升尽涤羣陰之障丰年其有辑成五福之基

春祭诸庙祝文

惟古者诸侯得以祭名山大川之在其地者礼也今以邑大夫之职而亦许之祷於山川之祠令也有其举之其敢废之肆以季春式严常祀伏惟时其雨阳俾民用平康而物无疵厉则某与邦之民报神之德其永无斁

秋祭诸庙祝文

诗之丰年曰秋冬报也春之时省耕而太守不及省也夏之日祈谷而太守不及躬以祈也今秋已成矣稻穗且熟矣乃获与南亩妇子享此乐岁岂非神之佑哉祀事有彝不敢不恪

国家水旱神司其权字民者任其责某为邑长於斯跨三年矣旱不为灾水不为沴年谷用登田里胥乐宁非神之赐耶春祈秋报厥有旧章敢羞牲酒用酬神贐惟神昭鉴而终惠之

古者诸侯必祭於境内山川之神者礼也爰以季秋祗率厥典申饬乃僚用修其报吏不忘神之德神不忘吾之民使来岁之稼丰於今岁之穡则民之愿也

古者诸侯得以祭名山大川之在其地者每岁季春厥有常祀有其举之其敢废之用是以月之既望祀於有庙伏惟时其雨阳使麦既实而谷有秋则神之惠也侯之望也亦民之福也

大易假有庙必於萃卦言之盖敬者德之聚而神之舍也今太守甫眡印首谒诸庙是以有精爽交乎神明过三日以往则役於事矣祗谒之初敢抱易以告

吏出守此土神庙食此土吏司其明神司其幽政事不修刑罚不中吏不敢辞其责若夫时其陰阳节其风雨俾民无水旱疾疫之灾则惟神实相之盖国家三岁一易吏而神则千万年永

保民也某始至三日敢以诚告某惟令近民者也而於神为尤近动静语默神必知之而况荷民社之重寄水旱之托则赋敛之过厚刑罚之失中神岂不降罚厥躬以示谴告去年之夏厥水为沴民之昏垫闻者惻然今偶为邑长於斯扞水防民此第一事而力未暇为也则共神明崇庙祀以厌水灾不敢不敬

正月之吉始颁教治已宣布於寛书大禋之礼必禱鬼神欲导迎於丰岁吏职其显神司其幽愿凭嘉德之昭灵以起蒸民之艱厄方祇厥事式写我心

祈晴祝文

阴居大冬时寒则应序天作淫雨太过则为灾矧当农务之未休重以田功之始播妇闻鸛而兴叹丁抱薪而不炊使人至斯皆吏失职爰露一忱之精禱仰干大觉之垂慈伏愿慧劒划云法灯破闇皇天不瞽获瞻杲日之明后土得乾预卜来甦之秀

閱月不雨则告旱甫蒙沾足之恩平原出水则书灾易致浸淫之患虽咨怨乃人情之常态而变迁亦造物之至难既掌此邦当职其咎岂惠心之未遍抑刑典之失中所以亟疏决以哀庶狱之不辜屡赈贷以济百姓之不贍更凭道力密转阳机云霁涨平无商羊之起舞年丰谷熟有铜雀之再鸣

国有大故方深虑患之私天多沉陰未覩开晴之日稻既穗而雨不得获麦可播而雨不得耘若其浸淫於十月之交岂不貽害於三农之务静省狂恒之咎率由秕政之愆敢不洗心专於事帝伏愿划劒云翳浴出阳明日霁日驿日蒙既谐吉筮实坚实好实栗汔用康年星正仲冬天作霖雨四境之内不治固欲安之三日以往为霖是谓过矣况钱荒而楮会弗起米贵而薪刍益高虽多方求济於生民而厥罚未消於咎证用殫忱仰叩高真伏愿压尽陰霾翻作雨雪瀟瀟之瑞豁开阳彩庶瞻出日杲杲之光使行旅者有阜通之期而边戍者无暴露之叹凡隶吾土悉蒙慈休

五谷熟而有年证方协序平地尺为大雪过则书灾虽去春尚有於一旬而涉岁已更於三日薪湿如桂而民食病衣冷於铁而师人寒为长於斯当职其咎用洁藁宫只园之荐仰祈玉清天宇之晴伏愿睨消陰霾绮散阳采洗六兵於北漠已占休息之期祝万壽於南山更覩清明之景

比岁不登方议賑民之乏淫雨蚤降又貽害稼之忧固非我佛之不慈亦岂衆生之共孽咎在长吏罚为常陰伏惟观世音菩萨以慧灯破闇为明以杲日涤昏为觉划开万象俾瞻初出之光拯活羣生庶免荐饥之患一诚禱三宝证知

神泉县祈晴祝文

维暮之春已切来甦之望崇朝其雨忽貽害稼之忧既非上帝之心亦岂下民之罪实系令谬

有戾人和致令穡事之久妨驯致淫陰之不解弗凭佛力曷挽阳车伏愿擎起祥云昭垂杲日
八极九天之上濯濯厥灵一同百里之间芄芃其麦

宁国府祈晴祝文

丰年多黍稷已占大有之祥淫雨害稼盛忽致狂恒之咎既非下民之罪亦岂上帝之心皆繇
牧守之不良政刑失当若匪依凭於道力何能感动於天明辄露衷忱以祈显相伏愿划其阴
翳尽呈露於乾端暴以阳光终结成於兑宝不但尽岁功之绪更希策秋猕之勲嘉与编氓导
迎景贶

天庆观祈晴祝文

伏以天多沈阴每望秋阳之暴星有好雨忽貽岁事之忧悯后土之不乾吁皇穹而请祷伏愿
高真洞格肸鬯潜通穡宝既坚可备稼盛之荐师干不耸永无烽燧之惊

祈晴奏告天地文

伏以宗祀明堂正欲稼盛之备天作淫雨忽貽稼穡之痒悯后土之不乾吁皇天而请祷伏愿
一忱贯彻三极感通诛黑蜮於荒郊划其陰翳推赤乌於阳谷兆此丰年

社稷祈晴祝文

伏以宗祀明堂正欲稼盛之备天作淫雨忽貽稼穡之痒敬以精忱祷於方社伏愿祓其阴翳
诛黑蜮於荒郊睨以景光推赤乌於阳谷更资鸿福迄用康年

祈晴社神祝文

社于国中有祈有报方以雨谢复以霑告惟社之神官地之道惟稷之灵司稼之宝惟后土氏
水土是平惟后稷氏百谷资生惟风雨师泽润万物惟雷电神鼓动羣植克相上帝皆着灵德
所以九州各建壇坛雨无水溢阳无旱乾惟此宣城山瘠土薄岂图夏五霖潦交作满集沟浍
山为水祥民实何辜吏则不臧用率府吏荐以清醑冀开阳光永福兹土庶其屡丰多黍多稌

诸庙祈晴祝文

按五行志废祭祀不祷祠则有水灾某自出守兹土敬共明神春祀秋赛靡不秩举亦曲荷神
休矣月书夏五梅雨成霑后土不乾平原出水推其所以致灾之故岂祝告不?欤岂燎香不洁
欤岂酒牲酸且瘠欤抑政令逆时欤或刑罚不中节欤戒谨恐惧惧有以貽神之譴而遗斯民
之害也兹用遣官遍谒于庙惟神益茂嘉德尽收积潦俾陰阳节风雨时民奠居而田多稼则
千里之国永拜神之赐於无斁

社稷祈晴祝文

冬不祈雨春不祈晴时之常也冬行秋令天时雨降时之变也顷以郡政失平阴雨为沴是用禱於社于稷惟神达天之氛神地之道使太阳之景曜灵而来岁之稼顺成则神之惠也抑某之愿也

诸庙祈晴祝文

方春载阳淫雨为沴麦既穗矣而雨不得发其实也谷且秧矣而雨不得茁其芽也沈陰不解必坏穡事用是乞晴於尔神明有能划剗陰云豁出阳景使年谷顺成不冻馁吾赤子则神永有饮食

万物莫润乎水过则为灾三日以往为霖沛然孰御非凭神力曷障洪流伏愿贝阙潜通珠宫密佑祥云覆壠蝗无害稼之忧巨涨复槽鸿有安居之乐

方春东作淫雨蚤降麦既穗矣而雨不得发其实也谷且秧矣而雨不得茁其芽也沈阴不解必坏穡事重惟国之有社有稷所以达天地之氛节风雨之宜纵阳闭陰惟神之惠用是乞晴於坛有其相之太守与邦民敢不选牲击鼓以报灵德

越州圆通寺谢晴祝文

顷以积雨为沴下民其咨自某日立秋若沈陰之弗解至招摇指亥喜阳景之渐舒爰沥衷忱以伸报谢曰霁曰蒙曰驿尚晴意之未坚时雨时燠时阳庶高灵之终惠

诸庙谢晴祝文

噎噎其陰崇朝其雨后土不乾皇天几瞽杲杲出日日出之光釜星杂垂鼓鍾其鏜鸦噪于田鸿集于泽爰刈我禾复耰我麦刈者欲晴耰者负暄匪侯尔私实神尔恩有飴其香有冽斯酒爰率乃僚告於有庙惟神仁明克相厥终绥我有邦年谷屡丰

天地社稷谢晴祝文

顷以沈阴干阳积雨为沴自立秋之日至十月之交分遣庶工遍走羣祀每加精禱靡不格思用涓良吉之辰以答高灵之贶曰霁曰蒙曰驿尚晴意之未坚时阳时燠时寒庶来甦之有望不徒报谢兼露恳祈

社稷谢晴祝文

昔文仲孺之守长安也以淫雨妨农诣於社而请之其夕发梦曹掾明而大霁人皆德太守而

灵社稷也今繆守以积雨之故借阳明於神之灵一念所通羣陰尽扫非神力回天其孰得与於斯敢率百僚以谢

诸庙谢晴祝文

农田苦雨祷尔於神只天宇开晴暖之以日月凡此感通之速莫非相佑之灵更望宿麦登場早有食新之望新秧出水永无断种之忧庶惠康境内之民尽销弭海滨之盗

社稷谢晴祝文

大田多雨祷尔於神祇后土得乾暖之以日月来甦既硕嘉种维新更望成此岁功咸有谷熟年登之象锡之景福更无木饥火旱之灾已应春祈尚图秋报

大雄山白虎洞敏应庙祈雨祝文

伏以三时务农饁彼南亩四月不雨病於夏畦矧疆事之孔殷重民生之艰食即不幸有方千里之旱其何以安亿兆民之心用咨廷臣徧走望祀伏愿山灵下格泽气上通鞭驾风霆尽洗如焚之魃作兴云雨顿苏垂槁之苗

诸山祷雨祝文【径山天目龙井广德洞霄】

伏以庶民惟星所望者岁四月不雨恐伤於农矧当师旅之未休颡以糗粮为司命麦已登矣而新谷不得以秧蚕且簇矣而艰食不得以粒若稔成於旱暵岂不蹈於忧危用咨百工徧走羣望伏愿【洞霄云灵旂来格道化滂流诸山云山泽通气风霆流形广德云呵叱鬼怪鞭驱风霆】雨我公田既咸宜於黍稷飨于世室庶无害於粢盛

卷十四

钦定四库全书

鹤林集卷十四 宋 吴泳 撰祝文

祈雨祝文

社稷

民生之命莫重於谷国中之神莫贵於社古之人水旱风雨必祷於其地者祈谷实也今田苗已穗矣而日曝之雨信已通矣而风阁之若非明神庇我穡事则东作废而西成坏矣燎芻酺酒惟神终惠之

诸神

新穀既升稍缓求荒之责时雨不降又深害稼之忧鸛巢栖垤而不鸣龙骨挂梁而复下非仰祈於甘霪恐立坏於垂成用殫一忱遍走羣祀伏愿叱风霆而密运沛膏泽以滂流既沾既足既渥既优尽除妖魃实坚实好实发实秀永保嘉生

风师

六月怕十七月怕半风之候也自季夏以来时雨不降民所望云霓也而吹使离之穀所仰膏雨也而吹使散之早禾晚稻几坏於成用率官僚致祷坛壝惟神歛阳乌之景祛海鸟之灾使沛然其泽下於民则吏与邦人有敬焉何敢讼

雷师

天地未解云雷方屯新穀既升时雨不降用祈于社复祷于神幸鞭霹雳之车密沛滂沱之泽使电交至而雨满盈则神之仁也亦民之望也

雨师

蚤穀将升晚禾且穗田以旱告忧心如熏东作既勤矣将合仞者只数日也西成在望矣欲倾盆者只一雨也吏职其显神司其幽鞭雷车摇电帜压终风霈甘泽俾集沟浍皆盈特在神辟阖转移间耳某率耄倪敬共以候

祈雨祝文

庙步

水旱不时祭山川之神古诸侯事也某自去岁出守是邦肃雨义阳粗得一稔今春以来大雪压土麦不得芃芃而茂也柔桑蔽空蚕不得羸羸而盛也四月之闰又以旱告脱或秧稻失其候民饥盗起岂不关千里利害哉敢洁瓣香以祈甘泽兴云致雨惟神其惠之

社神

在诗旱则祈於方社在礼裁则祀於社祠古者诸侯凡国中有水旱疾疫之事不但祷於境内山川之神而已後世治不知本燎芻寺观用牲庙宇便谓知典礼之大抑不知受风雨达天地之气莫贵於社也今夏闰告旱敢不忧祷惟神佑之甘雨随霑则邦之望也民之幸也

谢雨祝文

社神

惟守令古诸侯也向者试邑西州有水旱凶荒必祷於社每祷则辄应今假守於此民以旱告遂援百里之庇用之千里之邦曾不浹旬甘雨随应神之佑於有土有民迺如此敢不敬共以谢

庙步

赛雨敬亭厥典维旧眺以觐芻耒以牲酒某忝侍臣继两公守我蚕既登我麦实秀岂图妖魃为我民疚祷祠名山奔走在庙维神悯民密鉴左右指麾雨工手擘云霓粳稻可秧苧麻可沤水旱不灾年岁其有乐以五成牲以三豆神其顾歆永以孚佑

勾谿祷雨祝文

惟水旱不时祭山川之神此古诸侯事也而士得以行之非获已也吾乡之俗土旷而瘠民良而贫士循礼畏法而穷无水旱而犹水旱也况六月不雨至於秋七月耶今稻已秧矣而槁不得滋也芋已区矣而焦不得沃也脱或公上有不时之科须罔测之号令则农之家不得储粟矣士之家不得祀兹酒矣四山之木不得息且润而如彼其濯濯矣民穷至此更不待戈桩喉而斧伐命也是不可不阖国之衣冠选牲酺酒用币祷之於神也尊神其闵之俾雷雨之动满盈四郊庶几上下各有函活之意神之惠也民之望也士之志也

谢雨祝文

海神

天地左海为百谷之王山川出云不崇朝而雨虽造物好生之意亦威神赞化之功沟就洫而复通谷垂焦而遄活验占风之铎已无七月半之虞续志喜之书犹有三日霖之望

祠山城隍

比者勤闵斯民敬共有庙一谷不登之谓歉恐荐致於年饥三日以往则为霖喜获通於雨信礼有祈则有报物成始而成终更仗威灵益昭显相粳稻香兮雨足胥乐丰年荔子丹兮蕉黄愿歆芳祀

社稷风雷雨师

社神地之道稷司稼之宝润以风雨鼓之雷霆国有旱暵凶荒之灾而不致祷於兹者是之谓不知本也方闵闵望岁皇皇求雨即其本之所自出日率僚吏有请焉嘉赖神休遄霑甘泽物无疵疠谷用顺成敢不敬共以谢

祈雨祝文

昭泽侯

国家令典县有水旱则祷于山之神诚以兴云致雨神实司之惟神宅彼南山奠我四境比者以早有祷於神遄降膏泽今又踰浹日矣而阳骄不挫雷鸣之田水竭土坼用敢援令典以修明荐伏望赦吏之谬悯民之生殷其霑于山阳霑甘泽於境内某与百里之民跂立以冀

诸庙

县有水旱诣神祠祈祷此国之令典也比者四境之内亢阳为灾雷鸣之田水不满盈民心罄罄靡所戾止令之弗?固无以感阴阳之和神奠兹土其忍则安用是援令典以修明荐惟神鉴此精忱大霑甘泽以苏我田穰则吏与民不敢忘神之德

灵济庙

惟国有水旱长吏以下祷於山川之神令典也神能平水与旱而朝廷爵之通侯优恩也先皇帝以神有勤德始封为惠泽侯嘉定十七年秋出命而宝庆改元之秋符到受诰之日民适以旱告某曰以令典奔走在庙吏固不敢不?受国之优恩而霑然使膏泽下於民想神於冥冥中亦不敢不敬天之休也

雨神

惟天地间陰阳相交而为雨雨所以沛天泽而润万物也国家旧典立夏後申日祭雨神某为

邑长於斯岂敢简彝有椒其馨有洁斯牲其明以承厥祀俾膏润百里物无枯燥惟神其相之
社坛

国中之神莫贵於社所以受风雨达天地之气也矧为邑长於斯民以旱告则於社之禱其敢
曰莫用是熏香敬共坛壝之神悦蒙明神庇我穡事勅风霆以下膏泽俾勿坏於垂成若是人
民其敢忘报

诸庙

县曰雷土田曰雷鸣夏秋之交水不满盈曝以烈日田毛如醒若兹不雨则坏於成既禱于社
靡神不举敬其威灵庶回悔怒吏之不职罚止厥躬元元何辜罹此岁凶燎香酹酒以祈甘泽
驱风鞭霆涌出地脉水涌泉动物嘉且美尚几秋冬以享以祀

请石罽龙湫祝文

水以润下孰尸其功在天为雨在物为龙虽曰异途一气感通维时季夏我稼既同骄阳为梗
蘊蘊虫虫兹吏之责忧心若忡越国以谋靡神不宗爰有石罽龙宅其中用是緘香敢致敬恭
请分灵湫沃此四封嘘气成云雷电以风庶几西成不致岁凶神其鉴兹哀悯我农

谢风雷雨师祝文

伏以近者天久不雨心焦如焚四月为入梅田垄告旱五月名瓜蔓河流就乾用密禱於宫庭
及遍祈於山泽沆蒙响应果霈甘霖占离毕之祥既开其始诞维宝之穡永相斯成

立春祀五福十神祝文

掇提贞于孟陬方喜璿杓之换天神贵者太一载严玉璫之祠爰廸旧章式愍明祀伏愿上皇
降监五福照临边境息师尽洗旄头之色田畴多稼更陈龙角之祥

立夏祝五福十神祝文

孟夏之律中吕吉日维良太一之坛三阓衆灵咸会爰举奏词之典式祈向用之休伏愿穆若
上皇监於下土星辰清润边无多垒之虞年谷丰登民识有生之乐

立秋祀五福十神祝文

伏以昴主西方月行白道其明者太乙丽於天庭之中将憺兮壽宫锡尔下土之福式遵彝典
用致精祈伏望八极潜通十神昭假师干载戢拂除沴气之妖稼宝极登醞酿丰年之庆

海神生辰祝文

惟神庙食兹土庇佑我民属临诞期爰秩彝祀矧岁逢荒札民尚阻饥米方航海而盲风来秧正在田而淫雨至愿垂隲相时其雨阳庶几民有粒食之期吏寛刍牧之责惟神其鉴之

祈雪海神城隍祠山祝文

斗指两辰曰闰已就岁功雪於五谷为精更祈天瑞辄薰一瓣徧祷羣祠伏愿某神麾玄冥兮研冰令青女兮碾玉霜苏旱土已占麴麦之登成霰集良田更使螟蝗之秉畀

祈雪社稷祝文

社稷之坛受霜露风雨以达天地之气而雪不与焉故吏不以祈雪告陋哉彼安知雪者霜之余气雨之清芬积陰沍寒合成而为瑞者哉用是祇率官寮祷于坛壝雨天花丰地宝以育人民惟神其惠之

谢雪疏

岁五风而十雨未尝言郡境之全登地多燠而少寒岂谓见瓦沟之一白矧置闰适逢於腊尾而飞霰犹在於春前转回天机实仗法力更愿遗蝗入土终年无害稼之忧厉鬼出山百姓有为生之乐

谢海神城隍祠山祝文

郡以温得名片雪固难於到地瑞应诚而至一心端可以格天矧飞润麦之六花犹在先春之五日明神有德太守何功密覆牛尻预有来岁丰登之望冻凝鸱吻更无编氓疾病之忧

谢社稷祝文

社神地道稷长五谷皆主陰也今时雪不降而有祷焉岂非求诸陰之义哉一念才兴六花随应不惟可卜来岁之稼而庶民咸无疾病之忧敢不敬共以谢

祭风师祝文

天以一气运乎太虚散而为风润纖泽枯邦有彝典吏不敢渝祭有四时谨之在初粢牲既洁芳醑既储以享以祀惟神其监於兹

邑之小祀五社稷雷雨神则兼祀而风独专祭焉重始事也方春载阳万物纽芽不得风以润之则芽者不坼萌者不达何以施岁功於其後此祀事之不容不严尔是用敬共率遵彝典致

祭於神惟神妙鼓舞之神司长养之事幸终惠之

春祭祝文

维暮之春三月三日邦有厥典明祀是秩其秩维何既齐既稷我酒既旨我牲孔硕以祈蚕桑以保稼穡攘除厉鬼驱逐蠹贼守则何功皆神之德是用祝告其年其吉

祭海神祝文

周礼荒政十有二以散财薄征为首以索鬼神终焉夫为天子牧民不先惠养而徒事祷祈神亦所不享也某既抵东瓯以元日奉诏布德又三日率典谒庙先勤民而後致力於神者不敢不以其序也若夫时其风雨使年谷顺成盗贼屏息则有司海之责在

祭雷神祝文

惟天地间阴阳相薄而为雷雷所以代天言而动万物也国家旧典立夏後申日祭雷神某为邑长於斯岂敢简彝有苾其香有洁斯牲齐明以承厥祀俾震惊百里物无疵疠惟神其鉴之

秋祭城隍祝文

祭有祈焉有报焉方亢阳用事时祈年而年祈雨而雨祈谷而谷神亦可谓从民之欲矣陈牲设飧以报嘉德固其所也然地之生者有限而民之食者无穷以报之日为祈之始以今岁之稔致来岁之忧长吏曷尝顷刻忘於民哉夫足民之生而使之得以事神者吏之心也相吏之勤而使之得以养民者神之德也敢以忱辞告于有庙

奉安祠山城隍海神祝文

窃闻祠山为东壁之精天之神也城隍掌土地门行之事地之神也沧溟滚滚海神司之水之神也神官三才府万物水旱凶荒必祷焉今既奉迎於兹轰天之庭出地之云扬海之波抑在神变化阖辟间耳幸妥厥灵以宏其施

奉安圣水祝文

湫在潭而嘘为云出为雨者龙之变也水在瓶而徧洒含生普沾法界者观世音之变也今以圣水奉安于普觉寺以灵感灵岂无致雨之道哉亟霈甘泽以慰民望

青龙水祝文

按东嘉志大龙湫飞瀑万寻腾空而下神灵无与比方则龙潜於山久矣今西成在望旱魃忽

鸣民心皇皇惧行百里而半九十矣扣之父老称得湫龙之灵则激飞瀑而为滂沱特变化间耳用敢斋肃乃心奉辞以告神其听之神其惠之

春祭海神城隍祠山祝文

孟春祈谷季春祈麦自天子至诸侯其祀一也属春苦雨近方开霁秧既坏矣而复萌麦既枯矣而复实若非诸神阖阴辟阳安得一转移之顷而生意满田野耶用率彝章式修明祀惟神其终惠之

告土地祝文

伏以庙门容局宁无工筑地道贵静必有司存属吉日之鳩工惧明神之未妥尚惟阴相俾遂燕宁

谢晴祝文

阴霖过度方虞民食之艰霁色应祈悉自佛乘之赐扫顽云於顷刻收积潦於湫洄唯菩萨现无极慈悲使生灵受如是惠利敢忘报谢仰答灵私

卷十五

<集部,别集类,南宋建炎至德佑,鹤林集>

钦定四库全书

鹤林集卷十五 宋 吴泳 撰进御故实

建绍乾道陰雨五事

建炎三年六月己酉御笔太史奏天道久陰霖雨不止占曰久陰陰盛下有陰謀霖雨者人怨所致朕恐政失其道可来日召郎官以上赴都堂条具朕之过失民间疾苦政事失错可以消天变可以收人心可以召和气实封奏闻

绍兴四年六月乙丑臣寮奏方今国用军食尽仰浙西今陰雨连绵害于耕稼万一歉僅何以支吾臣愚欲望圣慈发自诚心专精祈祷仍诏大臣讲求所以修人事应天心之术凡刑狱有可理理之工役有可停停之浮费有可省省之人事既修天心自格庶几变灾为福中熟尚可冀也诏从之

八年四月丙辰御史中丞常同奏伏见比者淫雨踰月天地陰晦此盖陰盛之象其为灾异明矣夫君者阳也臣者陰也意者兵将骄恣有难制之渐乎刑狱淹久多冤濫乎百姓困弱怨气溢乎究此数端虽曰匪易然在陛下与二三大臣信之畏之虑之图之而已臣愿陛下每以数者曲留圣意念念不忘则羣策日闻变将自消矣

乾道元年有司以久雨乞分遣郡县吏祷於山川神祇上曰应天当以实此不必也比闻两浙身丁钱绢皆取於五等下户其议蠲除之小大之狱岂无冤滯其令御史虑囚朕将避殿减膳以答天譴

三年宰臣叶顥奏淫雨不止咎在臣等昨日有奏乞罢政上曰不必如此此皆朕有失德卿等当与朕交修庶政以召和气凡政事有失中刑狱有未当皆宜留意上又曰可差官分决滯狱

臣闻先儒有言臣者君之陰也妻者夫之陰也小人者君子之陰也阳明胜则妇婉而顺臣共而义小人远而伏故襍祥休徵并应而沓来陰浊行则妇乘夫臣僭君小人内而君子外故妖孽异眚层见而叠出考之先汉灾异之来抑何其稠也坤震载摇则嘉凤之专应之河井涌决则班赵之罢当之黜向任恭佞調求进而彗流日蚀之谪见北边驿骚匈奴骄肆而大雨水溢之灾起一事失一异应天人相与之际岂不甚可畏哉汉不足进矣绍兴开中天之业乾道有重熙之运君德清明政事修举内无女谒之宠朝无专政之臣憊壬无蔽主之失夷狄无猾夏之患然天多沈陰而雨数降霖霪不止而日少光修之人事者既无一缺之非而验之天象者犹有譴告之异吁可以见天心之仁爱人君矣然圣祖神宗岂一日忘敬天之怒哉虑政事之

错失也思兵将之骄恣也念百姓之愁怨也轸刑狱之多冤也君臣交修而德日隆天人交感而善日应卒能易水滂而丰登变妖眚而休福者盖灾异之来虽与汉同而人君之德独与汉异也况今木行失度既有苦雨数来之愆积陰不斂又有谷烂于场之虑则修明二祖之政在清朝可不亟加之意

建绍诸臣议秋防

建炎二年五月吏部侍郎刘班奏臣窃谓今时已中夏其去秋之时无几矣臣愿陛下申命大臣讲求其端博诏羣臣各献其说深恤军兵之居处饮食而教之以力战之法遴选守臣之才能勇略而付以足兵之寄优容狂直以广言路节抑浮费以裕邦财除苛徭信诏令以结天下之心急战功旌死事以激忠义之气如此则金人虽强尚可扞御而穷冬无惊扰之虑矣

二年六月御史中丞张守奏臣准省劄奉圣旨防秋在近朝廷虽已措置尚虑未尽令行在侍从职事官条具利害臣愚欲望陛下诏诸路帅守及防秋所遣将帅谕以前日逃遁失守逗留无功之人自今以往复蹈前辙必诛无赦亦复三令而五申之庶使玩法废职之人有所警惧防秋利害莫大於此

绍兴四年二月殿中侍御史常同奏臣闻国家艰难以每岁春夏未尝经意武事八九月之後方始讲究谓之防秋习以为常曾不深虑臣去岁之冬尝因奏对敷陈亲闻玉音欲自岁首即修武备夙夜以冀今春已中日月易逝得重寸陰敌国可虞而不可信和议可讲而不可恃欲望圣慈明诏大臣无苟目前之安无作因循之计加意筹画以壮远猷

六年五月吏部侍郎刘大中奏臣近蒙宰执召至都堂传圣旨令具将来防秋利害臣书生未习军旅之事安得具画上赞庙谟臣愿陛下应天变以实结人心以诚待敌勿事虚声爱民勿为文具此乃御敌之本也

十年五月江南东路安抚制置使叶梦得奏臣窃惟敌情变诈不测盛夏弓解马疲之时遽至王畿其志必欲先入东京休养士马至秋深长驱南下为冲突之计欲乞朝廷先定大计更命三将各具所见如何则守如何则战守以何道战以何术孰当锋居前孰勒兵殿後如何以为声援如何以为策应一一条上取所可行者就付之以责功效

臣闻周以盛夏征玃狁而捷汉以秋冬伐匈奴而败安边保胜之策亦贵乎豫而已矣夫温燠之气盛于东南严凝之气盛于西北凡敌人之所以衽金革被弓马坚忍而耐战者亦其气候使之然也故四月入淀八月出淀马乘牧之候也草青而归枣红而来兵出役之期也彼无岁不饮马无日不耀师专以蚕食上国为谋而吾则巍冠博带优游闲暇玩愒时日以待之则虽耳未闻钲鼓之声目不睹旌旗之色识者已覩其不敌矣杜牧有言曰今若以仲夏发幽并突骑及酒泉兵出回鹘意外一举无遗类矣今固不敢望行杜牧之策但如建绍间李纲所谓夏已及半去秋不远非早图之则敌又奔突刘班所谓时已中夏去秋无几惟博谋羣议则尚可扞敌如臣同如臣守如臣大中如臣梦得先定大计急修武备等策亟於此时早作措置则尚

可以遏羣哨於未南止敵衆於將遲不然采薇之戍勿剛折柳之樊益薄止俟其馳突自来而自去則非臣所愿聞也

绍兴乾淳經理荆襄淮蜀事宜

绍兴元年正月乙丑荆南鎮撫使解潛奏荆南系四川之口最為要害東鄰鄂岳北接襄郢見今侵犯未已千里之間人迹斷絕本路郡縣十分殘破臣獨立一方事力單弱無以鼓作士氣保守方面伏望差撥一軍精兵前來鎮壓敵氛保護川口有旨發王宗尹柴斌兩軍人應副使喚

七年知象州劉子羽奏荆襄昔人用武之地自喪亂以來莽為盜區國家多事未遑經理亦幸敵人棄而不顧殆天以資我也今千里丘墟固難盡守臣謂宜將荆襄合為一路增重帥權益兵聚糧募民耕種為戰守計一者貫通秦蜀無斷絕之虞二者控扼上流如首尾相應三者窺闕中原有卷席之勢是一舉而獲三利也

乾道三年勘會兩淮州軍曾經殘破去處二稅各已分數放免尚慮民力凋瘵未蘇州縣財賦闕乏可更與展免二稅一年其上供諸色窠名錢物等沿邊州郡更與全放一年

淳熙五年新知西和州王杰進對論關外四州與內不同當厚加存恤與之寬租賦釋逋負蠲徭役減征算使家給人足以備他日出師之用上曰今日正當如此

臣聞勞來還定西周之所以中興生聚教訓於越之所以復霸自古未嘗無敵國外患也使變故之來挫益激衄益厲剝缺破碎之處隨事補葺而益振則壞者未有不興僨者未有不超者當烏珠侵邊之際亮主飲江之時鐵騎如雲征塵覆鳥飄忽震蕩所向披靡而并邊城戍堡聚莫不罹其毒劉之毒曠土彌望居民稀少此何等氣象惟我紹隆君臣奮春秋復讐之心鼓匈奴未之氣振厲激作未嘗以一時觸藩之小故而沮其萬世立國之模故近而淮甸遠而襄蜀凡蹂踐傷殘之地兵闕則須而補之糧匱則隨而峙之流移未安則宅之城邑未復則修之耕種未廣則招民而垦之專務興補而壞者全悉心經理而勞者息中興之業成而復還承平之舊觀職此之故也頃者北兵潰防疆事孔棘襄蜀諸州半遭屠毀乘其暫退而亟撫瘡痍隨其流離而速加鎮定厚藩籬而安堂奧無大於此惟陛下亟行之

绍兴吳玠守蜀關二事

绍兴二年十二月金人使薩里罕裒五路叛兵來侵時吳玠駐和尚原兵不得進欲以奇取蜀乃令李彥琪駐秦州窺仙人關以要吳玠別將以游騎出熙河綴關師古而大軍由商於以入三年正月乙丑陷金州參議劉子羽移書與統制吳玠曰金兵旦夕至饒風嶺下不守此是無蜀也公不前子羽當往玠即馳與金兵遇金人始至關下被重鎧步登山而仰攻我之弓弩亂發且轉大石擊之至不能前則背山而坐玠又登凡六晝夜敵皆敗衄無何金人募死士從間道犯祖溪關守將郭仲力不能支玠見金人掩出我師後遂自饒風一日馳還漢中四川大

震二月己亥萨里罕入兴元府子羽约玠退屯三泉玠曰关外蜀之门户不可轻弃金人所以不敢轻入者恐玠议其後耳玠往守仙人关子羽筑硬栅於潭毒山以死守金人至金牛不见兵疑有伏玠又阳为军书会诸将欲断归路金人逻得之惧俄而报曰敌退矣於是子羽与玠急遣兵邀之于武林关金人尽弃其輜重及所掠人畜而去後军为我军掩击及堕溪涧死者数千计其後王俊于饶风下得马革万七千余且金自用兵以来无所得而有所亡未有如此役也四年春二月萨里罕与乌珠蓄愤日久纠合兵数十万转三河之粟鱼贯蚁附决意取蜀吴玠谍知之乃预治垒於仙人关侧号杀金平严兵以待辛丑敌自宝鷄进攻铁山凿崖开道犯关直攻玠营玠以万人当其前总管吴玠由七方关不待会合率轻兵倍道入援其兄宗弼闻之拥兵急攻关又往攻杀金平野砦对垒割连珠硬砦十数座又来玠营前立炮数十座击我营玠令军中并发神臂弓飞矢大炮毙敌无数敌添生兵万余分为二阵宗弼阵于东将军韩常阵於西我军苦战久遂退屯第二隘杨政言於玠曰此地为蜀扼塞死不可失当守以强弩彼不敢舍此而犯关玠从之金人复进攻第二隘人被两铠铁刃相连鱼贯而上玠督士死战矢下如雨翌日萨里罕命诸军并力攻营之西北楼统领姚仲登楼死战楼已倾仲以帛为繯曳使复正敌以火焚柱仲取酒击灭之敌引去遣王万年等分紫白旗入敌军敌奔溃抵夜玠别遣五将分更劫寨金人困惫死伤以万计歛兵宵遁是举也敌决意入蜀既不得志遂还凤翔授甲士为久留计

臣闻蜀国之上流也蟠冢导漾东流为汉则自金均历襄州而径趋汉阳者为一道岷山导江东别为沱则自涪万里入瞿塘而径会於九江者为一道故昔之固国者必以上流为固而所以固蜀者必以关险为守绍兴君臣日夜念此至熟也蜀之险固多岐而饶风一关汉中之屏蔽仙人一原西河之衿喉臣玠臣子羽臣仲尝守饶风矣臣璘臣政臣万年尝扼仙原矣如重弓副矢一隙弛则一备严一士亡则一将继铁骑虽成林而终不能越关而西者玠与璘之力也今敌之势不同于金而操关守御之士又少於全盛时近闻谍报颇有先通川路後会江南之意万一乡导者与之画王濬造大舟远舫之策直下荆州则江浒震惊而不但全蜀之忧矣为今之计莫若急督趣襄阆早发援兵以救仙原之危急科降缗钱差人押发以救蜀饷之匱急戒飭监司帅守各务进屯以救三川之亟如救头燃如解倒垂母使蜀之失自端平始几可以有辞於永世矣

高宗谕世忠修好光世

高宗皇帝绍兴四年淮西安抚使刘光世淮东安抚使韩世忠以私隙未平上谓世忠曰大将国家利害所系汉贾复寇恂以私愤几欲交兵光武一言分之即结友而去卿与光世不睦议者皆谓失驾驭之术朕甚愧之世忠顿首曰敢不奉诏他日见光世当负荆以谢

臣窃惟晋以桀书将中军而师乘和汉举向宠为都督而行阵睦师克在和古之道也两虎相鬪不能分之则不足以结寇贾之懽羣狐互争勿能遏之则适足以挑王沈之衅况中兴将士若非高宗皇帝驾驭调一则安能以服其心而折其气哉夫甲曰可战乙曰可和是犹议论之弗协也此欲进屯彼欲退守是犹识见之弗同也若强敌对境两阵决机进止之顷如云随山呼吸之间如雷破柱正赖猛虎之将熊黑之士相与戮力王室而私意横生羣猜不释往往盃

酒之间盖有白刃相讐者矣岂不误乃翁事哉此高宗皇帝所以举寇贾之事以论世忠而臣刘大中亦复书李郭之事以语光世盖欲使其先公而後私徇义而忘讐也已而私憾顿释忠肝相照世忠负荆谢罪光世贻书交欢而江淮克敌之功实基於此岂有诗书礼乐之帅反不如介冑武夫哉

高宗孝宗降罪已赦诏四事

绍兴五年正月敌人在江北者尽去戊午辅臣进曲赦淮南事目上曰赦文不可夸大第使实惠加於两淮百姓乃朕旨也已未德音云念士卒因战争之役吏民罹转徙之虞室庐焚剽者致无以自安妇子流离者有不能相保毒加尔衆痛在朕躬闵兹凋瘵之余霈以彫鸿之泽应淮南诸军并行存恤应山水寨团结人民并放免税役十年尝经兵马蹂践去处与放五年

绍兴三十有一年十有二月丁巳上次丹阳县宰执奏和州敌人已遁去乃议肆赦进呈赦书事目上曰向已下哀痛之诏今日恩宥不必更扬完顏亮过恶但专罪已而已甲子制云慨念疆场之民荐被兵戈之苦妻孥荡析肝脑糜捐室庐成煨烬之余田野丧耕犁之具祸貽尔衆罪在朕躬幸已靖于敌氛喜再成于乐土欲抚疮痍之俗爰推旷荡之恩其淮南京西湖北路德音到日释杂犯死罪以下囚

隆兴元年五月李显忠邵宏渊之师溃于符离癸酉降诏罪已曰朕文不足以柔远武不足以折冲明不足以见万里之情智不足以择三军之帅虽尔战士戮力取胜而我主将应敌无方号令既乖进退失律闵兹衆志罪在朕躬更期中外之协心共辅幼冲之不逮张浚特降授特进戊寅辅臣进呈近宿州敢死战士宜被优赏上曰当归功于下可催促张浚条具推赏

隆兴二年闰十一月和议成丙申德音降沿边残破州军曰重念数州之民罹此一时之难栋宇或遭於煨烬田畴并丧其犁鋤老穉有荡析之灾丁壮有系累之苦三冬匱薄千里绎骚顾尔何辜皆予不德宜推洗涤之宥少慰凋残之情楚滁濠庐光州盱眙光化军管内并杨承西和州襄阳德安府信阳高邮军界曾经残破去处德音到日除十恶外其余罪无轻重并放

臣闻万方有罪在予一人汤诰诰之辞也百姓有过在予一人武誓命之辞也仲尼叙尧舜禹历数之传於鲁经而独取汤诰泰誓二语继三圣之後懿哉罪已责躬之足以兴邦也汉世诏令九十一章而轮台一诏足以盖五十年征伐之愆唐德宗所下诏书九篇而奉天一赦足以销数十年强藩悍将之气悔志才萌而天意回猜情不任而人心感虽以好大强明之君犹不至墟汉而蹙唐者盖有繇也我高庙孝宗之志远矣某年发德音某年下明诏曰毒加尔衆痛在朕躬曰悯兹衆志罪在朕躬此汤武之用心也汉唐不足进矣今日内嬖相乘外忧未弭此危急存亡之秋也其可以虚文动民哉辞之辑矣民之治矣想襄淮汉沔疲民癯老莫不扶杖愿观陛下罪已之诏

绍兴淳熙预储蜀帅

绍兴二十八年九月庚辰中书舍人王刚中充龙图阁待制四川安抚制置使先是礼部侍郎孙道夫言成都帅陛下不可不择宜求材可以制置四川者二三人常置之圣度上云当储人以待缓急之用刚中亦言御戎最今日先务勿计敌之强弱当先自择将帅上壮其言会西蜀谋帅宰执谓宜得文武威风识大体者上曰无逾王刚中矣遂有是命

绍兴二十八年五月癸亥兵部侍郎汤允恭言仰惟陛下惠顾全蜀不忘宵旰至於擢用人材蠲除民赋无不上轶于渊衷者其除制置使也选任尤重每当制置使替移或赴召命若军中紧急关吏必候申朝廷差权官方有行移地远日久不免留滞欲望特降指挥依条令监司兼权诏今後四川制置使阙就令都大茶马一面暂兼权茶马又阙即总领兼权绍兴三十二年诏蜀去行都万里人材预当储蓄以备缓急今王之望既来欲举忠愍明敏之士周知蜀利害者可令集侍从台谏各举所知以俟采择淳熙十年六月己酉进呈太府寺丞勾昌泰奏蜀中制置使一员任六十州之安危或有疾病迁动自朝廷除授动经年岁方始到任一去一来之时至为利害之机愿于从臣中尝储一二人於蜀中令作安抚使一旦有制置使阙便可就除其于思患豫图最系国家大事上谕宰执曰此正在卿等留意今後欲除蜀帅须是选择可备制置使之用者庶几临时不至缺事

臣闻二矛重弓咏于閼宫之诗佐车副路掌于田仆之政古人图事虽一物之微未尝不置辅也矧蜀去天万里为国家上流三军之司命生灵之壽脉皆系一帅若非早储预蓄将何以扞不虞宅有用哉绍兴淳熙宸谟深远或列之华近以程其能或试之一道以老其器或欲求可以制置四川者二三人置之圣度或欲尝储一二从臣於安抚以备制置使之缺选择预故民听孚践馘多故戎情稔是以世将自禁从往刚中自宣谕除似与法原自利夔帅授如箝中之矢一矢既尽一矢继之如笼中之药一剂既投一剂承之更无仓卒乏才之患百有余年蜀帅得人职此之故今人才益衰少矣韩厥既老稟以智罄子仪将去代以光弼在清时不可不预加选择

孝宗与洪遵论吕蒙正所言君子小人之失

绍兴三十二年侍读洪遵进读三朝宝训至太宗问君子少小人多何也吕蒙正曰此系时运盛衰苟邦国隆盛则君子道长及乎将衰则小人在位上曰吕蒙正所言君子小人系时运盛衰朕以为不然正在人君如何耳

臣尝伏读国史历观君子小人之消长进退其所以互相排斥者大略凡四变自元佑初司马光为相登用正人屏逐羣小王岩叟八疏论章惇刘摯九疏论蔡确孙觉七疏论韩缜苏辙吕陶孙朴朱光庭五疏论安燾如京如卞如布如惠卿诸贤攻之亦不一疏其间或有以参用熙宁旧人以絕异时朋党之祸者光曰天若祚宋必无此事故其始也号曰君子攻小人司马光死吕公着老摯大防相继秉政而议论之偏君子亦自相矛盾矣吏额细事也而主摯者攻大防主大防者攻摯歌哭戏语也而主颐者攻轼主轼者攻颐向使摯与大防融以善意而无隙之可乘则何由有秦汶分朋之讥轼与颐开布以真诚而无衅之可入则何由有川洛异党之谤异时八关五鬼之号彼执我仇仇者反得以议我矣故其末也号曰君子攻君子方绍圣初

杨畏引用王氏之党而元佑之君子孤矣李清臣倡为绍述之号而国家之正论变矣故张商英之始攻元佑大臣也榜朝堂者凡十五条翟思之攻正人也乞追降者凡十四士郑雍杨畏之攻刘摯苏轼也具党人之姓名者凡三十辈黄庆基谓洛党虽衰川党复盛周秩谓大防恶党半已出外半犹在京甚至岭海之臣欲重镌责墟墓之人亦复追仇前日之去小人也何其怨今日之逐君子也何其惨故其初也号曰小人攻君子章惇入相制词布所草也而因进拟之失布倾之安焘执政焘与惇素所善也而因驳议之多惇排之举从臣之议布既倾卞建皇储之议蔡又倾章主一人也蔡主序辰章则王鎰恶一人也章恶嘉问蔡则恶种章蔡由是不盛矣虽迹在元佑心在熙丰以杨畏之捭阖终不免於斥去在元佑则尽更元丰之所守在绍兴则陰匿元佑之所为以许将之硕望犹不免於降黜权势相轧浇薄互煽至於平日以兄事人而不得使之入京以子事父而不得使之久於其位故其终也号曰小人攻小人逮夫君子之道既消小人之去既尽不得已而倚用庸人则如人一身受病参苓乌喙既已屏去而复命无恒之医下不对病之药其何以起民痼而延国脉哉故尝以为元佑之初如五阳之夬元佑之末如同人之吝绍圣之初如五陰之剥绍圣之後如二女之睽若使元佑而听程颢无自分党之说则必不重貽绍圣之害使绍圣而用陈瓘无所偏重之谕则必能参用元佑之人国是既明人心归一正人必不指邪人为朋邪人必不指端人为党中原之祸亦冥消於转移之间矣观乎此似若关乎气运之盛衰者而我孝宗皇帝识高见远乃谓正在人君猗欤盛哉抑诡怪行大中实有赖于皇极之主哉

孝宗施行王弗等所进故事

乾道元年三月丙寅权尚书刑部侍郎王弗进故事昔楚庄王问孙叔敖曰寡人未得所以为国是也叔敖曰国之有是衆所恶也恐王不能定也庄王曰善愿相国与诸大夫共定国是也臣闻国之有是至当归一异议不得而摇之则庶政惟和天下无事国无定是人怀异论不顾国家之安危不恤生民之利害惟求己胜以媒进取循致危亡者多矣楚庄王孙叔敖小国之君臣其所言乃尔可以为万世之法诏王弗进故事诚有国家之大戒今日之先务朕当与执政大臣凡百官僚思其未是以归於是期共守之五月辛酉中书舍人兼直学士院洪适进故事仁宗皇帝皇元三年以淮南江淮荆湖制置发运使尚书金部员外郎许元为侍御史元初为发运判官久之为副使既久之为使上谓执政曰发运使以得其人而久任今许元累上章求解朕思之不若獎勵以尽其才乃特赐进士出身除侍御史留久任诏洪适所进故事切当今日之弊今後非因昏懦不职不得遽有迁易其兴利除害绩用修举并依仁宗朝用许元故事优加推擢显用施行

臣闻道不稽诸先王不足以为善道政不考诸往训不足以为善政前事不忘後事之师虽圣帝明王有不能易也尧舜聪明之君也首曰若稽古汤齐圣之君也而曰率厥典书至高宗始言学而其纲领不过曰监于先王成宪诗至成王始言极治而其功效不过曰率由旧章道问学而咨故实盖有自来矣汉魏相奏汉兴以来诏书二十三事论者以为得体唐宪宗诏李绛等搜次君臣成败五十事识者谓之知言然而汉杂伯唐多乱未足以为法也懿我国朝以百代为元龟以烈祖为宝监前朝事近於治道者诏儒臣日进五条庆历故事也本朝事关治体者轮侍从日进一两事建炎故事也王弗进楚令尹定国是之议洪适进仁宗朝久任监司之

说乾道间故事也家法之美方策具在羣工之奏开卷了然善者可师而不善者可鉴也然而臣之进故事也不徒进也必贵於可行君之阅故事也不苟知也必期於允蹈若行之不力蹈之不坚则虽日进百余月献万言但其具文而已更化以来臣所进故事凡二十余篇皆本朝故实而不杂以他事大抵欲陛下法祖敬宗而以世为天下之法若夫迪上以非先王之典则非臣之所以事陛下也

乾道初郊雷变

乾道三年十一月丙寅合飨天地於圜丘以太祖皇帝太宗皇帝配值雨望祭于斋宫还青城质明还内羣臣赴文德殿听制戊辰雷发非时己巳赐三省枢密院诏及戒谕中外百僚诏癸酉诏罢左正奉大夫守尚书左仆射同中书门下平章事兼枢密事叶颙提举江州太平兴国宫左宣奉大夫守尚书右仆射同中书门下平章事兼枢密使魏杞并以郊祀雷震故也

丁丑诏曰比者盛冬之月雷声震发上天谴告不虚其应惕然警戒深惧朕有失德朝有阙政民有疾苦上奸陰阳之和可令台谏侍从两省官指陈咎徵毋有所隐

辛巳参知政事蒋芾奏窃惟当今急务莫先於人材伏见朝廷每一阙官执政聚堂商议阁笔相视累月然所除授竟不满人意者非果无才也天下之大人材之衆邪正能否未易悉知而欲二三执政周询而遍察之亦已难矣臣愿明诏侍从两省台谏卿监郎官於中外见任寄居待阙官中荐举可任郎官寺监丞簿监司郡守者十人各疏其所长附於姓名之下虽资历未至而其材他日可以郎官及监司郡守者亦许论荐限五日具姓名申奏乞降付中书省籍记每遇阙官臣等披籍检照所举官最多者较量人材高下资序深浅选择取旨擢用得人不至有乏材之叹从之

臣闻敬迓天威不敢昏逾成周之所以盛也旻天疾威弗虑弗图小雅之所以衰也古未有无灾异之时顾人君所以应之者何如耳寅畏则昊天降康上帝临汝可以回悔怒而为恻戏豫则昊天降威上帝震怒未免转和气而为沴丹书曰敬胜怠者吉怠胜敬者凶表记曰庄敬日强安肆日偷一敬肆之分而灾祥立异为人上者奈何一日而不敬哉乾道初郊雷雨示变日至之时而天动威飨帝之夕而雨倾注此大异也我孝宗皇帝岂斯须而忘敬天之渝哉今日而避殿宣制明日而戒飭百工又明日而策免宰辅又明日而下诏求言又明日而命百官荐贤达士孝宗此心非今日敬而明日不敬也非一事敬而庶事不敬也非迅烈之变作则敬而震艱之威息则不敬也敬天之怒而夙夜不敢康敕天之怒而戒惧不敢怠此所以灾异稠仍而不累其为乾淳之盛也乃者宗祀明堂天威震雷陛下严恭寅畏对越只惧凡所施行动遵祖宪已足以承天心而端帝命矣然周颂曰夙夜敬止又曰敬之敬之天维显思言无时而不敬也惟陛下留神

乾淳讲论会子五事

乾道四年五月四日上宣谕宰执曰朕昨疑会子三二年後壅并必不通快卿等有救之之术

否王炎奏曰会子行之既广自然通快蒋芾奏曰今以会子收钱银若会子稍多便出钱银以收之如此所谓行权陈俊卿奏曰敛散抑扬之道权在於上则无弊矣上曰然

淳熙二年辅臣进呈淮东西两总领所各乞以金银换兑会子支遣上曰纲运既以会子中半入纳何故乃尔缺少叶衡奏户部岁入一千二百万其半为会子而南库以金银换收者四百余万流行于外者才二百万安得不少上曰此是户部之数不知两总领所分数入纳如何恐久而有弊及钱良臣申到民间入纳缺少会子并两淮收换铜钱已支绝会子乞再给降上曰会子直如此少茂良奏闻得商旅往来贸易竞用会子一为免商税二为省脚乘三为不复折阅以此观之会子可谓通流上令从所请因宣谕曰卿等子细讲究本末思所以为善後之计

六年辅臣进呈权户部侍郎陈岷言契勘每月大军支遣会子昨缘折阅以见钱银两抵换今来会子与见钱相等欲乞住行抵换上曰可权住一月近来会子闻民间甚贵重之与见钱等朕若不爱惜会子散出过多岂得如今日之事乎

七年辅臣进呈淮西总领叶宏再乞支降会子赵雄等奏陛下称提会子今见其利遂使会子反重於钱上曰利在天下权在朝廷

十年辅臣进呈镇江总领所乞降新会兑换上见所具新印会子数目乃曰新印会子比旧又增多大凡行用会子少则重多则轻

臣闻周太公立九府圉法其言金钱布帛之用曰利於刀流于泉布于布束于帛欲其重轻相权公私俱利也至汉造皮币唐置飞钱国朝在京有便钱务天圣初益州翔造交子务所以与钱相权或便商贾之懋迁或佐公上之不给造端立法实本於周然法之翔也求以便民而其弊也或以厉民盖楮犹水也源清流洁支畅旁通则可以泽物而源壅流多溃防决溢则亦可以为民害东南之有铜会创始于绍兴六年其数至尠也乾道初增印二百万三年丁亥流行于民间九百八十万四年戊子又诏以一千万为一界寻又以两界相沓而行夫以十有二路之广一百三十州之衆行二千万缗之楮未甚害也而孝宗皇帝之谕辅臣乃曰会子少则重多则轻曰民间甚贵重楮不可使散出过多曰恐二三年後壅并必不通快又曰利在天下权在朝廷又曰卿等子细讲究本末思所以为善後之策大哉圣谟忧深思远真可以为後世法也矧今日楮会之书放者已十三倍於乾淳若能体孝宗皇帝圣训思所以少重多轻之因从其源头受病处止之然後多方求所以救之之策则子母必能相权气血必能相滋而其弊可渐革矣

卷十六

钦定四库全书

鹤林集卷十六 宋 吴泳 撰表

明堂皇后贺表

伏以练季商之日虚柳正中敞重屋之仪房心动色天地并祝家邦同休中贺恭惟皇帝陛下凝命溥将宅师嘉靖斋戒以事上帝获修圭币之恭肆裸以飨先王既奉牺牲之洁灵娯昭格景福来同臣妾忝备坤仪忻承乾施嘉与黎元之衆悉陶惠泽之春

贵妃贺表

载龟阳馆肇秩明禋笙鼓纯绎而百志熙粢盛令芳而三神格中贺恭惟皇帝陛下聪明似禹渊懿若文燕及皇天洋乎如在其上衍我烈祖恂然如闻其声精神感通福祉洋溢臣妾叨华星掖奉戴露恩觐熙事之休成同嘉师而庆赖

美人贺表

哀封国阳肇称禋祀奠琮而乾端露荐鬯而神意娯中贺恭惟皇帝陛下寅奉明威丕昭缙典效天法地俨高厚之顾歆尊祖敬宗瞻明只之来下受厘宣室均福後庭臣妾叨备下陈忻逢华旦既被祭典十伦之泽仍祈天家万壽之春

明堂庆成贺表

天子垂万世之基礼严宗祀明堂教诸侯之孝赉及多方凡隶王臣悉沾馥泽恭惟皇帝陛下酌祖之道对天之休屏玉女却宓妃夙夜致精明之德乘銮輿备法驾斯须无易慢之心愿民力之普存节邦财而用慎式凭一念祇答三灵所以款谒之朝风雨霁澄裸将之夕星月清丽岂曰弥文之应实繇俭德之昭靖惟先朝厥有不式自肇禋者严率斂之戒而继志者遵省约之风一黄道缙之微仁祖必为民而更造一黑羊裘之细哲宗恐害物而改为盖德修荐薄则吉大来而礼渎祀丰则灵弗假矧四藏合宫之际皆一循列圣之?大路所历黎元不知见人心之悦豫升歌之终明神既飨宜圣祚之绵长臣翳居林泉阻奉牲玉尚怀忠信效祝史之正辞未敢铺张第从臣之嘉颂

明堂庆成贺表

合侑明庭肇修旷典功莫隆于尊祖既保乂殷礼多历年孝尤重於飨亲故宗祀文王配上帝乾坤清夷而辇道零星日澄丽而斋坛光作民恭先惟圣是克恭惟皇帝陛下明超万古奥接

三才寅畏严恭固自克谨先王之宪寬仁慈俭未尝敢违宁考之心是用裒对天之闕休式严父之丕训工竞显相神来宴娛不惟见祖宗之灵在人抑可占国家之福未艾臣心驰象魏目动鷄幡陪祀合宫虽不预周士奉璋之列依光近甸尚可述尧民击壤之歌

天基节贺表

伏以紫盖在东已应中天之运赤光满室式标诞日之祥春遍康衢人登壽域恭惟皇帝陛下稟尧舜之圣躬禹汤之明求福不回虽备寿富康宁之美遇灾而惧常怀严恭寅畏之忱以仁恕结人心以忧勤养壽命肆其享国惟以永年臣目徯天庭身縻侯服莫陪俊乂銜壽酒於舞阶尚与老癯布诏书於方国

望云气於越山夙开圣瑞占龙躔于汉阙还启诞期春回九垓懽震羣岳窃考历代开承之统无如皇家眷命之休丽日照裾宜仁庙得天之久赤光满室肆高宗享国之长懿哉二祖之风鍾作一人之庆恭惟皇帝陛下神姿凝重性德清明黼展坐朝凝如山之不动细旃论道粹於玉之无瑕瑞符已协于帝文甄贍宜编於瑶牒所其无逸维以永年臣职在视厘报勤归美第从臣之颂班莫越于春朝歌圣壽之辞心但存于南亩

寅阶簇仗先一日以颁春甲观奉觴後千秋而称壽瑞浮天阙欢动海邦恭惟皇帝陛下性德徇齐身容郁嶷齐明而事上帝划开阳景之晴神武而馭四夷洗尽兵氛之浊吉梦着紫金之珎符镂白玉之编会登太平均锡繁祉臣久离扈从复忝蕃宣马头才近于东甌斗口忽瞻於南极奏诞圣之曲勿能赓唐殿之乐章诵祈年之诗尚可广周家之德意

圣统垂仁岁已更於六闰泰元增筴运复起于三阳矧名隶于禁涂合表通于瑞栞窃考历象周天之数始知帝王受命之符尧之生以甲申仁壽化行于万国舜之生於甲子聪明德冠於羣伦有开弥月之祥实并两朝之美恭惟皇帝陛下道包衆类智烛万微神武布昭虽克济中兴之大业严恭自度未尝忘当事之小心言动宪丹书之铭珎祥镂白玉之牒肆其享国惟以永年臣目徯虹流首勤虎拜舞阶寸地莫能接武於夔龙致主孤忠尚欲同符于尧舜

簇仗寅阶大王正之一统奉觴甲观祈天子之万年庆流海邦欢动崧岳恭惟皇帝陛下神姿英武圣性徇齐夙夜畏天之威每清心而寡欲寤兴惟正之宪因立号以改元矧逢电绕之辰宜介川增之祉漕河水足师曾无告匱之忧边柝尘清民始有为生之乐臣偶分汉竹阻奉尧樽嘉与东甌老癯之民愿同华封富壽之祝上金监千秋之录曾陪北阙之班奉玉隆万壽之词敢後南山之祝笔飞荷橐表露枫宸粤稽历数之周天因识帝王之启运尧自甲申而起所以世治而君聪明舜於甲子而生所以德行而民仁壽伟一人之有庆参三代以同符恭惟皇帝陛下圣性徇齐神姿郁嶷武能禁暴宅夫九有之师寬本爱人锡厥庶民之福矧紫逻絕夕烽之警而青畴迎腊雪之祥德则无疆年其有永臣翳居林木阻覲阙庭制诞圣之乐章未及升歌而迭奏磨中兴之崖石尚须泚笔以大书

七闰曰章方起系年之历三阳为泰又逢诞圣之期庆集路朝福流方夏恭惟皇帝陛下秉姿

岐嶷宅志清明性尧舜之仁适应甲周之数命殷汤之武首开颺降之祥旄头占敌运之衰龙角表天田之瑞御图有赫介福无疆臣近在日畿阻陪汉阙圣恩寛大再叨玉隆万壽之词国祚绵长更上金监千秋之录

王正一纪已占斗柄之指寅天子万年复喜岁端之换甲车书所暨福祿攸同恭惟皇帝陛下睿性徇齐神容郁嶷圣人之生不数黄河始遇於一清天瑞之应以承腊雪更逢於三白麦土压青蝗之沴榆关销赤羽之尘月正诞弥邦其嘉靖臣旋随泽鴈喜覩星虹录上千秋不能陪从橐之簪笔宫名万壽尚可效祠官之祝厘真人之生东越有开受命之符摄提之正孟陬适遇发祥之旦度绵万禩懽洽八埏恭惟皇帝陛下圣性徇齐神姿郁嶷踐阼阅十五载将以有为享国踰三百年所其无逸史奏日星之顺纪农占雨雪之呈祥凡为禹甸之臣率效尧封之祝臣夙叨昼接阻奉春朝銜系宝章虽去京之日远录陈金监尚报主之心长

天生英主有开瑞颺之符岁纪诞期适次苍龙之首庆绵宗社泽畅埏垓昔者尧以甲申而帝祚昌舜以甲子而天休永祗若二代懿予一人恭惟皇帝陛下齐圣广渊发强刚毅朝清道泰四门辟无凶人岁稔时和六府修惟善政矧青辂宾春於除日而黄麾簇仗于元正留万岁盃为九重壽臣近居日甸阻覲天顏奉香火无言已罢玉隆之秩贺朝廷有道尚存金监之书

望霞鹜之天新饬建侯之度瞻星虹之渚适逢诞圣之期庆鍾一人光动九牧恭惟皇帝陛下神姿郁嶷圣性徇齐乘尧运以得天乾清坤謚祀文王而配帝日丽星辉北陲无一警之尘南亩有屡丰之喜所其无逸惟以永年臣曩侍汉朝今侯周服阻陪俊彦銜壽酒于舞阶嘉与老癯布诏条於方国

元正贺表

凤图纪岁象阙颁正恭惟皇帝陛下位在德元动稽天若体仁观万物之资始致化如四时之错行矧逢交泰之期宜介畴离之祉列千官之仗朝仪既肃於寅阶留万岁之盃圣壽更祈於甲观臣奉祠真馆阻覲端门嘉与东郊老癯之民愿观春日寛大之诏

载旗丑陞先三日已颁春簇仗寅阶奉一元而布政恭惟皇帝陛下仁如天运敬与日跻求王道之端致和而万物育省岁功之始不言而四时行矧逢交泰之辰宜燕畴离之祉臣近居禹甸阻奉尧尊嘉与苕溪老癯之民愿效封人富壽之祝

青辂载旗迎年於卯陞黄麾簇仗贺朔于寅阶三朝会同万宇和泰恭惟皇帝陛下道参天运位在德元积闰为一章已尽财成之道先春凡七日首颁寛大之书无台不熙有域皆壽臣叨居靖馆喜见载阳嘉与龟溪癯老之民愿观象魏清明之教

洪都新府方奉教条象阙端门又颁正朔恭惟皇帝陛下稽天若位在德元不言而四时行有道而百神飨列千官之仗朝仪既肃於寅阶留万岁之盃圣壽更祈於甲观臣偶縻周服阻会汉京嘉与西山老癯之民愿观春日寛大之诏

冬至贺表

斗历改元已协岁成之叙天正肇统又书日至之祥王春从白琯以潜回仙仗簇黄麾而交贺化舒万国欣动千官恭惟皇帝陛下秉道之枢究天之度纪星量月中国常盛而夷狄衰辟陰闔阳君子益亲而小人远刚德正纯乾之位仁心迎来复之机悉陶尧壤之民溥锡箕畴之福臣叨祠靖馆阻拜明廷读易南窗虽有闭关之志系心北阙宁忘进袜之诚抑尝奏薄技于禁林敢不通微词于表案更祈上熟以济中兴

淳佑改元贺表

大衍归奇象闰已成积岁之功春秋谓一为元式正表年之统正朔所暨车书攸同恭惟皇帝陛下克绥厥猷皇建有极循尧之道观历象於昊天行夏之时訖声教於四海此以兵祲之未静加之穡事之不登吏巧而文寢深安得还淳於上去年饥而用不足畴能孚佑於下民爰稽五始之遗文遂辑四宗之徽号以崇励风俗以导迎休祥臣适守价藩恪承明诏斗历改宪已逢泰运於三阳春朝受图更巩鸿基于万岁

改元皇后贺牋

春朝颁象斗历改元正朔所加宇宙皆泰恭惟皇后陛下气含温厚德秉静专顺承乎天无为而羣物阜将遡於日不动而四时行爰参宝典之丕彝式正始年之徽号臣顾瞻凤阙维縈鹿城嘉与海滨遐迹之民布宣春日寬大之诏

进奉御书石刻表

圣人之情见乎辞咸仰王言之大天下之动贞夫一不离心画之精捧二宝以珍藏焕三辰而炳丽遂鑱翠石以侈鸿休恭惟皇帝陛下天纵多能学深六艺睿思高妙发于尧典之文章宸翰辉煌传得洛书之字法至若诏旨春颁於郡国词头夜下于禁林湛雨露之沾濡骇龙鸾之飞动鸦翻御墨烂垂银汉之光龟护丰碑永作海邦之镇臣曩陪供奉今忝藩宣纪载金坡之遗虽无钱惟演之巨笔顾瞻玉堂之邃犹有欧阳修之遐心乃营古郡之冈庸葺新楼之址题为拱极示敬主以弗忘跋所赐书庶托名於不朽

赐御书宗濂精舍额谢表

河汉宗於海岂道学之无源日月丽于天信神章之有烂焕开黉宇铺对鸿休粤自禹河之绿字无传周几之丹书寢远光武手迹方国竞观文皇飞毫朝堂争宝曾未若皇帝陛下銳情古训游思书林云汉昭回意态生於笔下龙鸾飞动精神运于画前乃眷孝庙初潜之藩是为濂溪始仕之地式颁御墨以重儒官臣敢不仰奉珎题俯宣清化经天纬地幸逢圣主之右文弄月吟风乐得英才而共学

知隆兴府到任谢表

起废寓里疏荣价藩臣罪积如丘山圣恩深于雨露恭惟皇帝陛下法度尧禹典刑舜文数引公卿欲闻四方有水旱盗贼之奏亲问守相要使庶民无叹息愁恨之声岂应一介臣之微辄冒二千石之寄伏念臣学迂而癖志广而疎居官亡以瘳人任郡率多废事方建侯寧国既不以治办名逮再守永嘉寻复坐懦弱免虽衆女望娥眉而交嫉实小人负乘器以招尤退处一丘亦遭三黜特荷皇帝陛下恢乾坤之量揭日月之明知非臣辜复以郡起欲吁天控免而诏旨丁宁勉臣治民欲过阙敷陈而省符督迫促臣上道便殿不得入奏侧门不及候辞空有心驰魏阙之忠莫能面奉玉音之训式钦乃命爰疾其驱臣所领州在大江南界荆扬域向也物华民富今焉地大国贫苗催一十五万石而所支尚欠一月之粮税管五十七万钱而所收不满终岁之用重以督府括财之峻加之饷台追吏之苛网密而讼益繁珥笔之风未弭民穷而盗滋起弄兵之习犹存矧帅权分隶于九江而侯度仅颁于八县孤垒子立百为莫开然臣尝阅汉舆图数唐职贡或治南昌赐侯王之印或分西道专采访之权虽曰地雄亦因人重陈仲举设孺子一榻清誉高于岱嵩王弘中得文公片碑灵光射於牛斗逮於圣宋懿我孝宗升潜藩为统府之华表赐额用纪元之号首振吏治以开中兴今天子圣神朝廷寛大乃眷玉隆之散吏就交铜虎之左符臣已於十二月十八日到府上讫谨宣鸿化式慰黔黎紫马朱衣虽动千里湖山之色玉珂金钏尚思五更京阙之朝

除宝章阁直学士知宁国府到任谢表

罢直禁林叨陞妨合虽离扈从亦忝藩宣祇荷恩华弥深感涕窃宁国本鸠兹地跨鹊岸营厥土饶瘠而坚厥民精劲而艺唐时户口不满六万戍兵才及二千而西平淮夷北取泽潞守圉扞敌名迪有功今生齿之版几倍于前而厢禁之籍乃不如昔若使岁年丰稔犹或可以保民脱遭水旱凶荒则将何以为国而况密迩姑熟接连大江当此防秋之时宁无饮马之虑永言牧御宜藉英贤如臣之迂岂堪此寄伏念臣始自入仕至於升朝宰岩邑几四年盖尝学道丞外府阅三载曾靡求知不自意于遭逢乃徧更於华显既叨銓部宪曹之选又忝词垣翰院之臣以文字为官常以语言为职业入直则闭合草制吏责不加退朝则杜门读书职忧靡及向尝登对便殿亲闻玉音谓臣奏疏颇为忧时谓臣麻词最为得体所以感激恩遇竭殫疲弩抑不思名既盛则毁日来官愈清则忌益衆致烦吏议有累圣知不谓特蒙皇帝陛下尧仁如天汉德如海察其初无大过矜其粗有小能宁屈刑章复紆郡绂霁威而待杨亿既寛阳翟之诛违谤而用元之犹畀黄冈之守臣无斯学力有此宠荣荷遗簪之未忘誓结草以图报故才抵郡境延见吏民具言天子圣神朝廷清泰治政无大小必躬必亲视民无戚疎兼爱兼养有隐必达无幽不伸更遣近臣出为刺史凡白袍乌?之叟见紫笔朱衣之人自谓生长至今已八十余岁不闻侍从出守几三十余年以臣之来必慰其望臣敢不飭己以正临民以庄不事掊刻为声名不崇简大为风采官暇则劳耕夫於野农隙则阅弩手于州千里佩符虽对斗垒旌旗之色五更听漏尚思神京钟鼓之音

知温州到任谢表

臣虬蝨贱臣久窃厘廩圣恩隆厚起授虎符去秋八月五日伏承制书除臣温州太守被命之後臣有弟昌裔适守东阳辟馆招延俾臣待戎嫠与温实股肱郡臣於弟同气而分形骨肉合并曾几何日而公朝寻有旨促臣之官州郡亦遣人迫臣就道臣更不敢久稽王事爰疾其驱水陆七程雨雪三日遂于除夕到州月正元日上讫既祇厥事延见吏民荷锄带经之农扶杖听诏之老争来马前具言天子仁圣治朝清明虽在海滨皆沾德化向者家给人足素号乐土今兹木饥火旱适遭歉年见臣之来从两朱吏拥双红旗佩二千石印绶意谓九重特遣侍臣必能利安黎庶辞忱望切凛莫克胜窃以温州负闽带粤在钜海极东户口几二十万家苗头仅四万余石海物虽繁而地产薄舶航欲聚而国力贫考之职方参之里谚乃知总一岁所收不敌浙西一邑之赋举全州尽熟不如苏湖一顿之粥况重之以方千里之旱加以人半菽之食野有饿殍室无盖藏民且病矣而荒不诏救粮则无矣而饥不及麦既号宅生之所托岂宜当牧之不求伏望圣朝以仁政治天下凡遇水旱曲意赈恤陝右饥仁祖皇帝出奉宸银以赈其贫江西饥孝宗皇帝捐上供米以济其乏列圣相受同此心法所以二百八十一年之间虽岁有荒札民无流离者植根厚而施泽久也今皇帝陛下体仁宗之仁法孝宗之孝祇德恤刑以迓天命薄征散利以饷国人每引公卿数问守宰吏道之臧否靡不烛民情之疾苦靡不闻上宏十三圣继天之丕基下永亿万年立国之壽脉臣於此际为吏长人敢不遵正岁治家之法布阳春寬大之诏捐俸粟以动大夫之贷虽未調百姓之贫減田租以寬下国之输庶获受一介之赐若夫亢旱而不以旱奏实损而不以损言矜纖能小慧为聪明倚暴歛急征为治办宠望贵胄瘼兹下民臣虽至愚不忍为此臣无任惓歎屏营之至

除宝章阁学士知温州谢表

代耕南亩已玷廩人继粟之恩假守东甌复玷学士登瀛之选殊私难报危涕自零伏念臣本自诸生家承素业柳氏之族少为朝士曩常聯綴于周行子云之官不过侍郎今已经登於常伯岂薄技出宗盟之右而謏闻超往哲之先实以遭值圣明踐更华显曾一麾而去国寻再命而典州虽回顾玉堂班莫陪于供奉而载瞻宝宇梦犹到於邃清申之以锡命之蕃重之以赐金之富丛徽章之沓至藐衰质之难堪兹盖伏遇皇帝陛下泰包八荒賁饰万物察臣秉心自直故抚弃迹以重收念臣力学未衰故貽嘉名而特授畴之迹列无此龙光彼壮士一餐犹捐軀而不顾匹夫片语终矢义而勿忘矧兹怀恩未报之身当此焦思有为之日若匪共而不貳公尔忘私则非惟无利于公家是亦自负其所学永言及此之死靡他

提举玉隆万壽宫谢表

罢守中川祝厘靖馆罪浮责薄感极涕深伏念臣起自书生闇於吏道入则簪笔扈从不离於文学语言出则秉麾蕃宣率本於诗书岂弟自领海邦之牧适逢岁事之荒蠲夏税七万六千余缗尚恐民财之不给放秋苗二万八千余石犹虞粒食之孔艰哀赈贫調厄为一书创裕民餉军为两库凡此搏裁於邦计只图安利於黎元名实未孚谤讒随至不但试弯弓之手又将加下石之辞论欧阳修徒以文墨致身臣何所损言钱民逸全於民事不理臣则不堪盖至难欺者匹夫匹妇之辞而不可掩者时雨时阳之实证庶民而有考对上帝以无慚敝车羸马挈家人以行见者谅其清谨斗酒只鷄酌季弟而别闻之靡不?伤理终无不定之天恩自有所归

之地兹盖恭遇皇帝陛下知人则哲御衆以寛谓刺史察州各有揽轡登车之志而从臣出守得无遗簪堕履之思宁少屈于刑章仍特优于祠廩臣敢不振励衰境激昂厚恩芝兰之性自芳必不安严霜而摧败葵藿之心未死尚须向皞日以昭明

又

祇命明庭祝厘靖馆恩如露沐感与涕零伏念臣猥以迂儒生逢昭代文不能以纬国误尘翰林供奉之班知不足以爽民亦忝宪部清明之寄况陪羣彦抗论一时祇知爱君岂顾忤俗今去国者九载而投闲又六年愈坐五穷惠因三黜隐居求志尚贻无妄之灾闭户抄书犹致求全之毁鴈闻弦而辄畏龟避网以莫逃方安时甘遯退之肥忽筮易得否倾之喜属清朝之更化辟正路以招贤包荒不遗宥过无大如贞元之朝士不自意全领太一之祠官示无终弃兹盖伏遇皇帝陛下濬发英断总收大权命相去凶盖欲励庶明列於有位举贤赦过未尝以一眚錙之终身而臣某生也有涯老之将至壶藏日月雅宜珍台闲馆之游履曳星辰时有广乐钧天之梦若或未填沟壑尚能图报涓埃

除权吏部侍郎赐紫服谢表

越从左史擢典右铨佩紫荷囊持金背镜温纶出乎天上命服拜於君门际遇甚华省循知愧伏念臣生於蜀道世以儒家少亲父师素有汲古鈎深之志壮任州县初无干时患得之心偶尘鹄板之招遂列鹭庭之序无机云之才调空驰入洛之声乏虞褚之风猷屡玷登瀛之选况值陛下亲政朝廷急贤植新甫之栢於雪中斷峯阳之桐於?下挈兹孤远之迹寘彼清华之涂戴星而朝岂但点螭头之水穷日之力更令书凤尾之纶远观元和六学士之风近阅熙宁三舍人之様位非人称荣与媿并盖尝以弟兄连茹之嫌为言亦复以天地恶盈之戒为请圣恩加重睿听益高疏六上而辄还官一年而屡徙谓臣粗持宪法故令权典于三班谓臣薄有词华故使仍兼于二制选事日殷而才有限诏书云委而思难工纵殫犬马之忠莫报丘山之施兹盖伏遇皇帝陛下艺祖之圣孝宗之明秉德迪知天畏罔失严恭之度立政其惟吉士勿容嬖御之私既恢大知以并容犹念小臣而明恤俾簪笔从陪属车尘臣敢不职思其忧敬佑乃辟权衡公道毋泯乱于官常粉泽皇猷尚道宣於德意

赐隆兴历日谢表

菟馆银符甫承天宠凤开宝历还授人时恭惟皇帝陛下道涵一元德翊万物璇玑以齐七政坐销飞流薄蚀之愆玉烛以调四时各当夷隩析因之候盼於太史赐及外臣臣敢不恪奉邦条以前民用清台密课预占穡事之丰登新府肇开尚布诏书之寛大

赐宁国府历日谢表

龟畴协纪既循天度之常凤历更春还授人时之正凡列居於侯服皆禀用於王正恭惟皇帝陛下德合乾符道参神策致和而万物育曾无凶荒札厉之裁不言而四时行咸应夷隩析因

之候举清台之密课布方国之新书以考岁成以前民用臣敢不奉宣寬诏聿相罢甿南亩省耕且共田夫之一饱东藩拜表更祈天子之万年

赐温州历日谢表

历元起卯首遵盛帝之彝岁龠先庚复示诸侯之度虽居海角亦见乾端恭惟皇帝陛下妙道赞元至仁育物配天其大公刑赏於春秋迎日而推谨几微于夙夜以前民用以懋农功臣谬綰藩符恪承明诏卜正月之吉已宣布於寬条酌四时之和庶导迎於景物

卷十七

<集部,别集类,南宋建炎至德佑,鹤林集>

钦定四库全书

鹤林集卷十七 宋 吴 泳 撰奏疏

论郡县人心疏

臣闻自昔仁明之君抚驭方夏莫不以郡县为根本以人心为保障郡县充实则富藏於下而国家得以奠安人心携离则利专於上虽有金城汤池亦不能以自固矣故善理州县者必惜州县之力而善结人心者尤不可失匹夫匹妇之心秦人之亡非豪杰也所以蹙秦之亡者州县长吏也汉末之乱非寇盗也所以召汉之乱者郡邑钱货也唐中世之变非泾原戍卒也所以稔唐之变者间架垫陌等法也今之州县残敝亦甚矣陛下仁圣非不爱民而民生益薄未免有失职不贍之忧朝廷寛大未尝增赋而吏道益苛未免有营私烦扰之弊税而倍纳则横赋非经赋也苗有抑配则强籴非和籴也措置浮盐所以通有无也而揭措置之号以均敷则人皆官盐也户皆丁钱也而措置适所以病民也称提积镪所以权重轻也而昔号某州为殷富者今则为空穷州矣昔称某邑为壮大者今则为凋敝邑矣上户折为中户中户变为下户胡不以前事观之江西之寇捕盐激之也常山之盗捕牛激之也汀建之乱贪激之也汉沔之兵溃吝激之也国家专倚人心以密基命此何等徵象而小吏莫之恤大吏莫之省平居奉法循理号为廉於己者则又折而营聚歛崇馈献至有欲糜列郡之财以覬收楮之赏风俗之胥化大可惧也天下之患盖有不在边陲不在境外不在残金强敌而深绵渺密乃伏於智虑所不及之中只楮会一事若非捐朝廷之力出内帑之金多方有以收之而其干赏蹈利之辈巧思截出勿顾大体又不严行禁止则人心一散不可复收立足以煽乱风而蹙亡脉矣进言者例曰精选守令然朝廷未尝不精选也必曰严择监史然朝廷未尝不严择也而吏习犹恬民生益急者赏罚之不章明故也陛下倘能擢其廉者三数人而厚汉世增秩之赏惩其贪之最甚者一人以申严祖宗治赃吏之法明谕好恶公行黜陟如立表以示人而使君子畏义小人畏法何天下之不可治哉孝宗皇帝尝谕辅臣曰朕念寇讐未复宵旰不遑暇如苑中台殿未尝有所增益率用竹?以护风雨何其俭也至议张师顔之罚则曰师顔有一道之寄却公然以鱼 作苞苴可特降一官如或不悛重寘典宪又何其严也夫竹?庶民之所常用者也而上不嫌於简陋鱼 海物之至微者也而下必寘之重宪盖谓约已者所以阜安四海而清罚者所以照临百官乾淳之风高矣哉臣愿陛下始终以孝宗为法天下幸甚取进止

论保淮事宜疏

臣去年八月辛卯轮当陛对尝奏机会不可侥幸之说继於今年三月壬子复进真宗皇帝十九年不言兵故事四月辛巳集议都堂又条具谨固吾圉事宜大抵皆为用兵设也恭惟皇帝陛下以兼覆为仁以不杀为武转回开拓之意向歛就平实之?模将帅之僨军者易其地偏裨

之退衄者降其秩天下盖已忻喜咏蹈咸知陛下克已就义之勇而臣职在西省日书降命画黄固於既往之事无庸议也然每窃叹古今议论之士捷报方张则常有扫平梁许之言警书遽至则寻有还保长江之议议扫平者无田甫田之诗也议还保者蹙国百里之诗也二者皆非也保淮为不可胜之计岂非今日第一议乎今日之淮非昔日之淮也自开禧之兵衅一动资实毁弃而淮之积贮空自盱楚之贼党逋诛科役繁兴而淮之财力空自河洛之义旗一举丁夫转运而淮之民人户版空淮吾之保障也而所恃如此脱有一骑落於河滨岂不貽宵旰之忧哉臣谬谓保淮之策莫先於裕民力莫急於收军心所谓以民力保淮者非设濡须之险阍颍口之冲据山城之要宅水寨之沃保龙泉陂田之利以为守也盖边民累遭科扰几不聊生今岁调夫竭力办装以应河南之役父行子哭夫行妻哭者在在皆是似闻桐城之夫科者万五千人舒城之夫死者不下数百衆间有大家巨室畏夫运之苦内徙过江者以臣所知尚且如此则其他可想而见如此厉民责之効死勿去难矣哉昔我孝宗皇帝轸念淮民不异畿甸无岁不寛租无时不戒吏虽桑株马草木炭之属皆不许科配其所以轸念斯民者盖不以为茧丝而以为保障也今边境蹙宁岁事差稔流徙之民渐复归业为之上者节其力而不尽田租之当蠲者蠲之军需之当缓者缓之使人无离心户有固志暇则负耒而耕警则荷戈而战吾封境之内自隐然有敌国之重矣所谓以军心保淮者非恃宁淮之衆藉武定之强倚制勇之悍靠游奕之精锐耀雄关飞虎之技撃以为胜也盖近年以来平峒寇平楚贼奋不顾身出万死一生之中而功绩屡升赏典不愆臣曩摄司封每见有军前上功者制司保明申上朝廷行下覆实展转因循动经岁月率付之悠悠不下近者河南之役淮师又为先锋杨义一军尽力鏖战死亡颇多盖有元兵追至虎牢关尚能夺马取牌而死者主将耻败例不以闻战死之人赏亦不逮淮之士夫类能言之赏罚如此何以激励其心而使之勇於赴敌哉昔我孝宗皇帝抚恤淮兵不间宿卫有材勇智力者每有激犒有武艺超越者悉加甄别将帅在军或有刻剥虽卖布搭息小事亦行密访切责其所以留意於淮兵者盖欲使之内以固圉外以拒敌也今强敌暂退藩篱浅薄曾经战阵之人痛犹未定为主帅者所当吊死劳生字其孤遗而勿使之流离悯其劳苦而不烦以私役回生意于已枯鼓勇气於已竭逮其志定气饱持尺檄而调之虽寇骑千羣亦无所用矣或曰新复州军未可轻弃也臣窃以为不然盖天下之事固有缓急先後之序新复之地率多污莱狐狸所号芦苇相望经理亦未易言也若先其所缓後其所急荒吾自有之疆圉实彼不毛之土田譬如有连城之璧价值百倍反过而不问破釜堕甑残缺已多而乃竭力经营夫破釜堕甑吾家旧物固不可忘连城之璧吾家重宝尤所当贵曷若先使淮堦有不可胜之备而後徐理中原以俟不可失之机哉若夫方城汉河乃旧日唐邓海泗之地张浚黄中诸人之所不欲弃以为襄淮扞蔽者今既归我则宜命边臣择其酋豪以守处其归附以耕毋重费吾财可也惟陛下与二三大臣审度之取进止

论臣不用密啓疏

臣闻易称君不密则失臣臣不密则失身此特为几事言也平旦眡朝广庭访问公听并观以来天下之言何取乎密伏墀论谏上殿言事明白洞达以自献其忠於君何事乎密密非盛世所宜有也国家盛时衆言并进宁辩论也如争而无倾也宁请对也如忿而无忤也宁累疏交章於上前也如讼而无嫌恶也言有昌言奏有显奏事有白事如天之昭昭日之皞皞无一毫回曲诡秘也如此气象岂不能养成端良正直之风而辑成安静和平之福哉夫对人不能诵

言而後有密啓李沆所謂非諛即佞者真可謂洞見人之肺肝矣近世之弊諸上殿臣寮乞留身奏事凡所敷奏乞留中不付出曰留身曰留中此皆密啓之余波有以鼓諛諂之舌而滋諛慝之口也可不戒哉可不戒哉

論大閱疏

臣聞立武帝王之常德整軍國家之善經國於天地間文緯武經不可一日廢也古我先王寓軍政於四時之田而戒衆庶修戰法獨詳仲冬之大閱以鼓則王執路鼓以旗則王建大常以殺則王下大綏凡簡徒選士王必親蒞其間故閱以大言者于以見天子軍禮之盛戎容之詳也春秋二百四十二年書大閱者僅一見漢用五腰之制唐行三驅之典亦僅見於太初顯慶間獨我國朝以兵立國以武禁暴藝祖皇帝栴風沐雨取五代破碎不可為之天下改紀而更新之故于除戎講武之事尤加之意今日幸造船務明日幸飛山營又明日幸朱明門七臨幸於教船池兩大閱於西郊士無歲不簡兵無時不教用能南征北伐罔有敵于我師孝宗皇帝繼承祖武銳意中兴二十八年之間凡五大閱乾道丙戌大閱於白石戊子于茅灘庚寅又於白石淳熙丁酉又於茅灘癸卯于龍山造命于朝授兵於府出金于藏簡卒於郊而又身屬橐鞬躬擐甲冑千乘導前萬騎擁後旌旗蔽野戈矛輝日軍容之壯也中軍鳴角騎軍打圍步軍變陣坐作進退起落旗槍皆應矩軍律之肅也降銀若干降錢若干降會子若干卒伍有犒偏裨將帥有賜軍賞之醴也乘輿親駕而紀律嚴鼓鐸精明而士心奮天聲既震國威孔張仇方至老不敢渝盟犯塞寧非選練閱習之功欤然而乾道淳熙間養兵之費尚充閱武之时常數故帝於幸茅灘之日嘗从容語宰執曰大閱不免薄費然散在諸軍亦不枉了臣雄亦奏曰國家財貨陛下不以賜伶優崇台榭而散之大眾此盛德事然則捐不急之費以賞戰士省土木伶優之耗用以優給三軍整軍經武者可不權衡於此哉

論命樞臣督視軍馬疏

督視之官國初不常置翠華南渡六師分屯一軍駐楚州以撼山東一軍出盱眙以扼泗口一軍屯合淝以指京汴又一軍宿荊鄂以向宛洛勢均權埒諸將每有不相聯屬之患襄淮有警朝廷于是遣重臣以董督之方略稟於睿算幕府選於朝紳前茅後勁遣于御營犒金賞帛出於內帑蓋諸軍有節度則觀聽一事權有總統則人心奮湖湘之平藉塘之勝采石之捷介冑先登而鯨鯢駢戮皆肇開督府之功也方今三陲未清四郊多垒錢谷甲兵之問日至於廟堂分命樞臣督視軍馬實為第一事委之以部分而不制命於中予之以銀錢而不問其出入元戎一臨人人自奮中兴諸將之功復見於今日矣

論元佑建中嘉定及今日更化疏

臣嘗讀易至乾之九三曰君子終日乾乾夬之九三曰君子夬夬乾六陽之卦也夬五陽之卦也衆陽翕聚羣陰退听內皆正而外无悔也而君子於此體乾之健而復承之以乾用夬之決而復申之以夬蓋三居上下之交履忧危之地此正天運闔辟之關世數屈信之候治化污隆之几君子小人消長之界限一息間有間焉則乾之變為坤夬之反為姤陽來而陰凝剛長而

柔牵有天下国家者是不可不鉴也恭惟陛下践阼十有一年天毙权臣始得亲政凡敝化勸令一切改纪而更新之向也上下垢翫今刑清罚谨矣向也君臣隔塞今志同道合矣人才惟恐其不聚今则贤者皆在本朝虽骨鯁者亦平时所不召之臣亦峨冠而来矣小人惟恐其难去今则羣邪皆屏於外虽元凶极恶公论所共嫉之人亦投北而徙矣台臣抨擊一疏动十余人宰臣进拟一笔几二十余士其视昔之题副封供祇检日进月进以希求官职者敝风亦顿革矣谓之非清明之朝不可也然而云气族而膏泽勿下陰霾散而阳采不舒君子之聚小人之去而治不加进兼以百度未厘三边未澄羣生未遂庙堂之上日夕讲求更化之端而未有确然一定之模縉绅之臣交献革弊之策而未覩的然显着之效验是岂无其故欤昔者元佑尝更化矣自司马光为相而吕公着文彦博韩维以老成用刘摯吕大防以端厚进王岩叟梁焘朱光庭刘安仁傅尧俞以忠直显经术则范祖禹程颐文章则苏轼论思封驳则范纯仁范百禄苏辙曾肇凡所登用皆天下所望以为宰臣为諫官为言语侍从之臣者也岩叟十疏论安焘光庭十二疏论章惇摯十三疏论蔡确或二十一疏论张璪或三十五疏论韩缜其所论列皆天下共指以为憊人为邪党为怀援误国之臣者也间有以熙宁旧事元丰党人为言者而光之数语对越在天辙之一疏倾动帘陛上下夹持议论坚一所以尚能扶持七八年间而国是始变也若建中靖国亦尝更化矣起范纯仁相韩忠彦用陈瓘邹浩龚夬江公望任伯雨於要途逐蔡卞章惇刘拯蔡京张商英於散地虽八士之亲除十一人之擢用閭閻小人莫不传播以为快活差除而布在枢府汲善之意少朋奸之意多名曰用中而非中号为加靖而弗靖逮置政事局而轻元佑重元丰矣进爱莫助图而左轼辙右京卞矣意向一偏更张未尽所以仅止於七八月间而国论遽变矣至嘉定更化则又不然也元凶殛死衆正方升楼钥自海滨召林大中自浙东召倪思自霅川召杨辅刘光祖自西蜀召黄度蔡幼学傅伯成刘燾杨简袁燮等同时为侍从郎官曾附侂冑用兵如邓友龙陈景俊郭倪郑庭皇甫斌薛叔似次第镌窜曾昌言侂冑误国如朱熹彭龟年吕祖俭杨万里徐邦宪等优与旌擢其气象似矣然敝事滋多勿能改侂冑之局面憊人互进未免寻开禧之辙迹虽远相是时未至以贿闻而牢笼官府参用邪私意已不能掩给諫台省耳目喉舌之司而流品混淆用一正人也则必邪調一人为之对卫涇钱象祖去而君子之势孤倪思黜而小人之脉盛逮至三凶四木之謡一二年以後国论遂变矣臣尝谓国朝更化模大抵三变变之缓者元佑诸贤扶持之力也变之速者建靖诸人偏諛之失也变之不元佑不建靖而胥变为旧习者嘉定邪正杂糅之病也阅汗青而慨往酌古道以御今其在今日可不鉴元佑之所以得戒建靖嘉定之所以失哉今陛下改元既十有一月矣回衆阳於枯茭出羣否于颠趾官师熙良士俗纯一臣固未疑其遽变也然而天下之理阳奇而陰耦治少而乱多君子之进也常难而退也常易小人之进也常易而退也常难机括所系於此乎分陛下盍不上观天运中阅世数下察人事封筑君子之基勿使能转茭夷小人之根勿使能殖不任贤则已任则必尽其用毋徒曰华之以美职也不听言则已听则必底於行毋徒曰崇之以虚礼也幽人聘於丘园当有以副苍生之望毋徒曰皎皎白驹賁然来思也故老加之蒲璧当有以罄辰告之猷毋徒曰凤凰于飞其羽也公道开布而实意孚至言劘切而浮文少气本日强精神日运虽有客陰外邪将见晁日消矣又焉得以摇吾国是哉不然公论自君子出而筹之未尽实政自朝廷始而行之不力则恐他时或有以不能主张之说议人主以又是讫了之言议辅臣以比日以来过于谨嘿而议纯厚之儒以被谤复起多所顾虑而议耆宿之老臣甚为此惧也为今之计若使在下者至公竭诚尽其所当言之职分在上者公听并观达其所当行之事实发之以刚持之以定守之以壮如是而德声之不振

治功之不起人心世道之不丕变臣不信也臣又有忧焉今天下之势譬如奕碁局垂败而复转势几危而复活更易布置於碁心者固可谓善矣然一着不慎则前功亏一罇或开则全局坏今奸邪失职在外其机权智数固不敢视章蔡诸人而旁窥侧睨犹足以为胡薛诸子彼见朝廷所施行少有过差便生乐祸之心君子所言论微有偏倚便开谗慝之口如近日用兵一事是亦开其窥伺之一耳幸而朝廷收斂俱就靠实彼无所容其喙若忽於不见而罇漏不补则国家之忧君子之祸殆未知其所终也予其惩而毖後患惟陛下深念之臣不胜拳拳取进止

奏乞宣谕两相协心治事疏

臣窃惟效忠险难之世当以匪躬蹇蹇为心忧念君事之秋当以在公明明为职大臣以身任天下之重不同一节之士哲於保身而轻为进退也恭惟皇帝陛下亲揽权纲并建宰辅清之端闲明谨敏於国事行简靖重老成审於谋国二人者犹之陛下股肱不可胥失比以星雷为异累疏控陈欲上相印以塞天变陛下屡降诏书趣令治事一二日来窃闻清之再上章求去又闻谒告臣实未知其繇但边兵屡骚民事孔棘荆州疲敝蜀圉荒残顾瞻四方靡究靡宅而一堂之上山积文书尘满几案宰臣执政仅有三人此何时也而乃迭相先後抗疏北阙引告东第奉身以求退耶昔王曾上章丐归刘随以疏争之谓知止不殆宜避逊於崇高忧国如家未可轻於去就富弼托疾谒告范纯仁以义责之谓但能早退自全以为明哲之术不能竭节匪躬以尽人臣之分陛下待宰相过於曾弼当无事时既享其逸今兹多故欲勇於退在人臣之计得矣其如国家宗社何臣欲乞陛下遣中使宣温旨督趣并赴都堂协心治事责之以经综军国之务何利可兴何害可除兵当何时可弭民当何时可寘悉条便宜以称隆委庶几陛下无用贤不尽之迹而人臣无洁身自营之私实慰衆望谨录奏闻伏候勅旨

卷十八

钦定四库全书

鹤林集卷十八 宋 吴泳 撰劄子

论蜀事四失三忧及保蜀三策劄子

臣伏闻熙宁中神宗皇帝尝面训苏轼曰凡在馆阁皆当为朕深思治乱指陈得失无有所隐臣以蜀人待罪馆阁朝思夕念每惧无以忠陛下之职分答皇祖之明训乃去年九月辄上封章言火灾事上自宗庙宫闈下至朝廷郡国凡公论之所欲言者亦尝缕数而备陈之矣圣恩寛大不即加诛越月踰时又当轮对顾瞻天下之大势慨念四方之多艰则如西边较之襄汉淮淝头势尤重臣岂敢避乡国之私而不为陛下公言之乎方乾德初蜀以斗絶一隅未归职方我艺祖皇帝披图数贡指诸将而混平之故命忠武节度使王全斌趣凤州江宁节度使刘光仪出归峡均州刺史曹翰转漕西南经涉岩阻冲犯霜霰得州四十六县二百四十粮百五十余万不知费几兵力而後能取蜀也高宗皇帝渡江於上流之势尤切注意一时诸将如臣玠臣璘臣政臣仲亦皆勇於用命今年战於和尚原明年战於饶风关又明年战於杀金平一处有警动辄驰数百里相与计议故能败走萨里罕射杀韩常不知更几百战而後能保蜀也夫以陛下天姿英武动法艺祖高宗而谋臣如云猛士如雨不减乾德绍兴诸将何向者之待蜀也如连城拱壁悉力爱护而今之待蜀也如破釜坏甑任其残缺而莫之省忧也不知陛下亦思上流一失则江南可得而有耶且敌自扰我西陲斯害溥矣问之关隘则攻乘会破马岭突出武休分道麻家平断仙人原径犯金牛潭毒最是西和四郡之脊膂也向者不曾?而今攻?矣沔阳汉中之股臂也向者不曾破而今残破矣益昌梁益之襟喉也向者不曾入而今深入矣人谓敌畏暑止严秋防而盛夏之时尤更猖獗决我藩篱闯我堂奥千余里之地莽为丘墟昔人所谓天狱所谓天险所谓大小漫天寨肆行如履平地而阆苑以东剑阁以西今乃视为极边此关险之失一也问之仓庾则余本荡矣粮道絶矣武阶之仓三同庆之仓七凤集之仓十有一西和之仓十有五金洋之仓二十有七其大者则如利沔兴元每月各支家粮万石而鱼粮一处计取财赋几收十分之四制司诸庄储积又不与焉向谓敌人以射猎为生不瞰五谷而今此因粮於我蚕食烧毁无有存者而况保馱之户亡流马之舟溺求欲如古人漕巴中之粟积汉城之谷运祁山之粮亦难乎其为力矣此仓廩之失二也问之将士则田燧死於马岭李实死於凤集李冲死於同谷陈寅死於西和杨杞死於天池原呼延棡死於芭蕉岭偏将小校阵亡战没者不复以数计何进老将也往年大安却敌茗山却贼西和却戎其功不在古名将下而乃机失於遥制力分於备多西和之守备方密而抽那於三泉矣三泉之扞御方固而分摘於七方矣逮夫兵势不接士马略尽而进亦转战力毙矣诸葛亮所谓更复数年则损三分之二此将士之失三也问之民人则关表之民困於?刘剑外之民困於迁徙益梓夔路之民困於科调力役夫估不已而又科正夫水运不给而重督陆运糴糗絺衲色色繁兴抽分括羨靡隙不尽斯民之所以终岁勤动竭力以奉公上而不敢言者盖谓上之人必能以庇之也而外寇忽来内讧先作官不能以保其室庖兵不能以护其禾稼甚至铁骑驰蹂夺我田畴以标插麦曰某统军麦则亦何所依赖哉重可痛伤者流移满野颠蹙系路弥

望数百里无炊烟正张浚所谓民人死亡十之六七此民人之失四也有是四失卒难经理而又有目前之可忧者一事後之可忧者二盖自近岁御军亡纪刑赏亡章诸军逢敌动辄奔溃其初止是东军去岁摧踏诸军亦相仿倣假称北骑袭夺平民国家竭民之膏血养之不啻骄子今乃不利御寇而利为寇溃者既招招者复溃因循展转流毒至今若如陆贄之说进不邀以成功退不处以严宪师一挫伤布路东溃其患何有终穷耶此溃卒之忧见於目前者一也诸屯老小移就内郡省运减余是亦一策但昔人区处不过縣閭三数州而未尝教之彭汉邛蜀等郡盖谓州兼节制屯置将领有以绥御而管辖之也去岁关头兵溃家属内徙不知谁人创为移屯之说致使诸军藉寻老小为名所在惊扰以为寇至且兼关以内外流人万数进入中州彼其见风土之美遂怀重迁之思因居处之华咸起疾视之意万一如耿滕之说梁人刚剽蜀人软弱客主不能相制必为乱阶岂不重貽西顾之忧此移屯就食之忧隐於事後者二也陛下更用臣?授钺董戎凭国威灵敌遂遁去规模措置亦自有绪矣独是受任败军之後将易兵新财殫力竭四失尚存三忧未弭欲以三路之力经纬全蜀之四譬犹大厦万间而以一绳维之安保其不将颠耶今欲图为保蜀之计则莫若急收人心之危渐革军政之坏豫理营田之荒夫所谓急收人心者必缉理边民俾复废业而後可以收人心必表选良吏俾修废官而後可以收人心必参用土豪使关表之士有所归而後可以收人心必多置营寨使诸军之老小有所凑泊而後可以收人心所谓渐革军政者必严纪律信诛赏而後可以革军政必明间探精料拣而後可以革军政必民兵与官兵相兼防托而後可以革军政必帐前之兵与出戍之兵头目相当爪牙相制而後可以革军政所谓豫理营田者盖乱离之後必多闲田户版既亡穡事随废救死且弗暇奚暇治牛具也复业且未得奚暇办粮种也若於此时官为度土授田募民请佃应所耕垦悉如旧制仿力田之科立定赏格耕及一顷与补一资置营田之官分给籽本收及万斛与进一等於田附近依险结坞使居得以自固乘时种获从以甲士使出得以扞敌始繇一郡拓至数州夫如是而後可以理营田若夫人心之危者安军政之坏者葺营田之荒者垦又须制閭进至上流经营分表无失事机则脉络联贯而肢体强声援相接而精神壮不惟闭关息民虽以此制敌之长技可也虽然不但制臣事也亦陛下切身事也陛下以天覆子育为职人有急则必呼天有疾痛则必呼父母大难甫平羣心靡定百役凋瘵之氓重伤疲敝之将皆忍死自力愿闻德音而旷岁弥年无一语相及告者益急应者愈缓恐远方之人便谓朝廷无保之之意今欲乞降一手诏如唐会昌间所下诏书曰伤居尔体痛在朕躬以慰疮痍之人亲洒一札如南渡後所赐御笔曰随宜裁处毋从中覆至於激赏燕犒之费已饬有司接续应办以付分閭之臣申之以恳恻而感动其心开之以恩信而激作其气新复州军悉蠲租赋上方库帑多出金帛陛下毋谓敌不来而缓於修政三省毋谓敌不来而缓於忧边密院毋谓敌不来而缓於申军律饬武备上下相应共图救宁如此而多难之不纾衆戚之不和四封内外之不耆定臣不信也诗云心之忧矣曷维其已愿陛下急图之取进止

论恢复和战事宜劄子

臣以孤远之人七载登朝四当陛对一上封章两陈议状凡事有系於国家之戚休谋有關於边庭之细大恳恳尽言已无所隐今复轮当转对何敢不罄朴忠而抒愚虑乎臣之友洪咨夔尝向臣说比以论思言用兵事陛下曾面谕之云恢复未尝不是信斯言也陛下诚有见於天经地义之不可易邦纪民彝之不可泯乱也然而义有是非名有虚实夫大有为之说孟氏之

言也岂不伟哉自王安石窃用其说以变祖宗之成法凡端人正士皆目之曰流俗则所谓大
有为者适所以为祸首也继志述事之说孔子之言也岂不美哉自李清臣等剽取其说以排
元佑之君子凡谗论忠言皆指之为谤讪则所谓继志述事者卒所以成厉阶也礼经孝弟之
说非不顺且正也老桧欲托之以刼制人主则孝弟乃忍耻事仇之物春秋复仇之说非不义
且直也权侂欲倚之以立盖世功名则复仇乃开边生事之门夫大有为正论也继志述事善
经也孝弟顺德也复仇大义也若用之而适其宜行之而当其可则凡此四说者以之利社稷
安国家何为而不善哉脱用之而不当其可借一时之美名遗後世之实害则此四说者皆所
以招乱召祸也又乌得为是哉知乎此则陛下恢复之说亦可言矣且陛下之始更化也收用
仁贤黜弃奸回善旌谏鼓开敢言之路金科玉条严赃吏之罚大廷塞苞苴之径方国絶羨余
之涂戒飭将士之诏动以师人多寒为忧蠲除科歛之令几与春日寛大诏书无异若及是时
保持初意谨固封疆爱惜根本兵不必多也而精於料简财不必聚也而审於调度生齿之版
爱护而不伤泉货之源流通而不壅吏士精敏马牛孳蕃所在公私皆亭亭有蓄日积月累至
於斯今则虽不至太和亦可以几小康虽不全望元佑而亦可以为小元佑独奈何封内未固
而妄兴经营分表之谋编氓未安而遽有吊抚遗民之意京洛之败徐邳之败唐宿之败精兵
殄尽劲马毙倒征者死於塲输者债於道粮储器械弥满於山谷者不知其几千万坐是边鄙
耗屈国中疲敝民怨召为天灾兵贫激为内难其所以至此者恢复之名误之也夫恢复二字
不载於六经书但言绍复而已诗但言复古而已春秋传但言复禹之绩而已至汉扬雄唱为
规恢之言最後班固方有恢复疆宇之说盖复者兴衰拨乱之名而恢则有拓地开疆之意臣
固弗遑深辨也向使劳师费财即所得之地所出之物足以供贍一路而不假外求然後可为
长远之利遂成开拓之益师不为轻出财不为枉费也今也不然新复之土仍闻朝廷自边城
輦运金帛制府从内地支拨粮草增添转运应接不给则是以吾民之所产而奉难保之骄卒
空吾国之所储而实无用之土地骑马一落於平岗而资粮皆化为野土真恢复者果如是哉
要之恢复之说用之於建绍中兴之日则为宜而开禧妄求边功则为非宜也用之於乾淳全
盛之时则为可而端平骤谋北伐则为未可也矧今北地早凉弓坚马劲敌情叵测突在面前
外间流传籍籍已有敌人祭天灼骨卜之说已有河南北塞并夷塹之说已有鳩兵在马狐岭
听发放之说已有分师从三路来侵之说於斯时也浪战非也亟和亦非也恐非遣李伯渊夺
舟刼马所能止其来也恐非纵王楫市獭皮搜犁髮所能结其欢也恐非结田八武仙以帛书
蜡弹所能制其命也为公家忠计则莫若急修守备大明黜陟易中军之暴帅以伸国威敛新
边之戍兵以保国势子才澄既褫鞬大将何得佚罚邳徐宿既溃败元帅何得已责淮北州军
如某处有舟船某处有粮械悉使收回以实吾之边备北来归附之人如某人譎诈某人反覆
更不专任以贻我之内忧区画既明位置才定降尺纸之诏布前所失於国中使海内臣庶知
其无好兵之心天地鬼神亮其有不得已之实明白洞达毋匿厥旨它日敌加於已为之应兵
则人心思奋士卒感动将何事而不可为者若复系吝执固憚於改为徒使边臣之不忠者成
则专利於已败则嫁祸於人且哆然妄谓前日之兴师发於圣断出於庙谟而非已过则何以
有辞於永世哉臣不胜拳拳

论天命人心国势劄子

臣生长东蜀本愚鄙之人公朝不以臣不肖误见擢序俾玷班列被命共职而来精思极虑每

自谓居未信之地而言深则为愚当有道之朝而言巽则为佞兹阅期年五月而仅得一对清光於此又不言焉则非惟负臣夙心亦非所以忠陛下之职分也臣尝读书至帝舜作歌曰勅天之命惟时惟几至皇祖有训曰怨岂在明不见是图至成王作周官曰若昔大猷制治於未乱保邦於未危未尝不掩卷深思以为自古及今帝王之所以传授国家之所以开承君父之所以警戒要不出天命人心国势而已而所以迓续其命收回其心保定其势则又不过先事察之图之保之而已然古之知者能睹未形之几而今之谋人则忽已形之患陛下躬姿神圣知烛眇繇濬哲如舜聪明如禹缉熙如成王其於万事之统必能见吉於几先销患於未形矣而臣犹以已形为戒者盖即一时之事而言也今请为陛下开陈之维天之命本之一身流行於天下着见於祲象凡以象与类示人者天盖甚不得已也陛下自初即位景贶荐臻比岁以来灾符迭见异有小大稀稠占有疾舒緩急臣固不敢枚数惟是日君象也而背气乘之雷君令也而春雪隔之天之所以叮咛譴告明以切身之事语陛下者意亦至矣欧阳修有言未有不召而自至之灾亦未有已出而无应之变夫使灾而未应国之福也若其果应则将以何道而消弭之耶此天变之已形者一也天生蒸民合以为国后非衆庶罔与守邦长天下国家者不可失匹夫匹妇之心也况所在饥民蜂屯螭结一夫煽逆千万影从方盗发之始其原甚微长吏不为之意寻之延蔓而起大者跨州城小者屠鄉邑丁不得耕女不得蚕衣冠华族不得保聚异时汀邵建吉贛抚漳泉素号积庶之地今皆莽为盗区则民情之散亦已久矣苏轼有言未论行事之是非先观衆心之向背今虽寇贼小定而前之疮痍未瘳譬彼坏木本实先颠少有微风百枝俱动此人事之已形者二也强在本朝则精神可以折冲威在中国则道德可以制暴操得致之势者其可示人以弱而不图强本制胜之道哉国朝自李沆王旦当国以来国论主於安静每有建明率以生事归之故其久也敝事滋多而国之势亦随以舒緩今则又折而入於弱矣京师临制诸夏者也而阴窥潜伺或容嫚侮之奸畿甸控扼海门者也而倏往忽来不虞航海之盗内郡城池荡若平地三边藩墙脆於折柳富弼有言窃计中国之势如坐积薪之上火已燃而特未及其身使弼当此之时将又何言耶近者又闻金人以残敝之师犹能扫黑白种而驱之则谋之及我恐不待其暇矣此又国家之忧已形者三也夫天命去留之候人心向背之交国势安危之几其间相去不能以寸使君臣上下日昃不食夙夜匪懈皇皇焉相与共图之则转乖盪为太和化叛离为欣合定隍机为荣怀特反掌间事而今犹未尽改为也遇灾而惧所以修德也灾仅息则遽忘屡省之心寇至而忧所以备患也寇一退则不为式遏之虑臣恐今日之後渐狃於恬嬉矣士稍亲所职目曰崖异而纸尾占位例皆闲慢之文书才涉经世谓之譟张而燕居与谈不过平生之常事臣恐今日之俗渐趋於熟烂矣路朝引对非不虚受也言者衆而听之已倦则有唯可而无施行郡国奏事非不上闻也奏者频而闻之已熟则有停壅而无裁决臣恐今日之风渐成於玩习矣向者盗发之始州县咸谓朝廷无保之之意而今则与之表选良牧矣与之罢遣贪官矣与之给诸处钱米矣与之蠲一年租赋矣所少者特不能下一恳恻之诏如建炎三年诏书自布所失四条於郡县之间使之晓然明谕德意则犹未免有壅阏之敝也向者咸谓朝廷不遣兵来而今则下京师之甲檄诸道之兵一军自金陵一军自淮西一军自襄阳一军自江池或遣监军为之部辖会於盗起之处矣所忧者独未有总统之帅如孟庾韩世忠平范汝为故事使军兵将吏共为一司则犹未免有涣散之忧也积兹数事胶轕纷纭外之邪气易乘内之疽根未去不於此时改纪而更新之则虽欲迓续天命而天命未必凝也收回人心而人心未必固也保定国势而国势未必如泰山而四维也虽然如前所陈皆事也非事之本也臣愿陛下养心以清明约己以恭俭进德以刚毅

发强母以旨酒违善言母以嬖御嫉庄士母以靡曼伐天性杜渐防微澄源正本使君身之所自立者先有其地夫然後移所留之聪明以经世务移所舍之精神以强国政移所用之心力以恤罢民移所当省之浮费以犒边上久戍之士则不惟可以消弭灾变攘除奸凶殄灭寇贼虽以是建久安成长治可也臣对君父之始固不敢冒浚恒求深之戒然但见古人居安思危而陛下居危思安则臣之所忧乃有重於今日者此其所以自抒愚忠而不自已於言也幸陛下赦其狂僭之罪取进止

论晓事之臣与办事之臣劄子

臣闻天生一世人自足办一世事天下事非士大夫为之而谁为之耶然而有办事之臣有晓事之臣晓事之臣明见事情通达政体而事无有不办者办事之臣则利口似该博而非实也夸诞似有为而非材也其锐於兴作似任事而非知也其不顾衆论似肯任怨而非公也其容易承当似慷慨许国而非忠也虽名曰办事而适所以败事也昔张栻奏言於孝庙之朝尝曰国家用人当求其解事者勿但取其办事者正谓此耳陛下临政愿治于今七年阅天下之材不为不久定人物之监不为不精而小有事变环视缺然无可使者此亦必有其故矣陛下盍不於经传史册中会萃而观之凡利於民而有益於国家者必吉士也必常人也必循吏也必儒雅润饰明习典法者也必性行淑均晓畅军事者也必恂恂如鄙人钦钦如对陈为古名将能得士心者也凡害於民而亡补於公家者必暴行也必苛政也必酷吏也必苍鹰吏也必虎而冠者也必狼牧羊者也必水清无鱼者也必捕郡中豪强挝帐下健儿刑杀过多不得全身之道者也晓事之利如此办事之害乃如彼陛下试於利害之交明辨而分疏之则可以知人矣今日之病大率好趣办之意多而少采循良之誉喜浮夸之说胜而每卑经实之贤上之雅意趣尚下之游声仿习悠悠风尘混为一律不聚敛不足以为能也不抑配不足以为材也不抄估籍没不足以为严也不征商榷酤不足以为政也不哀刻军伍不足以为利也甚者诱杀降附以希上赏也执平人为俘馘以图隼功也囊括赢资争献美利以望美官也今天下譬如疴羸怯薄之人四肢已受病而复欲以轻躁之医投之乌喙之剂本气之不伤而元命之不絶者亦幸矣为陛下忠计莫若更用晓事之臣如孝宗朝分五等用人练达民事者俾任郡寄谙晓财计者俾裕民力通习典章者俾掌朝仪临阵骁勇者俾鼓士气持身廉洁者俾律贪鄙随才籍记工命而器使之劝之以重禄尊之以隆礼磨淬涤濯之以精神如此而事之不办治功之不立臣不信也然又不可不体其情而察其心也昔越寇猖獗王式为观察使夏侯孜遗式书曰公但以执裘甫为事军需细大此其悉力淮南盗迫高邮晁仲约之使去范仲淹谓富弼曰彼无兵与械何能战守得使小民免於杀戮事或可恕若以办事者言之则式无一功可论仲约有余罪当议而乃待之如此盖用人之道不以一途也今之使人者才委之以事任则邈无叙情闵劳之思而下之事上者苟可以称时求则便谓不须朝廷一兵一骑之助夫以平居无事犹之可也况当四郊多垒之日而交为此论兹岂鼓动人物成就治功之本哉诗云恺悌君子遐不作人惟陛下留神天下幸甚取进止

附圣语口奏

第一劄读至盗贼处圣问云外间盗贼如何见时有捷报想已平定某奏云虽时有捷报终是

病根未尽扫去细民不得一日而安上云是读至如前所陈皆事也非事之本也一节圣语云朕在宫中习字观书一无所好某奏云陛下进德日新务学时敏非谓有他嗜好而小臣告君不得不预致戒警之意容某奏毕为陛下详言之上首肯读第一劄毕奏云某所陈奏劄虽是说天命人心国势而实欲君臣上下毋忽已形之患共图长治之策又要陛下颀于本领上做工夫圣问曰何谓本领某奏云陛下之身是也臣每闻陛下在宫中留意四书又亲写先圣格言徧赐羣臣经生学士有所不及但大学自正心而上皆是劝人做修身底工夫自齐家而下便是推广修身底功效上云是大学云自天子至于庶人一是皆以修身为本某奏云孟子亦曰天下之本在国国之本在家家之本在身以此见得圣躬乃天下国家之本万化万事之枢其所关系甚重且大不同庶人且如圣体近日小小愆和便上关宗社之忧中貽太母之忧下及大臣百执事天下生灵之忧尤不可不厚自爱惜上欣然谓某曰近日薄感冒两日来又暑气饮食尚未健某奏云臣所说本字正要陛下从爱身上做起盖身安而後国家可保也某又奏云古人居安思危陛下居危思安此二语亦不可容易看过圣语云便是制治于未乱保邦于未危某奏云诚如圣训但居危思安却又有说今天下灾患频仍盗贼充斥奸宄窥伺只当戒谨恐惧做将去更岂可思量安逸一路某所谓思安者非谓陛下还声色乐燕乐侈宫室实嫔御之奉实有此安逸之事盖一念才着在安逸上便于进德有妨便于处事无力便于民不相亲便于正人端士忠言谏论不相浹洽便不能做尧舜三代之君便不能成唐虞三代之治即其病根皆从此一念上起若防其将萌而澄治之则天下国家无不可为者上首肯读第二劄毕奏云臣窃见近者百司奏事多说贪吏酷吏即臣所谓办事之臣之别名前後进说者虽多而未见朝廷大明黜陟贪暴者物论所不赦而反多覆存循廉者国人皆曰贤而横遭黜降若如此为国何以劝惩上云赃吏无状某奏云只在朝廷宣明典章激浊扬清贪浊者即时罢去清廉者即时褒显则国宪立而人心定士无有不竞劝者上首肯久之奏毕下殿曲谢

卷十九

<集部,别集类,南宋建炎至德佑,鹤林集>

钦定四库全书

鹤林集卷十九 宋 吴泳 撰劄子

论今日未及於孝宗者六事劄子

臣以蚘蝨贱臣窃日月之末光近者蒙陛下简眷擢兼记注获与右舍人分立於螭陛下立不载笔记不执简揆之典彝皆非其旧独有直前奏对尚髣髴古意臣虽暂摄何敢不以先儒之所以事君者而事陛下哉臣始读孟轲书至入则无法家拂士出则无敌国外患者国恒亡未尝不掩卷而叹曰人主之临御天下不可使危亡之言不入於耳儆戒之念不存於心也得臣在楚晋文不失为外惧孟孙恶臧孙纆乃以为药石天下之理履危难而生儆则危者可安因拂乱而知惧则乱者可治自入春秋以来已有是说孟轲氏特表而出之盖深为亡国败家者之戒也今天下才多亦最多事谏诤辅拂之臣剨切於内外侮凭陵之患攻扰於外操心虑患其可以转乱萌而成治象矣而惴惴然若有日就其亡之忧何也臣知之矣今日之病不在拒谏而在玩谏不在畏敌而在玩敌二三大臣旦夕承弼左右侍从朝夕论思台省给谏之官日与天子争辨是非百僚羣有司亦以序进陈时务之阙矣陛下既有其官矣而不能使之尽其职既听其言矣而不使之行其言则是玩谏者也以振古所无之敌不于其邻而于其躬以百年所豢养之兵不利御寇而利为寇将吏被甲胄不得卧丁夫转输於道不得息陛下亦尝有戒心矣而未闻有亲事法宫之劳三事大夫亦尝有忧色矣而未闻有申儆国人之实则是玩敌者也玩谏者懈玩敌者偷天下阽危之机岂不伏於此哉唐虞三代之治国朝列圣之典臣固不敢远引悉数惟孝宗皇帝陛下每视以为法而隆兴乾淳间事接於耳目之间者尤为至近臣请为陛下条陈之孝宗皇帝以圣人之才运天下之器旦旦视朝勤於政理揽衣夙兴不暇黼黻犹且诏谕宰执曰朕每听朝以议庶政顷刻之际意有未尽自今或有奏陈宜於申未间入对庶几可以坐论故召於选德见於祥曦引於水殿燕於观堂从容坐席之间略同宾友上下射饮之乐过於丝竹非但曰礼乐相示而已凡军国大政古今理乱有事当商确者不妨直奏有疑当关决者随即彻闻异时老桧独相执政皆其所引更不措辞而淳熙间枢使周必大同知施师点各陈已见互相可否则犹能於榻前论辨也当朝宰执同班奏事更无密奏而枢臣黄洽见其有未协衆心则退而疏是非是尚能与宰相异同也如某事未施行则以不肯任事责魏杞如某除未公当则以徇情废法责允文至谓朕有缺失卿等亦不可不极言君臣之间更相儆戒如此则事何由不办治何由不立哉今蚤朝奏事仅按常程漏晷未移戎冠夙退虽更化之始曾降宣召指挥而燕见不频引对不数一日之间曾不一二情意既不浹洽言论又不尽输以朝夕论道之地而数入劄子奏请握权衡造化之柄而乃委其命於天间有一令之失一事之非则交相诿曰非我也此何等时而乃避嫌若是哉此臣所以妄议宰执宣召犹未及於孝宗者一也故事禁从讲读官及掌制学士更直通宿以备咨访或问经史或谈时事或访人才或及宰执所奏凡所蕴蓄靡不倾尽故宇文价论六路赈济推赏事此尚书夜对

之言也陈騤论治赃吏当用祖宗法此中书夜对之言也倪思乞养成皇孙国公德性此直学士夜对之言也金安节马骥论谏官言事失当不宜深罪此侍讲夜对之言也周操以侍御史内宿召对论遣使事王藺在讲筵夜对论临安府王佐赃污事此皆燕直清闲雍容论奏之言也恩意浹密则就澄碧殿锡燕职业修饬则上清华阁赐诗从容造膝过於南衙面陈先事献言加於路朝显谏此皆乾淳良法也自是以来从臣虽内宿如故而宣引阔疏词臣虽夜直有常而视草非昔况学士院至禁庭有一街之隔既不便於临幸又不频於宣唤每批答奏章特降御笔或出於近幸或出於内臣或出於外庭奏拟内相之职殆若具员绍熙词臣尝欲仿汉室承明之制於常御殿侧创以寓直之所以便延问盖谓人主左右不可无词翰之臣应有批旨使之润色庶几号令明涣处分得宜嬖御无所用其奸斜封无所容其诈今政权亲揽奎画屡颁尧言布传何所轻议其间有如保持旧臣无得捃摭如起用贪尹特与祠廩如议立王邸之嗣朕不敢私或者犹疑其未尽愜当岂非宣召之典不复於先朝内批之草弗视於学士所以流风敝习至今犹未革耶此臣所以妄议禁庭夜直犹未及於孝宗者二也国朝旧制三省各有属舍人者中书之属也给事者门下之属也尚书侍郎暨二十四曹尚书之属也旧时省部合而为一自南渡以来惟给舍属之二省而列曹尚书以下别为一所强分之曰六部体统气脉若不相属也隆兴初特诏多事之时侍从两省官日一至都堂其合关台谏者并令会议又於都堂各赐笔劄令取当今弊事条具以闻故自吏部侍郎凌景夏等十四人为一状自御史中丞辛次膺以下六人为一状又惧其言之未广而听之未博也则复令退於听治之所各率其属谕以上旨使之极言无隐夫会议而关於台谏给劄而及於从臣极言抗论而暨於六曹之属盖曰与庙堂相亲密也与宰辅相可否也情亲则事理达听广则议论详也以是知思堂之所共议不但二三执政都省之所咨访不但五六宰士一自权侂怙势自尊病远简贤独运先朝气象不复再见更化以来粗振坠典固尝诏侍从论思矣又尝诏卿郎以上集议矣又尝令从橐省官会议楮币而关白台谏矣然发言盈庭而边臣北伐之表已行会弁如星而官阙税亩之议先定命之曰论思论而不能尽其思名之曰会议会而弗克伸其议就使商论反复至於十数则亦徒久而已曷若先给笔劄使之条陈无隐哉此臣所以妄议从臣条具犹未及孝宗者三也百官陛对自艺祖开基高皇再造虽倥偬不暇给之际常日轮一员以备延访自後承平始定五日一对之班孝宗励精仍率厥典凡百执事日以序进引见一班或四三班进而眎其所繇退而考察所行天日之临贤否毕见故王暕以朝见而除郎官王藺以陛辞而除御史郑闻沈度以归自辅藩而除枢掾宰属贾光祖论州郡不当献羨则曰议论人物有似杨辅近臣问郡守得对者孰为称旨则曰潘慈明气寒周頔又下慈明一等或内召小臣或特引布衣如朔如光朝如揆之等皆以议论剴切即蒙擢用其後生气骄言论卑鄙一经奏对悉了其为人故有晨奏事而暮批除夕引见而朝放辞者黜陟臧否之间沛如膏雨迅若雷霆鼓舞动荡人才何患其不作兴忠言何忧其不竞劝耶今多士充庭率皆济济羣言日进非不谔谔臣近在西省看详奏疏有以定社稷之计为言者有以继天伦之絶为言者有以南阳近亲北司贵臣为言者有以相不和於朝将不和於边为言者有道一私字至数百言有说一欺字连三四纸有陈蜀计之匮乏乞科降者有论淮边之浅薄乞籍义甲者如此之类不可殫纪不知陛下於进对之顷观其可用者几人於听纳之际见其可行者何事若一人之进略加顾问而曾无显拔明扬之意一篇之陈姑示褒嘉而未有精择笃行之实则乍贤乍佞若可若否果何补於治矣此臣所以妄议百官陛对犹未及於孝宗者四也自昔蛮夷猾夏治世之所不能免寇贼鸱张王化之所不能加矧国家南渡适当阳九之厄高皇中兴孝宗嗣服干戈抢攘无

岁不有敌亮虽毙大定复立拥兵崛强髣髴元魏而又结蛮扰於西鍾贼骚於广茶寇自湖南北跳梁江右亦可谓不靖矣我孝宗皇帝留神军政注意将才御几之上尝书一将字往来紬绎日求所以选用之方凡三衙及在外诸统帅之兵则书注各人武艺於册谓之掌记自准备将以上至统制官则排比全军姓名於籍号曰揭帖密院审察则试以边上事宜承旨拍试则阅其人物事艺逮夫拍试中格陞差既定则以不时宣引故有制领而召对内殿者有兵铃而引见便朝者虽三衙帅臣如敏如琪素以才武自奋亦许之倚仗奏事则凡将帅兵卒之有一技一能者莫不求以自献间有帅乘不睦如拱如刚则以师克在和不在衆之语委曲宣谕彼见上意所以待遇者如此则岂不踊跃自奋於功名之会哉今北人鸱张叛徒蠡起州郡长吏单若旅人边鄙空城荡如平地戎成不戒寇深不虞四道并驰三垂俱扰於斯时也筑坛而拜推轂而遣犹惧其晚况陛下以万乘之贵未闻宣召一军官辄亲见问大臣以絶席之尊未闻呼召一兵役与之款语枢密本兵之地亦未闻口谈兵屯将校之数择一奇才贡之於上则重弓副矢缓急何以应手哉臣所以妄议今日之经武择将犹未及於孝宗者五也不宁惟是当时捐金钱数百万以收楮而封桩见管尚有三千余万缗出粟数十万石以賑民而丰储诸仓犹有三年之积以兵计者三衙之军九万九千建康马司与屯驻大军六万九千京口江池鄂渚十一万六千有奇江陵襄阳三万九千有奇蜀口三大将之屯九万七千有奇士马精强器甲犀利所在州县亦亭亭有蓄故阅於白石於茅滩於龙山一犒师之费动至三十余万缗而西边餉军除积粮十一余万斛外犹可供贍其如优铁廉校射之赏以激励士气厚密院遣间之金以刺探敌情无日不讨军实无年不制国用故二十八年之治民富兵强所为必遂者盖有钱币足以使衆有糗粮足以实边故也窃尝夷考端平以来财用出内虽内无两宫应奉之费外无奉使司往来之币而供亿经用招纳生养其数已倍蓰於乾淳时况都城火後营造繁兴而缗钱耗官场兑会号令弗谨而金帛空三京师行调度错出而粮械尽钱耗则民贫楮轻则兵贫米尽则国贫一本既摇百枝皆动国家所藉以措事建功惟金谷楮币而直为此凜凜此臣所以妄议今日之治兵理财犹未及於孝宗者六也夫宰执之宣召也禁臣之夜直也法从之条具也百官之日对也四者皆所以拂违也若无所矫拂则是具文而已矣武经将略之日讲也军实国用之日?也二者皆所以愍患也若日复玩弛则是养寇而已矣臣愚欲望陛下一以孝宗皇帝为法昼则宣召大臣以论治道夜则宣引近臣以咨时政非时则诏侍从台諫以条具阙失职事官则日轮一员以观其人才将校管军官则间点召一二人以试其方略其有开示大公力抗羣小者则不嫌於特召其有关系民望不附权贵者则不厌於数引其有明白洞达援经引古通於世务者则不惜令熟数於前小官中有鲠亮敢言者则待之以不次之除擢偏裨中有才艺出羣者则宠之以躡等之陞差而又不测遣使以访边防之虚实密切用间以覘敌中之动静惜阴爱日无顷刻暇使忧勤之念日周於天下数遭而发强之志不委顿於安逸之躬应内帑之财亦如孝宗节俭不以之赐伶官崇邸第专桩留以激犒战士则疆事虽殷人心未散尚犹可为也然臣犹以为欲复先朝之典则当破流俗之论殿中侍御史按论察官未为过也国子祭酒劾奏寮属未为异也着庭小臣一疏荐侍从而下十六人未为越职也台臣累疏必欲黥决奸凶之吏而投之远裔亦未为严於用法也其大者如并命二相元非陛下权有所分眷有所属也此皆圣祖神宗之旧典先正献臣之令猷而四五十年来沈默畏谨恬习於耳目之陋见此举措瞠而议之此正欧阳修所谓下至竈间老婢亦相惊怪不知此事古人日日有也但问所言当否而已陛下傥能具超卓之懿识镇胥动之浮言涵养直气扶植善脉毋以端士为冠玉毋以忠言为弃髦毋以儒生为贵其须毋以议论文墨之臣为绣

其輶輶详考之以言专任之以事精神所运日异岁殊虽以敌衆之强亦谓吾中国有人而不敢动矣诗曰无竞维人四方其训之惟陛下财幸

论中原机会不可易言乞先内修政事劄子【癸巳八月十九日】

臣恭惟艺祖皇帝以神武啓天运以忧勤保圣功一日退朝坐便殿俛首不乐训饬左右有云尔谓天子容易为耶属早来乘快指挥一事故不乐也孝宗皇帝入继大统式遵圣谟因进读三朝宝训至退朝不乐事慨然谓洪遵曰为人上者奈何不敬猗欬盛哉充敬与不乐之心此夏皇祖凛乎若朽索驭六马之心也此商成汤栗栗危惧若将隕于深渊之心也此周武王惕然恐畏闻丹书之言而铭于几于杖于盘于剑于弓矛之心也夫以天子之尊日有万几一事之失若未有害也一指挥之快若未为过也而我艺祖皇帝其躬儻焉终日弗能安我孝宗皇帝敬心属焉须臾罔敢失坠诚以人主动而世为天下道言而世为天下则是不可轻也陛下胄出艺祖宪法孝宗临御十年至仁至孝天下亦欲望陛下奋然有所作为而迺者辅臣奏事制阍宣对讲官侍燕清闲窃闻训谟屡有中原好机会之叹陛下此言之发即是良心即是天理即可以昭假烈祖即可以克配上帝盖陛下为人之父母而中原遗黎久堕涂炭不能兴吊伐之师陛下为人之子孙而百年陵寝莽为丘墟不能遂迅扫之志宜乎陛下不憊于心而惜此机会将以大有为也然而天下之事所施有内外而宾主之辨不可以不明所务有名实而先後之差不可以不谨若徒虚内以事外而吾之所为主者弗强好名而忘实而吾之所当先者反缓则目前虽有可忻之会而反求诸已所忧乃重于所忻此好机会之语或者犹谓陛下言之太易也岂陛下姑漫言之耶则书之史册天子不当有漫然之言岂陛下真欲为之耶则稽诸事实天下未尝有易为之事且复以孝宗之事明之当乾道淳熙间敌势浸骄连年饥饉盗贼肆行在彼不可谓无其机我之战士犹有北方之豪我之劲马犹是冀屈之产年丰食足所在亭亭有蓄在我不可谓无其会然一闻陈俊卿论及海上事则曰有机会尚恐难成况无机会一闻盖经语及时机则曰力有余可以应机会力不足虽有机会亦不得而投则是机会亦未易言也孝宗思其难不惟其易躬其劳不於其逸故置恢复局览华夷图建国用使开都督府立奉使司兵自偏裨而下各有掌记将自准备而上各有揭帖江北诸城增陴浚隍沿淮分戍鼓声达於泗潁盖无日不励?恢之志无时不为备御之事而当时端人正士犹有忧其无备而引去者刘珙朱熹张栻最号持恢复大义者也而珙自西府入奏则谓复仇大计不可浅谋轻举以幸其成熹自祠宫上封事则谓东南未治不敢苟为大言以迎上意栻自严陵召对则谓敌中之事所不敢知境中之事则知之详矣国家比年官吏诞漫不足倚仗正使彼实可图臣惧我之不足以图彼是三数人者岂固遽忘中原哉实以无穷之事会难可以计料言不世之大功未容以侥幸成也夫以孝宗之明圣羣工之良显乾淳事力如此之浑厚而犹不得中原尺寸之土况当开禧起衅之後乱本厉阶至今为梗而今乃安坐无为欲语恢复之大机其可哉陛下自视今日比孝宗时何如耳兵不如昔之强将不如昔之勇财殫民薄不如昔之厚官邪赂彰不如昔之严铜楮厄於会通餽粮渗於博易襄州石米贵直百千蜀口营屯仅食半麦沿江之水渡淮之蝗又不无害我穡事陛下平旦视朝顷刻而罢其于四方利病未能博访周知二三大臣合班奏事须臾引退其于国是庙谟未能反覆熟议而况境外之事变诈百端讵可遥想而臆度哉方今国家譬如久病羸怯之人元气已衰他证未作谨固汤剂休养岁月尚有痊安之理若直投瞑眩之药必使之遽离枕席亟走而疾趋则鲜有不蹶且颠矣臣固

非劝陛下勿以规恢为志勿以时机为念也盖志不可不立而意向不可偏於外念不可不存而歆羨不可留於中君以一心之微交於万变之会有所好乐则以喜功之说进有所忿懣则以怒敌之说进有所恐惧忧患则又以临事好谋之说进彼初无一定之论不过欲投吾所向之机且如恢复之说陛下虽未尝实为此事而外之所传则以陛下实喜此说边臣好功揣摩上意便为河广可航蔡虚可伐强敌之颈可系而羈垂瓠之城可蹴而下此臣所以不能不为国家根本虑也或又谓因敌之储聚以为粮则不患无粮合中原之响赴以为兵则不患无兵即一州之豪而使自为守则不患不能守其土地是三说者又非识时知务之论也彼赤地不耕清野不庐何粮之可因蠡结而来蚁溃而去何兵之可用朝而迎王师暮而拜敌庭何人之可守金既垂亡元方新起与吾敌者又非吾父祖之讎则复讎之说恐鼓作人心不上也无已则折而与元和乎而和亦未可轻议也彼方从容制和而操术常行於和之外我乃汲汲议和而志虑常於和之中散关凤集之事厥监未远而复以三事为议则殆无异前车之已覆而後车之不诫也昔靖康中金人邀索吾赂聚议经时赂未渡河而游骑已次濬州故敌尝语人曰所以索重赂者且令南朝争议一两月耳元使之来恐亦出此大率国朝之谋事所以不强人意者议论之臣多而任事之臣少故也然则为今日计将何如诵往哲之遗言进谋国之上策实不过曰内修政事而已然所谓内修者非但车马器械之谓也袞职之阙所当修也官师之旷所当修也出令之所弗清所当修也本兵之地弗严所当修也直言敢谏之未得其职所当修也折冲御侮之弗堪其任所当修也陛下退修於其上尝使清明在躬而不越礼度之闲百官有司交修於其下亦使洒濯其心而不由支曲之径朝廷既正人心既附然後申警国人精讨军实合内修外攘为一事以整擊乱以顺讨逆迟之岁月神州赤县皆在吾指顾中矣臣久蒙陛下储之秘府每当轮对必自盟其心不敢竞为可悦

贴黄

臣于州县间事既已敷陈其间又有关涉要害去处合为陛下申言之今之江陵昔之荆州是也东连吴会西控巴蜀素来号为用武之国嘉定年间制置使赵方以敌势垂亡临边以镇之故不得不驻襄阳而後之为帅者因仍勿改兵甲之利财赋之源又挈而归之制司则荆州不过拥一空城而已是襄阳重而荆渚轻也万一点敌有人为之向导先遣偏师留缀岷首一从光化小路直至夷陵鎖断峡口以扼我之西一循汉江潜入白湖呼集丹徒以挠我之东荆州单弱无以堤备则吴蜀为之中断二千里江面殆可虑也今北方事重制阃未可遽回荆州而欲图托里之策则莫若少假副帅之权如沿江置副自为一司使之储财积谷训民练师以增壮国之西门襄州有警仍责之互相应援如此则不惟可以户牖京西而亦可以襟带江东愿陛下与二三大臣亟图之

附圣语口奏

第一劄读至此好机会之语或者犹谓陛下言之太易处上问云真是好机会某对云陛下言之及此即良心苗裔即天理机括但机会虽好我国家事力单薄未便可做上顾某如何说某对云自古及今只是内修政事臣次第开陈于後乞赐睿览读至蔡虚可伐处上问曰残敌今在息州对云息乃蔡之属邑见升为州臣只闻盘泊於蔡州想亦出没於新息之间便是边臣

喜功生事揣摩上意谓蔡可伐敌主可擒如何容易擒得但恐惹起边衅不然激出内变陛下不可不虑他日中原自有可复之理上云甚是

卷二十

钦定四库全书

鹤林集卷二十 宋 吴泳 撰劄子

和战集议劄子【甲午春】

照会臣比準吏部牒坐奉圣旨於今月十三日赴都堂集议备边待敌和战攻守事宜臣寻往後省待命台吏关报应权郎与兼职事官并不与议臣逡巡而退然窃念西省为机要之地应国有大议臣虽暂兼亦得参关欲作议状以白谋之同舍及同朝之分厚者则止臣者半劝臣者亦半止臣者曰既不得与斯议也则何以状为不为乃混成劝臣者曰诸臣之议不过可进则进可守则守而已若议须活落臣尝以二说衡之於心既不能括囊口以犯一嘿之戒又岂能骑户限以持两可之说晏子曰臣共而不贰此臣终身之所服行者也臣於去年八月陛对曾言和不可轻议彼方从容制和而操术常行於和之外我乃汲汲议和而志虑常於和之中则臣尝以和好为不便矣又言机会不可易言虚内以事外则吾之所为主者弗强好名而忘实则吾之所当先者反缓则臣尝以开拓为不便矣陛下翼日宣谕执政有云吴泳所上劄子说机会事甚好今欲评淮襄诸帅和战之议亦不过祖述前说而已然臣之所深忧者则又在於和战之外也夫有无故之福者必有无故之祸不争而分俘玉以遗我则得俘玉者乃纳侮之兆也不战而辟土地以待我则拓土地者乃开衅之端也边场交为好胜之说而朝廷务持容养之论譎诳欺绐而弗以密察震撼击撞而弗以静镇吓持恫喝而弗以理折张大夸诩而弗以义断彼其尽忠於国者固不敢谩言而比附之者乃敢於奋当辙之臂鼓如簧之舌轻朝士轻宰执轻经筵官至谓戕其冠者皆不足以商略疆事则朝廷之体轻矣朝廷体轻则人主之势渐轻矣昔晋隆和初征西将军上疏请迁都洛阳朝廷畏之不敢为异独王述曰彼欲以此虚声威朝廷耳非事实也但从之自无所至後果不行臣窃料今日之事主和议者决至败事易之可也若夫进屯开河之策恐必不能往就使能往亦不能至就使能至亦不能守殆见如述之料征西也今旧敌虽灭新敌未去邻家之火将炎炎及我矣何暇议远攻哉如欲诘臣待敌之策则谨固吾圉时其缓急以为应兵使须至奏闻者右臣谨录奏闻伏候勅旨

论不可厌近名好直之风劄子

臣闻天之眷佑中国常欲人主为明主而不欲其闇常欲斯世为治世而不欲其乱常欲朝廷为有道之朝而不欲其至於失道之败故四时霜雨之灾神气风霆之变皆所以为教也天道之警戒弗思而灾符之谴告逾厉九月而雷固非归妹之正也正月而雷固非奋豫之常也尤可异者明堂之夕荐配上帝精禋未交大雨震电天基之节拜表称贺寿觥未举雷电以风怒之未息而至於震怒威之不斂而至於疾威则天之所以申劝陛下者益深切矣夫大君天之宗子也当仕而有官职者为宗子赞理家事者也在官而有言责者为宗子纪纲家政者也天既全付陛下以有家而乃不能尊信仁贤容受谏直则是弗祇服厥父事弗聪听厥考训岂所以为应天之实哉自昔人主所以召乱者非一道而远耆德逆忠直商书独谓之乱风国家所

以致亡者非一端而入则无法家拂士孟子直指为亡国盖贤者治之本朝亡贤士则不知道直言国之华国无争臣则不知过是不可不惧也且陛下更化之初收召诸老登进羣儒会朝清明衆正在列天下固不可以弃贤议陛下也自时厥後初意渐移文献之老而谓之耄经术之儒而谓之迂骨鯁之士而谓之褊狭名节表表有闻於时者反谓之为好名风望棱棱见推於中州人士者又谓之白望积毁成疑积疑成瘡意向一偏而贤者不得安於朝廷之上矣迄今以来未有胜政比日诏下前时去国诸贤稍稍收用而进拟之际问难再三或者犹谓陛下终以好名之士为疑如臣了翁拜会稽守搢绅之士莫不感喟引以自近彼方怀绶问途而遽有改行之旨何远贤之速至如此耶夫一人之去郡得郡且未问也将恐毁巢而凤凰不至涸泽而龟龙不游贤者望望引去朝廷不尊百姓不附谁肯为陛下用者则陛下之势孤矣端平之初号开言路诏百官上封事谏侍从陈已见更置给谏擢用台察人未尝以拒言议陛下也曾未几时风采销铄争辩是非稍力则命之曰不平正弹击奸谀渐多则名之曰不忠厚论奏及於朝政军务则目之曰不体国指陈逮於宫府左右则讥之曰沽激曰卖直曰不识事体耳目之官纪纲之地岂宜轻有动摇而易置不常殆如传舍故有以两月出者有以三月出者有以六七月出者臣范再入执法殿中正色敢言不避权要仅浹两旬正衙未奏事宪府未移席而寻以左史迁矣左史六品官耳不为下也自去相当轴以来每以华官英职为屏去台谏之术天下岂可以名欺也哉不谓易相未久而复蹈斯辙也若范果去则台臣为之不安台臣不安则近臣尸位不敢谏远臣畏罪不敢言谁肯为陛下言者谗谄面谀之人至矣臣直为陛下惜此举动也今天下之士正患其不好名耳士若好名则临财也必廉临事也必敬临难也必不苟免皜皜其洁必不黯黯黷黷以为污也侃侃其正必不滂滂訛訛以为邪也言事之臣正忧其不激切耳言苟激切则上可以箴王阙中可以肃朝纲外可以落悍将之胆寝强藩之谋谀谀其昌必不唯唯否否以为随也闇闇其诤必不喑喑嘿嘿以为容也陛下何嫌於近名之士与好直之臣哉夫天下安危在边而植根立本之地则在廷间之土地则土地日蹙也问之甲兵则甲兵日少也问之金谷货财则金谷货财日益空乏也所恃以绵国脉系人心者仅存好贤容谏一路若又销靡而摧遏之此岂祈天永命之道哉臣愚欲乞陛下体任贤勿贰之意味从谏如流之言亟收揽人望以聚於朝亟挽回言官以复其位洒扫庭内绸缪户牖使我之根本丰实精神充强士心凝则人心合人心合则天意得敌国外患亦可以渐攘除矣昔司马光程顥四贤之望也熙宁并起而用之故足以大为一时之壮蔡襄欧阳修四谏之选也庆历既出而复之故足以永贻列圣之谋懿桀宏纲具在青史陛下能仰而法之则天下称为好贤之主後世不名为拒谏之君宗社幸甚生民幸甚

论坏蜀四证及救蜀五策劄子

臣窃见边事日急国事日蹙民生日困士大夫日危宗庙社稷之日凜凜矣江淮事体臣近者旅从橐之条陈陪都堂之末议计必转而上闻独惟蜀中乃臣父母之邦而弄坏至此臣窃痛之盖敌骑自八月分道入寇犯兴元犯沔阳犯阶文九月并兵破大安十月一日哨朝天七日闯益昌十日至阆中又分为三涉江而西者以十二日入普城顺流而下者以十三日入顺庆繇新井盐亭而东者以十六日入潼川并三道之兵以十九日破成都二十七日掠眉山二十九日焚青神十一月一日渡湖?迫嘉定凡梁剑以北岷峨以西皆我祖宗德泽之所涵濡不意斯今横被此祸三百年之境土自此残坏三百年之人民自此涂炭三百年之衣冠士大夫自

此污蔑不知陛下曾闻之否乎呜呼痛哉臣尝推原其所以坏蜀之故四境不治而交秦巩三军不结而结十八族我之将士衣紕衣而卧掘草根而食曾无挟纊宿饱之恩而輶输银帛驼载姜布反使官军义士担擎牛酒以厌敌之欲关隘不修不问也士马不练不恤也器械糗粮不备不计也问之则云已得朝廷处分矣下秦川入关中将会於宛洛矣分表经营喜功生事卒使北人刘我边陲突我堂奥兴沔利阆緜剑潼遂彭汉成都嘉眉莽为盗区或者皆谓汪石引贼而来此结约不审坏蜀也蜀之所恃以为国者险也外三关不守而保内三关内三关不守而保汉沔汉沔不守而保三泉境日益蹙戍日益敛已贻识者之虑而近者制阆戎司又立为纵敌深入然後邀击之说大安衿要去处而开关延敌弃险不守乃欲设伏山谷间以奇功自命鏃矢未发而敌已越我而西矣龙洞阁谓之天险朝天岭谓之天寨而栈道不烧隘口不塞乃营营於德胜一堡不知费几工役坏几钱粮而聚一二骄驂子弟於其上虚实动息敌之在对山者皆嗤笑之所以敌兵过险更无後顾之忧此措置不密坏蜀也誉一人也则游扬拂拭虽有僨军失地之过而曲为掩覆毁一人也则訾短詈謫虽有救民保境之功而终加沮抑陈昱械而彦威乃出狱贺靖废而显忠乃管兵死事义也有赏有不赏弃城罪也有罚有不罚前帅所施行後帅多不以为正是正司所经画副司每不以为然一司之中而有两总领一家之中而有三制置士大夫之阿附曲諂者往往獎不肖而尊愚此议论不一坏蜀也自丁卯曦乱兴沔而权臣已有弃蜀之说自己卯寇入汉中而廷臣又有无蜀亦可立国之论自辛卯敌兵破利入阆而襄阳帅臣复有扼均房守归峡之策积习至於去冬庙堂条具边事夔帅申明事宜则又欲置襄州一屯於金移田家一军於戎矣何待蜀之薄如此耶三京之师弃资粮如泥沙至蜀餉科降则咨北使之遣捐金帛如粪土至川阆奏请则嗇公府有月献胥徒有例钱置官设局於此以事交结反谓以此通制阆之情抑不知敌入不告师败不言帅之老且病不以状闻则适所以涂其耳目也亡形已具而相不悟遽报日急而上不知破碎烂坏至此极而後仓卒易帅此气脉不通坏蜀也积是四坏已非一日臣自离乡里及造天朝今九年矣己丑上西陲八议辛卯乞遣蔡范救蜀壬辰疏四失三忧癸巳论武仙窥我安康乞严作堤备乙未言元兵先通川路後会江南不可不固上流又言西边连年调度财殫力薄乞速赐科降蚤趣援兵今岁之夏乞蚤储蜀帅以备不虞又以彦呐未疾告老会议都堂尝言李?有威望杨恢有精力皆可以为彦呐之代无一岁不言蜀事无一日不忧蜀亡而诚意不积不能感动事势至此噬脐何及臣每惟国家图事不大敝坏则不更不至危亡则不革然委其坏乱危亡而不之救此岂陛下念祖宗全付予有家之心哉此岂大臣一夫有死皆亮之罪之心哉此岂小臣闵其宗国颠覆之心哉臣得杨恢书自言由简入泸誓死以报欲召泸叙荣州长宁诸寨之丁以图进讨借兵於西南诸族以壮军声取财於一二郡纲解以济乏絶檄募豪杰榜集散亡且欲进至汉嘉谋复成都颇见其有愤悱獎率之志比虽已令制置四川若更陞畀从橐之名许用大使之印庶几事权稍重可以励其志气责其事功此一策也又闻李?尚在夔子虽年耆齿宿而威望德业犹可以镇服人心昨已除成都而成都今已破败未可卒往莫若使之暂留夔门与虞普同共措置凡监司帅守沿流而下者或有带行官司钱物许令截拨以为招军激犒之用此一策也又闻贺靖在白水刘锐在文南曹友闻在顺庆杨履正张涓在左緜陈隆之李显忠在已渠间其麾下部曲犹未尽散欲乞札下制司分遣帛书蜡弹从间道付与诸将令其前後伺便夹击剿贼出境若有奇功即以所立赏格赏之此一策也顷闻朝廷已降黄榜给牙牌分界二阆甚得区处之略然闻敌兵之入利路诸司桩积已荡尽於广都刳船之日根本扫地公私赤立似未可以虚文救之也臣欲乞朝廷捐拨金帛多给官告文臣自朝议大夫以下武臣

自武功大夫以下皆付空头告命令制使便宜书填更或畀以数十金带以示激励庶得救蜀之实此又一策也外又有蜀士之旅食京华者其间岂无忠义慷慨有志事功叩阊上书议论可采若得朝廷獎借或假以一官或许以免解使得凭藉西归以说谕豪杰共图克复又一策也臣前所陈四坏欲陛下知之也後所陈五策欲陛下行之也又恐世之便文自营不识时务者各持异论土地之残破不惜而惜金帛人民之涂炭不恤而恤顔情衣冠华族之污辱不校而校爵之崇卑忠臣义士之死亡不问而问军功之泛滥撑虚驾漏付之悠悠将恐祸至无日而唇齿俱寒矣臣愿陛下念艺祖皇帝所以取蜀之难念高宗皇帝所以保蜀之难念今日所以失蜀之易合羣策而救之资羣力而复之母曰孙氏无蜀而可以抗魏东晋无蜀而可以控制刘石也情痛辞迫不避斧钺之诛惟陛下亟图之取进止

边备劄子

照会某等今月十五日蒙宰执召至都堂宣示御笔令侍从给舍台谏条具边防备守事宜某等谨以所见具列如後

一今日事势战则事力单薄和则敌情难恃若以和好为权宜以备守为实务来则惩而御之去则备守时其疾徐缓急而为应兵此最上策

一淮北新复州军截自今敌退之後画疆自守如蔡息陈颖应天等处只令其土豪且耕且守时有不足量周给之切不可空吾有限之力事彼无用之地高孝二朝无此藩篱未尝不能立国徐邳唐邓宿州之事可以深鉴

一京襄两淮土豪民兵团聚堡寨扞卫乡井最为可用近因出战之际官军常忌其功每夺到马匹获到首级多被攘夺官司又从而苛问取索往往或遭杀戮或遭械系功赏不沾展转被害所以怕惧官司不肯为用甚至有移徙江南者今宜行下帅司各於所管州郡按籍补填仍优加激励使人自为战若有功绩经从所属申上以议推赏

一敌之长技惟在於马长淮边面率多平旷敌马易於驰骤中国所以制马之具亦岂无策如宗泽军以战车当其冲韩世忠军以长斧斫其足刘錡军以竹筒盛熟豆乱其羣近世毕再遇扈再兴之徒犹能募敢死军用麻扎刀以截其胫或淤洳其田以为陂塘或纵横其亩以为沟洫皆是制马良策宜及此时专立一科使献策之士各陈所见行下诸帅司精择而用之

一东南所长自昔多以舟师取胜建炎间陈思恭窘乌珠于大湖绍兴末李宝斩郑嘉努于胶西虞允文却亮于采石沿江诸军咸有车船每按试中流上下如飞北人骇愕今艨艟战舰腐坏不葺篙师棹士散逸不招第恐数千里江面脱有一骑饮江何以御遏况诸处探报敌方以厚利诱我舟师或斩木作筏从浅狭处径渡则吾之所长彼亦得而用之岂不利害今宜行下沿江诸州各作措置日具造过工限缴申枢府以行殿最仍时委制司督察勿为文具至如海道要冲全藉舟师以为守御亦宜行下沿江制司及许浦诸处隘口如姚浏沙之屯并合严作堤备

一江陵国之西门素号重镇自赵方移治襄阳而州之事权稍分然守臣尚带安抚正使陈旼继之乃以京湖安抚使系衔而江陵仅存湖北副使之号往往又兼制参则殆如一大属官矣酒税利源既归制司守城军兵又复抽戍缓急有警无以支梧调遣今宜复还旧制仍正使名俾之招兵聚粮自为战守勿使他司干预且兵以一万为额此外又有七邑义勇可及二万若帅权稍重事力不分则可责其固守以壮上流之势

一江面之兵平时多遣戍淮既有家粮又费生券今宜用生券之费就淮上地头招兵戍守却令戍边之兵归护江面如此则费不增而兵多诚为两利又枣阳光化均安等处残破之後溃散军民必多急宜选招以备战守

一蜀中连岁敌兵俶扰视襄淮为尤甚敌骑既退溃兵焚劫沿流诸郡荡然一空加以科调繁兴民困财竭须当别作规模择人委付宣抚不必置盖使名一新诸军便望犒赏困竭之余何以给之是有损无益耳金洋夔峡之屯亦不必创添譬如盗从前门入而欲牢闭後户非所以保蜀也保蜀之策莫重汉沔诸将惟曹友闻贺靖可以倚仗若令曹友闻为沔司都统兼知沔州任责措置经理贺靖为兴元都统陈隆之为安抚同共措置扞御如李显忠吴玠和彦威等别令制司相度区处使分任利州副戎及金州都统之事

一蜀口兵额旧号十万安丙帅蜀日尚七万有奇比年敌兵深入除死损溃散外通忠义及杨家军闻止有三万兵之单弱如此何以摆布边面不知戎司兵籍之缺有无填补计所养兵之费何所支用此二事专在制阃急作措置令还嘉定年间新额仍与四戎司总所通情商量截自今日新招之後应虚券诡名厘正更革使无弊幸庶几蜀计亦稍优裕

一近年蜀兵多溃其患甚於外寇縣州系文龙来路顺庆系利阆来路今欲抽摘东西路厢禁军缺额钱招收勇健可以战鬪之人置一屯於两郡本州令正副将时加训练提刑因出巡指试事艺庶几缓急可以堤御溃卒得免冲突之患右谨具录奏闻伏候勅旨

边防劄子

某等今準省札以边报日急令条具御寇之策窃见厥今事势危迫人心湏洞譬如医危急之病於数千里之外脉息不知若何險度不若遣良医随证救疗其诸方略一任良医区处以图康功所有合行事宜条具於後一淮西系襟要之地近闻敌兵俶扰侵犯数州所合亟图救援窃见沿江帅臣陈玠累尝讨伐威望素着合使之兼制淮西增重其事权随宜控扼庶可蔽遮江淮一边淮之民如霍丘固始等处土豪闻其老小多被杀戮而强壮尚存者动以万计所宜急作招集以助兵势其羸弱流徙无所归者急宜安集以固人心

一敌人以和误我盖已累年近闻奏使程芾已归齐安王楫又与之同来以难从之请重邀於我今上自川汉下及京淮数千里之地戎马布野决不可凭信若信之则衷甲刼盟之事不可不防只当严为堤备以固吾圉一敌人自犯边以来寇汉沔蹂荆襄环十余郡之民肝脑涂地合降哀痛之诏深自悔责以感动人心激厉将士其如诸帅恐未尽协和却当亲降御札以廉

藺寇賈之事勉之使之同心戮力共濟艱難

一江面單虛海道空闊上流之勢今已可憂如歸州江陵黃州皆嘗被兵萬一堤備稍有疏失則長江千里與我共之至於沿海亦當嚴為防范萬一果如所聞敵歸挾山東余黨乘時窺伺豈不震動此二事合責之制閫使各任責措置毋致疎虞

一沿江守臣上自歸峽下至江陰皆是緊要州郡朝廷所當精擇其人逐郡稱量孰堪倚仗孰為可易急作區處以備緩急

一會價折閱最關利害矧當邊事孔棘之時外間或有倡為收換之說深恐民听疑惑致艱兌便乞降黃榜遍下諸路曉諭照原降指揮永遠行用庶得流通右謹具申三省樞密院乞賜采擇施行

卷二十一

<集部,别集类,南宋建炎至德佑,鹤林集>

钦定四库全书

鹤林集卷二十一 宋 吴泳 撰缴黄奏议

缴阁门宣赞舍人许堪充荆湖制司参议官兼知枣阳军录黄

臣窃惟参议官之置自建炎四年始其初两浙帅府仅置一员自後沿江三大使及江淮都督府川陕宣抚荆襄制置亦许并置员数浸广其制视提举茶盐官其序官视转运使其资格或以直学士充分阃之寄参制其半体貌亦隆矣川陕则用刘子羽荆襄则用吕擢江淮则用冯方查龠等选任亦重矣等而上之至於参谋沿而下之至於准遣皆以文臣为之而未尝有一武弁参错其间顷自绍定以来官名混於流品格法坏於私门凡所欲为之官皆可由经营而得至有以祇事合门而滥簪机幕者物议已藉藉於时今甫更大化治朝清明岂宜议幕之官不举正名之典臣窃见合门宣赞舍人许堪近者特差充荆湖制置司参议官夫参议之不差武臣旧矣许堪之若贤若否臣虽未稔知其人而除命一颁良法随废则於国家事体实有关系惟计议之职在祖宗朝则文武通差今欲乞收回许堪参议之命改正为计议官庶几无紊官常无隳法守名正而言顺法行而事兴亦可以为今日器使人材之劝所有上件指挥臣未敢书行

缴王梦龙落待制李日迈知宁国府词头

臣闻仁宗庆历中吕夷简去位上欲革天下敝事故首更用四谏绍兴间秦桧既死高宗皇帝欲收揽政柄故尽易当时言事官大凡任耳目之寄於权奸用事之时虽依凭有浅深进退有久近而原其始之所就要其终之所为竟不能掩天下之公议则斯人也是岂可不加之罚也中大夫焕章阁待制王梦龙嘉定十一年台官也时故相已专国柄以其容仪龐厚气貌深简必不好为异论故擢之於要除盖以貌取而不以人取也梦龙在台中粗号谨饬不至如莫泽朱端常等辈排击善良然议论素卑风节不竞始以利合终以利联逮其出守婺州为帅长乐则括经界之赋以献羡卷公帑之缗以丰已血气既衰贪鄙益甚若使在台果自谨饬则必不若是狼藉也中奉大夫新知宁国府事李日迈绍定四年台官也方东朝庆寿七十故相於正旦朝会选其名之美者为台谏曰万龄曰处久而日迈与焉则是台谏以名选不以望选也日迈在台中坦率似无城府笑谑似少畛畦不至如梁成大李知孝等辈肆无忌惮然招贿纳赂无异稠人折简呈藁暗伤善类虽其疏不果行而讥骂之诗传诵於人不可泯没逮其晋长蓬山言论鄙俚册府之士耻之将漕畿甸词讼停压财赋亏耗司徒之事几弛若使在台时稍能自植必不若是谬也今台宪昭明正人登用前之元奸钜恶既已屏黜则败类之贪人如梦龙利口之儉人如日迈亦岂容置而不问若非朝廷将日迈新任寝罢梦龙更与镌降则晓晓者幸免昧昧者获全殆非所以昭大公而厉新政也所有梦龙落焕章阁待制日迈知宁国府事

词头臣未敢撰述

缴李知孝宫观梁成大罢黜词头

臣闻虞帝之去凶也流於幽州放於崇山殛於羽山何其严也周人之恶恶也投畀豺虎投畀有北投畀有昊何其厉也盖大明正照之时不容使燭火之有辉衆芳翕聚之际不可使寸草之能殖此固有天下国家者所当深监也臣窃见朝散大夫提举西京嵩山崇福宫李知孝绍兴名臣之孙东莱望族之壻委弓裘於败壁颓其家声弃琴瑟於幽闺灭无天理方其苟於仕进也右丞相府主管文字此名何官而知孝甘於为之自後夤缘躋登华近权相喜其附已每事寄以腹心於是领袖庶顽羽翼元恶内陰主殄灭君子之谋以固宠外仍掠保全正人之誉以示恩乱是非於唇吻之间藏贼祸於嘻笑之顷斷丧国脉耗伤民和然犹口谈六艺之文动引礼经之目陛下之欲躬勤听断也知孝则以承顺慈亲为词陛下之欲有所除授也知孝则以尊礼大臣为请虽曰传儒先之训而实怀箝制之私为臣若斯不忠甚矣诗以见睍之雪比小人之陰柔曰如蜚如髦我是用忧臣谓知孝当之朝奉大夫梁成大猥以斗筭之才素亡乡曲之誉狼贪而狠冒衆恶之所无鸷悍而坚为小人之不敢观其諂事权相也彼万听者特奴隶耳成大无耻行以丈呼门以恩称传之搢绅莫不窃笑成大则曰要官是我为也昔御史以不呈身为高而成大则自献以充耳目之官諫官以不得其言而去而成大则请留以备牛马之走以叱咤为势焰以殿呵为威风苟可贼忠而害良率多攘臂以称首然而色虽厉而胆薄外虽强而中柔能嫚骂士夫而不能抗郎官面折之词能简傲宾客而不能回官僚力诋之语所为若此又焉得刚书以燎原之火喻小人之暴恶曰不可向迩犹可扑灭臣谓成大当之臣尝反复熟观二人情状知孝之贪犹成大之贪也成大之恶犹知孝之恶也凶德参会实为羣小之宗而就其中言之则暴烈而发於外者易见陰险而伏於中者难窥也顷者陛下亲政夜降御笔逆察其奸而并黜之知孝犹语於人曰所不堪者不合与梁同传彼盖欲掩其不善而自别於善亦安能逃公朝之清议哉既而给事台臣连有论疏褫职罢任夺祠降官可谓寬典而二人者长恶不悛知孝归乡创第建阁借韬藏御书之名辄斧斤丘陇之木纳浦城之黥吏作私门之爪牙武断乡闾逍遥精舍即其余毒犹足以害人也今成大所居室乃宇文氏赐第邦民畏法不敢冒居成大何人乃辄白夺理田之讼索逋之牒日不下百数而犹党奸以抗官司挥剑以拒追吏其为暴横犹足以陵公上也况成大偃居大厦知孝密处近畿若务涵容弗加屏絶则必能陰求复进掌握国是岂不重貽邦家之忧臣愚欲望圣断将知孝成大重行镌降屏窜远方仍下绍兴府追出知孝所匿浦城黥吏押送本县开令福州拘成大所占赐第缴还官司庶几小人之乱邦者知所警惧贪人之败类者不敢为非亦足以仰称朝廷清明之政所有词头臣未敢撰述

贴黄

臣僻处西州与知孝成大元无间隙顷者降官命下亦已书黄继而参之物论咸谓罪大罚轻不能伤其毫髮用是辄敢缴奏伏乞睿明早赐处分

缴袁韶宫观录黄

臣窃惟元佑六年朝廷欲以李清臣为吏部尚书王岩叟争之谓前执政为尚书固不为过但恐公议不容放其入来元符三年上欲以蔡京复为翰林承旨执政争之谓京怀奸害政其党布满中外善类义不与之并立甚哉兰艾不同植薰莸不同器小人之覆出为恶则君子无所恃以为善此盖消长屈伸之机明者不可不致察乎此也陛下更化今几何时进贤退不肖清明方始台臣所论给舍所缴去佞不啻拔山之难而旌招之贤币聘之彦犹有览辉而未集者乃夏五月六日忽颁袁韶宫观之命识者骇焉咸谓清臣蔡京复作矣非但臣等不容放其入来凡天下之公论皆不与之也彼其七八年间再典京兆羽翼权奸凌轹善类扰累富民罗织儒生鉤距术数盖有为昔人之所不为者使其复用则贤者必不安於朝富者必不安於里六馆之士必不安於学天下之乱将自兹始矣或有一等邪论乃以楮会折阅非韶之了事不能以称提卒伍喧闐非韶之多智不能以弹压京邑衆大之区非韶之权譎智数不能以胜任夫天下非少才也何独韶而後可用哉况其前此之政不过好行小惠以要虚名而实则无甚善状京师根本之拨未必不由於此陛下不快於贤者之舒徐而遽思於能者之健决则恐一韶既进百韶如蝟毛而起绍圣崇宁之祸阶不可不鉴也兹事上关世运下关民命中国脉盈廷之士言语籍籍莫不深致其忧而臣职在西省虽录黄不过下房岂宜寘而不问且闻咨夔已上缴章今犹未报用是辄具奏闻伏望圣慈特发睿断将韶宫观之命寢免以杜奸隙以遏乱萌伏候勅旨

缴薛极赠官词头

臣闻昔贾谊尝谓俗吏之所务在於刀笔而不知大体汲黯亦谓刀笔吏不可为公卿夫生亡辅弼之望而没享孤卿之封此公义之所不赦也故少保观文殿大学士和国公食邑一万二百户食实封三千户致仕薛极蚤以法科躋升朝序国家典宪见谓淹通故自廷评致登政路与权相相为终始者二十余年方其在都司时四木之謡莫匪尔极之嘲得罪於天下公论盖不可枚举也独惟楮币一事极素号谙晓而施为颠蹶政令烦扰既失人心又伤国计辛未之冬楮尝折阅矣然其所出之数仅一亿已上何至缚手无策而乃以旧券之貳易新券之一新令一行物情疑骇怨嗟之声盈於道路豪家大姓至有聚楮而焚於通衢者其失人心如此不恤也癸巳之冬楮益折阅矣行於民间者二十千万陛下更化留心救弊极在西府本不当与东府事而贪於固位欲求有以自见惩艾太过恐人复以用一兑二之策议已遂请捐内帑金银度牒官诰及盐钞卖乳香等以收两界夫收一界可也而并其二收之所以耗国之财力轻国之名器在京十局共支过金九万一千八百三十余两银二百一万六千九百余两诸州品搭之数不与焉如官诰如度牒如盐钞印造换给则又不知纪极矣夫捐金银所以裒弊而弊愈滋捐告牒官钞所以权楮而楮愈轻既无益於民又多损於国始谋之不臧贻害至於今日不裒止推原其故极岂得辞其责哉今公朝方集侍从台諫两省官议所以救楮之策上下一辞莫不归罪於极而极赠官命词适过西省岂容置而不问其去国之时峻班书殿致仕之日升华亚保已极辅臣之荣而今又宠之以师臣之位当责罚而反褒当追夺而反赠其何以示天下之公哉陛下傥以其曾为枢臣稍存事体未欲夺彼生前之爵则如少师之赠合与寢免继自今或又有请諡陈乞恩例之类并乞下有司勿与施行所有赠词臣未敢撰述

缴陈宗仁林介落阁降官词头

臣闻左右司须是学为宰相不可不谨择神宗皇帝之训也都司纲纪之地非习知台阁故事不在此选哲宗皇帝之命也圣祖神宗守此家法故谨简宰掾率用士人盖谓一朝之纪纲系焉三省之政令出焉六曹之机务决焉四方万民之休戚利害关焉脱非其人未尝得使参错其间也自远相当国凡所置属乐逢迎之吏喜健决之才三十年间纷督政理耗伤国脉剥坏人心皆倚都曹为之犯天下之公论者不但四木之謡而已如陈宗仁狼贪出於资性俗恶形於面顔人望见其眸子眊焉已知其心术不正矣故相喜其贡諂奴仆命之宗仁自度无以取知故相故於进拟之间动辄以坏人事为得计法所当原则曲文以内之事所当行则吹毛以疵之彼尝曰不如此则不足以为都司也因是得漕因是除卿日有日进月有月进馈献之目几与债帅櫛贪总珂互相颺颺逮其利尽交疎遂屏於外而犹哀鸣干郡则其为人污鄙亦甚矣如林介以忤忍峭刻之才济艰深巖险之智当相妾颺宠以谱系自通每四节之会遣馈致礼仆仆跪拜不以为耻人已知其所进不正矣浙西洋刑饥民蔽野而不知恤反取赢而贡美焉遂得左司优游省闕颺务逢恶无所纠正属当轮对之时假手馆人草一奏劄不暇观省大忤相意既而中悔朝夕求解得免罢去而又使之尹厘畿甸善状既亡火政亦废辛卯之灾上而太庙下而省寺居民延燔殆尽而介也不揀太室而救宰相之私第不护三省六部暨民之屋庐而护临安之公廨其自为计得矣其如宗庙百官何其如畿甸百姓何介罪至此虽百赦不原可也详二人所为自合遐窜远徙台抨累疏仅从中罚犹未足以快公论而近者忽传闻有陰图召用再入都司之意若此徒复进则是亦韶之类也公朝岂应置而弗问哉臣属以病在告而二人降官谪词忽下本房臣更不敢以请告为辞力疾草奏亟以缴闻伏乞睿断更将宗仁介重与镌降以杜絶贪人健吏复起之萌以培养端人吉士安静之福海内幸甚所有辞命臣不敢撰述谨録奏闻伏候勅旨

缴全子才降一官録黄

臣闻马谡违节度而败不免行街亭之诛萧思话弃积聚而奔遄即正尚方之系盖将帅三军之司命刑赏一国之精华无功而懋赏有罪而失刑非所以劝惩於将来也臣窃见江淮制置大使赵范劾奏赵葵全子才轻於调远急於退师乞赐褫削以正其罪圣断斯赫朝纲大明将葵子才各降一官葵依旧兵部侍郎淮东制置使子才依旧直秘阁京西湖北制置副使刘子澄等以次行罚有差亦可谓训章明法曲当其罪矣然臣采之公论犹以为洛师之败杨义则淮西之将也刘子澄则淮西之参议也徐敏子则淮西之机幕也而子才则淮西之统帅也首谋深入子才实倡之望风奔溃子才实先之岂有身为统帅而不能率励将士实覘敌情汝陕之寇仅合而我师已败京洛之功垂就而城守遄弃以至士马耗伤粮械几尽为之帅者尚何所逃其责哉赵范以义断恩故劾葵与子才之罪不欲异同国家以公行法则镌葵与子才之官当分轻重而况子才为人趺弛亡赖始因范葵得官後虽夤缘通显范葵常意轻之暨至提兵境外才敌势钧则又敢於抵巇以贰其所事其他专嗜杀戮肆为诞漫轻猥之状不可殫数朝廷之所以不遽加汰斥者意欲责其後効尔然以若所为何能洒濯自奋如荀林父孟明视之以功补过也哉今圣策庙谟方欲外壮藩篱内实根本陟罚臧否岂宜混淆如子才之罪难与葵比所合重与镌降或将京西制副之命并行寝免庶几上不挠於国法下不厉於乡民可以为行险侥幸者之戒所有録黄臣未敢画行

再繳李知孝梁成大各更特降兩官錄黃

臣惟惡惡而不能去古人以為國君之憂退不善而不能遠君子以為仁人之過今有身為法從冒天下之大惡人主黜之給事繳之台臣論列之中舍又從而封駁之而猶得以肆焉安於其居者去佞之如擦山何其難也奪祠降官罪大罰輕遂用繳詞頭乞行鑄甯荷陛下聖明照見其惡特依所請縉紳韋布之士下及閭閻小民莫不鼓舞稱快仰嘆陛下謨斷英敏朝廷政令清明二十年來給舍不伸之氣遂得一鳴於更化勵精之始誠為美事然邸報竟傳於四方畫黃復下於西省鑄官報可甯典未加陛下御衆以寬固不欲為已甚人臣事君無隱豈能自己於言況二人者懷諛迷國曾不少悛方當冰山欲倒之時猶作泰山四維之計知孝自乞為中丞以氣使台諫成大揚言再入台以觝排正人使得遂其奸謀豈不重傷國脈今既蒞居鄉里自合杜門省愆或創起私屋以斬伐坟林或冒占賜第而僭仿宮廟抵冒法禁欺凌善良臣已具列前章更不申瀦宸听重惟會稽毓聖之地長樂多士之邦豈宜奸凶公肆煩擾陛下之不欲謫徙二人者其惠小而二人之得以遺毒一方者其害大臣非不知仰體陛下忠厚之意而必欲申其未甯之罰者正所以發揚陛下之仁政也伏望聖斷詳臣前後所奏別降指揮所有錄黃臣未敢畫行

繳許俊贈檢校少保詞頭

臣竊以李廣輕財愛士為漢家名將而生不列茅土之封祭遵約已奉公佐光武中興而死不易軍侯之爵今有邊方之帥貪暴着聞而生都顯官死極贈典是國法公議之所不赦也故武康節度使致仕丹陽郡開國侯食邑一千八百戶食實封二百戶許俊少而狠愎濟以奸回匹馬段槍但有一夫之勇貪功黷貨略無諸將之長自擢總於戎旃肆虐用於刑法討峒寇則嫉高貴朱守忠之能而鞭敲箠打至於斃亡典騎司則捃王換徐國良之過而抄估籍沒使之孤露凡一兵之粗給無爾體之不傷方當敵騎之犯淮乃拥王師而坐眎直翱翔於江汭弗攀援於蘄黃敵既退師彼亦卷甲制使李大東聲其違命之罪劾以懷奸之私飛章上聞俊覘得實於是忿兵露刃突入金城屠戮我官軍凌軼我將士賀蘭之師弗進既亡援巡之功肆元之謀不臧几有殺降之意實包藏之罔測賴彈壓以無虞虽示薄懲尋加顯用及至七閩盜起數路兵交乃遣黃口小兒以當綠林巨寇一籌不畫同列笑讥至牽舐犢之情誘殺虓虎之將此而可忍人謂斯何然其敢於桀驁之凶亦必有所凭依之故椎剥盡於軍伍賄賂歸於權門大臣啖於利而莫之違司寇撓於刑而莫之問既屈國法又抑人言乞奉祠則進以承宣乞致仕則畀之節鉞至若投聯亞保上通宰塗豈宜朝廷絕品之官專作債帥飾終之具恤章之濫莫極於斯方之古人使貪詐之道則為橫恩揆之史氏誅奸諛之筆則為佚罰臣愚欲望聖慈將許俊承宣節度使及檢校少保悉加追奪庶使凡為將帥者皆知飾苞苴以事結托專冒嫉以希功名虽漏網於生前必追戮於身後以激忠憤以勵貪愚其於新政實非小補所有詞頭臣未敢撰述謹錄奏聞伏候勅旨

繳汪絳降官詞頭

臣聞明允篤忱共懿惠和謂之才子世濟其美者也頑嚚不友傲狠亂常謂之不才子世濟其

凶者也济美者善加益而不知济凶者恶欲掩而自着是以操赏善罚恶之柄者必自其源流观之则才与不才斯过半矣恭惟皇帝陛下励精更化宣明典章録用及於名臣之家旌褒逮於贤者之後其所以振幽发潜惠至渥也独惟奸谀之既死者未诛凶暴之济恶者犹在臣职隶西省每见有伤於名教有害於国家者不敢不为陛下疏别而诵言之臣窃见降授朝散大夫汪绎乃义端之子义端在绍兴间曾为察官在庆元初曾为中书舍人彼岂不知宗臣赵汝愚德在生民勲在王室望在缙绅士大夫而三上台疏极其诋诬一草谪词至引刘屈氂李林甫事以相挤排不惟不能分别善恶而且欲?正人於死地当时论者直以凶人目之以傲象目之以奴隸目之所幸给事中黄裳能声其罪於绍熙之时而无人焉秉诛奸之笔於庆元以後臣每读国史至此未尝不痛恨太息今绎之不才劣於义端而奸凶极恶又有甚焉盖其居官也以酷为能以贪为宝席卷仪真见於论疏簪扫宁国形於赋咏手执告缙之令口含罗织之经凡豪家大姓之饶於财赢於产者靡不被其毒手凶人不足以尽之也其居家也为弟不友为长不义会宾不以礼而以黄白之多少相夸雄視身不以律而以丹书之轻重相讥诮一语不咸则杯酒殷勤之懽翻为寇讎一事弗协则家庭燕私之丑亦相告讐屠牛之讼至今传之人莫不鄙笑是象傲不足以尽之也其奉权要也月有月献岁有岁献每一番通讯台馈辄数千缗而四节庆遗相府动数万计绶献朱床既极精巧绎贡珍玉狮子尤高且大下至舆仆干办倾身事之弗以为耻奴隸不足以尽之也夫凶一极也傲悖德也奴隸贱名也决非积善之家所宜有也义端之首恶既已逋诛於身後则如绎之济恶岂宜漏网於生前顷江东宪臣廉访来上考其奸状自合窜谪而仅从镌褫则是丘山之过而毫髮之罚其何以惩贪暴而励忠廉哉臣愚欲望陛下特发睿断重赐屏斥或朝廷忠厚未欲屏之远方亦乞更欲镌降永不叙用以为世济奸凶者之戒所有词命臣未敢撰进谨录奏闻伏候勅旨

贴黄

臣既具奏汪绎世济其凶等事因契勘绍熙庆元间稔奸积恶朋邪丑正者不但义端一人如胡紘李沐沈继祖刘德秀之徒尤号为攘臂以挤排故老擊逐善类者使其若子若孙颇能畏飭如蔡叔之後而有蔡仲冀芮之後而有冀缺张汤之後而有张安世朝廷洒濯而用之则固不必以世论其或狠暴贪戾有亦如绎之所为则当终身锢废不应使之参错州县间蠹国伤财永为民害也臣固非越职言事盖自隆兴以来中舍缴奏亦有论及一人而带说三四人者故实具在用敢援此言之其於大明黜陟之朝诚非小补伏乞并赐施行

缴虞一飞狱案

臣窃详臣寮奏疏溧阳县虞一飞以赀得官输贿权门请干田事交兵纵火多所杀伤自福贤泰丰之庄继立而溧阳之民?於虐焰自干办提督之号并行而一飞之势阡如虓虎逐令毒尉禁舟夺棺陷杀其叔於岭外以并吞赀财谋杀其弟於仆家以越人于货孤人之子寡人之妇不可数计乞追捕一飞送临安府狱尽情根勘从条施行及拖照临安府狱案坐虞一飞所供见得虞时元是一飞亲叔始因以昭穆事相争设心陷害已非一日遂以虞时毁谤史丞相言语妄申史府牒下建康追虞时禁勘又行钱计嘱建康公吏将虞时追毁出身以来文字除名勒停决脊杖二十刺面配昭州牢城後因父死回归奔丧虞一飞恐其生事报讎具状申县解

府再将虞时决脊杖二十刺面配雷州牢城又诉押发人私脱虞时錙身又将虞时决脊杖二十别差人押往雷州遂致身死虞应飞系一飞堂弟因在一飞住屋山头造坟一飞怪恨乃以越界卖酒事百端罗织应飞不得已宛转亲戚同共往其家恳告一飞一飞即便令仆子捉住赴官却买别酒埋在应飞人工地内指以为应飞所藏法司检断应罪犯合依条决配缘为命官具案奏裁寻押出召保间复已身死其如县宰章铸遂罢因依县尉陈景周卒死情节亦皆一一供款招认臣照得在礼八刑不睦之刑为先在法十恶恶逆之罪为大不睦谓谋杀大小功之属恶逆谓谋杀伯叔父母虞时为一飞叔父而一飞敢於陷害决脊者凡三配於岭外者凡再百计谋之不死不已应飞为一飞堂弟而一飞忍於诬告以本家之仆而执其主以别家之酒而入其罪冤恨莫诉竟至身死一飞虽忝右列其初元是钱氏奴隶乃敢恃贵豪横倚势凭陵陷王官虐平民欺骗公府杀害叔弟滔天之恶虽擢髮不足以数就令圣朝寛厚贷其死命出乎尔者反乎尔亦当以虞时之罪罪之令所配州军月具存亡以申今看详狱案罪大罚轻更乞朝廷别赐重作施行所有录黄臣未敢画行谨录奏闻伏候勅旨

卷二十二

钦定四库全书

鹤林集卷二十二 宋 吴泳 撰状

进奉御书石刻状

臣猥一书生遭逢圣主端平更化蒙陛下拔擢典司文苑有所得御札御笔御批六本久已宝藏罔敢失坠昨者蒙恩出守东嘉郡郡治有楼基颇高敞遂更葺之题爲拱极命工刻石安奉其间庶几上有以铺张对天之宏休下有以揭垂经世之懿范谨装背两轴同臣所书拱极楼三字顿首百拜奉表上进干冒宸严臣无任战兢局踖俟命之至

缴进明堂御札奏状

臣被命宣锁伏准御宝封下中书门下省熟状以今岁明堂大礼前期令学士院降御札处分臣以遵奉圣旨拟撰修写进入外偶有愚见辄附奏以闻臣尝出入礼经读郊特牲谓祭有祈有报有由辟焉读周官太祝谓祝有祈福祥有求永正有敕裁兵焉所谓肇禋於郊宗祀於明堂者不但曰报而已盖海内乂安兵革不兴年至於屡丰则铺张扬厉而主报疆场多事水旱间作民居未有宁宇则禴禴祠祷而主祈此皆成周令典国家列圣以来成法所不能废也粤自近岁词臣所撰赦诏类多颂美形容之辞而少爱人惻怛之意矧今兵祲未解民食孔艰陛下畏威一念如对上帝愍祀一忱若保赤子所宜因此时力致祈天永命之请臣用是辄援仁祖高宗两朝故实载之御劄所有将来合降赦书更宜推广此意深自贬损明示四方如建炎间臣梦得所上奏疏绍兴间臣益臣近臣世将诸臣所拟赦文则庶几可以迓续天命感动人心仰昭陛下寅畏怀保之实傥圣意以为可采乞降付本院遵守施行

缴进嘉绍本议状

臣恭惟皇帝陛下以艺祖适传奉宁皇丕训入继大统二十有二年上敬典神天内尊事宗庙夙夜永惟万世长策而未有继嗣无以安天下心臣曩以非材簪笔禁从曾取仁宗高宗两朝故事上进丙辰之秋因陈已见复及国本且援仁祖语王珪曰此决自朕怀非由人臣之言高宗谓陈康伯曰此事出自朕意非因臣下建明盖欲陛下濬发睿断遴选宗莠保毓深宫以待皇嗣之降是时特蒙陛下和顔听纳不以爲忤自端平而嘉熙历嘉熙而淳佑凡九年矣内学既达而储议未定臣虽在畎亩一念惓惓未尝忘此昔司马光以一并州倅尚能开仁祖养育英宗之基娄寅亮以一上虞丞犹能啓高皇选建孝宗之议况簪履之旧耶臣因考绍兴二十八年范如圭言广嗣建储二事遂纂集嘉佑臣僚章奏三十六通囊封以进或以越职爲如圭危之独陈康伯对上曰如圭可谓爱君之至言之不尽故类聚以进呈圣心感悟立予之意遂决顾恨其书止於仁宗之世而搜求有所未尽至南渡中兴以来其贤臣所言则又未有继而述之者臣辄不自揆窃慕如圭忠爱之忱网罗放失会粹见闻合嘉佑绍兴奏疏共六十三篇

分爲三卷仍参考事实疏於其下间有管见则自爲一说以发明之命之曰嘉绍本议臣久已缮写欲输畎亩之忠而臣数年以来扼於?嫉弗敢出位缴进今覩陛下更新大化收召羣贤下至微臣亦蒙简眷俾窃祠官之廩今因表谢辄附此奏并同上件嘉绍本议三册作一盥奉表以闻伏惟陛下清闲之燕特赐览观圣志既决公与大臣协议早定主计以绵亿万年无疆之休臣干冒宸严罪当万死

奏寬民五事状【广东运使】

照得本司二月二十八日准尚书省淳佑十二年正月空日劄子正月五日奉圣旨令户部及江淮茶盐所分司则用司制总诸司应有财赋病民事各令条具寬之一分民受一分之赐日下遵依奏闻当已具遵禀状回申今来不敢泛及他事姑以本司逐年支遣军食应办纲解及管催诸郡财赋有关於民之利害者谨画一条具於后

一本司一年应办诸州府摧锋军分屯兵马券食衣袄等钱共计一十四万六千八百余贯逐年繇各处屯戍兵将分上下半年差人赴司搬请本司於财计库支給及诸郡桩留钱截拨应副军食所系此不可一日缺者也本司所仰以给军食者只有盐舶司抱认墟市钱二万贯及提举司添助大兵钱义兵钱六万八千七百余贯计支一年军食合用一十四万六千八百余贯两司应办仅有八万八千七百余贯未及三分之二诸郡桩留之数不多只得东那西补近年以来本司累政动是拖下总所纲银亦缘侵移於军饷之不给漕计窘匱无所从出又只有丁米钱一项非民之所乐输傥蒙圣慈矜怜远民别作区处行下无使军食得以病民则官有一分之寬民受一分之惠取进止

一本司一年应办湖广总领所荆南出戍军兵钱推考源流盖缘南渡初大将韩京提兵驻劄广东一时钱粮系漕司应办撒戍之後此项钱粮遂爲不可废之额以一时生券而卒爲经常广民之有所不堪久矣旧来每年起发总所二十九万一千二十五贯文省自绍熙二年准省劄行下每岁截拨钱一万六千六百八十贯付广州充新招义兵三百人衣粮钱目今年尚合解总领所见钱二十七万四千三百四十五贯省纽买银七万六百七十四两有零团纲起发则又有火耗秤折之类与夫搬运水脚部纲官吏往来路费特支诸项数目浩瀚无从那补旧例置场收买客舟银子因船之大小令其供卖却免雇船上税色就其名色虽若分商贾之利究其归着实则爲小民之害本司尝欲痛革此弊缘是总所银本太轻买银不登尽一岁银场之入不足以补岁额四分之一罢之诚利於民而纲解无可裨补坐是虽知其爲民害而直付之无可奈何非直无人心者拖欠照买银省价租例每两支钱三贯五十文陌数十年前银价每两只是两贯六七百左右比之省价每两尚争二三百钱故前手漕计见谓从容比年以来银价日穷今已增至三贯五百陌而未止广州非产银去处本司逐时买银起纲铢积寸累极是艰辛置场非一所无缘逐处差官只得责之吏輩未免并缘爲奸近日本司觉察已将场吏张祥刺配静江府仍镂榜晓谕民旅讫然银场则不可罢盖无此场则银两无所从买况兼银价日增陪贴日甚若以省价论之每两银更合贴钱四百五十陌一年纲解共计银七万六千六百七十四两零合贴银头钱三万一千八百单三贯三陌展计四万四百七十六贯九百二十七文省此等陪贴何所从出此项倘蒙圣慈劄付总臣以元额二十七万四千三百四十五贯

省照今来市价三贯五百文陌外优加搬运水脚诸项费用纽结实数庶几官事了办而民旅受一分之赐取进止

一本司所管财赋每年只有诸郡丁钱二十七万五千七百余贯絳陌一分钱八万二千五百余贯虽有此数而催常不足拖欠动以千万计外有两司抱认墟市钱并大兵义兵钱八万八千七百余贯总成四十四万六千九百余省每年支拨总领所银纲钱二十七万四千三百余贯诸郡上供银本钱四万六千六百九十余贯诸郡分屯摧锋军衣粮一十四万六千八百余贯至於本司官吏俸给客军口券又计一万一百有零贯总成四十七万七千八百九十余贯而送旧迎新一司支遣又在其外量入爲出每年自有三万九百九十余贯未有可支而陪贴总领所荆南银纲买银钱四万四百七十余贯有零起解总领所银纲搬运水脚部纲官吏路费特支等一万余贯又在此数之外总此三项自计八万余贯本司别无科名又非如他处有盐息酒果之类可以凿空趣办凡一文以上皆是取之于民况盐舶提举司及诸郡积欠不解日见凋弊官民俱贫一至於此傥蒙圣慈轸念此项事体之穷迫特赐区处行下使不至穷竭民力则庶几民受一分之赐取进止

一本司一年管催十四郡上供金银解赴湖广总领所纲解虽办於诸郡而银本则实隶於本司合诸郡上供计之共当银四万二千八百八十七两有奇又金十五两本司岁支银本钱四万六千六百九十八贯有奇各郡添贴之数不与焉以银本而纽在市之银价多寡自是不侔今各郡皆欠上供纲而英连韶雄其欠甚夥总所徒知责之本司本司只得责之诸郡曾不暇问其银本之若干银价之高下则上供安得而不欠诸郡安得而不窘昔淳熙年间漕臣林光朝奏广东便民五事尝言历年上供之害且以英连韶雄爲尤甚乞与蠲免彼时诸郡事力尚全银价未长而漕臣之请已如此在今日则又将如何自淳熙至今又已七八十年民力何啻竭矣必欲便民则当如林运判之请今之列郡正苦於银价之增长傥略爲之斟酌损益亦可以宽诸郡之责今诸郡凋瘵在在筑底诸郡既无所从出则只得责之县道县道又无所从出则只得歛之於民爲民巨蠹莫大於此盖不如是则无以应上供之额此项傥蒙圣慈轸念诸郡穷迫之极检会上供钱数从今来银价纽结合解银数庶几官受一分之宽则民受一分之赐取进止

一民户丁钱诸路并已蠲免独本路尚尔拘催然本路所以断不可以蠲免者缘本司只藉此以植立若免丁钱则司存可废纲解可罢也今广东民贫丰年尚有不足何况年来积歉鹑衣鹄形救死不贍官司又从而拘其身丁真可怜也又兼死亡逃移户口日耗县胥作弊或当销而不销或当纳而不纳词讼日多户长代输破家荡产本司虽明知其爲民害奈何别无财计舍此则无以自立纲解军食舍此则无所从出每思所以变通之而不得其说且如梅州一郡客丁租例纳米本州军粮全仰此米欲罢免梅州之丁则本州无米可纳无以给军食梅州之不可无丁米亦犹本司之不可无丁钱也其间有可讲明者惟有申严州县不得於正钱之外过取糜费听民自纳不许揽户代纳多取利息当销者销不许妄催贻害户长明赐行下使州县知所遵守傥蒙圣慈酌量事体或於本司纲解略与蠲减却与量减丁钱少宽民力如此施行庶几细民均拜一分之实惠取进止

右件画一开具在前若上供若银纲若养兵若丁钱无非切实利害既非敢有一言虚妄今恭奉圣旨指挥以宽之一分使民受一分之赐真尧舜忧民之言而禹稷由己之思也远民何幸身亲见之欲望圣慈特赐裁酌或就加增损或别作变通此非本司之私利实十四州四十县之民均拜更生之厚赐谨录奏闻伏候勅旨

奏乞留殿院徐清叟状

臣闻臣节以不回爲忠主意以易回爲圣威武屈之而慑富贵诱之而就非所以爲忠也震霆不斂其怒烈火不藏其热非所以成圣也祖宗盛时以尧舜之德养直臣之气以尧舜之量容直臣之言故台谏得以伸敢言之风朝廷所以无罪言之谤元佑初元谏议大夫孙觉论事不合哲宗圣意以二月甲午除给事中越二十日仍供谏职建炎三年监察御史沈与求论人不当高宗圣心以十月癸卯改兵部郎官不一日擢爲殿院二祖风烈所以垂诏万世而无穷者盖乐於听言而不吝於改过也陛下自践阼以来权臣柄国台谏多用私人供奉检呈副封台纲几案更瑟之初稍振风采言者无所避忌如南阳懿亲北府近侍与故相所进用之旧臣不知几人论列几疏开陈矣陛下未尝不改容而听康色而受也近覩御笔殿中侍御史徐清叟忽有常卿之除越一夕又有兼权户侍之命夫御史七品官也升而爲五品四品官亦不为卑矣然清叟不安於位议者不已於言盖以陛下素非拒谏之主而今者乃有轻去言官之失臣爲陛下惜此举也况闻清叟所论三事止言其渐未尝浚而深之夫仲舒二渐之策魏徵十渐之疏虽武帝太宗中材之主犹能倾听虚受之岂谓陛下躬尧舜之圣而反爲汉唐之所不爲乎或曰清叟已解言职必不肯复爲既出城闔必不能再入是犹未知有元佑建炎典故也傥陛下勇於改命如哲宗高宗之决使清叟复能就职如孙觉与求之忠则美在朝廷直在台谏不失爲圣朝盛事不然界以中舍之职假以封驳之权如洪咨夔出给舍台谏均爲纪纲所系清叟亦何辞而去哉臣职在西省第居南台本以嫌不当论奏事关国体身荷主恩弗容自嘿惟陛下赦原

直前奏事丐归田里状

臣冒陈愚悃仰瀆圣聪臣来自西州班於北阙书林史观荐仪清要之除翰院词垣屡玷文章之选遂陞华於从橐获簪笔於甘泉其在孤寒实踰涯分而近者天憎其满鬼瞰其盈三焦既不通几成痞隔之证两胫又病肿立有阢危之忧所以明堂竣事之初首露闲馆奉祠之请暨班睿旨犹閤俞音重惟系心於顺适之所则必伤措足於平稳之地则不跌虽昔者病今者愈幸逃天降之殃然中则?盈则亏宁免人言之咎敢摅诚於君父冀息影於丘园伏望皇帝陛下体天地之仁垂日星之照察臣之心弗爲於矫饰亮臣之请悉出於忠忱以聪听卑以惠从欲时当引去俾安鸿鴈之情身未颠隮誓图犬马之报

缴奏赵汝谈指摘告词状

臣逖远孤踪疎庸亡似误蒙简注擢贰词垣自更化以来至於今日凡一年四阅月粗究厥心比於三月二十日伏准省札备奉圣旨以臣咨夔爲疮疾有请令臣时暂兼行上三房词命臣

谓六押之事难於一身兼权即欲控辞而君命所临友谊交迫兼恐新除执政侍从卿监郎官词头积压欲爲了遣一番除授即以控还其从官告词臣方撰述发付本省元未书黄而权吏部侍郎汝谈辄谓告词末语有云若卿能砥节奉公则朕亦清心省事以爲讥讽其爲郑损事臣窃见告命之职本代王言既彰其美於前则必示其戒於後质之先儒具有体制况砥节首公王尊所以爲忠臣履正奉公任延所以尽臣节是皆臣子之职分名义之大闲有不可一日越者臣初草此词止谓近年铨选私意浸多法令滋弊不过欲道陛下之德意志虑以厉其臣中心皎然实无所讽不谓汝谈以邪心猜物以臆见度人近与其子隐语私书爲人所告致招物议方此沸腾不能痛自训饬而乃妄指王言以发其私忿且谓臣不能爲损别白以附时论照得损帅蜀四年臣於宝庆三年十月十八日以成都路机被制司辟差入幕至次年二月二十一日祇受都堂审察之命前後幕府共十五人臣最末至岁荐蜀士共五人而臣实居其一在幕府四月未尝不劝以正臣登周行八年未尝辄交以私臣之本末粗有可考今朝廷行事台谏论人汝谈爲亲戚则自辨可也而乃归咎於有所戒论之告词无所干预之中舍何其谬迷一至於此臣於汝谈每以其文字古雅齿髮老成故於陞侍讲权吏侍两词头颇极究意汝谈身直翰苑亦岂不知而摘片语以文欺借微臣以分谤此臣所以不容自嘿也臣谨按汝谈老至耄及气衰识昏近者玉堂发策至谓正心诚意爲缙绅先生之迂谈今此露章自辨乃以砥节奉公爲中舍词臣之讥讽若尔则是私心邪意方可以爲学毁节背公方可以爲臣侮圣言而轻王制莫此爲甚臣职在西省致令汝谈妄议实缘臣人微望轻不能振职然台谏给舍均爲纪纲之地词命轻则朝廷轻臣不敢避汝谈妄言之嫌辄具缴奏欲望圣断亟赐施行所有臣曩者不应在郑损幕府不应被郑损岁荐及近者不应赵汝谈砥节奉公词命之罪乞赐罢黜臣以具状申尚书省乞将职事归还中书舍人洪咨夔外见居家待罪须至奏闻者

卷二十三

<集部,别集类,南宋建炎至德佑,鹤林集>

钦定四库全书

鹤林集卷二十三 宋 吴泳 撰状

与马光祖互奏状

臣蒙恩守郡恰已期年救荒赈饥粗无愧怍独以手足之戚荐寻香火之缘温诏褒嘉未赐俞允私情忸怩方欲再陈忽得绍兴朋友报提举马光祖有疏论臣虽未知所言云何以臣揣之必是报怨盖缘端平初光祖守高邮以贪酷激军变身与母妻俱受污辱未几而复官词头过中书臣以太蚤方欲缴奏忽乔行简传旨令与书行词头之间未免有训饬之语光祖颇为憾臣守永嘉光祖守处温与处实为隣境平时处之面下而易温之所无温之米上而济处之所乏光祖既严面之禁不使之下臣亦防米之泄不使之上因此微隙遂几积怨今甫得使节遽倚势以挟私怨原其本心亦是观望时好奉承风旨所以敢犯公议以中伤善类臣若不以委折上陈则无以自白欲望圣慈检会臣累次所请先畀丛祠付出光祖之章容臣与之疏别仍乞圣断下清明御史辨其曲折付之公论见於施行於以彰圣朝黜陟之公臣不胜大幸

又照会某近者以浙东提举马光祖上疏劾臣已尝具状奏闻欲乞先次与祠仍付出光祖章疏及臣所奏下之御史辨其曲直未准回降指挥今得其章疏乃知悉是诬罔臣若嘿而不言窃恐有负临遣从臣牧民之意亦非微臣事君行己之节用敢画一疏析於后

一光祖疏谓臣粗有文墨绝无吏才阳为宽博之容阴挟贪婪之术臣起自书生操觚弄翰乃其职业固不知吏才为何事然廉谨自将一毫不妄取与官至法从无屋可居不特流寓於东南为然人所共知两任郡守洁已奉公比到永嘉悉意荒政虽所当得俸给三月不曾支请今光祖既谓之贪婪必须指其事实岂可只以阴挟二字中伤良善

一光祖疏谓假守宣城善状蔑闻白简犹新朱幡荐驾永嘉望郡得於营求臣戊戌夏初自宣城得祠至己亥秋末拜永嘉之命整整一年有半乔行简说圣上本以福唐相处缘辍与李大同且以永嘉郡望稍小故进直学士以华其行此自圣恩特达不知光祖营求之说指何而言

一光祖疏谓到官之时适丁歉岁始者大言力诋前守谓其不申旱数以爲志不在民意其设施必有可取而乃懵如醉梦事无巨细仰面以视吏胥朝令夕更貽笑远近臣去冬赴官甫及处州之境便闻本州饥荒就借处州印具申省乞蠲租科此光祖所目撃到任之始首捐已俸置局赈荒只是州郡自办不能如隣州科扰平民曾具账册备录施行次第登於台省今尚可考济民四万六千有奇巢户十一万有奇放夏税一十二万有奇放秋苗二万八千有奇又断罢都吏又勒诸吏之稍厚者各令买米不知光祖谓其懵如醉梦仰面视吏胥者得之於何所

闻也

一光祖疏谓郡通海道商舶往来其间傥能措置招徕不患米艘不集泳乃折支度牒低价敷余以致客舟望风奔遁米不入境臣比准朝廷乞降度牒二百道提举司一十道皆是给付诸县令自变卖余米赈济本州原不曾立价敷余又尝出榜晓谕招诱米客其来者二十五万余桶流入处州者亦此米也光祖乃谓客舟奔遁者不知奔遁於何所也其详已见之申省账册

一光祖疏谓闾閻嗷嗷兼旬乏余市民千百环拥丽谯至有扛去知州之语臣未到任前本州之民皆有饥饿之忧及既行劝诱米舟辐辏贫民皆得接济至有相告语谓此菩萨不来我等都是饿死底光祖时察邻国之政不应不知今谓市民千百环拥丽谯者不知是何月日也

一光祖疏谓大饥之後疫疠乘之死者枕藉泳闭帷深居恬不加恤本州因饥荒之後果有疾疫传染既多不无死者臣命医巡门看诊金厅置局施药又时加抚恤俾爲汤粥之供死则给以棺材又差官吏逐日分隅掩瘞皆有实数亦见之申省账册

一光祖疏谓今岁之旱无异邻州泳惟恐上司蠲除不便於已亟以全熟申上今岁本州风雨调顺早谷颇登晚禾却有?伤去处遂不待检踏永嘉与放三分诸县已放二分盖是参之卿大夫之公论得中都书谓左相李宗勉曾向人说闻温州得熟却如何又申放分想是吴某要誉今光祖乃谓全熟申上既曰全熟则何缘有二分三分之放自有申台省状可考亦自具申诸司光祖胡爲不知

一光祖疏谓又於管下科赧高下其手付之鹜行使得甘心渔猎赧价翔踊民不聊生本州苗额四万九千去秋收二万八千岁支七万四千除放外系欠四万余石支遣本州接续措置外尚欠两月之粮今岁稍熟南北不稔未免就寺院亩头上敷余系以市价偿之自无一毫侵扰目今米价每升正是四十见钱比之台处诸州米价最下岂得谓之翔踊

一光祖疏谓近者谓朝廷更易新楮泳自张黄榜外无一毫措置人心疑愕市肆昼闭十七界会子直不满八十视东浙诸郡独低本司移文取会并无回报本州自黄榜初下臣遂唤上诸行民户与之开说人心元无疑惑市肆交易如故又多方措置分隅称提具申朝廷乞添拨十八界会以备兑换十七界会旧用九十今已长作百三十乃浙东诸郡之所无亦已具施行次第申尚书省

一光祖疏谓自蜀客无家可归广求田问舍之图无首公爲国之念臣僦居德清就有薄产平时奉法循理岂不知守臣不可於所部辄置产业亦尝出榜晓谕谓不惟本位不敢置虽舍侄位下亦不令於此时置一亩创一椽有托姓名者亦许令告首榜文至今尚在照得田宅非囊橐中可藏之物必有坐落亩步若行体访便见着实

一光祖疏谓纵容子弟关节交通挟娼妓以遨游冒新丧而应举臣长子盘即弟昌裔之子登乙未进士第任提领犒赏所准备差遣自闻所生之丧即解官奔丧多不留此不知通关节者

何事挟娼妓者何人臣教子甚严其在侍旁絕不令出入盘亦粗知谨飭不敢爲非兼其已自登科不应再冒新丧应举

一光祖疏谓占僧庐以爲葬地而不恤公议之腾嘱部氓以市膏腴而不偿契券之直亡弟昌裔在婺州不禄治命令诸子权攒温括之间系是诸孤自请於朝援绍兴流寓人典故买寺院之地安厝朝廷割下本州从行即非冒占其如嘱市膏腴已具前项但未知所指部氓谓谁却须指出姓名方见着实

一光祖疏谓人方诋爲推不去之谢令泳乃视爲死可葬之桐乡臣治郡一年上下粗相孚信本州之贤士大夫如陈畏大卿诸人皆劝令就此卜居臣以於义不安屡辞却之在彼初无推不去之讥在此实无死可葬之意

一光祖疏谓以若所爲而望其爲天子牧养细民难矣臣忝以从臣出守只知奉宣天子德意抚恤小民势家巨室或有以强凌弱者当官而行未免招怨恶然小民之无告者却颇相安光祖之言恐爲势要而发

右臣所具十四项其十项必待反覆体究然後得知虚实最是中间谓臣以营求得郡以全熟申省子弟冒新丧应举占僧庐爲葬地四项乃实陛下所简记公朝所明知国人所通晓者光祖欺罔天听莫此爲甚照得光祖志淫好僻素不知书嗜利无耻自号能吏其在班行招权纳贿至有无钱十万贯莫登乔马门之嘲方遭白简旋得处州不过丰饰厨传优待过客买嘱游士使之扬誉於中都今冒焉得节去天咫尺乃敢指无爲有变是爲非肆无忌惮以诬上下无诸已而後非诸人光祖固难责之以此独不顾公议乎臣切见孝宗皇帝励精庶政无远不烛监司风闻不当必出自圣断与之区处朱熹爲浙东提举唐仲友知台州熹被旨检旱行部因民户有词熹方论奏仲友亦上章自辨熹疏遂不付出寻各与别路差遣而去夫熹大儒所言又是使事仲友庶官所爲又有实迹而当时区处乃尔今光祖如一失节之妇所论臣又皆虚诬清明之朝岂宜有此陛下志绳祖武动法孝宗欲望圣慈并臣前後两疏下御史台详与辨白特发睿断处分施行庶几臣三十年忠洁之操不致一旦爲小臣之所污辱谨録奏闻

辞免除权刑部尚书状

臣伏準今月一日尚书省劄子三省同奉御笔除臣权刑部尚书兼职依旧日下供职者臣钦闻出綍愧若践冰伏念某蜀之鄙人亡所肖似自爲青袍朝士已阅九年及玷碧落侍臣亦几三载制词共千百篇而经济少奏对凡十八疏而献纳疎圣恩重於丘山臣报微於毫髮盖尝以疾病之遭连而请外以乡邦之颠覆而丐祠谓天盖高曾是莫听乃径从於小宰遂晋长於秋卿华以一迁重於再命载念士官之所掌实於国脉而相关舜不赖臯陶之明何以布好生之德周不得苏公之敬安能审用罚之中必惟良臣始称公选若冒司於臬事恐纷致於人言欲望陛下矜察愚衷收回成渙量能授职亟改畀於时髦敕法清刑庶共登於汉道小臣获免旷官之刺陛下不失知人之明所有省劄臣未敢祇受

第二辞免状

臣比准省劄奉御笔除臣权刑部尚书寻具辞免於今月初五日伏准诏书赐臣不允者臣闻才爲造物之所?名者道家之深忌二陆以吴中之秀入洛官才盛而毁来两苏以西州之彦同朝位益高而谤起矧不令之兄弟亡前修之典刑而臣摛词玉堂簪笔荷橐职亲地禁终日不离文字之间选妙秩清羣才半入铨衡之下雉不能於铲采龟不解於韬灵致彼胥谗纳之危奔每荷陛下保全之力实如皇天生育之仁曾未报於隆恩乃复叨於异擢亟腾免牒以俟俞音盼春诏之十行虽荷褒嘉之宠掌秋官之三典终非审克之才敢逊忠贤庶安愚分所有恩命臣未敢祇受

第三辞免状

某伏准今月初一日省劄备奉御笔除某权刑部尚书某尝一再具免牒奏闻天听盖高未蒙俞允窃谓文昌高於法从宪台重於诸曹讼牒滋繁非肤敏之才不足以剖析情僞刑章纷委非谙通之识不足以分别科条如某谩学缀文未闲读律使之讨论润色尚能奏薄技於词林若曰纠禁议询何以宅嘉师於王国倘非逊避恐速颠隮伏望朝廷察其被宠之若惊谅其控辞之非僞爲敷陈於九陛庶毕达於孤忠俾守旧官亟回新命所有省劄某未敢祇受

辞免兼权中书舍人状

照会某今月初五日伏准尚书省札子备奉圣旨除某秘书少监兼权中书舍人者光命巽申愚衷震惕伏以太乙之坐紫微之垣下临图书上主词令俱爲华选专用英髦如某学不足以知方文不足以饰治曩尘册府曾躡等以三迁比直词垣亦叨荣者一载搜访遗文以补书逸缴还成命以绳官邪虽云粗尽於厥心初亦何裨於更化岂期误渥复及陈人还贰书林岂敢方元佑之人物改权中舍而乃用绍兴之典彝一旦不堪二难兼取若令磨鉛吮墨尚殫典校之劳如复翻勅批黄是速颠隮之咎毋拘反汗不致妨贤某已於当日赴秘书省供职外所有兼权中书舍人职事欲望朝廷特赐敷奏寝免施行

又辞免状

某比者一再辞免恩除俞音终闕某更不敢冒有陈瀆惟是中书舍人之职所管四房文字十有八色词命颇多某自更化以来讫於今日跨越三载撰述几千有余篇辞殫义拙亡所裨补顷者伏准御笔陞直禁林仰荷圣恩獎拔之至靖惟内外两制古今词人兼掌者少某实何人冒敢共贰且某既除右史又权吏铨又领瑶牒及直学士院委於中舍难可通摄近尝以洪咨夔除吏侍兼直院日辞免中书舍人体例申控公朝敢乞特爲敷奏许令某解还西掖职事简畀时髦庶几不妨鵷序之贤某亦得专农马之智

第二辞免状

某比者误叨恩除有兼职依旧指挥尝一再具奏辞免中书舍人省札荐颁俞音终闕今月十三日得起居郎兼中书舍人袁甫公文备奉尚书省札子及臣寮上言等事将後省印记令某掌管窃缘某学术空疎仕材答飒近者又苦目眚委是难兼两制而况词垣文字实爲浩繁若不陈力控辞未免速致颠沛欲乞朝廷早赐敷奏别於周行遴选儒绅之彦俾充此选庶上下房文字不致积压

第三辞免状

某窃以宥坐之器盈则覆仲尼忧太盛之易衰再实之木根必伤文子惧兼荣之难保今兄弟一门聯登要路可谓太盛矣内外两制皆代王言可谓兼荣矣居盛而不戒则危饗荣而不已则辱若非安当止之分何以免交謫之言比於黄纸之初除五入控辞之牒继以赤旨之间作三陈祠禄之章且依屡降之指挥不许再行於陈请若退而自嘿几悖戾於先猷复进而有言是重违於圣旨某之进退至此周章与其身兼数器而独冒书生之荣曷若知効一官而免供中舍之职矧词章系国脉之隆替而论駁关朝纲之重轻傥久据於华绅岂不妨於贤路今巧匠?云斤而未试良工 美玉而弗沽非甄拔而用之则无以展其器能非磨淬而新之则无以扬其风采輒忘疎陋敢逊誉髦裨谏草创世叔讨论爲命岂一人之力宰我言语子游文学设科须衆善之长庶於有道之朝得免蔽贤之罚更祈敷奏即赐允俞

第四辞免状

臣西州晚进不学不文伏自去冬误叨除授尝三次具疏乞免兼中书舍人忱悃屡殫俞音终闕今又几半年臣见贰吏铨又直翰苑又兼瑶牒选事浩繁书诏填委若不解中舍一职不惟积压文书将恐有妨贤路矧文士如林词人辈出内则如国子司业陈耆卿著作佐郎应絳外则如知江州吴潜知安吉州蒋重?建康运副高定子前成都运判李刘官观刘克庄皆有文名可充是选伏望圣慈详臣累疏控辞精选人以兼摄庶几臣得以颛心职业少图补报人无旷官之?已无蔽贤之惧

辞免兼直舍人院状

照会某今月二十四日伏准省劄备奉圣旨吴某除军器少监兼直舍人院者冒膺兼组增惕孤衷伏念某顷自着庭暂权右掖无英词以鼓天下之动无宏议以植朝廷之纲挂名忝与於判花嫉恶但思於去草粵稽元佑尝用蜀珍咸推苏轼范百禄之贤能缴李定张诚一之恶自愧寒乡之晚进敢攀前哲之高风比还二凶之词荷垂九陛之听然而历时滋永久假不归纵未致於烦言亦弗宁於方寸正欲露章而控免岂期带职以超迁既升武监之华仍正词垣之直虽军旅之事未之学尚能阅戎器之精粗以帝王之制举而行恐难称皇猷之润色宁专农马之智敢冒熊鱼之兼某已於今月二十四日赴军器监供职外所有兼直舍人院职事欲望朝廷特赐敷奏寝免施行

辞免兼权直舍人院状

照会某今月十二日准尚书省劄子备奉圣旨吴某时暂兼权直舍人院者某被命频仍省躬震惕居编摩之府才及五旬登著作之庭未经一月当明主励精之始正微臣思报之秋而学不足以网罗旧闻识不足以通达时务方虞黜责岂望超陞矧赞书王国之精华而论駁公朝之机脉开宝之後仅闻两中允之除熙宁以来始见三舍人之盛岂宜朴学暂使兼官虽资浅望轻在礼弗容於控免然职亲地禁非才恐速於颠隮伏望朝廷特赐敷奏收回成命改畀时髦庶专农马之能少答乾坤之施所有恩命未敢祇受

辞免知泉州状

右臣今月初八日准尚书省劄子六月二十四日三省同奉圣旨除臣依旧宝章阁学士知泉州除已望阙谢恩外臣竹宫奉祠甫颁渥渥桐城出守复玷新纶申命甚休省躬若厉伏念臣曩陪羣彦获侍禁除王褒之遇明君每喜得行於直道韩愈之傲相国岂虞潜伏於危机坐投闲者六年复被劾而三黜自分翳林泉而槁死岂图见日月之昭明属调更化之弦误畀专城之绶靖言若昔曾忝斯除合浦之珠复还敢不敬承於天命贪泉之水再酌恐犹未免於人言牛负轭以莫胜鸟伤弓而辄畏冒当委寄定速颠隮伏愿皇帝陛下念簪履之遗改丝纶之宠别选良吏爲治宣圣化於海滨仍令祠官祝厘歌丰年於农田所有省劄臣未敢祇受

第二辞免状

臣比准省劄备奉圣旨除臣依旧宝章阁学士知泉州寻具辞免伏准今月十四日诏书赐臣不允者臣比控忱辞上勤报告对天捧读局地怀惭欲王之德意志虑达万民固荷圣恩之重称臣之笔墨议论妙天下敢当天语之褒况文学止於润身而政事可以及物若稽往哲具有芳猷修以翰墨致身而对客每好谈於吏事轼以词章名世而居官常自任以吏能乃知学古之儒不薄综世之务眷兹南服常用词人倪思初出镇於绍熙德秀复典麾於绍定凡一再命或四三辞一则以地望雄重军民杂处爲忧一则以民力焦熬宗族衍蕃爲说昔者已非其旧今焉又不如前岂应孤危一介之臣能继笃棐二人之辙伏愿皇帝陛下念臣曾忝侯藩之寄察臣非辞王事之劳亦思以奏最闻又恐不胜任免陈力就列不能者止何敢饰情发号施令罔有不臧毋嫌致命所有恩命臣未敢祇受

第三辞免状

某昨再具辞免除某依旧宝章阁学士知泉州伏准尚书省劄子备奉七月二十二日圣旨依已降诏不允不得再有陈情者窃念某去国九年屏居六载虽在畎亩未尝一念忘君兹蒙公朝起废予郡岂不欲奉命驰驱以布宣德意窃缘温陵旧日史嵩之曾以某姓名进拟濮斗南寻即承风旨论劾诬词丑诋污蔑素行某更何顔以延见吏民耶不宁惟是斗南後来亦出知此郡其交割月日与罢命到日不相後先闽中士大夫皆言温陵早是荒残雕弊更经此一番送迎扫刷则愈不可爲矣若使某在郡整龔究理则有修怨之嫌寝默不言则貽败官之譴某虽至愚极陋粗知义理实不愿与之爲代欲望朝廷特赐敷奏俾某获免是行仍奉祠官香火爲太平幸民不胜至感

辞免除权吏部侍郎状

臣今月二十四日准尚书省劄子备奉御笔除臣权吏部侍郎日下供职内有兼职依旧者涣若出纶震於闻命窃以甘泉扈从以侍臣爲邦家之光选部典铨以小宰爲人物之监匪畴夙望曷称亲除如臣者猥自遐陬躋登朝序才能甚短如鼎之不可以柱车文体近浮如玉之不可以爲谷偶值清朝之更化忽陪羣彦以同升谬当记注之筵复玷词翰之选赤墀载笔几瞻言动之容红烛燃窗两被传宣之宠虽曰儒生之荣遇每惭往哲之高风方戒满盈又叨甄擢官清易旷甫半岁而三迁恩重难酬不一月而再命倘冒承於殊渥恐交喷於烦言伏望圣慈俯矜愚悃於赞书之未出择髦士之攸宜庶安私情允惬公论所有恩命未敢祇受

第二辞免状

某比於今月二十四日伏準省劄备奉御笔除某权吏部侍郎兼职依旧寻具辞免奉圣旨不允重惟吏侍之迁实高诸曹非知人之明不足以监裁流品非秉法之正不足以检柅吏奸比者某共貳之初以卯退朝以辰入局典吏抱案迁官满庭爱惜分陰仅可区拨而才不周於繁剧智不足於眇绵以所不能之人居所甚重之职因循之久易生苟玩岂图异渥复畀陈人若贪恩荣冒昧以处则必以庸疎抵於旷败欲望朝廷特赐敷奏得从寝免庶几上不累圣鉴下不以溢愚分所有省劄未敢祇受

卷二十四

钦定四库全书

鹤林集卷二十四 宋 吴泳 撰状

辞免除宝章阁学士知温州状

右臣八月初五日准尚书省劄子三省同奉圣旨除臣宝章阁学士知温州除已望阙谢恩外某闻命之始拊心若惊窃念臣罢守闲居杜门退省歛文采於莫争之地尚黄离之得中飭行防於不睹之间庶素履之无咎犹恐林泉之不密易於言语之招尤沉潜圣经陶咏皇化退不草耕东臯之赋进不谋上北阙之书岂自意於遭逢忽起臣於闲废一去而奔阳瞿本无深罪杨亿之心再迁而得颍州似有复用臣修之渐既畀之以古诸侯之任又华之以真学士之班銜此鸿私继之感泣然念恩隆则受者愧官盛则嫉者深况莫荣於手足之亲而相比为股肱之郡宝婺固中州之望东瓯尤多士之邦匪得通今学古之才曷胜御衆牧人之寄伏惟皇帝陛下以惠安黎元为务以表选良吏为先乞回新除改畀宿望则臣虽在江上祝厘之日亦犹海滨宣化之时所有省劄臣未敢只受

第二辞免状

照会某近者辞免除宝章阁学士知温州奉圣旨不允令学士降诏者某闻之慈父不弃无益之子仁君不遗无用之臣至爱虽隆自量贵审如某者猥由疎远获际休明三载禁林已媿作命代言之选一年便郡又无承流宣化之功皆繇学力之不充遂致人言之交谪若以愈傲相国而获罪犹有可言或疑黯薄淮阳而要君则为已甚方欲杜门而省咎复蒙畀郡而起家歛容而拜除书已觉恩濡於春露挥涕而读答诏便如尘洗於天波谓心事之端良而发为训词谓德履之醇亮而达为政事不但记琳宫之散吏又得为圣代之全人只服宠灵岂宜逊避然念永嘉望地延阁隆名脱使某冒宠以居择安而受则恐解绶而投闲者各起向荣競进之志怀章而需次者必萌觖望不满之心虽有寸忠莫容再瀆伏望朝廷曲如敷奏特寝误恩芝兰之性自幽常有避羣芳之意葵藿之心终在宁无倾皦日之诚所有省劄某未敢只受

辞免起居舍人兼权吏部侍郎兼直学士院状

右臣今月十一日恭奉御笔除臣起居舍人兼权吏部侍郎兼直学士院者涣纶沓至拊已兢慚窃以柱史周官翰林唐制记言殿下至元丰而始分寓直禁中暨开宝而昉置矧右铨之要任皆天下之清官非宿德不除非英才不畀如臣者学殖将槁笔花就芜遭逢盛明之朝屡玷清切之选东壁图书之府已叨再入之荣紫微词命之垣又历三迁之宠视登瀛列仙则有媿较渡江诸老则弗如曲荷简知复加亲擢谓臣曾摄官记注故华之以右?之除谓臣尝兼掌赞书故陞之以北门之直地愈亲则责愈重宠益厚则心益惊难以一身而兼数器英俊常有积薪之叹弟兄岂无连茹之嫌倘非控辞恐速颠蹶欲乞睿旨收回误恩庶逃维鹬在梁之讥少

安斥鷃知足之分所有恩命臣未敢只受伏候勅旨

第二辞免状

某皆蒙恩除起居舍人兼权吏部侍郎兼直学士院寻具奏辞免恭奉圣旨不允者窃以大君之命固莫容违小臣之私所当控请伏念某得生孤露承绪单平读蓼莪之什以茹悲咏棠棣之华而相友辞章骖骃殆非台阁之文言论迂疎岂识朝廷之体敢不遐遗於圣代俾联仕籍於清朝自衡厥心已过其分今者某既叨荣於螭陛而弟某复分察於乌台一日并除孤衷增惕历数先朝之盛典仅传元佑之两苏轼方立柱下以记言辙亦上谏坡而论事处连茹之嫌而弗避虽有彝章踵并驹之辙以分趋敢当异数若俞音之终闕恐愚分之难安兄弟二人敢效孔鸾之集君臣一体愿怜犬马之诚欲望朝廷特为敷奏处分施行

第三辞免状

某皆蒙恩除起居舍人兼权吏部侍郎兼直学士院兼职依旧寻具辞免恭奉圣旨不允某窃见吏部侍郎旧比止有二员洪咨夔系正除左侍郎袁甫系暂兼权右侍郎今袁甫虽除起居郎兼权中书舍人窃缘省劄内有兼职人依旧指挥一项未委某合与不合供职取自朝廷处分施行且某既除右史兼权吏侍又直禁林若并兼中书舍人不惟文字繁委难以通摄俊乂如林某实何人敢独当其任近者洪咨夔兼直学士院日亦曾辞免上三房职事近例可考并乞朝廷敷奏改畀时髦令某免兼施行

辞免陞兼修玉牒官状

某準尚书省劄子三月初二日三省同奉圣旨令臣陞兼修玉牒官其余兼职依旧者臣荐叨纶命陞纂瑶编窃惟祖宗白玉之牒与金匱石室之史并传在真祖时凡与纂修之官必命词臣为之知制诰梁周翰盖其选也非学识粹正不足以明祖宗之宪章非笔端丽腴不足以纪帝王之符瑞如臣者探道未博摛文弗工二年供奉翰林三年讨论帝籍眎五凤楼手何敢辄窥其藩迺蒙恩躋升一级俾踵前修故事忝窃甚矣知臣莫若君知言莫若心傥或冒昧只承未免孤负隆委欲乞收回涣渥改畀英髦庶几小臣稍安愚分所有恩命臣未敢只受

辞免除宝章阁直学士知宁国府状

臣今月二十二日准尚书省劄子六月十一日三省同奉圣旨吴某除宝章阁直学士差知宁国府臣顷遭台评俯伏山舍拱迟明命忽叨除书伏念臣圣代迂儒西州朴学三纪之陟仕版曾无居官赫赫之称十年之筮朝行亦靡论事奇奇之操岂意九重之简拔谬当两制之清华受宠过多揆才莫称遂至满盈之极自貽颠蹶之虞犹赖上德仁慈圣朝弘大不惟不加重汰且华之以直学士之班不惟不与真祠又畀之以古诸侯之任岂軫念供奉翰林之久抑凝思对敷玉陛之忠是有此除以荣其去但宛陵近郡妨阁隆名疎远之臣冒昧而处则恐人言之未已有孤圣造之曲成伏望皇帝陛下骏发睿谟收回涣渥俾就江湖之上获寻香火之缘不

胜战灼侯命之至所有恩命臣未敢只受

第二辞免状

某近者伏准省劄三省同奉圣旨除某宝章阁直学士差知宁国府寻具辞免状闻奏恭被温诏未赐允俞仰戴鸿慈深深感惧窃惟圣祖神宗优待词臣非他官比虽曰以罪去国寻复分畀藩符杨亿临汝欧阳修上蔡王禹偁黄冈洪迈镇江周必大建宁倪思太平或近一年降旨或越数月出命或不出浹旬之内即颁除书而四五臣者高行挺特皇文黼藻被此宠光固亡忝愧如臣无深识足以爽邦无英辞可以纬国谬当两制几跨五年较之先儒但有惭色矧今遭论未久只宜引分投闲而圣上率由旧章辅臣好行故事望藩华阁蕃锡过优揆之疎庸恐难称塞伏乞钧造曲赐开陈改畀祠官俾安分愿

辞免知隆兴府状

臣今月初三日承安吉州递送到尚书省劄子坐准八月二十三日三省同奉圣旨除臣依旧宝章阁学士知隆兴府除已望阙谢恩外臣荐叨温渥申畀名麾愧浮於荣感继以泣臣窃以带湖襟楚莫如江左之上游帝雨栋云无若洪都之新府山川崛奇而地形壮臯壤平沃而民物繁盖自唐开节镇以来而其国视侯藩为重匪畴明牧曷殿大邦而臣明不足以爽师和不足以吁衆诵謏闻於六籍之囿自知学力之不充奏薄技於羣英之林每叹词章之无用矧栗里居闲之岁久而漳滨卧疾之日长壮心虺隤精意牢落若处以衆大当要冲之郡则将貽罢软不胜任之忧比尝控免於南泉今敢冒临於西道俱为君命固无恶前从後之心其在人言恐有就易辞难之谤臣之出处心实旁徨伏愿皇帝陛下濬发明威亟收涣号别咨良吏俾分铜虎之符就使老臣仍奉玉隆之廩所有省劄臣未敢祇受

第二辞免状

照会某比控微臣吁天之辞欲免洪都新府之命至勤答诏尚闕俞音伏读诏书且谓豫章襟带江湖物华人杰佳山水郡而畀词翰之臣宠绥之仰荷圣君以礼使臣简眷隆重之意已即望阙跪拜只谢矣第惟江西一大都会必得重臣作镇然後为宜岂应陈人冒当此寄更不敢再具奏闻以瀆天听敢望朝廷特赐敷奏曲从所请仍使祝厘庶几上不累朝家量才授职之明下不失臣子陈力知止之义

知隆兴府丐祠申省状

照会某近以次男之戚辄伸衷悃乞畀丛祠天听甚高俞音尚闕切念某一生孤穷连岁灾病嘉熙年间守永嘉未闕两月哭亡弟昌裔今岁守隆兴仅及三月又哭亡子柴夫亲莫亲於兄弟爱莫爱於父子而近遭如此岂天降祸殃於家门不欲使之紆郡绂耶此所合丐祠者一也隆兴旧号佳郡近岁地气转移盖缘广风顛雨吹入章江下潦上雾渐有瘴气一家翻病不谙风土而某婴疾尤甚近日以来形体支离手足不能运动一日不出厅则簿书堆案一句不引

词则讼牒山积不惟误身抑恐误国此所合丐祠者二也某自到郡後公帑赤立竭力经理一意撙节粗能了解总所纲米十五万硕支散诸军春衣见钱五万余贯遇雪寒则犒军人因水潦则赈济民户支还官僚积俸整顿学校弊事近又招填禁军三百余人蠲放四年苗税几四百万催桩朝省盐钱二百万若士若民若军粗与之相安惟蜀士之寓此者七十家责望乡守者甚重郡力凋薄一有不周便生谤言夫马力穷则必毙鼠技穷则易竭自度精力不能展布此所合丐祠者三也有此三者用是控告庙堂早乞钧慈特赐敷奏别选良牧以承重寄某虽随犬马填沟壑亦无所憾

已见奏事丐祠状

臣远自蜀道登於天朝八年之间亡所补报今岁二月二日以目眚丐祠十二日再请十七日三上乞归田状因循至於季秋明禋忽病痰肿十九日入奏十月十四日以已见上殿复伸前愬俱闕俞音至蒙陛下加宣谕弗许控陈臣实何人敢有冒瀆窃缘近者蜀事阽危敌兵驰蹂臣室家坟墓亲戚骨肉与乡之衣冠华族存歿死生未知其所每遐思遥望痛心如割独念臣起自书生既无膂力荷戈以备扞御而身居法从又弗能朝夕论思力争利害以拯乡国隐之於中焉得无罪臣复何顏以立於陛下之朝哉惟有上告君父力求黜罢庶几可以少追乡父兄之谪若陛下念其久在词林不忍遽加澄汰则乞检会臣前後奏疏畀一祠廩实拜天地生成之造

火後丐祠状

照会某西蜀诸生登朝十载陞华翰苑晋长刑曹只缘某贪恋圣恩不能早去入春之始祸及家门丧子哭孙延及孥隶不四五月之内而樵者五人方埃秋凉抗章引去迺壬申之昼融风为沴延焚寓廨生理一空仅能搬挈家人栖止於外触目为况殊不堪言若不急求退闲恐又重速颠蹶今蜀道危迫未可遽归欲乞朝廷曲赐敷奏特畀丛祠庶几少休以安愚分

知宁国府丐祠状

照会某疎远之士十载班行每荷公朝拔擢虽获罪戾犹蒙恩予郡责之华职敢不永矢图报际事以来布宣德意扶立郡纲朝夕恪勤不敢少懈民亦稍似孚信忽得蜀道家信闻亲姐归徐氏者去冬死於寇堂弟嘉定通判中孚者今夏死於顺庆之兵锤爱手足平时相依为命一旦身殒於难痛贯心鬲亡以为生数日之间便觉心志怔忡神识瞽乱往年痞膈之疾遂复大作度不胜共理之寄辄欲丐一闲廩栖息江湖少便医药蒙赐敷奏特遂所请他日未填沟壑一惟朝廷处分况某下政已除袁申儒叶棠便可趣令之戍放某一面离任又二照会某比真祠实出忧悃居股肱之郡敢辞共理之劳闻手足之丧实重孔怀之感每顾瞻於蜀道常痛哭於家门所以?伤因成疾痰志凋识耗莫检扼於吏奸神敝形癯难应酬於军务陈力就列不能者止投闲置散乃分之宜岂期天听之高尚复俞音之闕欲乞朝廷再於敷奏察其忠诚非避事矜其亲爱非矫情检会前章特畀祠廩庶少休於神观尚图报於隆恩

又三照会某比者一再上祠请俞音终闕靖惟某西州晚学奋身孤寒自寅周行首尾十载繇外府丞列中秘书徧历二史兼掌两制讨论玉牒封駁银台径登禁涂遂长宪部儒生荣望至此亦极矣得罪去国常躋华阁出镇潜藩若非遭逢圣朝何繇有此侥幸第食廩人之粟无一日阙叨朝廷之爵无一日闲官至八坐秩享二千石取数太多食功无补则恐天道恶盈人情忌满此某所以朝夕愧惧而欲丐闲者一也某旧有瘡胀之疾积痞成痼前岁将禋时自鎖院陪祀以归瘡见於面浮注於胫邪气干挠几不能以为生得郡万山间岚气颇重祗染风气旧证复作忽蜀中书来又报兄弟之难爱鍾手足愈不能堪日来心志凋耗精神怵恍虽欲强自扶持终难荷此剧寄此某所欲丐闲者二也某所领部号古名藩民淳讼简士尊吏畏法某到任以来奉行朝廷寬大诏书每颁下条教人颇孚信更无一词到省部台寺及本路监司惟是国小而迫捉衿见肘每及遣厢禁寨铺兵春冬衣赐常是阙乏所收苗米率不能供一岁支用而上弦益急迫吏满前且知版曹今岁抛下十年所无之额今月又发下隔眼清册并要岁终取足自惟书生作牧固是拙於催科但细考其十年内最高年分以今年起解之数计之亦自有增无减若必欲於两月之间并明年後年合起之数一顿解发则必至槌肌剥髓重伤国家爱养根本之意何况六邑道里濶远移牒往来有误期会此某所以宁受殿而欲丐闲者三也凡此三者皆出某之真忱不敢欺隐欲望公朝早赐敷奏令某得奉香火而去仍就催下次官之任他日某宿恙稍已一惟朝廷处分

又四照会某西州晚进十载周行践历清官径登法从又叨华阁出守名藩朝廷恩厚书生荣望不啻足矣前此两上丐祠之章只缘某旧得胀满之疾既有郡事又有家事亲姐堂弟从侄俱死於兵蜀中报至痛贯心膺情怛伤而怀不宁者数月痼疾至今未解所以累章冒瀆更无一辞自雕饰也某岂不知得郡可以行志苟禄可以养身而多病早衰冒承凋弊若不底於司败必致填於沟壑伏望朝廷密察衷忱初非避事再赐敷奏俾某获领祠官少得休息即拜生成之造

又五照会某比者四次上祠请未蒙俞允切念某孤寒寡援备位从臣既得一麾无所补报而灾病遭连肿胀日甚一日重以家门之难亲姐堂弟既死於兵亲戚子侄五六人亦毙於难既有疾病又加忧伤膺此千里之寄时有盗贼兵卒作过实难支吾敢乞公朝检会某累此所陈乞祠状再为敷奏既从所请不胜至幸

又六照会臣伏以事君无远忠诚所至则千里如近王畿之前临政在勤精力未衰则百为不越侯度之外矧以从臣而出守实分天子之顾忧何敢辞劳急思求退伏念臣幼而孤露长益单平虽学为箕裘有父书之可读然不事生产於世务以常疎米盐靡密则付之室家资用有无则通诸昆弟岂意私门之薄祜连遭蜀寇之披猖臣有女兄以垂老之年而死於难臣有季弟以强仕之岁而歿於兵其如募功强近之亲半罹?义夺攘之厄郁邑而谁与语能无怀土之思乱离而莫适归几作无家之别兴言及此何以为情每垂涕以览书遂积忧而成疾往岁祀明堂後曾生肿胀之根今年当勤农时复添痞鬲之证医更而药不効食少而事益繁今则神惫志荒筋弩力缓临事多忘岂能应酬於簿书期会之间立心不强何可支吾於城郭甲兵之阙加以凋敝不堪之郡置之溃沆难塞之冲少失堤防立致狼狈重念臣旧虽法从今实外臣所以五丐真祠只是具申都省岂谓精诚之弗达尚稽睿旨之赐俞宁扶未死之躯直扣曰生

之造忠信以事其上更无一语之矫情疾痛则呼於天幸冀九重之垂度伏愿皇帝陛下曲加清问矜愍愚衷特颁罢守之书俾遂祝厘之请葵藿之心常在固欲向阳狗马之疾未瘳难于胜报永言终惠庶保余龄

又七照会某比以灾病频仍六上祠请一状奏闻五状申朝省未奉俞音焦心如灼近从乡人之仕於朝者得蜀道书报又闻敌兵今岁之春抽兵北去经行乡邑族兄侣之肃之堂弟昌辰及妹夫袁璫甥婿涂辰乙等复死於兵小小姻娅更不敢缕数溷瀆朝听重惟某兄弟少孤倚宗族亲戚以自存立去岁丧十之三今岁丧十之七才闻讣音感伤悲痛因此痼疾转加实不能任繁剧所以催科益拙不免版曹督趣甚峻见请告命医调理欲望朝廷检会某前後申状特赐奏闻蚤令汰去庶免有误郡事实拜生成之造

又八照会某孤远鰥生冒当凋郡顷以灾病七次丐祠伏自元年十一月一日汔於今岁闰四月二十二日六奉省札行下不蒙圣旨俞允某之进退实为狼狈某向者来自蜀道登於王朝十年之间历遍华近入为法从出典侯藩本图宦达之荣岂矜恬退之节不谓门衰祚薄凉德挺灾前月十八日遂宁通判从弟有成万里致书以兄弟亲戚宗族之讣告丙申之冬亲姊归徐氏者死於难丁酉之夏堂弟制机中孚者死於兵是年之冬敌兵再入叔母杨氏与堂弟昌辰俱死於火今年之春临邛白兵啸聚知县事从弟象明又死於官宗族死者十人亲戚死者三十二人其人之名氏其死之处所其受祸之月日靡不言其情状之惨每读至此不如无生以此悲痛纏心旧疾转剧耳瞶瞶其刺痛胷郁郁而痞结若非力求退闲专近医药不惟妨废郡务亦恐颠陨元身伏惟圣朝崇孝友睦婣以治天下辨老幼废疾以任官政察某所愬实鍾於情怜某所陈真出於病即乞检会累疏敷奏上前俾奉祝厘以保残息某见已在告牒府事委三通判兼摄日俟报可之命

知温州丐祠奏状

臣闻臣视君犹天也疾痛不以告则为有隐於君兄於弟同气也急难不共扶则为不友厥弟矧臣少自鞠苦连遭凶始生三年母也见背外傅十载父兮不存岂无乡闾强近之亲宁若天分怡悦之爱兄之待弟真直谅友弟之待兄非他人昆既同万里之造朝复共一麾而出守弟以去年八月至宝婺臣於今岁元夕抵东嘉鲁卫之国相依秦晋之隣交睦方议力行於球政各图汔济於饥氓布宣天子寬大之书培植朝廷爱养之本岂以家门薄祜仲氏云亡眡鵠鵠则原隰已荒顾鸿雁则形影相吊臣弟昌裔有三子三女仲嗣次息皆後於臣藐是诸孤斩焉在疚悒悒其谁与语遑遑其欲何之远瞻蜀道则无家可归近望浙江则靡屋爰止每一念至忽然忘生载惟郡政之本原全靠兹心之精爽神已散乱民何庇依愿解买臣之章与营季子之墓伏望皇帝陛下以孝弟领天下以礼义顺人情察愚款之所陈非曼辞之自饰使歌唐棣少寬孔怀不已之悲虽在考盘尚竭永矢弗忘之节

又二照会臣比家弟之戚露章丐祠未蒙圣慈特赐俞允伏读诏书以至濒海民饥顾忧未寬为训臣职在牧养敢不只承圣意窃惟东嘉素号乐土逢此歉岁遂至艰食圣泽普沾枯槁之夫皇灵下烛逃亡之屋如肆赦宥如减田租如给僧符如拨廩粟一钱一粒皆是君恩臣不过

与千里之民歌咏帝德而已臣前时所忧惟恐荐饥所以被受训词之後不敢言去今则麴麦登成风雨时若田畴之间秧青水白人有一饱之望本州荒政月终亦可结局惟臣之弟旅殡僧舍而臣宴坐黄堂寝食为之不安欲乞令臣蚤解郡印得与诸孤营一宅兆以遂居者往者之计实出君父生成之造

吏部侍郎乞祠状

某西州晚进绍定己丑躡登朝着今跨八年自太府丞历秘馆郎闾繇编摩着廷戎监兼词垣翰苑史筵径班从橐盖繇更化以来屡蒙拔擢清华之官殆几遍历深愿竭尽愚衷仰图报称入春以来人家灾病遂丧长孙随行仆隶亦多病死而某以劳心疲虑之故忽苦目眚旬月不校一二日来赤痛逾甚虽见已请假切恐省院词命吏铨文书多至积压必貽旷职之惧兼以某赋分畸穷荣望踰溢若不奉身求退又恐别挺他疾定速颠虞欲望朝廷特赐敷奏畀某祠廩一次以便休养他日未填沟壑尚得糜捐以报恩遇

又二照会某顷以人家挺病目眚为灾曾乞外祠尚闕中旨窃惟吏铨文书繁剧之地词掖书诏填委之司心思既殫目力又竭然後可以检掇吏奸专情词命而迺日以来攻治赤眚虽退服饵凉剂太多视官梦梦用明弗远脾经黷黷食旨不知若旷厥官定貽伊戚盖满盈则必致鬼瞰其室而静退则可以神游於庭因揣分以自量非丐闲而莫可用申前请再瀆公朝欲望奏於黼坐之前赋以琳宫之廩俛使蝸鳩自适之分知免於今则如犬马欲报之心永肩於後

又三照会某比以目眚腹疾两上丐闲之请荐颁睿旨弗允愚忱虬虱贱臣岂应更烦公朝以瀆天听缘某共貳西省家弟昌裔分察南台虽稽之先朝具存典故而揆之私计终有未安不惟职事妨嫌而其议论弹击稍涉故旧则人言交謫连及孤迹是以无所干豫之人而投之是非之海若不急求汰去久则无以自明欲望朝廷曲赐敷奏检照某所上两章特畀祠廩若念其万里间关未许放闲於田里八年忠恪粗能寡过於班行或蒙与之江浙一麾俾以民庸自见他时命使所不敢辞

知隆兴府丐祠状

臣闻君臣之义同体疾痛不以告则臣为有隱於君父子之情主恩死丧不自临则父为弗字厥子矧臣少加孤露长益畸穷昆弟七人俱以康强而蚤世葺功一姓半因离乱以亡軀臣晚有二息盘乃亲弟所生柴实侧室之子各专末艺粗习諛闻退惟桑榆垂老之年幸得弓冶传家之托而柴也久离侍下远仕吴中方请告以言归忽染痼而在道母嗟季之行役假寐弗遑兄怀弟之急难永叹不已犹云无弃以慰所思岂期事与心违命随才尽曾不浹旬之顷遽兴长夜之悲子因念亲至切而陨身父亦望子不来而婴疾恨皇皇而弗得哽悒悒以何言重为会府之浩繁实自兹心之经纬今则精神耗乱纲纪放纷本居官亡以踰人况病力何能任郡辄输忱悃仰丐丛祠伏愿皇帝陛下明以察伦慈而使衆容子夏退老於西河之上不至丧明庶延陵返葬於嬴博之间尚为合礼

知温州丐祠申省状

某邈居西州久仕南国既叨法从连典名藩君恩常厚而犬马之报甚微邑爵渐加而蒲柳之浸薄虽忝字民之长不谙为政之方放田赋一十五万而民犹以为未仁余军储六十六万而兵犹以为不给旧楮非不称提而直日下新谷非不平糶而价日增盖缘孱躯疾病之衰遂致庶事施为之谬天虽谅只人谓斯何医不能治病则害人农不善服田则伤稼乞身而退乃分之宜即非望之雅意於本朝实以汲黯不堪於治郡若少迟於汰去定速见於颠隮伏惟公朝以道而进退百官以法而殿最羣吏曲加敷奏俾遂退休国家政清令明悦遂今日祠官之请州郡员多阙少庶无後來贤路之妨

申省二状

汲黯不任郡久宜上印而归倪寬多负租竟被考功之殿虽荷圣朝之曲贷恐於公议之不容矧某介不通方拙於从政详刑而失之缓素无赫赫之名弛利而狃於寬常书下下之考率十分減三而谷尚贵以五券税一而楮弗昂百为不闲动辄得咎重以私门之薄祐加以痼疾之相仍同胞之戚系心每遇岁时而感慨上气之病如瘡岂禁霜露之凄寒若尚留之典刑必立抵於司败伏望朝廷察其忧悃畀以丛祠治状不登安有白鹿衔花之瑞文才已尽更无金銮视草之工惟此孤忠尚如杲日

卷二十五

<集部,别集类,南宋建炎至德佑,鹤林集>

钦定四库全书

鹤林集卷二十五 宋 吴泳 撰后

通郑侍郎后

瞻五色之云知有郑公之人瑞问三奇之戍恍惊葛亮之天威自单车径度於玉关而尺纸未登於籤府每怀靡及辄诵所闻靖惟南纪之上游无若西徐之重寄残金虽毙尚时肆於逼墙灵夏方张亦尝闻於乞状行险者妄欲投夫可为之会偷安者则又付之无事之乡连鷄固不能以俱栖困兽亦岂容於无备藩篱未固外莫御於风寒根本先颠里难禁於污下鹰脱鞬则扬去鴈闻弋则鸣悲既无诚死君上之心卒徂盗弄父兵之态虽陵夷之有渐亦抚御之失宜汉师忘夙饱之歌楚士起多寒之叹至问积仓之数殆如窰室之空登首山呼癸庚梁则无矣循秦岭当子午忧又甚焉况夫节根之螟为我頽尾之蠹食苗食心食叶分毫何利於公家剥足剥辨剥肤八九尽归於私室顾方衆难塞胷之後当有良医洗髓之方然而文俗拘挛人情熟烂加以事权之错出因之体统之弗明士臣皁皁臣輿本相隶属身使臂臂使指焉可支离纷纷輿瓢之人落落背剑之议职分不专则国威褻号令不一则人心疑节制败於多门陆相所以论沿边之状王师衆而无统令公至於丧诸道之军凡精神之弗强由脉络之受病惟开公诚可以综万事惟布威令可以收人心惟章明国法而後黜陟自由惟改纪军政而後伸缩如意率吁和於衆戚毋胥动於浮言则不惟保吾蜀以偏安虽以是取中原而亦可恭惟某官堪輿间气湖海伟人风范端凝如清庙邃严而莫窥宝藏文章浩博如黄河流转而突起层澜虽尝编摩宥密之间然喜开济功名之会月清湓浦颇嗤温峤之燃犀风静维扬坐却佛狸之饮马肆畴庸於玉帐还召对於金门陞之甘泉法从之班涣以尧阁云章之直径从碧落来上青天道国家之德意志虑而致之民涉山川之险阻艰难而撫其实磔鼠輩於市不言征西破贼之功去狼贪於民尽还蔡人有生之乐少清紫逻即近黄扉某粗繙戊夜之书叨窃辰年之第倡青衿於泮水诸公时取其斐然攜緑绮於万山旧识或为之莞尔尚幸以一雷之地得托诸半壁之天?鷄分殊安敢援金花之旧事象犀笔在尚能摩崖石之新碑忻拚惟新敷棗莫喻

谢崔侍郎后

涉海求安期生之药渺若津迷荐人得崔大雅之书翕然价重虽攻玉自它山之石而转钧繇大化之工一手挈提百思感激窃以举士清朝之彝宪达贤君子之盛心口不置秦坡老所以见称於安石愿无易介欧阳所以极论於沂公自雅道之湮微而时情之偏窄居王公之位者不借其势负天下之望者莫为之先宜乎随珠不免於暗投至宝亦甘於横弃岂期末俗见此伟贤兹盖伏遇某官德宇冲夷礼容瑟澗清文纬国织成鸾凤之章姤节照人雅有琴龟之兴况储才犹储艾而积土如积材集成司马氏之编已经识鉴补拾忠献王之奏伫看甄收某敢

不强鞭古心以附名德鼓瑟咏春风之煖纫兰撷秋佩之香玉汝於成既荷挽推之力从公於迈尚推补报之心衷所欲言舌难以既

见郑侍郎启

藁幙霜寒久被参旗之照柳营春动忽膺云檄之招卷收後务之文书趋听前茅之号令驱车甫到振旅式还粤稽国朝康定之间讫至南渡建炎之末屡常谋帅少见行边独韩忠献之经略西陲与张魏公之控扼北敌往来絶塞轻车或至於泾原援接诸营正马即驰於关陕一则周览山河厄塞之势一则规知将士虚实之屯盖备御既固则人心安而旌麾自临则兵气鋭奈何懦俗弗绍英猷保家寨者安能坐以制人乘皮輿者未免怯於应敌於诸老收声之後求一贤制难之才必有伟流当此大任恭惟某官天姿间出坤?独旋填压三边定力若银山之不动指挥诸将奇筹犹宝藏之弗穷更提玉帐之弓重踏榆关之雪激犒戍士阡断支途我师初无犯於秋毫彼界自潜移於数舍带裘轻缓少清紫逻之尘佩玉玎玲归闯碧沙之路某受才不武佐幕何能偶聯金花榜帖之书遂感碧落仙翁之遇袖无长笛更吹出塞之愁囊有拙诗尚赋从军之乐其如陶咏罔既敷棖

贺丞相拜太傅启

显奉王言晋升帝傅礼优絶席高於汉制之三公麻未扬庭散作商霖之一尺矧执操於谦柄力恳避於师垣德动縉绅光垂史册恭惟某官忠清而不挠博大而有容调燮万机独妙宰舟之手纫缉百度不言补袞之功虽光辅於两朝然永肩於一意既右烈考亦右文母备着元勲之崇时若保衡有若甘盘亲承家学之懿逮手扶於日毂以身障於河流国无危疑民以宁一徧閱典彝之旧莫阶恩数之隆且留师尚父之班仍宅右臯陶之任况平治适当於今日而聪明又过於前时非示尊崇曷图报称七十杖於朝七十杖於国参诸礼以母嫌八千岁为春八千岁为秋尚斯文之未艾某濫陪簪笏获听丝纶街转緑槐愈近东隅之暖堤摇翠柳须添西岸之陰诵咏惟新编摩无斁

答曹知丞启

攜琴柳畔初非彭泽之心覓句松间喜识蓝田之面方下马笼葱之日属持龙扳墮之秋未及报章遂成旷礼恭惟某官器姿缜栗襟度冲和咽 羣书尽撷古今之秀讲明寸地率循天理之真曾栖梅隐之门遡入荔枝之社署鹖行之纸何妨再转以为丞聆凤珠之音祗恐一鸣而向阙某更刀技拙倾盖心长饮此水兮石门安得隐之之节操解余佩兮洛浦已规子建之才情愿奉从容勿嫌高偃

知泉州谢丞相启

更化愿治尽搜西蜀之珍眎邦选侯忽畀南州之绂非钧所指谁玉於成伏念某狷不通方癖於嗜古飭身粗谨未尝竞趋名利之关履道甚夷何敢蹴踏险巖之地彼譖人者太甚媚有技

以恶之指心术而议欧公殆似尽鬼神而无证摘私书而诬石介几於织贝锦以胥谗慨前修之尚然宜後学之弗免赖圣主镜羣情而洞照而元台主善类以陰扶竹宫之命甫盼桐城之符再锡靖言若昔曾忝斯除旧物重还固荷公朝之简畀贪泉一饮定知清议之不容弗控忱辞恐孤洪造恭遇某官皇朝柱石吾道栋梁制行冰清不改儒生之操抡材器使真知宰相之方不惟嘉善而矜不能又欲举贤而赦小过收之末路借以恩光知人能官人量授靡差於尺度造命不言命曲成又在於毫端先抒谢忱更祈终惠

知温州谢丞相启

罢郡闲居久离扈从起家荷宠复忝藩宣退惟踪迹之遐遗尚玷陶钧之块圯叨荣实惧拊已包羞伏念某本出单平粗亲词艺遭逢亨会徧历清华以文字为官常误被玉音之褒獎以言语为职业滥为时辈之推馭然而名出於衆则衆所憎宠过於人则人所忌谓杨亿刚介而寡合则诚有之以元之韬晦为未能亦几过矣粤自请麾而去冀销投杼之疑宣化承流虽无绩效牧人御衆粗守廉隅然犹罹射影之伤惟退愿斂形而避浮家泛宅梦虽不到於玉堂得祿代耕身幸偷闲於蓬筚林氏宗族少为朝士昔尝接武於从涂苏公昆弟相近东方今又聯裾於辅郡光生寒閥恩出大钧兹盖恭遇某官一代宗工三朝壽隽以黜陟羣才为任以陶熔庶类为心谓正元朝士无多每荷挽推之力言河南太守第一又叨表选之公重念某所领州事浸殊昔重之以方千里之早加之以食半菽之民纷罢遣之相仍凛支持之不易谁与领此厥惟难哉某敢不廉以飭身勤於恤下正岁遵治象法已寛田赋之一分春日奉寛大书自出俸租之十月撤赏柑之旧宴辍梦草之新诗专务賑荒以图报国

知宁国府谢丞相启

宪曹亡补自貽白笔之诛朝度从寛复玷朱轡之宠罪深恩重心悸神羞伏念某猥以诸生闇於大道信史册之陈言而欲以经世持词章之末技而务为胜人矧来自於遐方遂径跻於华路足践云气三为秘府书林之官手织天章两兼北门西掖之制入承明则簪笔扈从对便殿则曳履论思地愈禁而官愈清名益隆而谤益起人固憎其盈满鬼亦瞰其高明所以招尤更将谁咎荷清朝之弘贷屈公法以曲成畀以名藩华之邃阁某自凤山之趾直沿鹄岸而行水驿三程陆车四日始到郡境便宣教条凡兹荷鋤之农莫不扶杖而聽自言虽在田野亦有识知恭闻皇上英武而仁大臣公忠而义每发号出令未尝不布寛大之恩每视邦选侯未尝不择循良之吏至遣禁林之牧来绥古宛之民谓朝庭必有以厚其生谓太守必有以副其责而某器资朴钝政术迂踈知不周於一身才已困於多务细考板籍荡无纪纲山乡瘠硤郡计凋敝眼前朱衣三辈虽有待侍从之名案上紫笔一双已非草诏书之式度越三十年之旧典拓开二千石之良规第恐孱庸所难称塞兹盖伏遇某官陶钧善类长育英才以某十载登朝粗有小廉隅之行以某三年入直屡当大典册之筵宁薄元之之罪而与黄冈轻大年之责而畀临汝眎诸宠数铭在肺肝某誓当庄以临民勤以莅政自尽诸侯所述之职庶分天子共理之忧至於事鞭朴以立威飭厨传以干誉固官常之弗赦亦儒者之弗为

谢杨礼侍举科目启

春闈典试曩尘秀造之科禁闕搜賢茲玷文章之目贊榮甚矣拊已闕然竊觀當路之荐才无若近臣之居要买臣召見因助直承明之庐杜牧超升繇鄜司礼部之选盖以地亲而职禁易于德进以言扬肆予盛朝越有彝典保任責之侍从籍记關於中書在熙寧則選舉五人在元佑則科為十等皆列聖器材之美意而先民達善之公心若匪譽髦曷光清舉某者顛愚氣稟荅颯仕材猥承緒業於先人來并英游於鄉校斷斷无他技自知伏鵠之難兀兀以窮年應笑雕龍之拙姑从共藏修之業敢云窺着述之藩以雄書之意指閔眇而尚貽難客之嘲以思賦之體制麗研而不免伶父之笑矧如固陋詎稱華褒伏遇某官英英朱鳳之姿皦皦素絲之節華軒珥筆能手織於天章金匱紬書仍世專於柱史凡出言之輕重關在位之升湛列游夏之科類若浮而少實附鰓枚之末得与荐以惟榮某敢不踐修厥猷篤迈乃訓尚綱味詩人之旨佩韦求君子之中將以遺兮瑤華既荷殷勤於遠道我欲報之玉案尚期归洁於師門涵咏良深敷棗莫諭

謝鄒都大启

煮牆陰之瓠叶方咀道腴采泮上之芹芽忽膺荐目豈謂漢諸儒之末玷於周八士之中褒辭所嘉吾道增重窃謂姿稟氣質之性教道風俗之機歐公荐陳烈為學官咸誦清介蘇公舉長文為教授見謂修姱若无至教之專勤未有先賢之論荐晨入學者尚遭毀訕暮歌客者犹肆謾嘲矧惟苦窳之資敢當華褒之賜茲盖伏遇某官身章肅括德宇靖深詩書漢循吏之風禮樂晉中軍之政武能定難曾襟自有於金城文足扶衰風化独行於石室祀典舉十年之廢讲堂侈多士之榮人方游道鄉學問之中身已在黍谷春風之內某敢不恪遵行檢祗服言箴勵修洁博習之科循文行忠信之教曰童子命也敢忘今日之恩以國士報之尚冀他年之教其為忻咏未究敷棗

謝鄉宦士人生日启

上壽百歲中壽八十歲自怜蒲柳之易衰兄事五人友事十一人聯拜珠玑之委貺徒然彈鵲弗及卷鯨愿長守於祝規庶增修於問學養老事長而行鄉飲尚心慕云岩之風計功調役而筑塘堤乞力贊上元之政

見楊尚書启

曳只履於星辰之上方闖華途落孤帆於云照之邊已馳归夢錢宣靖向急流而勇退蘇黃門因夜雨以懷思暫停海觀之驂亟訪官池之鴈樂繇天分蒸作人和恭惟某官性德柔嘉丰儀靖穆紬書石室自成良史之一家侍讀金華渾得講師之三昧國論賴調膈之力時几資剴切之言不惟平持元佑之偏抑欲大作熙寧之壯鳳影影兮遠矐击駒皎皎兮莫繫維三上封章屢陳悃悞侈九重之宣賜紛百兩之祖行進退从容已益聖謨之簡注抚摩還定必虛揆席以延登某學制虽新擇栖已旧十科荐士曾坐司馬之編交口誦賢倍費老成之力已分作沟中之斷木豈圖識天际之归舟湖似掌平未盡融怡之樂蜀方弦急却須康濟之謀

宫祠谢丞相启

屏居近甸密依槐省之陰除吏公朝新拜行宫之命荷特加於拂拭想倍费於陶熔伏念某学不通今才非博古孤行一意莫能适道之中强附诸贤宁免近名之累彼譖人者一以为韩子言傲相国而罪我者一以为萧生意轻大臣致令坎 之踪长锜圣明之世今去国已九载而投闲又六年闭户息交犹致求全之毁黜居思咎尚貽无妄之灾乌尝虞后羿之弓龟莫避豫且之网属熙朝之更化辟正路以延贤包荒不遗有过无大若匪借紫阁黄枢之重安得为珍台闕館之游兹盖伏遇某官博大而高明端夷而雅靖谋王体断国论盖尝先天下以为忧布公道开诚心每欲得英材以为乐尤笃杏园之好不遗栢社之材王文正之护词臣每虑言者中伤之害赵韩王之进除目不辞榻前补缀之难敢以二贤期於一相若未殒於沟壑仍冀收之桑榆

又谢丞相启

北斗之口专城愧无善状南箕之舌腾谤几蹈危机荷朝度之从寬丐祠官而得请伏念某学常泥古智不通方诵占毕之謏闻欲扶於世否持雕虫之末技思救於民饥志虽广而才实疎心益勤而力不逮暨领海邦之牧又逢岁事之荒蠲夏税六万七千余缗每虑邦财之不继放秋苗二万八千余硕旋忧兵食之弗充所以哀賑贫賙厄为一书创裕民饷军为两库只欲相期於安靖未尝过用其聪明岂知横旷野之苍鷹久已窥上林之飞鴈既张射忌又下石焉蔡君謨不言政事而喜论文章岂可谓偏长於文墨欧阳子少说文章而多谈吏事又何尝不足於吏才盖至难欺者匹夫匹妇之辞而不可掩者时雨时阳之实证庶民而有考对上帝以无惭与其好辩以增尤莫若奉身而早退纵停云之蔼蔼自揭日之昭昭敝车羸马挈家人以行见者谅其廉谨斗酒只鸡酌季弟而别闻之靡不叹伤理终无不定之天恩自有所归之地兹盖伏遇某官才膺帝赉谱出家传手记皆旧典章岂待善神之护法心平无私好恶何须恠鬼之作诗当其未眎印以押班盖已先荐贤而助国至今孤远亦被曲成某敢不戴金鉉之宠光奉玉隆之真秩雪摧霜败已半枯春晚之兰日澹烟轻更添种沙堤之柳既输谢悃又进祝辞

卷二十六

钦定四库全书

鹤林集卷二十六 宋 吴泳 撰 启

通曾漕启

望卿月於天边曾侍朝骖之影占使星於江右忽依荡节之光虽一麾受察之方新然十载论交之已旧怀章问戍擘楮恭先恭惟某官博大而靖深疏通而峻整照人丰度炯炯如玉山之清综物才华森森如武库之富自影纓於外服遄振佩於中朝鸡舌含香既傍蓬莱之云气犀渠夺目又牵农扈之星輝谓宜献纳於甘泉胡复驰驱於周道详刑江左冤尽洗於岩崖絕岛之间将漕江干人自得於湖山千里之外属狼贪之当道愤羣尾之厉民独拜疏以力争曾赐环而弗顾六年不调一节弥光适公朝更敝化之弦遂再命复皇华之旧西山草木遥知问俗之旌南浦龟鱼潜认过桥之履恐未解青丝之缆即径归碧落之班某巴蜀陈人江湖寓士陶潜赋归栗里已悟昨非公干卧疾谿滨久頽荣望特荷九重之眷洵盼二郡之符所幸洪都获依大漕画栋珠帘宏丽莫继典型绣衣玉斧光华喜亲条教

又通黄漕启

提六轡於云间莫窥华辙挥五弦於云外实隶英躔虽素心怀覩凤之先然尺纸落鞭牛之後擘开水璽揽溷月潭恭惟某官沈正而秉彝清通而知务深醇学问得考亭心事之真洒落才情仍山谷家风之旧久践扬於外服寻推寘於周行监事参厘蟠数万兵於胷次垦曹区画条十二便於帝前合躋紫橐之班乃问青天之路?言益部实甲坤维天府之富而人物阜蕃陆泽之饶而田腴绮错一坏於开禧之駭将再雕於嘉定之骄兵虽惊尘不到於岷峩然病脉已周於井络矧边烽之未息凜邦本之先颠轻輶之来大国所庇廉勤问俗更无形?紺幘之仪恳恻劬农浑记翠竹碧沙之路揽轡不妨於继范赐书恐趣於徵黄某繆以一雷记之数仞制锦虽无别段酌泉犹有宗风服县令之箴敢替弦歌之旧赋皇华之什愿瞻礼乐之新心所欲言舌难以既

又见范漕启

彻仪鸾之帐曾薰书传之香望冠雀之堂喜近节旄之采既曰滥竽于乡校敢辞执?於铨台辄献謏闻试垂静听学之为事不专在於缀文师之所存要相与以明道舞雩一段皆发挥天理之机窃屨片辞有鍛链中材之实一自青衿之废谁知黄耆之尊瓠叶为俎豆则礼多阙然骊驹作歌吹则耻亦大矣甚至挟书而遁倚劒不譚虽曰经生亡服义之公心亦繇师氏欠达材之硕望暨我宋启奎文之运肆河南标月指之明坐光庭於春风浑是一團之和粹立龟山於夜雪曾无只语之疑难非诚身明善之方则精义入神之用盖知味者以辞章为抑末而计功者眎学问为太苛不有此文几坠於地恭惟某官德容瑟僴气稟醇明握天孙制锦於一机传

鼻祖说经之三昧春秋以竣後圣炳大义之日星礼乐以遣使臣肃皇华之风采蜀学起诸儒之痼韩文扶八代之衰不惟士风如洙泗之间再使民俗在唐虞之上某猥蒙末第分领下庠新如焦谷之方芽旧学乌头之无力文翁庭高联室犹蒙尾於生员司业酒广文藁实惭居於子座不倚使乎之重寄孰逃率尔之狂名跻彼公堂未暇传亲於郡友载是常服合先揖拜於上官涵泳之私敷棗莫谕

又通范漕启

汉庭出节遥瞻礼乐之华鲁泮滥巾例被诗书之馥虽曰鶡音之既好岂应繇兆之不谋预谨书邮仰驰记室恭惟某官冰壶映俗玉璫在中气色和平蔚有淳父讲筵之望工夫坚厉尚含忠宣灯帐之烟自南国之翰飞肆华涂之步濶钓深涪右梦吞天易之三爻作牧汉嘉勅赐月湖之一曲曾谓朞年之暇旋膺走节之除官职序而国肥儒术行而民富持使者绣斧已高摇岳之风织天孙锦裳伫洒宿春之翰某赋姿不惠闻道最迟燥乾枯涸之病多润泽孚尹之功少使柳子为越之雪宁免笑?号孺文如冀之天尚几覆露其为心向未易言殫

又谢范漕举启

指隣家而乞火曾荷言扬就神鼎以铸金端蒙范造已谓塞翁之失马岂期合浦之还珠一手转回百思感激学问士之谷菽践履身之衣章举正叔於经筵司马独称於渊博荐尧臣为直讲欧阳乃谓其淳方自往行之不闻惟末师之是信手探理窟者亡矣脚踏实地者谁欤如某繆迷岂人比数学犹恐失殆如潢潦之源道不加修宁免白圭之玷踵常途之役役犯衆口之器器虽未能涉珊瑚之海而资以汲深然亦欲贯薛荔之裳而希其寡过不谓独被烛光之照遽加袞字之褒兹盖恭遇某官绣玉精神布韦气味澄清天下挺然孟博之祖风謡咏军中伟矣希文之将略外靖羽书之警内修俎豆之容博学之审问之笃行之公诚无外修身也尊贤也劝士也已与有荣某敢不对秋月之章咏春雩之舞减恫喝?疑之病加着行习察之功蕉鹿梦长恍觉前宵之幸得越鸡羽短庶图他日之般成凡所欲书未容以笔

成都教到任谢范漕启

谈经雾市惭非说驾之才受命星台许畀传文之印虽玩客藁而卒岁然偕户履以生春祗服宠荣靡知称塞窃念某鄙钝之质拙疎於时幼从乡校之游长窃太常之第南陔之养则阙矣常棣之华犹韡而着矮屋书已非卓犖纤徐之士述蓝田记安得泓涵演迤之文偶沿制阃之辟书冒领通都之簪序此非子坐反教人为矧舍法之更弦肆儒绅之矩步负数而进者动数千辈论秀以升者几五百员神龟宿火陰鼠栖冰虽各殊於稟气奔蜂化蠋鲁鸡伏鹄实专在於得师匪赖耆儒曷张公道兹盖伏遇某官德鉅而化博心醇而气和文章非三代不观政事自六经而出湖滨荒政还安庚癸之呼淮上民兵控制戊巳之位践扬滋久声闻益宏旣将漕以建台纯以儒而饰治秉部铨之公法紧要持衡严科举之程文先观下种某敬修其可愿增益所不能一卷书必立之师固非敢望三年学不至於穀则反求之尚图洁身以报知己

答李解元启

昔年共学君子之道孰先传今日袖文先生之号则不可正有怀江东之李白敢自谓河南之吴公某人气自豪华才非龌龊繁露玉杯之学自成一家风樯阵马之文不数余子洵登鸛表行快鹏图为费宰何必读书敢冒孔门之戒有澹台行不由径毋嫌偃室之来

答康县尉启

双笋陌边久动高贤之想五花泉上忽逢隐吏之来旗色顿新簿尘如濯恭惟某官春风满颊皎月荡曾诗可解颐固自夙传於家学赋能入室屡闻夜诵於乡人遂辞蜀泮之英游高策太常之名第徜徉容与暂留鸛之滩卓犖纤徐恐脱凤鸾之棘某弄弦心倦倾盖眼明止则止行则行殆似舟之不系左之左右之右愿如同气之相扶

答衡县尉启

江边濯锦尝怀隐吏之风花下酌泉忽在故人之里才拂铜章而眎事即鸣珂佩而及门贲饰虽华辉秋风之

晚节【阙】曾司三尺谅多陰德之培植佐一同要熟道经之读未容淹汨行即褒陞某别德逾年分辉有幸怀日莫碧云之想方切倾依枉夜光明月之投殊慚报称

通交代高教授启

听骊驹之歌客归兴已浓觚冠雀之集廷来音何暮况旧有同舍郎之契分而今为郡博士之交承於素书之往来想高谊之濶略恭惟某官天才肤敏经学粹明蚤腾乡校之声笑取太常之第高文演迤识者信其无剗刻斩絶之言濶步翱翔望而知其有醇厚和易之气遂振兴於文铎来领袖於子衿苍苔室古栢庭暫迂逸驾红药堦紫薇省立俟清吟某猥以下陈乃居前馭田园三径自笑胡为而不归厦屋万间庶几无议於其後

通林教授启

坐谈鲁教伟夫子之中分游綴蜀英愧相如之末至力自知於喘月驾莫并於追风惟新是图挟故而问恭惟某官奎精稟粹玉德含辉屈曲聲牙探渊微於理窟纤徐卓犖挹华藻於贤关自绦帐之南来而青衿之北面肆更舍法咸济儒冠春服既成傥或紆於杖履秋阳以暴想均在於甄陶某近听鶉音喜亲鹤表思小子之有造伊谁之从与先生而并行则吾岂敢

通交代廖教授启

跋红校艺数陪燕几之谈施绦授徒误踵芳尘之蹟况丰仪之近接而音问之不疎龟既在前

貂疑可续恭惟某官节森叩竹文擢蜀英云气飘飘蚤岁已腾於纸价棣萼韡韡修涂共濯於
纓尘肆停鼓於花村荐横经於芹水轻车熟路聊泮涣以优游通籍修闺信纤徐而卓犖不待
鸣弦之化定膺簪笔之除某立则参前忽焉在後笑夫藿蠋虽云薄技之难堪怀彼桑鵲犹赖
成?之可守

谢运使启

弹铗戟眉终岁弄月边之影濯纓锦水一朝闻弦外之音虽云事会之相遭实赖化机之密转
得非所望愧溢於荣窃惟宰邑之难莫重边城之寄经营保障尹铎所以擅晋阳之名摘伏惩
奸虞诩所以美朝歌之政矧玉峯之为县当石纽之要冲上接鸡栖控扼氏羌之道下连鹿栅
蔽遮绵雒之区不惟知紫塞之风烟亦可通绮川之血脉林无声则翼静水太激则鳞烦固宜
选良吏以图安岂可听庸人之自扰如某仕材荅飒政术谬迷守纸上之尘曾弗堪於用世搜
囊中之秘亦无足以动人方将寻山水县以读书不谓即桃李场而得阙力绵地重月短星高
兹盖伏遇某官惠直而柔嘉公明而通溥典司类省如监形於水而妍丑毕呈掌握外铄犹称
物以权而重轻适当岂谓迂疎之器误当进拟之书某敢不谨饰令箴益褫身检论官而任事
已蒙交荐於公车学道则爱人惟务服行於圣训

贺乔参政启

序陟宗工晋陪宰席乾德之并命吕薛实为政路之光庆历之同除富韩仍作枢庭之贰典彝
虽旧观听如新恭惟某官六经而後之辞章三代以前之人物方重不倚雅有大臣之风疏通
而明默识当世之务圣性赖薰陶之益天工资弼亮之多未启金瓯且参玉铉心平无好恶要
操元佑之舟政弊必更张须改熙宁之辙更力扶於公论庶叶济於中兴某手拂芸香袖衔贺
牋草贤臣之颂愧无蜀客之歌圣德之诗愿继徂徕之武

贺汪茶使启

辍自转输易司?牧汉廷出节方腾天马之歌禹阁升华益峻宝书之直儒绅为之鼓气氓隶多
所属心恭惟某官峻架霄峥?襟春盎温厚和易之气望之可知寬闲博大之风挠之不浊矧家
声之舄奕实海县之倾依霸府谋猷铭鼎已高於夹日龙溪词笔演纶无愧於代天威名犹着
於诸宫风节尚推於谏院有祖之烈惟公其人夙影纓铜匭之门合持橐玉晨之座历井弗辞
於崎嶇观风肯效於驰驱金科三千属之肃清春扉草緑骊驾十五城之廉按秋廩粟红上尤
念川秦茗乘之资今实系国家规恢之计宁稍迟於银信爰重畀於玺除马从西极徠万队定
聯於锦绣雨足茶户喜一雷已鬯於根荄莫酬星使之高始作夏卿之式恐未氎氎之煖即荣
衮绣之归某妄挟鉛黄偶紫铜墨喜认鵠原之旧垒敢忘燕厦之寸诚乐莫乐兮相知久已荷
监衡之察迟之迟而又久仅能通竿牋之勤诵咏良深敷棗曷既

通李总启

紫气绕关均被转坤之福淄尘染俗邈无望履之期虽悬旌摇北斗之边然墮舄直西山之底
洁清水楮搅溷月潭恭惟某官沈正而秉彝清通而知务袭鼎鍾而韦布名重於山屹保障於
茧丝脊坚如铁既扫烟霞之瀕洞盍归风月之邃清指湖海以来游尚赋从军之咏下荆門而
长嘯又歌出守之诗人咸僖於东归帝乃眷於西顾鬱藍之天东梓之部光方动於使星盤木
以北函谷以西掌就升於卿月於炊米剑头之际得浣肠局外之方不加赋於民而歛散自如
不给徵於上而化裁有道万牛齑肉梁无庚癸之呼两虎籍边屯有戊巳之壮我公所独近世
其难利西南往有功倪汔外庸之明试置左右辅台德仁观中诏之催还某门绪单平仕材荅
飒制锦曾无别段酌泉粗有宗风服县令之箴虽剗裁之技短草贤臣之颂尚依倚之心长

贺史石泉启

荣剖藩符肇新侯度元日至人日已开雨雪之祥新年胜故年顿改花泉之色出丹鉛於掌握
蒙锦绣於山川恭惟某官粹度春融凝姿山重蜀第一人之选无愧祖风汉二千石之尊屡寬
天顾老手素便於剧部贤名藹播於时绅尚迟馭娑之游仍结寢香之梦眷言鴈塞莫重蚕陵
占古圣射蓬之乡自鍾灵异缘道家罗浮之境孰拟真清况羽书不到於雌台而樽俎尝闻於
鹤屿媚绣輿於暖日濯彩笔於春风洗却蛮烟岂久鷄心山之驻平趋帝里定膺鸛尾阁之除
某袜线亡长锦机謬制虽已拜光尘於紫岩之下而未亲檠戟於石纽之陰王阳为孝子王尊
为忠臣已眎险夷而一轍子贡治信阳子贱治单父今方托庇覆之万间

贺杨礼侍启

温纶申命亚旅真除伯夷咨作朕宗既奉玉除之清问司马世典周史仍繙金匱之宝书斯道
有光真儒得路恭惟某官柔嘉维则洵美且仁吐白凤赋甘泉擷辞章之藻丽衔鱣鱼象卿服
涨诗礼之涟漪自擢置於周行遂徧仪於汉阙乃繇璧海晋陟道山棘寺载聯庭有鹄巢之美
稼卿分任农歌扈正之祥极东标柱下之一星殿侧冠螭头之二史朝班益峻帝眷逾隆弼予
一人方赖弥缝而辅赞典朕三礼实资献纳以论思允惟法从之班实培相贤之地遙观棣用
式副岩瞻某猥以校官莫陪贺列凤九苞而东翥敢稽尺楮之驰乌三匝以南飞漫達寸忱之
悃

贺漕试太学国子宗学启

白袍立鹄羣空俊造之场黄矢得狐并入英雄之彀纷华裾之织翠委尺锦以见投省元先辈
清贯江心秀冲斗口取之数路幸观盛事於东甌放出一头莫让高科於西麓

通洪倅启

桂櫂斷冰尚滯吴江之色缙屏驾月来分蜀道之春虽未覩犀亦尝梦鹤恭惟某官学探理窟
文贯道机典教番阳望而知其有醇厚和易之气从军淮上听者信其为磊落奇伟之人合上
禁坡乃司甸籍云紓垂於峻岭翼恬静於中林是宜陪碧落之仙相与问青天之道辟愈为行

军司马已知敷奏之公命洪以河阳参谋还纪歌诗之盛某猗亡它技雅敬高贤寸心常勇於
自鞭末力每虞其弗逮十年文字空如地籁之号一瓣緘封欲待天刀之折其为陶咏未究敷
蔡

答黄秘校启

岩前滴水曾窥黄叔度之汪洋花下酌泉乃访吴隐之之寂寞谦光所逮贲饰何多此盖某官
笔底生花胸中烂锦漱十四泉之芳润转九万里之扶摇背此古锦囊但见一班之突出报之
青玉案愧无片语之相酬

卷二十七

<集部,别集类,南宋建炎至德佑,鹤林集>

钦定四库全书

鹤林集卷二十七 宋 吴泳 撰书

答游景仁书【倡】

某顷者得罪去国径入凤山少避人事岂图崇笃旧游荐赐手书相劳抚情原何可忘也山间地幽境僻游者病其遽也故车輓履齿皆所不及因得与一二道士施汗漫游经高丘陟深林穷回溪幽泉怪石意有所极境随心会其鬱然而陰粲然而荣者与鹤宜黯然而深渊然而静者与琴宜河柳不种自生水花不植自富道庵相望树禽杂语与诗宜但年来不甚作诗自被罪而去何繇更有高思所喜是闻老氏藏室收书最备时得滴露点甘棠义焚香读谷神赋如龙虎要诀鉛汞密旨亦复克扣问其钥如此而去体观静颇发深省若得富彦国诸公以园契宅契户契相遗则便可随地卜居作苕霅间农夫第恨此去京城犹近尔数日来旧吏忽报有寧国之除圣恩宏大不至摈弃如此薄闻邹枢亦以端殿出知四明则景仁径上必矣败类者之例何庸援耶所愿贰赞枢极燮和陰阳使某辈得为太平幸民或述为中和乐职以歌咏鸿化不啻止足早晚便过湖州去相望云阙益遥临楷颺缕

答杜成己书

某一年不通记室之问近覩黄纸除书承知显奉明纶同金宥府蔽自圣断协於人心庆愜庆愜某每读国史见张忠定公尝语人云吾榜中得人最多谨重有雅望无如李文靖深沈有德量无如王文正面折廷争有风采无如寇莱公时太平兴国五年一榜如向如苏如宋皆宰相皆参政枢密而忠定不数焉以人重故也戊辰金花之帖自年魁而下凡六政府淳佑一岁之间自知院而次凡三枢密同登之盛抑不让太平兴国矣然而位之高者人之期待也必重名之盛者士之责备也必深况素号君子为朝家之光者皆以为枢密一人则开济规模经纶事业又不同春官考礼掖垣纠阂时矣今屯坎之爻不变否泰之机相反扶善人之纪主公道之盟引类達才辅时宏化於枢密有望焉某一摈二年杜门守拙寓居之地虽近京而实僻人客少所往来向来读典谟训诰誓命之书见传注解丛杂无所统一亦欲参考订正一番工夫浩阔勉焉孳孳毙而後已更不复仕矣惟是枢密得路不容不为吾党致一笺之贺更不繁述彝仪之问伏乞钧照

又

某比者伏领槩海小侄自浙东来又袖出前所赐钧翰啓緘熟读不惟眷爱有加而尊谦下问恳恳不已亦足以见大丞相开诚布公之心集思广益之道已度越流俗数等矣却闻舟次萧

山小憇调护天佑耆德当即康和海内所望丞相之亟造朝者尤急於望霖雨也钩翰谓近年以来虽有改弦之迹而不闻调弦之音诚为至论大丞相平日清夷直大事到手幸勿以忧畏为怀元佑初或有以他日报复之事撼温公者公以为天若祚宋必无此事丞相傥有大建明终利於国家者便当於进见之初历历敷奏不必疑其所行也某久屏林壑寡所闻知但於灾病之中时发深省请以疾喻人有抱痞隔之病前之医者暴下急攻率多攻心伐性腐肠之药今既更医只须用参苓君子甘草国老之剂以调养之陆子静在勅局官时或问如见用则以何药医答曰某只有四物汤任贤使能赏功罚罪而已其言颇有味大丞相以为何如

答李强父书【宗勉】

某伏自丁酉去国奉违光范已跨四年昨者荐拜柔緘申叙衷曲计必关彻钧览丞相秉钩以来尽道事君清不言贫勤不言劳忠不言已效公不言已能真可以表仪百辟矣但有沂公守正奉法之心而事权不如庆历之一有温公至诚用人之意而贤才不如元佑之聚智独运而难周善孤行而无助有志於当世者不能不为丞相忧也近者以唐伯玉卿奉常以王幼学秘书监殊愜公论前所召者子华元善直翁胡为犹未赴阙耶蔡遵父最重於丞相者甫及修门而遄得郡郭子奇风力可以担当事而天又不假之年云气簇则成雨今片东片西牢落如此安足以熙百度而厘庶工哉况时机易失圣恩难恃丞相只宜密加之意也某踈戆之人动与时忤置身多士之邦既不能饰过使客以擡声价又不肯奉贵要以虐悍嫠飞文流言譁於都市凡契旧朋友皆能具道所以然之故其得免於戾幸矣昔杨文公大年累被譖流落於外赖王文正公始终保全之某之文之才何敢望大年而丞相之心度实无愧於文正傥蒙笃念登门之旧许以退闲俾得早脱郡事而去不胜至幸言莫能尽伏乞钧察

答蒋良贵书【重珍】

某顷从吴先知处附拜赤笺之问谅已洞彻书月後来窃闻兰桡桂棹才过湖州抱晴月兮击明鲜望锡山兮歌欸乃人遂不得耳其拏音兹风亦高矣汨汨朝市中日扑红尘数十斗其与酌泉煮鱼玩易髓穷天根立於吉凶悔吝之外岂不大相辽絶哉近者鬻仪倏钜倏变载籍所无某与景仁和仲二三朋友首上封事後稍稍有应诏者不过十来篇却盛传校书奏疏伟甚诸君皆羣队使药而合下独用一单方果有之乎欲借副本少观千万惠教某斐作漫寄乞订其是非幸甚良晤未有期愿言宏毅坚一护雪中之松栢以副朋友之望

又

某浸踈记史之问又见秋风矣纪纲来自锡山粲堕宝帖访以辞受之谊拜名以尊君辞实以存己真至论也先儒盖有居其位而不乞历子不求恩封者是亦此意某谋乃心问诸朋友俱以为处得其宜独和仲独谓辞受只有二字当辞则辞当受则受界分不令分明和仲之说所谓既切而又磋之既琢而又磨之亦玉成之道也圣学路长良朋难得荃蕙化而为茅兰芷变而不芳者大可惧也近以再当陛对不敢不力但顾瞻天下事势惟两头为重只得首及父母之邦今録一本仰干是正有未莹处乞赐指教可也景仁闻陪杖屨游山甚适恨不倒冠落佩

相与共酌此山之泉尔良晤未有期愿言以前修盛德大业厚自涵养

又

某顷乡进士归^廿附一笺弗及详问啓处兹蒙专使惠示宝帖且知洞庭为况之安差以自慰戕冠盈庭邪正杂糅人之立言不患不可知而间界之为患最大所以孟子爱说间字周子爱说几字晋宋间爱说户限字唐人爱说模棱字此尤不可不察也校书初对与後来封事如一盆池水清洁纯白更无些子渣滓不但言之诚而又行之勇故中都之士愈久而愈加敬也近又闻上为君难七箴密啓而不欲人见然诚亦岂能自揜哉抉秘藏以指教可也景仁既出和仲久在告不出次第亦勇於行微之之谕敬悉当達盛意宝章添倅之命又复封起渠剡地担阁也欲言浩如海曷日酌惠山之泉共谈亶亶

又

某初春交讯之後坐此袞暑不能嗣遣一纸访问死生伐木之思与在原之情等其怀慕何敢忘也旧书吏传赐珪帖继又领一梅万竹两记梅之辞腴竹之辞劲腴之极则不狃於偷而敬生劲之极则不淫於乐而和生此则主人大意而客於此蠡测焉不识是否某尝仕於东南而所得之士曰徐毅斋蒋梅堂而已毅斋躬耕垄亩蔬食菜羹真所谓簞瓢犹是者梅堂不臭富贵之饵则近之或者犹谓用度稍广更须谨自裁节使之可继则善矣顷送景仁词録一本去并同送和仲三诗微之一诗偕往幸赐指教石屏恰方得乡人寄来者二堵供几案之玩词余更乞讲道自力

答陈和仲书【坝】

某再拜言私门挺灾荆妇以久疾竟至丧逝仁者笃念友朋之伦唁问以书且欲励之古礼安敢不遵来教大率自亡妇初终饭於牖下歛於户内大歛於阼凡大小歛朝夕奠成服之制一如文公朱先生家礼中间有家礼所不载者一二条本欲扣问而太夫人在堂避嫌不敢请上舍令弟访临已言其略矣衰与其不当物也寧无衰圣人於名物度数之间广狭轻重之等谓稍有不当则直以为乱礼而不如已则子之为亲丧吾侪之为妻服是不可不细讲明也前日荆妇初终之日方纵纵尔未克即答人慰疏礼在成服之後故具此忱悃白於执事或更有以相其不及者切冀终言

又

某犹记嚼别酒於青湖翠柳间今芦花又霜矣诸贤去国士气销爽孤标峭直挺然如寒涧松谁得侣良贵危言鲠论毅然如指佞^廿谁得侣和仲志正气一亭亭然如直竿木谁得侣景仁每恨气稟差弱学力不充未能即去以追高贤之躅然离骚所谓荃蕙化而为茅兰芷变而不芳者则深耻之也某登朝六载轮对者三上封事者一每当陛对必自盟其心不敢有一词谀悦其上近十九日上殿为首遏机会之说次陈州县祸变之源两金黄又是一事乔文谓上足

以开释君心下足以整齐国事子静谓此诤论第一筹也则斯言亦过矣不审和仲又以为如何召客高绵州性行良实乡闲耐久之交必经行治下幸暖热之欲言如海书非尽言之器所冀以天下之宝为天下爱惜

答高詹叔书

某自姻翁除内翰时尝驰一纸之贺近从山间读淳佑朝报承知涣号明廷升班端殿翰林之班高华盖免辞健笔於禁涂枢极之贵近太微寻典神兵於宥府有光吾道式壮斯猷某尝考国朝自南渡以来跨百余年蜀彦之登朝者仅三宰相十政府而端平及淳佑不七年间鹤山与枢密兄弟聯居其二峨眉太白之西井络舆鬼之南想庞老遗黎读此诏书当预有生意矣虽然位之高者规模必宏名之盛者责望斯备整军经武以折遐冲洪化亮功以赞元宰達才引类护良摘奸以寿国脉实於枢密有望也某一摛二年杜门守拙虽不能着钱神论以救贫但时复赋疟鬼诗以驱病暝如槁梧僵如仆柳更不复有向荣之望矣惟冀诸贤协力辅时共登太平俾得养遗息於田野间即为幸也草此抒贺余祈护 稊穉调芍药鼎竚宣廷麻以福海县

答家本仲书

某嚼别酒於金泉跨五霜矣丙夜更烛讲学谈经莹然金玉之相藹如仁义之言时见梦寐中更多故虽不能以书访问死生而声臭之同岷峨以西江浙以南其气脉未尝间断天清龙尾之道夜下鹄头之书有来蜀珍以寿国脉本仲又抡魁之望上岸之英积年名声博此一召直也但俗流世坏人物衰少勉斋既下世宏斋继没穀斋孤立於嫠女之滨罕与世接留宗庠者惟叶六十四丈时复往来咨问相与求为精义至当之归若更得本仲肯来则吾党增重矣其如直言之士朋友间却自有三数人一二年间亦复引去陈和仲未得出黄成父方上二公精神谔谔议论挺挺俱有可观见说成父自与本仲素厚自黄先生之门来者其风猷意象自不同也契丈既与詹叔光远同召察之命令刘己如京师则二贤岁晚亦须出峡速理行舫慰此延望可也恭伯抚机久不相闻问三荐而三泥岂非数耶季永弟闻屡得欸承倅於文物之邦不能不借润耳矮牕雨暗布此崖略愿言为天下之宝珍哉

又

某自被罪去国得郡万山间中都厚禄故人音问断絶虽耐久朋如本仲亦复作疎然非间也经幄之儒史观之彦道不得行以望议幙每为斯世惜之隐不以吏云度必从容无事居敬以穷理修身以俟命工夫当益精进视天下之物不足以动其心矣某以书生试郡亡补事功不过以平日得之圣贤者而推之於民修明教化扶立纲纪爱护本根使士循理吏畏法盗贼不入吾境流民不饥饿於土地凡所施行具有条目上下亦粗相孚信独是郡计雕敝甚上弦急迫徵调烦兴寧书下下考不奉急急符也边声屡警蜀事尤可忧近得亲友书见说兄弟亲戚间颠连而死於兵难者颇衆痛贯心鬲积成痞胀仕宦之意顿阑矣三上丐祠之请期於得去而後已季永弟秋时卧病池上久搬挈来此近方小安闻自拜书矣余祈冲辅气机益宏道力

慰友朋之望

又

某曠不嗣音三見黃花矣某之懷本仲想亦猶本仲之懷某也制參高明勁節如火後琮璜雪中桧栢愈久而愈耐看況詣學精深出詞霧霈書囊疊疊終日不能休退之所謂吾行天下得此於人蓋少矣內而望史筵外而都漢節皆分所當得者但世途逼仄賢路荊榛或者猶以薄恙為辭豈知司馬溫公不以甚疾而不登顯位楊龜山不以老病而不處經筵尹和靖不以筋力衰憊而不受命造朝朱文公不以足疾未瘳而不上殿登對況本仲歲月未邁精神尚強而無有挽之推之者知其賢而不與立豈非在位者之責耶某一擯四年更不復出仕獨是道不加修而老色日上面又思向来讲學只是半間半界無詣平實處今只欲耐心攻苦了却數卷殘書與村秀才子輩尋數行墨畢此一生耳

答程季與書【公許】

某春首嘗飭一箋致鵲板招賢之賀山居習懶弗克嗣音誦懷人之詩每深向往茲承北闕疏榮西垣掌制青城地青城客固多人物之炳靈紫微花紫微郎尤覺文章之增重矧聲名如月未望才業如川方增華塗要職何可量哉某嘗謂蜀文章為天下冠漢相如子云同工異曲唐陳子昂孤騫獨步國朝四范有絲綸譜二蘇有制誥皆溫雅麗則王岐公被遇三朝大典冊獨出其手每一篇出人爭誦之亦華陽人也渡江而後更不繁叙端平至嘉熙更掌內外制今已四人某雖不才亦預茲選茲得季與詹叔相與討論潤色斯文之未喪蓋天也此不但為中書賀為國家實賀某晦迹山林誦衣錦之章絕不從事筆墨見故人得路遂喜而作此紙殊愧草率不庄好也東嘉之除出於望外方具免牋念不可不伸賀謝之悃余冀護太白璫毓疏黃鼎徑上銓坡以賁飾萬物

又

某日者聞有去國之命嘗與公發商量借張氏別屋以後從者溪頭望已久拏音聞然佳人不來徒有浩嘆近得到安吉後書知所僦屋甚華某嘗愛韓退之語謂中州士大夫以官為家去則無所於歸今季與雖為萬里客而得屋之寬潔乃如此就溪買魚掬水弄月何妨賢者之適其適也人家不如意事更何必挂諸口耶某髮種種矣以一日之力分為十八分讀聖賢諸書一二分應酬人事率是為常間亦有發深省處若郭外一頃薄收更得州家繼以廩粟則社某日雞腊某日酒可以因節聚族屬會朋友話鄉曲之情也薄儀餞歲余祈以斯文斯道珍毖

答劉時可書

某別豐儀邈不記月一自振旆登朝苕溪去天不尺五日聞鳳鸞之唳暨得奏疏觀之則疊疊乎仁義之對而懇懇惻惻愛君憂國之忠也近傳黃紙除書人皆以芸省郎賀時可道韻冲澹神峯峻峭薄蓬萊而不即此風高矣端平諸賢去國之後岷峨之下尚有時可德方二人与雪

山争明又未知德方过衡阳否某一摛四年翳然林水间更不复有荣仕之望尝谓士不难於得时而难於得日之暇胡文定公历官四十年考第不登六载朱文公历仕五十年立朝止四十日仕于州县仅九考所以得此岁日之暇能尽读圣贤诸书吾侪官职考第过於先民而学问工夫不及前辈若更不及此时倍用其功复悠悠湮湮则将恐有初平无及之叹矣某粗有着述一二未脱藁四方朋友来讨斐记者却俟得墨本拜呈欲言如海更祈以天下之宝为天下珍哉

答谢德方书

某音题不厚久矣庚寅之秋曾对说夜气一章占答来教江浙望岷峨相去万余里恨不能时以书往复莹所疑以融会於一但有怀贤之思耳德方神疎而识练才老而意新如未望月如方至川何可涯涘蜀栖贡珍羣英彙进芳名在周八士之列甚休甚盛好风西归鹄头之书当夜下甘泉矣某登朝六载一无补报滥丞秘府复贰封曹人谓丞为天下之清官爵乃朝廷之公器而子兼司之亦可谓遇矣然区区所性所乐盖不在是臣之事君有多少不尽分处苟尽其分则虽卑官冗散亦可以行志苟惟不得其职则虽一岁九迁天官清华可以立致但见其皆外物也德方以为何如因逖函抒贺忱余祈为清庙之器珍琬

又

某前岁定叟归尝狃情作状寻蒙瑶墨下坠殆如垂露在手手之不释大化更新诸贤彙进德方以前官召殊愜公言但某尝读易窃疑泰之初九曰拔茅茹以其彙征吉否之初六亦曰拔茅茹以其彙贞吉亨泰否之时各异君子小人之进不同而皆曰吉何也及以象考之则知泰之君子其志在外凡建事立业泽物活民皆外也若否之小人其志在君则止於得君而已故一征字为君子喜一贞字为小人戒德方才到阙必立登要津苏栾城正邪不可参用之对刘元城冰炭势不两立之说或者以为当作龙象筵第一谛也某道方志拙端平间开口论事至为权奸所扼一摛六年三遭论罢凜凜常有不测之忧今翳然林水间更不复言仕矣偶得外甥书却闻朝旆已及修门殊以为喜辄抒一笺就令致为庆余祈精疏天和坚保初节以副友人延瞩

卷二十八

钦定四库全书

鹤林集卷二十八 宋 吴泳 撰书

与魏鹤山书

某属者拜笺寻蒙报翰慰诲勤勤恳恳感不可为言校书读易工夫逾造妙密不以一书穷易而支畅旁取尽将诸儒先之说相与剖析疑义订正其真是非易之卦脉圣之精蘊羲皇之心法周公文王宣父之庶类百物将自是心契神授而语言文字之枝叶亦无所复用矣某学不切已依依然如游骑亡所归乃蒙校书手笔以示教良发深省固荷不屑之意但资质钝迟中庸大学语孟之四书未明诗书礼乐之四术未莹躋等言易恐非盈科後进之道傥自今气血未衰稍有长进则幅巾只履尚得从容扣问校书於鹤山之间也来书所说户外之屨以讲学来以干荐干书来终令人倦於接纳固是如此然某之意更欲校书充先儒寧受百人欺之说使好贤之心无一日替则尤见其宏大也不识以为僭否未有詹拜之日愿言冲辅道腴前轂泰祉

又

某每谓侍郎文章天下所共知而某知之为最深愈於天下之人何则文以神志为主异时选人逐客蹶於忧患伤於感慨耗於血气既衰困苦而无精采而侍郎养熟道凝神全志壹作为文章天力自到其趣窈窕而深其声清越而长如梦笔山记捻起老去才尽一段洗笔池记说咸之良感艮之实见处俱造微密最是李侍郎北园记於丰道扶教极有功而舜俞山房记根本六经之奥义演出先王之大法其於学者进学工夫尤所关系迨夫意与神驰文随笔肆隐然有味之言出於记事之外此则侍郎之所独得而某窃以为知侍郎之深愈於天下之人者此也独知处祠堂记迄今犹未见本只以前书所教谓近世祠堂太泛古无此典谓先圣先师之祀只是汉儒之说而庙元不出阙里此却不能无疑大司乐掌成均之法以治建国之学政凡有道有德者使教焉死则祭於瞽宗瞽宗殷学也有道有德者先师之类也以其有道艺德行可以为人之师而祀之於学亦其宜也不知何以谓之古无此典此其疑一也自孔子梦奠邪说诬民战国以来礼坏乐废秦又燔诗书隳学校何有於先圣先师汉兴至元朔五年始诏天下郡国建立学官而永平之际皆尊奉孔子之祀则自汉以前先圣之庙固未尝不出阙里也礼经如戴氏所记郑康成所释其他傳会处不无舛驳至论先圣先师之祀释奠舍菜之典互见错出少有悖戾所以陈祥道礼书朱文公学制多从其说恐未可槩以汉儒之说为非古此其疑二也古人假有庙必於萃与涣言之其义诚妙矣然延陵季子亦曰若?气则无不之也无不之也者谓辟塞充满流动洋溢无所往而不在也今有抱道怀德之士出为大贤没为先师世之相後百有余载地之相去千有余里精爽?干极於神明能使人斋明盛服饰礼容奉豆筮尸而祝之有不敢忘者兹岂强而致之哉士读圣贤之书传圣贤之心气脉之通自相关属其祭也非諛其歆也以类初不必即道州而祀濂溪即关中而祀横渠即伊洛而祀伊川明道

以此看得向来朱张二先生记诸儒之祠不是放过亦礼义之所当然耳此其疑三也侍郎稽考古文出入经传何有一物不知但高明之既极则往往於商论之间必欲发先儒之所未发先儒固有发挥未尽者而天理之则人情之中恐不能过也某晚学安敢妄有拟议而於此三条实有未達且蒙侍郎虚心下问故复以此质之门墙切望明赐开晓俾知有所据守豁然如大寐之得醒斯为幸欤前书所问纪陟魏徵二事并希赐答

又

某伏自去岁仙艗次於月峡连驿羈起居状亦曾奉疏唁问叙州难弟之戚经閱日久响息音销新进士来袖出双白璧亟开捧玩乃知前所寄书悉彻穹檻矣世运将泰朋阳彙升西山出守温陵鹤山易帅泸水土庆於朝农歌於野莫不举酒相属以为端人得时之贺而某窃以为侍郎之所可贺者盖不在兹时也坎以刚中而亨屯以居正而利蹇以能止而硕否以不苟禄而吉困以不失其所亨而通则卦脉之起伏即天根之动静来伸往屈进减反盈陰销阳息山川窍而日星垂是理本粲然明着於天地之两间而世人习矣不察一遇厄穷不堪流落卑者煦煦以乞怜高者婞婞以陨获内无可乐者终日命酒赋诗而平生所学全不能倚靠者又未免参仙翁释子以添熱鬧求其致命遂志遁世而无闷进学畜德盛行而有加如侍郎者则盖难其人矣俗流化敝人物衰少政隳土裂大音不完居今之世而闻侍郎之一言一行莫不刻意竦慕而况侍郎不以此举自满着书渠阳内乐晏如於魏公论语序见修身践言之有法於文公年谱序见丰道扶教之有功於濂溪诸老先生祠堂等记见根极理气分劈义利辨明德性物欲与夫圣传之真俗学之痼邪说之诬尤为有警於後学其它杂着春容简短虽若不齐而卒泽於仁义道德炳如也前辈尝谓退之子厚皆於迁謫中始收文章之极功盖以其落浮夸之气得忧患之助言从字顺遂造真理今观渠阳一编则又岂可例以文士目之耶然尚有可商量者记序铭说诗词各自有体虽文公老生素号秉笔太严而乐府十三篇咏梅花与人作生日清婉骚润未尝不合节拍如侍郎歌词内重卦三三後天八八三三律管九九玄经等语觉得竟非词人之体是虽胷次义理之富浇灌於舌本滂沛於笔端不自知其然而然但恐或者见之乃谓侍郎尽以易元之妙谱入歌曲是则可惧也某少粗有志於学尤好读濂溪河南横渠新安朱氏广汉张氏之书自来京师交於四方朋友不无切磋之益而力不从心悠悠渍渍立於梦觉之关竟无实得去年登秘府稍收放心会四库之储厄於遗烬亦不曾读所未见岂造物者终推墮於小人之归耶看得来学问官职必无两立之理此长一分则彼消一分更不能长居户限上须是归而求之恳恻痛切倍用人一已百之工然後为有得也陛对二札谨缮写拜呈初篇本欲提大纲领别有建白而乡之士友适至备言去年遭变甚惨为父母之邦只得首及蜀中事末章则述所职也有未是处仍赐指教欲言甚长悃悃无繇尽申写所冀宏毅忠壮以先民事业珍毖

又

某自入春来凡三拜起居状其前後两书亦有及乎问学行己之要正欲求警诲一语濯去旧见以来新知兹领四月念八日台翰则知仅有二月十八日一缄关彻书月也侍郎闲静中阅理理精义明忧患中观物物格知至今承天子之命出守侯服只以得之圣贤者次第出之汉

人何患不安夷人何患不信径从此拓开北定规模可也东州惟泸叙尚可用兹得来书乃谓搜练简閱仅得弩手百人弩三十枝堂堂大府而单寡若是将何以为国号曰长吏实同旅人昔贤盖不虚语也某每病今时一种议论率谓儒者不能晓畅军士曾不知胡安定在丹州更陈法治兵器开废地为营田募土人为兵虽军校蕃酋亭障厮役辄饮之酒访备边利害张直柔每与人论造战船法曰此事甚易可作一小者计其丈尺广狭长短即是推之则大者可见天下之人何有一事非吾儒为之耶区区所望於侍郎者更欲於实用上做起工夫然後能有济也欲言之事拍塞满怀上冀存养清明之气辑成嘉靖之福

又

某自承侍郎建榦书牋之礼未尝旷絶六月十八又拜一书附成都月逡以往不审曾洞彻穹檻否詹叔近方到修门已再胥会且知体况甚悉边声不惊军务多暇又闻即北山之堂址重与修筑羣乡之秀茂讲道肄业其间此古者诸侯所以师保万民之意是固侍郎之所乐为也然天下之理固根於人心而未尝不形见乎事物为学之方固当存养於德性而亦不可不省察乎实行俗流失世败坏而今之为士者犹务为空谈以长华竞侍郎欲筑堂某谓当如胡安定在湖州置治道一斋治兵治民水利算法之类各使诸生精论熟讲若请堂长又当如朱文公在漳州博采公论延请恬退老成者以为表率庶使後生少知尊贤尚德之意却不必待科名之士而後为之如此则聚辨有益而精粗不遗向背既明而趋舍自定兴民心出治道此其基矣某登朝六载三对清光每当书思之时必自盟其心不敢妄有一词以谀悦其上近所陈二劄首篇粗述无田甫田之旨二篇略陈大风有隧之戒而主义者已不乐台中论事之课已有疏驳其不然者恐得因此汰去未可知也副本録呈仍乞警诲幸甚瞻望旌棨惟冀为庙社保重

又

某去冬使人之还肤帅具报入春以来词头山积随分又有职事卒卒无须輿闲非故於侍郎为简也朝家厉精公道日辟较之前此政令垢翫上下否隔不可谓不渐就清明独是君子用之未尽小人去之不力上书论事者莫不以此为言所谓用之未尽者侍郎与真丈也所谓去之不力者李知孝梁成大也二贤之本末惟良贵一疏尽之二凶之情状独未有人说破近因洪察小帖子言渠台纲不肃事朝廷虽与降官某以为罪大罚轻辄冒昧?还降官词头乞行镌窜幸而睿谟英断已并与施行矣同朝诸公与两学之士及闾阎小民粗以为此举愜当而一二党奸者犹谓只当封还不合侵台谏之职彼岂知先正诸贤?章盖有甚於此者就使摇撼得去亦素心所甘也官职之荣有限名节之美亡穷近来益见得此理直是分明又时荷詹叔相与切磋警教夹持而上恐自此或更长进也趣计所月逡作此未究欲言尚冀冲养神明之舍厚培勲业之地副此延瞩

与洪平斋书【咨夔】

某枇杷熟时仅得一番交讯涉暑葛秋砧音题不嗣新进士自邑中回每言郎中不相遗忘且

於文字议论间多所推许吾行天下半矣不知何以得此於郎中哉鸾凤高翔之後鸣者束晷巢於阿阁近日稍稍复理遗音絕响而賡之人共指以为明廷之瑞然较之乙酉封事其伉直之风高矣闲居几时想泰宇益定挹树花之生香盼庭草之再綠境与心会乐与神会所读之书与圣贤会斯咏斯陶当有不可涯者独恨縈维於此欲一望美人而咫尺有絛河之隔耳某资稟沈雾冒焉此来官於中都比州县间竟是事省且亦有一二耐久朋友可以讲切近年来看得先民之所以教人只要人着已下靠实工夫不欲令人多作文字故黄离之彖曰畜牝牛吉中庸之训曰衣锦尚絀以此弥寡於言不甚拈弄笔墨比过荆渚有诸客骑驴雪夜相访黄其姓虚舟其号强提赋一篇号虚舟词新进士于斋堂铭乡人游湖索和韵又未免随分酬答然枯燥之病深研磨之工少殆如白地明光之绫但有其渲而无精采也因岁事遣人相闻藉手干指教仍乞一语为参同之钥山间论着无惜惠寄数篇良晤未有期愿言护太白之璜洁青精之羞光此泰道

又

某臆前遣墨奴笔史问讯天目之仙五云自山中来絕无一点尘气肉食者良可鄙也纪纲踵门连拜宝翰郁然风味其臭如兰此又在言语之外感藏何斲郎中一代文伯袖丝纶之手韬岩谷之间芒寒色正隐然自名动於时而每每以此相期待前书且欲某为廊庙之文夫文章合下有两等山林草泽之文其气槁枯朝廷台阁之文其气温润譬如按乐教坊则婉媚风流外道则麤野嘲???如某者麤野嘲???之为也不惟不能作官樣文章亦无日过花砖之梦稍待春晚得一对後则往往赋遂初诗式微纵野鹤於双林以返其自然也赤子弄兵潢池州县之吏不能抚安之仿傚而起前此朝家以隆兴起崔先生竟不肯出颇孤苍生之望今淮壖一向却平静所愿如此若此去道泰年丰使吾之根本厚而精神全则彼亦不能动矣因下问辄及之郎中闲居许时絕口不道贫字每与温校书论到此莫不推敬学力然亦不能不过饒台季文之少风谊也斋宫连日祠祭既归又有孟陬一番人事迟来使两日方能拜答切冀宿疏黄鼎护太白璜以迓天宠

又

某两拜劄翰一则约之以礼一则博之以文心融气浹良发深省向者得郎中之文读之神彩精丽词华绚发只作綴文之士看别未几时今则浑造白澹矣记之规为叙置殆如白云演迤於苍崑翠谷间而自生态度流水盘纤诘曲泻入长河而不见底最後最善独善之说方是指出标本使杨君而领会此义则宜其家可以成教於国得於已斯不失望於民如百围之木封植底本根与发生出底枝叶只是一贯世之士盖有错会独善之义而自遏其躬者则亦可怜矣郎中以为何如杨君名铨字平叔其尊翁讳济世青城人渠不忍书其父名欲以它字易之且更不欲出永康二字又欲以字行又欲减墓字大槩是感郎中之深知借雄文之润色故敢切切说稟耳肯曲笔从之不胜至幸

又

某坐窗风雨中更无羣乐之兴灯花双悬宝帖粲堕殆如痿而起醉而醒也中都海物维错而不曾飧太牢之滋味故人念及之兹属厌矣矧儿辈又得牵衣覓卢橘哉近读参同内景等书辄书数语代答末章之戲琴床日按胎仙舞鼎室时抄姹女歌此外不消媒妁语脾家安好是黄婆此其志也所问西州事见说北兵犹未出境也风鳧日鯨雪壶友书以献余俟後讯详之

又

冬未半月气顿为寒伏惟对纯坤之美履牵复之吉翁堂子舍蕙阁芝房各拥维春之祺顷自使还占报兼旬不嗣音詹咏风徽遐心炯炯火後沧凉祗如前日鸣声諠諠杂语嘈嘈譁於民间不能自禁一日凡四五惊近者方小定盖缘新岩自西头来恂恂如鄙人终是有与三军之士同甘苦意象尹厘将漕和厚详雅善类多之京兆年来中乾之形立见譬如好家居織儿更不禁再撞坏也诏书一盼学省首上封事虽其言未必当事情而劲气直声有犯无隐亦足以大为一时之壮某最无闻知者然每交四方朋友例不以凡辈见目兹岂宜妄自俛嘿效不鸣之鴈哉副草一本漫写求教请葛公事比以见之施行恐益重忤者之过尔外间惟蒋良贵袁广微亦有封章来上郎中必技痒安得诸贤翕聚於朝共吐胷中之奇耶祠庭奉亲冬日为况何如松以负霜故隼敢书此为郎中贺

又

某每得郎中书辄数日把玩不能去手守至忽遽中复惠鱼兔帖抉精意於象外露生机於画底已迥然不肯作世间书所谓天机在半夜子之初人事在五更三之後尤佳对也第欲某下观复一转语不识郎中真以迎长日之至者为复也夫自夏至冬十一月者一年之复也自午初至夜半者一日之复也自午日凡七日复得子者一月之复也自午岁凡七岁复得子岁者一纪之复也天道循环卦脉通流合之为为一纪分之为一岁析之为一月一日无日不可观来复无时不可验生意故周子以静处测陰阳之根程子以动处观天地之心邵子却以动静来往之间閱三十六宫之春或自小雪积分或从中孚起卦或又谓应鍾当复纯体破体本气余气纵施横设无不可观只看人落处何如耳不知落处明安得用处活彼历家以尺管候阳气医家以寸口切阳脉修炼之家以鉛鼎玄珠进火候般运之家以敲竹唤龟鼓琴招凤行子午法皆取之造物还体之吾身岂有秀於百家九流而不掘易髓蹶天根哉郎中六七月间退居南窗之下必能静閱陰阳进減之理洞扣往圣参同之钥不知於此时节作何卦会作何爻看龙蛇之蛰未尝不安也尺蠖之屈未尝不伸也稻垂而秀麦仰而生未尝不自裕於天壤之间也想朋友之进说於郎中者多谓雪霜摧剥之久则其发達也必艰须俟朋来而後无咎此犹未免於周孔足迹下盘旋真知郎中之心者未必尔也参子黄昏亟命小童汲井花洗破砚漫答来教不觉盈纸曷日胥会析薪煮鱼共谈精到

又

某阔不奉山房之笺盖有待也天道左旋一阳来复朔日南至二首为章谓十九年逢一章云物必瑞水泉必清贤者必为时挺出如芸芬荔馥弗可得而遏胡为黄纸除书尚不到天目山

耶清源之牧久已建旗泸水之帅免牒已上不信潜郎之终於潜耶近尝蠡测管窥造化之运含洪之德虽至发用之功稍迟宣滯底和要须有人焉斡旋於其间而後能成物今官陰阳府万物者半是占云候气之家而独无以身贊化之士则涸陰之未解而稚阳之不舒无足怪也侄子槃颇有志读易因其侍叔父西归使诵所闻以告幸参择之送邛州王进士一序就録请教且以验进减工夫毋以颂而以规可也书窗得半日晴喜为作此鱼酒伴书极^廿^廿它俟臆前折梅花以问讯

又

某日困秋暑一夜风雨撼摇窗屋殆如痒处得爬不必倩麻姑亦为之一快也不审却害稼否屡收宝帖备见讲学之力解经之功韩苏二子皆因作文章时见道理故前辈为之倾倒然东坡如银山铁壁占得地位十分完牢退之如欹篁偃松未免一时有倒赚处毕竟本心磨灭它不得若刘柳诸人则合下墮坑落堑不必问也富而可求一段伊川以义言上蔡以命言尽之矣更有新得望时书所见以莹其疑又有借书之请山房年来储藏颇富必抄得阜陵实録日历会要等书及稼轩石湖赵忠定王宣子辈文集或行述碑志与南轩奏议豫章江陵长沙乡里成都等志专遣人悬干执事幸语鲁叟辄寻畧小厮以回不胜至感每思一事虽摸摸索索记得三二分但精魂不强终是遗忘又未免东坡獭祭鱼之戒亦可怜也金星昼见沿路黑眚此为何祥耶抽织锦之一机露标月之半指正有资於耐久朋友也鱼酒伴书一笑领略对客草草照之度外幸甚

卷二十九

<集部,别集类,南宋建炎至德佑,鹤林集>

钦定四库全书

鹤林集卷二十九 宋 吴泳 撰书

与真西山书

某生长东蜀自小学读书兢强而仕已知有先生长者之名欲趋拜於下风而道远江长莫能赢粮撰屨此外惟以书请益而又堕於因循既作复辍先儒谓悠悠湮湮虚过岁月是可惧也去年春令享税院相过始得尚书所为文冠带读之夜气一箴冥升利于不息之正也拱极一记考盘在涧永矢弗谖之义也楮衾一铭怙侈灭义服美於人之训也坐右十图简而严勉谕僚属四事明而切翰林词章一编温醇深润其思油然以幽其味黯然而长也某虽未识尚书之面兹见其心矣化敝文衰人物消磨故国之乔木零落殆尽新田之采芑培植未丰中外所属望以扶持世教康济时屯者尚书一人而已命召才盼朝野胥庆咸谓温公起洛譬之游龙能出云雨蜀公起蜀譬之麟凤能服猛鸷盖羣贤翕聚固为朝家美瑞而大贤出处尤关国之重轻是必求有以副海内之望可也今弊事方更而未尽危机交急而弗停金灭元兴忧端方始最是人心蛊坏溺既深非得华佗换肠涤胃之方恐亦未可卒拯尚书经济之藏着几古今必知所处於此矣某材不能适时用学不能辅理化漫以片文只字奏於作者之庭词虽未工忌者已衆每思黄离畜牝之吉深味中庸尚絅之训若非韬晦定速颠隮所赖尚书主吾道之宗盟立斯文之慧命盈庭吉士倚作金城如某者傥得一望声容参侍海语持是以归见乡父兄是亦终身之愿也草此修问瞻望旌棨乞为宗社保重

上刘左史书

某闻国之有老臣犹人之一身有元气也功名魁杰之士容或可少於时而至於耆儒宿德则宗社之所倚重朝廷之所尊信天下万世之所取法而一不培养封殖焉则是犹气体不完精神不接而欲运其手足肩背亦将漠然不我应矣书曰罔或者寿俊在厥服予则罔克正谓此也故尝以为国家真元之运息养於庆历之时桎亡於熙丰之际而复清明於元佑之日衆正登用大奸屏絶士大夫庆於朝庶人歌於路故在庆历则犹平旦之气老臣渐疏新进用事素有勲望者纳政在里第而年德弥高者各自放於洛故在熙丰则犹旦昼之气一法令之不便则累章以力争一除授之得人则寓书而志喜待之以扶持之殊礼宠之以不拜之弥文逸之以经筵朝参之节申之以遣使咨访之重故在元佑则犹中夜清明之气然是气也清明常在不为息养而加不为桎亡而损扶天地之心寿国家之脉立生民之命与昼夜陰阳坤乾复垢相为无有终穷至於今日又不待读圣德颂耆英序元佑党碑而後知其梗概也方今天下勲德闳大为四朝元老学问粹正为天子旧臣兼山黄公之後独侍郎一人岿乎灵光之存耳然政有關於社稷事有系於安危侍郎不言又谁言耶比闻之道路播之封章则侍郎盖以储

嗣为言矣以民事为言矣以军政为言矣或相疑怪或相赏叹不知此事古人日日有也昔司马文正之在并州也议建储凡三状其在西京也六事谕时政而一事及边防其在洛十五年也朝廷每有大事知无不言言无不尽岂尝以出位为嫌忤时为讳耶呜呼閱天下之理多则其见事也必明趋荣名之念薄则其持论也必固学问苗脉自善类中来则其为仁也必勇侍郎之与司马文正盖一品地为人也朝阳之凤何所顾而不屡鸣也今天下亦多故矣所可言者不独三言而已使当路者力引耆德老成置诸左右以开谕上意则庶犹可以扶救若其护疾忌医而不为思则天下事去矣学校小儒无所建明於时顷得侍郎所赐书且云道益衰矣时益危矣使世间常有善士固无远近亲疎此不独见侍郎恳恳忧时之至心而於不令兄弟犹欲期之以学问器业而不俾为小人之归也故於安輿之就养也辄纾情素而自献焉旧所为辩说七篇别纸庄写并赐览观不宣

上崔侍郎书

某生长东蜀少时孤露其居家所共游者不过乡党邻里之人其出而宦游於外又不数十百里之地其讲学也无河洛之全书其论事也无燕赵之奇气其记览为辞章也无龙门禹穴之伟观稟气偏滯而规模隘执德不宏而才胆薄狃於耳目恬习之陋冥然被驱而莫之觉者盖已四十年於此矣曾子曰士不可以不弘毅任重而道远孟子亦曰居天下之广居立天下之正位行天下之大道此之谓大丈夫尝持是说以求诸天下之豪杰或谓古人有之而今则无之也侍郎自天子侍从帅西南某虽未得覩窥风采而问之乡人於朝访之南方士夫於蜀则皆能道其梗概轻裘纓徐被服率素而知其为孤介人也器无重备妾无衣帛而知其为清忠人也菲於奉身薄於徼福陋於希世而知其为冲澹寡欲人也夫举天下物欲一不足以动其心则居官也必廉莅军也必庄临财也必义立天子殿陛必能直辞正色得志於天下必能使万物各得其所异时新城之邑若狭且近不足展拓才具而救饥弭盗乃有二十四考中书所不能为之功信乎富贵贫薄者何往而不可行志也某每爱诸葛武侯高卧南阳不求闻達其澹於荣利若将终身焉者三十年将相何欲不遂而家之所有仅桑八百株薄田十五顷而已岂武侯好自抑损耶盖经纶天下当使清虚恬澹之意常多而功利物欲之心常少武侯之功烈所以扶持人纪复兴汉室挺挺然有三代之英雄气象实自清心寡慾中充广之也胡文定公有言人须是世味澹薄不要富贵方自激昂若胡公者诚亦得武侯之心哉侍郎清心寡慾有武侯之资作牧益州当武侯之任陛辞之日必欲中外通情大小协力此已窺见用蜀之规模而入境之始登民间俗屏去帷帐此又见夫爱惜民力之至蜀之民将颂而祝之曰此更生我者也蜀之吏将率而劝之曰此胥训诲我者也学校小儒有如某等亦岂敢徒事文墨而不以实应先生哉某窃观近岁蜀多弊事军政坏於亡纪疆事狃於尝试陟罚臧否乱於无章然此三者使法度修纪律正不过一转移之间而至於好利之蠹则剥蚀士大夫之良心为甚此殆不可以沈痼之日为受病之始也昔熙寧创置条例司之初讲利之臣多聚文章之士而充斥四方者莫非分行营干之使彼自以新意为功名而不知利源一开则留病根於腹心牢不可去识者推原其自以为民不靖亦惟在邦君室至哉斯言不独当时之鉴亦今日对病之药也窃知侍郎寬静简易皇皇以求仁义为心欲某等得以进其厌饫之说若夫以腐儒之常谈不足为思则区区无所复望於时矣伏惟属意焉

与曹昌谷书【彦约】

某不令兄弟少自孤苦常有志於斯世学力不充惘然无所成立郎中入蜀首蒙异知尉弟昌裔既辱论荐且以其贱姓名道扬於诸公间大心公溥则天之道此達材贤者所为也一自新都萧寺拜违遄有出峡之命无益之书不敢登诸燕几郎中既离梁益事变日异人心日危国势日益蹙敌人几再犯蜀今春尤甚破武休入汉中复犯大安边民涂炭衣冠虏掠虽制阃亦为徙治之计蜀几危矣尝以绍兴三年考之萨里罕亦曾寇兴元犯大梁子羽至退保三泉魏公移司阃中大略相似然是时蜀危而复安者人心均一事力完具人才如抽箠中之矢一矢既尽一矢继之不致如今日无拳无勇职为乱阶而已也某尝出位蚤夜以思每谓宇宙大物也惟休休绰绰者始能用之猜忌褊狭恐天下之加乎已忌医护疾使坏证侵寻不可复救不知古之为宰衡者亦如此乎否也某名微位卑空言不足以達志如郎中之才美上为庙朝命脉下为生灵根本能以蜀之危亢言於朝俾二三执政稍开诚心布公道参用度外之人勿讳张皇之论命帅选将收拾人心则蜀道幸甚蜀民幸甚不然听其所为如赌采一掷则梁益之事去矣某僭布此未有詹覲之辰上乞为洙泗河洛宗门珍眚道体以福海县

又

某杪春拜书附制干晏丈之舟以行历夏徂秋计当上達一自成都移制阃於益昌邮筒邸报不复西来凡朝廷大除授少所知见但闻之道涂相语藉藉谓侍郎始以月卿命继以法从除将自是西帅矣已除书自天陞华邃阁遄拜真命即为此来人心所向士心所怀三军之心所属不惟徒贺而将实贺也蜀之为国靡敝倾坏视昔时为甚顷者兴元溃兵扰天纪凤集紫巾转相仿傚跨州连邑如涉无人之境彼之所以冒为大恶疾视其上而莫之顾者亦以蜀中诸郡城多隳圯兵不练习干戈朽器甲钝无以共御王事缙绅先生又不历筭周思开示逆顺躬任讨贼之责惴惴然犹养虎狼惟恐少拂其心则若将忿而怒已此岂驭军理国者所为哉古人於屯之难也而必曰康屯於否之倾也而必曰通否天下岂有不可为之事特在夫处置者得宜而已前日之变环寇坐视而不用命者关外官军耳邀求赏给而不肯前行者移屯营兵耳如黎雅诸处牌手则未尝不效用也前乎开禧则有判将後乎嘉定则有判兵如沿边流民内郡贫民未尝有一人敢作乱也今残敌自支它盗蜀中频得寧帖若更得侍郎之来经理军政收回人心责任士大夫以事使气脉常流通而支节不散寇去之後常如寇至之时上有凝志下无离心则国庶乎其可为也侍郎素谙蜀中利病鲁泮诸生才识谬迷然恃知予之厚则不敢不略陈狂愚而抒素情进之退之一惟所以命耳时已薄寒所几上为庙朝寿本下为生民命脉厚加眠食以福善类

与崔菊坡书

某伏自尚书帅属东归曾饬一笺於江之上下遣人追送隶也不力及夔而仙艗已过月峡矣洪考功之还臧前书同诗卷册囊就附其舟以行虽?缓已不及事然门人所以恋德之诚非此则无以少见真意度先生必能照之度外也尚书志正而气一养熟而道凝惟其视宇宙之大无一物足以动其心所以安分义之闲虽万鍾不能夺其志嗣君访落图任旧臣累诏趣徵亢

章不出难进易退之风高但温公既归洛朝廷每有大事知无不言虽诏书中有不便於言事者亦请改易魏公去国之後或劝其勿复以时事为言公慨然以君臣之谊责之乃知国家之命脉关言路之通塞系善类之消长尚书身虽在外詎可翳然林水之间不以温公魏公之所当言者为言哉况尚书负海内之望多士之所模楷苟惟不言言则必用况在蜀中凡所荐进之士有登於朝者有籍记於中书者有留於连帅之幕府者川泳云飞次第拔擢如某者谬庸亡奇亦以尚书旧辟龐抚机之例置之机幄前修所谓一经品题便作佳士真不虚言也蜀边一向帖静频年田里间亦不为不熟而物价之昂竟不肯减所幸者关表差平自此外别无所闻今因漕司人便辄附一缄申 就有某宰神泉日冬夜九诗及前崇庆王使君所记社仓碑一本拜呈幸赐标月之指余祈冲辅耆德进乘新阳竚有延登之拜

与李悦斋书

某去岁才及修门即祓牋用敬附五月十八日逦以往揆日之程亦当?彻书台之下矣每校勘微之常丞景仁出示宝翰虽屡蒙齿记而日前所寄书音销响落竟堕浮沈不识先生长者罪其简否侍郎学懋而政美德成而行尊人物之望海内所属有如广东崔文建寧真丈与侍郎代不数人而已但世运多屯泰爻不竞三先生者或勤劳於外或偃息在家譬如云气浮游太空片东片西不能聚而成雨近者寇盜披猖已屠数县名藩重镇多缺帅守崔礼书既辞隆兴之命王帅久得祠而未离福建以此事权错出而人心摇刑政垢玩而贼党固夫人情本不甚相远若得一人焉出而镇压抚柔之先从人心上做起根本则昔之胁民为盗者度今可以化贼为民此特反掌间事耳班行诸公之论直以为此段须得三先生然後可以办集盖兵者实大贤盛德之事非小才小智所能用旨哉徐考节之言真有味也某仕材沈下玷蹟周行亦既一年曾无补报轮对又在今春之莫但历考乡父兄袞袞登朝者官职崇卑各有定分风节议论率皆可观某虽不肖不学安敢希慕之才之珍而求以附善之心则晨夕不置侍郎模楷後进天下方望之如元礼岂无可以警悔者因风愿示其略庶存此体段於胷中它日不至为宵人之归是又拜门墙之赐也王正之首熏蕤濯露徂此一幅之藤上祈为国之珍式玉其体以迓天休以寿国脉

又

某顷从月置再奉赤牋就以所露封章上尘书月不审曾洞彻否上睠西顾谋帅中军诗书礼乐之望亡踰老臣者於是拓以蜀国十连之封峻以尧章延阁之秩式正使名永清国步眷简之意盖有在也命下之日中都缙绅莫不举酒相贺而某独尚窃迟盖烛之武不能早用於郑国未危之先诸葛孔明驰驱受任於汉军屡败之际凡所施置倍觉吃力今须夙戒元戎径度双劒更勿牢辞往复以缓於事机此则邦人之所望也侍郎胷次着几古今扶否康屯必能宏济顷庚置未发前因会宰士皆谓侍郎孜孜体国尽公血诚凡所建明率皆平实是时已自略知有建栖消息不三日而命从天下盖以望选不繇人言也某兄弟游门墙已久区区之见以为今日之事莫若旌三州死难之守戮环寇坐视之将章明国法兴起人心凡弱政敝事劝令一切更新应五州失业之民尽与蠲减租赋或如西和忠勇军法团结民丁或如渭滨杂耕故事逐渐讲行屯田不知兹时便可为否若夫制总相通掌兵者与理财者和豫此在侍郎必有

所处尔纵笔及此不觉怵怛

又

某顷连通奏记兹更不繁述起居之间十二月三日邸吏録以侍郎辞免之牒备悉蜀中事势已就濒亡後一月度常卿处复转示与乡人劄子并粘连到赵副使书尤见侍郎恳恳忧乡国之意读之使人哽咽方敌骑破利州时才闻遽报即同乡人往扣庙堂昼登光范之门谒执政府犇走伺候饮食尽废如此者凡六日亦曾两见丞相四见参政枢密与之痛说蜀亡之状且乞召陈襄阳以二赵为制副藉其兵粮援蜀又以其新立功之故提一军上夔门以控扼其喉一军出金洋以邀击其背侍郎从中权运筹副使纠合忠义招集溃卒相与式遏寇虐恐有可康救之理言之者急而应之者缓虽尽从其请而尚迟其行既得侍郎书又以四事为请其一言降诏抚谕其二乞趣二赵行并遣鄂州王旻一军应援其三乞应制司财物须管制副同用其四乞沿江荆南须择才望方略之帅次日微之监丞又欲乞降省劄徧下诸路监司帅臣许其自辟置官属自支用财赋招兵御敌上下流相应援其间委折乡人必详报去五月间第一番议蜀事某以为诸葛公德政不举威刑不肃二语最中蜀捆之病莫若更用悦斋为帅或云妨碍桂丈又见侍郎与游景仁书令从二赵中择一人来或又以为此统兵之才当时言轻既不孚信後來繚遶回旋竟不出此然待其出命则已晚矣侍郎所谓傥陛下擢臣於数月之前大安利阆未破诸将未尽歿亡军士未尽死散则尚或可以勉竭真至言也第区区犹有余望者侍郎与副使心腹相孚更无掣肘可以展采错事更乞勉为乡国多方措置共图所以救援收复之策此不独乡人之望亦宗社之望也言之及此血泪迸落仍冀加餐善护以拓经济之藏

又

某伏自六月十八至於八月三日凡四拜书皆附益昌通行近蒙专使遣致书馈复从月置中祇领七月空日一緘则知某前此四书犹未关彻穹檻又不审牙纛起离之後浮沈与否也谕及结局兵财总数仰见综理微密之功向来蜀口兵额号曰十万宣抚司交与制司尚八万二千四百余人後來两三政所管止六万九千上下今受任败事之後乃能收集填刺合忠义至八万五千余人则兵不为不足矣向来制司元交宣抚司钱物本窠名钱引尚七百一万一千二百余道各项桩管一百四十五万六百余道铜钱小会子金银物帛又不在内想前帅交割时必多散失亏损矣今於用度单乏之际犹能撙节则亏目共管一千三百余万则财不为不厚矣经理荒残规置厄塞又皆可久可大着实工夫後人亦得以有所据依何其幸也世尝谓儒者不善知兵而不知夹谷之会强者惴焉善知兵者莫如孔子儒者不善理财而不知无政事则财用不足善理财者莫如孟子天下事非吾儒为之而谁为之耶近亦得新捆书有二语云兵不在多而在料简财不在取而在调度却也是好说话但临边练军自昔所难而不知所以料简者何道师行一日便有支费而不知所以调度者何术俱未能喻其详在高明以为然否张忠献公罢都督府除醴泉观使或劝公勿复问时事公慨然语之曰苟有所见安忍不言如来书所谓继此归伏林泉不复与闻外事之语则非所望於元勳旧德也丞相久病近作止不常时事大可虑书不尽言所冀为庙社保重

卷三十

钦定四库全书

鹤林集卷三十 宋 吴泳 撰书

与汪尚中书

某闲居寡俦得蒙赐书以劳岑寂且辱録示至日?义见教体段平正辞旨条達如以子半为复之初黄鍾为复之候仁为复之元仰见探索之工但首辟诸儒动静之说此为未莹耳盖阴阳易也动静易也易六十四卦无非天地之心然二阳为临三阳为泰四阳为大壮五阳为夬渐生渐长日新月异盛心普万物而流形於穹壤之间於斯时也物实相杂难可名状大壮虽曰见天地之情而所见者特其发达於外者耳而心之精微妙密则未之能测也惟复小而辨于物五阴方剥於上而一阳已生於下当肃杀之中已有孳萌之兆於贞固之下已有流动之脉生生之理无一间停息於此而观则昭明洁净见得天地之心最为亲切故在周子则谓之阳之根在程子则谓之动之端在朱子则谓之辟之始在邵子则谓之阳之初起处大抵皆於动之端倪识破此心真善观物者也况坤上也震下也坤即是静震即是动圣人分明以此二体画卦若离动静而言阴阳离阴阳而论易道是犹以无寸之圭而测景以不度之衡而观星则复易为纸上之易又安能窥测造化之心哉盖易自老氏王辅嗣以来止就归宿处观复至河洛诸儒方以发动处观复羲文周孔之精蘊密义至此复大明矣不审尚中便以迎长日之至者为复耶夫自夏至冬十一月者一年之复也自午初至夜半者一日之复也自午日凡七日复得子日者一月之复也自午岁凡七岁复得子岁者一纪之复也天道循环卦脉流通合之为一纪分之为一岁析之为一月一日无日不可观来复无时不可验生意或自小雪积分或从中孚起卦或又谓应鍾当复纵施横设无不可观只看人落处何如耳不知落处明安得用处活此卻要吾人吃紧用工书问往来亦附赘悬疣耳尚中识见自高兹心常爽必欲穷极某静中自得之妙又安能妙万物以为言哉一日之间鷄鸣而起读经东窗下饭罢临池习古法帖学未成又弃去复命子侄以所读之书随笔抄记屋之後有山有梅园竹坞非风熙日暖不出夜则青灯吊古繙閲史策率至子之半乃寐尚中以为易乎否也雨寒迫节草草占答来教余俟後讯

又

某自川中罢守复回苕溪翳居林水之间粗安其拙虽白道而冥穷不问也尝访问朋友生死中间得和赴真死矣或有谓竹坡亦上仙者昉亦疑之何天之不慙庇吾?耶收近书问使者以故则知挈妇子隐於吴门几与世相隔所以人谬传耳南窗读易想日有新知但六经惟易最难学伊川平生所得只在易传尝曰吾四十以前读诵五十以前研究六十以前紬绎六十以後着书其传之成也犹不敢轻示门人且云只说得七分今台翰便谓自有此易未有此解何其言之易也且勿言卦象爻辞先说易一字老先生只言变易盖谓阴阳相磴日月相射昼夜相承死生相摻其大纲领不出乎此或者戴神墨履灵式或以玄测或以祲传或以本气余气

言或以纯体破体论或以飞行流通看若见理到亦只是变易之易不然则流为丑博之学也尚中以为何如近穀夫看论语尝寄序引来煞好惟命名曰衍究卻又倡好奇吾人只是讲学读书不妨细商量独惧其年之老也俛焉日夜孜孜毙而後已因答来教辄僭及此亡弟圻记一本就纳过目必为惻然春和切望撑小艇访我於花外当同作径山洞霄之游余冀以斯文斯道珍眚

上邹都大书

某尝闻天地之间有常事人之一身有常职学也者所以事人事奉天职者也化民善俗非学不行入政莅官非学不治裁事制变非学不决然则学之於人也其所关系亦大矣昔周大夫不说学而闵子忧之以为上陵下替能无乱乎夫春秋之时去三代尚未远也当时列国君子如郑侨之知学晏婴之知礼韩宣子之知易叔孙穆叔之知诗延陵季子之知乐菁菁然学问气象参错着见於时者尚为有人也一原伯鲁不讲学何遽至於兆凌替之乱哉盖天下之事兆於无形而能制有形者学术是也自入春秋道与政为二途而理与事为二致天子不议道诸侯不明理士大夫不讲学庶人不敏政周列国之望也而大人者曰可以无学则道术分裂而祸乱日相寻矣可不惧乎是以君子必贵讲学今夫武人悍夫强梗难制威之以兵则弗驯惧之以势则作敌至於见仁人君子一言之诚一事之义则往往感泣而愿忠投命而下拜此岂有他智巧可以屈其力乎俎豆既修则军旅之事潜寓其中教化兴行则凶悍之气冥然消弭泮宫之诗曰顺彼长道屈此羣丑小雅之诗曰君子如祉乱庶遄已衆若非长道之能屈而乱疑君子之所不能定然竟能屈丑已乱者盖学问之力也执事以天授正学崛起南方实践真知见于有政自登蜀坂驰使车崎岖险艰备殫劳勩盖二年於兹矣方敌兵之来瀕洞深入益冒濒危仅一栈道而执事能凝然不动以镇安军民援师一来敌竟却去及叛兵之起朋伍骇乱缙绅被祸极於惨酷而执事能挺身干戈不屈威武凶徒相戒卒不敢犯夫内寇外讐皆不可以礼义弭也当时勇者不敢当其锋怯者不过避其銳执事一儒生耳诗书礼乐是习道德仁义是修寬厚长者是处然敌至而反戈贼来而革面譬之凤麟高翔羣狡率服者此非有学问定力能至是哉虽然元济之平蔡人不知上下之分久矣而裴晋公借一嫪以示之囊鞬礼行观者皆耸天下之患狃於所习而转移之机不可不新其所习者也蜀自近年以来纲常陵夷名分隳替将士不知阶级之礼军旅浸无纪律之法含忍混贷殆为故常而孽萌疽根转相仿倣遗祸至此欲一洗而新之其必由学乎今执事奉天子命牧御全坤共二师屏而某以占毕诸生适掾文学此六十郡观听之始也执事倘不以某不肖与之讲学以劝化齐民使平日礼义善物孝弟忠信吉德有以习其耳目而柔其体肤则民知尊君亲上不敢觊觎守固攻克效死勿去虽间有强悍弗率亦将闻风胥动消其暴戾於冥冥之中矣此岂非今日第一事哉昔张忠定之始镇蜀也均乱甫平学校颓替公不急急於弭乱而乃留意於兴学有刘式者服勤师说精通大义遂自撰牒辟充州学教授而蜀之学者闻风远来其词曰兴邦教隆世礼莫先乎六经率天爵臻人极必本乎四术事固有相感而不迂者执事倘留意焉则礼义之宫名教之地文翁高卧之室必有刘式者扶道植教兴世礼立人极者也执事幸无忽

上应都大书

某闻之昔者圣贤之论为政不曰才力非以其人之英迈勇敢不足以办一世之事也盖事物之来必有联络管摄之处而应事接物之中亦必有经纶主宰之妙使吾方寸之间湛然清虚精一无二则是心也如火之炽如泉之达斯足以制万事而宰羣物脱或不然良知之苗裔方萌物欲之攻取滋甚听其与物流转而惰慢之气又从而乘之则神明无所舍而其弊有不可胜言者矣然则舍讲学何以澄治之哉尧舜禹天下之大圣也以天下相传天下之大事也然其授受之际前後相诏不过危微精一四语毕命一书康王之精神在焉毕公之文献存焉而其所以训迪殷士至亲至切者亦不过曰虽收放心闲之惟艰逮至春秋兹学之源流犹未泯也子产列国之大夫也当人欲横流之冲而独能别识心体之正其言曰朝以听政昼以访问夕以修令夜以安身於是乎节宣其气勿使兹心不爽而昏乱百度此在孟子即是夜气在周子即是主静在程子即是主敬在谢子即是常惺惺法在延平李氏即是洒落处在建安朱氏即是天机活泼虽发言之章指互有不同而要其极则皆收敛齐一不迷失其本心而使为事物之主也执事平日所得其得诸此欵方象山陆氏倡为即心是学而婺之士曾无一人遡江以西其风气盖已淳矣执事者又自东莱而参之考亭者也学问之本末行己之桀度某固不能尽窥其秘而得诸朋友之所闻盖知执事以中夜之气看道心以平旦之气看人心以性之静者为心之本体以情之动者为心之感发以如保赤子心诚求之为与人一动静循环体用该偏执事之学亦可谓讲之密矣某也少尝有志於此而学力不强静不足以君躁敬不足以胜怠恹恹然如大军游骑四出远而无所归岂期末路执事移节西川而某以留台未至之宾实执见贤之贄苟惟随俗俯仰以浮道阳相尊而不求所谓审问聚辨之益岂不罔乎为生哉此某所以宿戒豫斋欲以心源之所得而参同於宗门也呜呼心一也以尧舜三代之所存者而存心则其心活以春秋战国之所亡者而为心则其心死日知其所亡而夜无忘其所存则心之本体昭昭具在虽以此通天下之志成天下之务可也不识执事以为何如幸诱而诲之

答严子韶书

某比承贤主宾联璧见过吏尘不清简於延待弗克久驻车马此为怅然耳即日冬序晏温喜聆经纬隶习德履休畅道丧千载圣远言湮濂溪周子河南二程子横渠张子倡绝学於衰世之中相与发挥孟氏以来不传之秘然其讲道也言质素而不华理平淡而无奇微开其端而不尽发以告人盖使学者怡然自得之也至武夷朱晦翁紫岩张南轩则句句而释字字而解精微妙密之蕴盖已抉露无余矣兹承下问犹以无极为疑致知力行为二岂其於朱张诸书犹未究极其说必欲问而辩辩而知耶太极之理亦妙矣涵动静生阴阳二气五行四象八卦皆於此乎演出方其未生也犹人之怀子子在母中及其既生也犹人之生子子在母外流行发育之妙化化生生之机於是乎无穷矣然是理也无声之可求无臭之可接无有方所形状之可见是以周子必曰无极而太极盖明太极乃无形之理非有形之物也晦翁披剥图象义理极是章明而南轩释之曰莫之为而为文势亦顺说者犹谓无极二字不可搭在太极上大传言易有太极而不曾言无吁此不惟不见太极且不知易矣易者无方无体者也而云有太极则无极而太极之理明矣圣人着易字於太极之上亦何尝以屋上架屋床上叠床为嫌哉其如知行之说兄以学者之病穷格汗漫墮於徒知徒闻之地而少有所谓真履实践之功脱使真知验之躬行率多悖戾则兄又误矣凡躬行之悖戾者皆未曾真知之故也知与行工夫本互相发始条理终条理如人两足相先後行不可偏废知之明则行之力行之到则知之澈

是知常在先而行未尝不随之也兄乃以穷格为汗漫而必欲从力行处下手格物之功未至而疾行之心已先则将恐於义理中有不中者矣秦汉以来岂无志於力行之士行矣而不着习焉而不察擿埴索涂莫适所依卒背於中庸不能与入尧舜之道是殆冥行而已也行之惟艰之言盖不谓此高宗旧学於甘?则发高宗之知者甘盘也传说之告不过欲高宗行其所知而已矣看经须是参互出入首尾融贯当自脱然有警悟处中庸曰博学之审问之慎思之明辨之笃行之学问思辨居其四而行居其一某仍欲子韶从致知处下手已知者则力行以终之未知者学问聚辨以求之如此则谁得而御之哉对客之暇随笔疏去未免挂一漏万有疑不妨再指教

又

某伏自神泉道别寂无音驿之问共月万里於我良朋岂不怀思即日秋炜正浓喜聆里居侍亲德履休畅河洛辍响斯道荆榛武夷朱先生发孤昧於朝阳洞析微义以告後之学者不但数千百言而已圣门路长良朋难得钝者既难湊泊敏者又不耐烦脱有英才间气生则溺耳目恬习之事长则师老儒崇尚之言未识圣人心已谓不必求其迹未见君子志已谓不必事其文冥然被駟浑不知觉此吾道所以孤行而有志於斯者必欲羣居相与讲明而求为至当之归也子韶真能办得担簦万里访寻文公诸书且徧谒於其徒既归而求之复以所闻见於东南者会萃为一编以验不令兄弟子之志则勤矣教授叶文自是宗门中的的正传笔之於书化之於口固已纯熟不同如器之陈县丞於知行一说亦然分疏得明白其论司马温公有见於正心诚意未见於致知格物白没了大学发头两章唐自韩文公作原道已脱漏了致知格物一段其言曰正心诚意将以有为也是虽能掇一时佛氏之害而不知已躐大学之等若只从正心诚意处做起而不向致知格物上发脚譬犹人之行路不识路头而便欲从半路里截去其得免夫颠冥幸矣向来与子韶说几多而犹以此发问於人脱使真知验之躬行率多悖戾此何等语不意子韶未之改也见得来子韶日前都是看知字轻了才有所知便不能涵泳乎所已知突有所见即不能推极其所既得温燖紬绎之味少融会洒落之功不至所以怡声下气终见其难疾辞遽色未免间作原其病根皆生乎此盖不可专罪气稟也行道之人苟知爱乎其亲悌乎其兄尚或能之岂有秀於民者而反行道之人不若乎昔者某兄弟亦尝以怡名斋矣养不逮乎其亲而同气相属同堂相好一如父母俱存时相似怡怡融融虽友生不能喻其和妻孥不能比其乐但见只是天分中事易知易行不知子韶如何问一怡字有许多说话甚莫晓也夫所谓学问者不徒学也而问亦不可苟焉易才说学以聚之便说个问以辨之中庸才说博学之便说个审问之论语才说博学而笃志便说个切问而近思问之不辨不审不切者皆非学也子韶既获与朱氏门人相接从四书中尽有大纲领大节目三数条可问而问其所不必问等闲蹉过是则可惜耳边声时摇军务未休横渠所谓委之剧聚以验其勤暴之边冲以观其略正是时也而某咸无一於斯有所警教不惜因北风时惠好音

又

某堕迹红尘市中闷然不见已缺每四方朋友相与讲学既切矣而又磋之既琢矣而又磨之时发深省勉斋既下世宏斋继没毅斋槁立于婺女之滨罕与世接留宗庠者仅叶六十四丈

一人担当考亭门户呜呼亦微矣有志乎此学者须是完养思虑栽培义理不可先起求成之心孔子所谓获孟子所谓正政此病也如子韶拙藁与四书讲义其间文字尽说得去但发得太轻便欠深醇醲厚之味要是此时节只好讽咏尚絅之诗可可也立斋自谪渠阳後学益造诣文益和平不可不审之季永弟恃原而往进进殊未已也近方识唐彦祥其人颇能用心科举之外他时必有可观因舜父之归占答来教不暇详述所怀耳余祈为天下宝珍悵

答吴道夫书

某间不上起居状倾向之怀想亦同之比闻读易北窗日诣胜处但不知从何处下手易变易也上下数千载惟伊川老先生断得此一字分明盖谓陰阳相磴日月相射昼夜相承死生相代其大纲不出乎此後来或以玄测或以祲传或以余气言或以破体言或以飞行流通看虽支辞蔓说亦不过从其动者言之独关子明颇见理有云天陰阳半人善恶混然阳画六时晓昏皆为陰所侵其用事惟四时而已易卦六爻初上皆小位之正其用事惟四爻而已此所以善人少恶人多治世少乱世多亦可谓易之精深有关於世道者也不知道夫有取於此否乎东臯子来出示二章且知传经之暇诵诗读离骚时复游戯於酒垒棋局上环视区中之人皆坐我百尺楼下矣某亦留意书传有经史互考有传注订义有分章有断句有缺文有疑辨有帝制王言体有天文地理说絶不用诸家解法工夫宏濶弥年未就他日脱藁则幅巾藜杖相从於云水间当求以莹所疑也九日怀贤辄遣白衣人为壽康尊风味不减桑落蒙赐领采幸甚气序薄寒愿言冲辅阳机以人物自爱

答任子嘉书

某造朝之初程叔运来中都具言子嘉居家好学其所得者跃如也一句某闻之惊愕日子嘉顿与舞雩咏归千载同乐耶若尔则百圣之户庭荒矣旣得来书乃云再取六经字字而读之於圣贤用心处粗窥一二则知前日之所谓跃如者莫是於读书时有会心处否於看义理时有欲罢不能处否圣远言湮士学疎莽钝者既难湊泊敏者又耐烦譬如园夫灌花须是株株而灌农夫之务去草须是根根而锄若以莽卤灭裂之工而祈浸灌梳栉之效非善为圃稼者也子嘉读书之志谅必有见於此但未审窥见圣贤所以用心处果能真见乎否也真实之见与摸索之见得皮肤者大不同格至之知与约略而知得些小者大不类百世在前圣贤之心炯如一日试为我书其所见者何事明以见告庶几交相益也且今为字民之官岂弟君子民之父母此二句作如何说并示标月之指其如名誉之不闻此自朋友之责不待丁祝暑候正祥愿言讲学自爱

卷三十一

<集部,别集类,南宋建炎至德佑,鹤林集>

钦定四库全书

鹤林集卷三十一 宋 吴泳 撰

书

答吴毅夫书

某自祖王人之车于红船翠蓼边曾一再书矣都为人作活计不能输此衷曲耿耿怀思但随落月照锺山也世谓以儒名科者不应烦之生计噫误矣大学曰生财有大道生之者衆食之者寡为之者疾用之者舒则财恒足矣是善理财者莫如曾子孟子曰无政事则财用不足是善丰财者莫如孟子盖自吾孔氏以来未有不以此发身者而况状元及第必历三司使国朝自有典彝在也大卿孤寒翰墨之林拔脚风尘之外心事荦荦直与文墨偏长以议论为功业者迥不相同此某所以始而疑终而信终而敬且服也微之去国言事者絶少馆中惟黄成父颇相好它时风力担当不在诸贤之下本仲亦早晚赴阙矣屋矮暑蒸如甌曷日良晤煮茗谈碁歌文公之词使人和之

又

某比答槩海忽遽甚矣就使不忽遽亦不能尽所怀也凤山之下林深树密花落鸟啼溪洞活泉??从松间流时有一二道士能鼓虞舜南风之弦弹伯牙高山流水之操其幽幽可以适体其黝黝可以观妙若有买田筑屋之资便可从老农圃种田艺瓜作终焉之计而兹事卒未能也毅夫竟肯来说半日话否每得小儿书闻以某去为身忧固荷朋友之谊但恐行止有命弗能强人之从袁尊固访山间说陈计议者就湖州卖已新屋置丁氏之屋岂方伯耶若尔则就往僦居何如或得富彦国司马君实诸公垂念尧夫直以园契宅契户庄契相示则尤为之望也付之一笑道夫过金陵省季永之病於凤台劳问极至凡今之人莫如兄弟旨哉诗人之言儿子亦不欲令久留都城或欲拜见勾谓之进

又

某顷承回槩极感相於之意山间久居动辄成趣林水静深絶无暑气与琴宜松月高朗清风徐来与鹤宜云亭雨观户悄人疎与碁宜河柳不种自生水花不植自富与诗宜却缘儿辈时有书来未免薄恼怀抱邹枢胡为勇去直翁胡为请告欲归稽山胡为召宝庆间借君臣大义以鞭辟善类者胡为复见之论奏火胡为屡作不止兵胡为谗语未宁贵要之家胡为搬动行李以为民望此何景也须是别作规模唤几个人归来降心商量方可龟山故事便可推广此

事望毅夫力贊庙謨之決某輩只因多言掇禍今又不能自禁輒与宗文及之旬勿广

又

某比者使人之还尝飭一笈以答謙施計必上彻穹覽宣歙間大雪浹旬深者丈余淺者盈尺川陸為之路斷米不入市薪刲價益高師人多寒細民艱食為之邦侯者只得痛自剋責發倉廩粟支歲寒錢米以千計錢以萬計甫得濟活幸至無事隨分燈夕又与之作好春矣詩牌云半空霽月天公眼一點華燈太守心此其志也設廳下又有四句鵲岸雪消金柝靜鰲峰春到彩燈繁時人不解邦侯意將謂痴獃作狀元此其興也燕同官及尚中兩詞就錄請教幸賜標月之指道夫近相聞和賀新郎水調歌筆力稍壯舍弟自去秋過此痼疾乍作乍輟比因風雪冷氣冲搏疾逾甚人豈知果真病耶毅夫近按吏鄉人之好事者又謂曾經商量冤哉某已四上祠稟期於必去草此占叙悃悃愿言順理三陽珍馭氣以輅新渥

又

某一年不享音思心弥結以某懷毅夫想毅夫亦拳拳於某也客有自雙溪來者竊知尊兄觀書靜閱羣動晏晏守道不以榮辱欣戚嬰懷狂士豪徒亦少接納此自可清心省事想學問如大川之增如長日之益而莫能御也某閑居寡俦以一日之力分為十八分讀圣贤書一二分應酬朋友所干文字率以為常盡有樂處第西州士大夫以官為家罷則無所於歸瞻烏爰止于誰之屋斯世又未有如韓魏公為石守道買田庄司馬溫公為邵堯夫出屋契者只得力學守貧柴立於其中而任運也久欲相聞以病?症數月入冬方有起色拜此草草愿言冲輔氣機以斯文斯道自愛

又

某間者不遺枉賜書教辭丰誼渥愛踰骨肉以某之懷毅夫知毅之亦拳拳於某也進退出處大略相同更不欲深為毅夫道似聞論語衍究久已板行頃蒙教序引極為平正友朋有自四方來者略舉數條却未詳其義想深居窮理必有精到曷不綴一編以開警未悟耶某考訂書傳六年于茲矣前乎望刊定之聖人而不可見後乎顧習傳之學者而未有得兀兀於殘蒲朽竹間而欲窺姚姒敷周周公仲尼之蘊亦已難矣蓋書最難看又難全解缺文當考分章斷句當考今文與古文當考小序與大序當考帝王之辭與史氏之辭當考注疏有直見理者有極害義者諸家解有造平易者有傷太巧者當考其如天文地理歲月日時又不可不細考也林少穎解只到洛誥而終呂伯恭只自洛誥而始朱文公解只有虞書三篇周書三篇今人解書盈箱滿笥此某之所深懼也所以歷年滋久而藁未脫用心益勞而功弗就安得一簡而釋此千古之疑哉歲月易來佳朋難得石酒伴書相聞姑見遠意余祈以斯文珍翬

答李微之書

某間不上起居狀比從令弟在史轉示寶帖熟窺仁誼之言度越畦畛之外近見尤伯晦說鷄

馭久留池阳方此西遡芦花荻竹之浦不致落寞否蒲萄涨肥却可到江陵度夏也紬金匱石室之藏游紅蓮綠水之幕归兴亦不惡矣朝廷見行下館中令尽以宁考会要三百卷发付以待鴻筆纂修次第悉如大着之請也某六年朝列半岁五迁已为侥幸而正兼詞掖則尤侥幸之至也平时于文字間不敢不勉而又有封駁之職比?还許俊承宣使節度使檢校少保駁論梁李降官之罰太輕公論頗以为然不审?章亦經書月否和仲之出毅夫之罷左史計必報去詹叔將漕金陵为况極相安舍弟在荊州必得胥會幸趣渠早來兄亦欲援更迭之制持一麾而去也欲言如海挂一漏萬愿言輔養神明之舍拓開久大之業

又

某咫尺門牆少踈拜狀盖秋來一病弥三月不愈近方有起色屬服剛劑太過胃廩之官虽健而魄門之癖間作岐黃素問書陶蘇本草注今犹未离几席也侍郎抱國史隱於南山之下揆諸公論負屈稱久矣作宋一經舍鴻筆誰屬且晚須奉京祠以終其志耳某屏居一年讀書亦粗有緒嘗以为文定胡公策進士四十年任官實歷不登六載文公朱先生歷仕四朝几五十年立朝止四十日仕於外者仅九考所以得此歲月之暇能讀圣贤諸書光明正大卓然立於天地之間名之曰人某六十二翁矣瞬息光陰更不堪把玩若复悠悠憤憤不倍用其功則將起初平无及之嘆而墮於小人之归矣甚可惧也膜外榮辱又何足嬰諸懷哉本欲相与盍簪歛論名理來往極郑重薄禮姑餞岁華余冀精护鼎飪力扶泰道

答李成之書

某去冬中川上狀今复星岁改矣前此聞尚書去國复还寓里意謂撐舟渡月過蒼溪來可以得一番會晤物色久之而桴音竟不聞矣尚書雅淡冲夷靜觀羣動讀書精舍老兄弟日各相講磨想必有進學之益孟子所謂兄弟无故一樂也某自罢守來归則无此樂矣嘗取典謨訓誥誓命之書讀之亦欲向上作少工夫盖此書竟難全解只如屋壁所傳与口授不同諸序所記与經文相舛帝王之制与史官之詞舛難辯篇帙之离合章指之同异歲月之後先地里之遠近又或有缺文有疑義有斷句傳注有理到者有全害義者林少穎洛誥而下已非亲作呂伯恭洛誥而上亦多出其門人所記此都着整頓拈掇出來浩浩難下手不知年歲之不足也向來隆山先生令兄郎中与尚書俱为此學苟有精至處无惜下教甚欲一見审問明辯而天寒岁晚矣薄禮聊見鄉風余几珍护气机竚登密地

答岳肅之書

某伏以祥雲齋雪媚此章月恭惟坐都賦輿春滿淮甸泰元媪神槩相台候萬福某生長東蜀不識東津面母得片紙妙墨洗刮千秋之塵數行麗詞抉出萬寶之藏則因其書可以得其人得其人可以見其心矣俗流化敝人物衰少政厖土裂太音不完工於翰墨者必不閑於政事精於綜理者必不贍於文學以儒飾吏事者又必不能測識軍戎萬里之情侍郎精神而醇文墨而吏胥中有數千百年南北巧攻守樣子而沈潛韜晦其与書生仅習偏長縮縮如束長竿者大有迳庭矣但諸葛孔明當經事綜物之時而文采不艷過於丁寧陸敬輿於遠近調發之

日而书诏若不经意动中事会更望侍郎以孔明敬輿事业自任则文藻余事益浩乎其沛然矣某猥以晚学丞于秘林学殖就荒笔花不润朝绅间每说侍郎有数种书皆人所未见久欲拭目一观而未有便偶因临安洪兄之行辄就委之洞扣青囊之钥惠肯赐教它时有得焉则不敢忘所自也洪兄名勲字世鲁閩爽而秀旧识其父子於岷峨之下乃翁自拜书家食之久甚可念也晓窗乍晴拂寒云扫残霰崖略布此上几护太白之璫宿疏黄之鼎竚听履声切星辰而上某忱扣

答蔡遵父书

某比从三衢士友得知靖作状间藩之始训齐吏偷抚问民隐纯以岂弟为政某每笑俗儒误讲岂弟二字大而为州小而为县一向寬弛纪纲不立教化不行遂使贪官健吏目吾人为书生不了官事冤哉吾道之不明耶岂以强教弟以悦安本经正文元不教尔寬慢放倒而後为岂弟也遵父其得之矣良贵去国之後遵父得郡而出景仁和仲屡丐外而未允某後日再请恐径可得归也向来三数朋友鸣一时之盛弦絕响息未有继者荃蕙化而为茅兮兰芷变而不芳风俗移人不可不强自树立如来书所谓立朝大节当使凜凜可观由衷之言一本诸道而时不与焉盖同此语脉也仙里叶六十四丈竟是学问有本数日前出示近帖亦复论至此为之慨叹某灾患遭连书问停废已久但世俗之礼一不相酬答便以为背教伤义惟是五项起头之割施於故旧殆似浮道阳相尊者仍用归纳切乞原照浦城令兄一书至今方能报去亦不暇治择笔墨甚草草耳

答方齐英书

即日夏气清淑伏惟袖昭文氏之琴玩心圣处相在尔室台候啓处佳福某交四方之士久矣荆江风雪中小车从花外来遂得交幕府之彦暨游中都又复盍簪餐秋英之初落啓夕秀於未振真退之所谓吾行天下得此於人盖少也道丧言湮才识不竞闇识者既难窥藩皎厉者又不由户粗有一知半解者则悠悠梦觉之关而无大警省知县於天命流行之间而洞见着存之理某何敢不以古人期之但圣学路长卒难湊泊为善之事切须平居讲贯令本数未度密无罅缝则它日临事必不至错了路岐舜之所以孜孜顔之所以拳拳正为此也若必待居官接物而後相与商订为善之事则将恐善利杂糅而决择难工夫不接而德性懈自县而州自州而一道又将欲大有为也则何以哉义理无穷问辨无斲区区之意非为它日之为善更不必商订也盖只欲就此时完养思虑栽培意脉先使邪气妄念无一毫夹杂於其中则举而措之天下其为善之功用岂不滂沛也哉某久玷周行曾微补报尝爱横浦南轩二语书之座右盖以为观大节必於细事观立朝必於平日平日趋利避害它日必欺君卖国平日不能犯顔敢谏它日安能仗节死义以此体段常存於心庶几不至为小人之归所以轮对二篇应诏一书亦随分说得去不谓副草已洞彻书月也既切矣又磋之既琢矣又磨之正有望朋友之规勿爱於言幸甚自余仍乞以圣贤事业珍毖

答王成父书

某伏自去岁从合阳答来教之後遂下古渝日酣於欸乃声中虽欲摘兰茝以遗所思亦无从也夏中伏领宝帖襟仪洒落见乎其辞鄉邑得茂宰悉意字毗絕以岂弟为务二年民安之但岂弟二字世之士只一滚作慈善看了岂以强教之弟以说安之不但安民便了必也扶道植教俾斯民兴於礼逊然後尽吾所以父母斯民之责不然则徒善而已矣成父当亦领解於斯也某缀迹周行已十月矣轮对尚在来春之莫宿斋预戒充积诚意久矣朋友责望不敢不勉是间文公先生诸弟子如叶文知道郭丈德元吴丈西庵度丈性善时有过从讲磨之益方京华车马如雾而每与三数公作冷淡生活澹则欲心平和则躁心释以此存主得定沽名好官职之事都不能犯吾之关也成父以为何如仍冀讲学自厚

答蔡達父书

某顷被融风为恼继遭台评灾患遭连曾不宁止闻报之後即径往凤山待罪圣恩愍大不加黜汰初二日晚既降予郡指挥二十一日又被宝章宁国之命罪戾之人不宜冒昧居此已连疏控辞必祈於得请也山间閭寂絕无暑气每风轻云澹花落鸟啼滴露点周易焚香读道经颇有佳趣又一二道士能鼓有虞氏南风之琴歌离骚大小山之操其幽幽可以处体其窅窅可以观妙若有买山之资则便可筑数椽於其侧与山农溪叟种田艺瓜为终焉之计而兹事卒未能也京城再火国力既屈边声一动兵力又单诸贤何以为策是间极僻黜陟俱罔闻知或朋友访来粗能言其梗?独吾達父素非生客一字不相及何耶海内人物絕少今卿月既高公论赤帙往往亦责在阁下切冀发扬蹈厉无日饮西湖水作不鸣之鴈乃所深望纸荒笔稿占报不庄上几以天下之宝为天下珍毖

答郭子寄书

某端平更化初获接服容观玉声於振鹭庭下违去道德倏又五年有斐君子终不可谖兮未尝不寘此诗於怀也某山野之人少知世事六月间得邸吏报状见御笔新除两谏官除书一颁识与不识莫不为朝廷庆得贤之喜京师竞抄谏疏以流传下邑遂得与舍弟拜观言论侃侃风采谔谔人心道心之论阳明阴浊之说圣远言湮道衰化敝幸得正言复体贴出来至於覆鶡巢以来凤凰耬萧艾以植芳草此则又言人之所难言几有动摇山岳之力盖学自伊洛中出者其渊源议论固自不同也然尝读国史士之学古怀道者不为宰相必为谏官而移孝以教忠者至谓欲做谏官不能得盖式讹尔心以畜万邦其所关系甚大只缘大人格非之学不传惟有诤臣一路可以行志比又闻一再抗疏请祠何为太蚤计耶庆历中孙之翰等因劾宰执不下相继引去仁宗从容谓甫曰卿等言一不听则求去令朕逐言官各自为计则善矣如国事何元符间邹道卿以谏官闾得罪自谓其言为戇田承君正色语之曰愿君无以此举自满士所当为者未止此也方今坎离失位泰否反卦其所当言者甚多劝行好事以迓续元命力扶善类以培养寿脉小言入则受小利大言入则受大利正言岂宜一日轻去朝廷之上哉某一摛岁余自知学力不充无以孚信上下只欲潜心伏奥穷理修身为究竟法忽今月五日误叨进职予都之命恩出望外拊心若惕岂非端人在位有以阴扶密护不使之终弃耶不作帝城书久矣念不可无一字伸贺谢之悃书不尽言所冀护好贤之衣宝击邪之笏以昌公道以康兆民

又

某比者春中飨笈用敬讎已关彻书月兹覩除书承知陡下言坡晋跻柱史拾遗失一谏士虽无龙墀扣额之风记注得一儒臣犹有螭陛直前之路未须引去尽可摠忠右使英名姤节已在水黄河之源山泰华之顶矣蒙泉而出之以时宿火而達之以壮犹不能不望留功名作久远看也某自来东嘉适值歉岁悉力招徠除某与同官捐俸廩劝分外其朝廷科降度牒仓司分拨米钱一文粒皆实惠及民今排日赧济度可至六月终今则麴麦丰登雨阳时序秧青水白当有一稔之望生平精力尽耗於此重以鵠原之戚外景与内心相触百念灰寒恐废郡事更望於吾君吾相之前力赐一言令某早得脱去不胜至感余祈珍芍药鼎飭芙蓉裳以竚两地之拜

答徐茂翁书

某曩在宣城曾得一番交讯罢归寓里翳然林泉间一字不敢通帝城书虽厚禄故人音问亦废夏六月忽闻御笔除两谏官亟起而视黄纸除书则元直林宗也公道宏开端人进用不但为吾党贺为天下实贺後一月朋友间传示三疏敛容读之司谏平时清谨恂恂似寡於辞今遇事当言风节坚劲议论切直无所避真得谏臣之体王沂公尝谓韩魏公曰向来台谏官如高若讷辈多是择利如范希文辈亦未免近名近日频见公章疏只如此可矣如此可矣云者某犹以为未能窥司谏之所止也官以谏名立殿陛与天子争是非辨邪正乃其职分昔之小人尝以朋党二字倾忠良今之君子多以心事二字被诬谤国朝名臣如程天球欧阳永叔苏子瞻周子充皆不免受此名况它人哉不是谏垣献纳经幄从容於上左右深明而力辨之则将恐仁贤见忌於蓄疑骨鯁潜消於积毁虽有正国致君之心亦何自而達耶殿讲司谏计必垂念於此否某自奉祠官深居退省诵衣锦之章絕不以文字语言求闻達於世比恭甫登用公甫引去首闻司谏以词翰称誉於诸公间良荷不遗故旧之意虽学植槁落不足以仰副盛心而起家予郡越等进职意者亦由拂拭游扬而致斯哉某丞外府时昉识司谏在郡从之先今既得路亦不能不藉一云之终覆也草此申贺并述谢悃所祈護太白璫毓疏黄鼎以栋吾道

答赵茂实书

某春夏间常得交讯居闲成癖一向不复嗣音中秋五日夜读黄纸除书承闻疏恩凤阙寓直螯扉斯文有光吾党增重犹记往日茂实与某评品文章载南塘语谓自六经左氏国语外至西汉而止又说某料子不曾夹杂晋唐而下草料是时已叹服英猷卓识迥与缀文之士不同一举而为南宫舍人再迁而为翰林直学士固其宜也大抵文章只要古履常法度宗王介甫景元辞气似欧阳永叔盖自西崑剥落後欧王两家实为近于古茂实於此稍加意焉前修不难到也某闲居寢久兀兀一经今已穷年粗有一知片解更不复为言语词章比又叨误恩除阁予郡见具免牒万一未赐允俞只得先过东阳望玉堂如在天上所冀殄沆濯毓清明厚自珍毖以听金莲归院之诏

答唐伯玉书

某暮春送客於清湖翠柳边今又见荻花风矣每怀濬发英猷脩伟节候鴈北飞所以望君子正也时事岂无可言向日诸公但言君子小人消息之几今此便可破口说君子小人消长之决此亦是个说话只在翻转使耳欲言如海挂一漏万会景仁詹叔诸丈引诚余祈为道体珍重

又

某比者外甥入京待试辄附一笺申述起居之问计已关彻省槛得邸吏报承知襆被直郎官省提衡当吏部铨冰条甚清华辙益峻每闻持左铨当以严典右铨当以宽严以窒贵要请托之门宽以开羈穷厄塞之路於斯二者而用法酌情则得其平矣子正以为何如蜀中闻又有遽报劔阁开達之寇头势颇重益梓夔峡间恐又如沸鼎矣每思东坡手帖云岁猪鸣矣火炉上烧骨头煮血青自有一种泰安风味今那复有向来时节感时之泪不觉迸流重之以兄弟颠连亲戚离散积忧成疾几旬日不解随分又有官事如诛斩逃军放释罪囚减价粿米增钱充会皆不能不费酬应兹岂养痾之地哉屡上丐闲之请诚出衷曲若就早得去不致委於司败幸矣扶惫相闻愿言清明厥躬竚有亲擢

又

某去秋因恠推官人便草草拜状并以答汪尚中复卦动静说求教回书示及刚反之谊更圆亦书之一助也子正经明行饬学易书年工夫自有诣处今不远数百里録示婺源记文且云尚未分付指诲修改地中有山谦子正实见於行也性情义理之学人皆谓二程子发之而不知自胡安定石守道孙明复以来已有其渐古文之学人皆谓欧阳子倡之而不知柳仲涂穆伯长诸人已近於古文以理为主体次之学而无统则悖言而无法则支而古今文人学士见诸纪载者不知其几而文公独取古灵先生天台孔子庙记曾南丰宜黄及筠州二学记盖华藻之辨易工而义理之文难好也至若文正公子陵祠堂记胡文定父子极所称道而文公独疑先生之心出乎日月之上光武之量包乎天地之外未免伤粗而不密栾城晚年作待月轩记自以为见理最高而文公独谓其轩是人身月是人性未免假外而合内东坡文字任气有疵病处最多安南学记说古人於射时因观者羣聚遂行选士之法却似因人之聚场命之以作角觝戏无甚义理苏范尚尔岂可以易心临文哉矧如朱先生祠堂文许大题目使某辈当此笔也须是浸灌义理根极体要将文公所说古灵先生曾南丰体段寘之胷中又须观文正公东坡栾城疵病生在甚处养其膏而俟其光耘其莠而望其实虽然如此犹不敢轻下笔本之以黄离尚之以白贲体之以含章之坤顺之以养正之蒙博之以畜德之大畜韬之以用晦之明夷原头上浹洽则流之所出自霏霏莫能御矣此皆先民教人之标准某辈常遵守而勿失不知高明谓何台谕谆谆仍以朱先生所论记体答来教幸赐勿罪自余切乞为斯道斯文梁栋自任

又

某去岁东嘉交讯之後邈不嗣音中间承闻祇召入京陞华粉省都弗克申述贺语然与四方朋友未尝不同致君子得舆之喜也子正行高而养粹德新而理明玩心黄中观象白贲眎世间华竞恬不以婴怀再潜于郎不审曾登对否积诚意以格君心主公论以扶国脉度必有可观者然某尝谓与其遇于巷而无咎则曷若扬于庭而有厉为光明也前时陈叔茂曾拈出明夷左股一段援引颇切而发明未莹後來颇以某之言为然不自揣量动辄搀行夺席良可笑因笔及之某治郡无状一年之间吃尽辛苦赈饥恤荒髮为之尽白其如蠲夏税放秋苗置裕民饷军两库粗有益於东嘉而终以罪去平生所遭类如此更何敢尤人耶侄辈为亡弟请于朝葬荆溪且欲庀墓二年然後议所居止某势不容不暂回德清也偶因问及道其梗槩良晤尚远更乞冲养道腴竚登经幄

卷三十二

钦定四库全书

鹤林集卷三十二 宋 吴泳 撰书

答罗嗣贤书

某去秋八月访寻碧梧翠竹之游文闱已鎖醉翁矣霜月之夜细敲棋子空落灯花怀我良朋莫适其愿迨理行舫东去又弗克干一语为标月指怅然而已府教学宏而诣文丽以则每见之词翰间清腴奇峭殆欲谢朝华之已披啓夕秀之未振眎某辈学植之槁笔路之荒大有迳庭然探黄离畜牝之旨味中庸尚絅之训昔之圣贤所以修身立命体受归全自有可尊可贵者任而直不以文字语言为事业就文字中言之则又当如清水出芙蓉天然去雕饰而後为至也向来兄弟亦好为文词粗识减字换字法今年渐长看来都靠不得日夕戒谨恐惧实惧为宵人之归故每读一书必择紧要用功处潜玩体索令帖着身上来盖以我观书则随悟而有益以书博我则释卷而茫然此理甚昭昭灼灼修之家庭用之天子之廷不过将此体段充广去嗣贤所谓幼学壮行之诲大约其谓此耶浙西春水浙东夏旱梓遂与西州山鄉一带多有流民淮风益肆横天时人事如此忧端无穷大游与五福太乙之说更须详推测下成都教授元有一任回除学官指挥试检寻见示恐或可饶舌也自它更冀为天下之宝珍毖为请

答文子舟书

某夏中伏拜手帖方谋奉报而剽闻敌骑已犯武休矣寇之始至也宾师有去之道自与他人不同独是音响昧昧略不闻撰屢消息心窃忧焉後来得兄弟朋友书则知还定後已即回汉中但不审学舍亦遭焚毁否耶崎岖戎马之间讲明俎豆之事此一难也当世所急者长枪大劔所问者刍藁糗粮而子舟衣缝掖之衣领青衿之士弦歌是间此二难也诸道惟东军易溃溃则叛叛则招招则骄利为寇而不利御寇子舟虽欲受出征之谋歌献馘之颂书破贼之露布何可得耶此又三难也积是三难都无一可谁不谓子为迂然尚有说副使举动磊落杰特子舟倘抱经济之胷直扣军门以半策干之度必引为上客此则鄉人所属望也朝家每忧西头事重旦晚必迁动一番却当延誉陆续稟闻尔某仕材答飒秋初忽叨秘馆之命後两月都城火应诏上封事未免又贡愚言较之轮对觉得更踈直也世间事不言则已言则升湛进退直扬下一边安能如騃人痴子不明不了长居户限上耶良晤尚賒愿言宝此令名以时自力

答程叔运书

前年敌骑入洋川曾草草一笺访问生死道塞地梗浮沈不能悬断去春有贾人携鉅絨而来已惊喜过望今岁又拜瑤墨廼知自洋而汉自汉而复之巴山其为兵间困苦之状盖有史册中之所无者疾疢所以生慧忧戚所以玉汝安知患难流落不以老吾叔运之气耶叔运嶷姿山立论事泉涌运笔飒飒动书数千言亦自奇峭博丽使当汉之初兴必不曰安得猛士生唐

之中世必不曰安得好汉龔细并入皇王帝伯错出岂不为经世之才但韬晦善藏或者犹有余望来书又欲驱驾笔墨檄召风霆拈弄刀尺剪裁宇宙此固书生活计但恐风霆高远宇宙宏阔君未必有常山宝藏符并州快剪刀耳一笑所需宪漕书定甫旧朋友景南亦常同官不敢不如戒作去然声名气焰如此恐未足为轻重也某登朝六年分毫无补八月更得一对则便可归扫松菊矣郡兵鹄立索字草草占答自今应有遽报密闻却望时因北风惠我好音

答黄子实书

某去岁得舍侄江陵书颇详入峡之耗猿啼瘴云鴈落别浦竟不能驰寄一字然每与兵侍邮筒往来则未尝不闻知也制侍以真法从开大行台幙中雄辩呵斥星辰马上檄书鞭走雷雨此内机之任而以诗从军又其次也今读壬辰已後诗藁冰悬雪跨混之唐人集中固无能辨然欧公每谓圣俞之诗气完力浑辞非一体至於它文章皆可喜非如唐诸子专号诗人者此则某犹有望於子实也某三年秘府仅能收拾放心留意简册其间良朋益友相规警多不喜拈弄笔墨以故诗人之类絶少今得君书来譬如早年好猎自後戒之甚严及至中年忽见人飞鹰走狗犹有喜跃惜乎未有见成之诗以答来教耳

答胡叔献书

某顷被火之後复遭台评灾患遭连居无宁止闻命之夕即襆被守关而出更不候星牢落鸡喔咿矣今暂憩翔凤山下不谓故旧时相劳存独惟太社定交不为不深略无一语之赠方此惊怪而苍头已踵门矣来书以道之兴废归之命身之遇否归之天陈义甚高晚学何敢当此但山间林深树密花落鸟啼溪涧流泉飞遶屋下三竺灵鹫山风斯在下又有一二道士能鼓虞舜南风之琴歌伯牙流水高山之操其幽幽可以处体其窅窅可以观妙荒志滞虑为之顿释若有买山筑屋之资则便可於此种田艺瓜为终焉之计而兹事卒未定也记得邵尧夫在闲司马君实富彦国诸人皆与之区置家事如宅契园契户庄契悉捐而与之今人与居而古人与稽安得有若人哉予郡指挥虽蒙札下罪戾之余安保其往比得小侄讯舍弟又病于金陵甚重风雨之思南仲子华襟谊高大抚问备至令人不可忘因书到维扬为某拜意令舅盖自入山之後更不欲作厚禄故人书也自此远矣草草占答余惟以天下之宝为天下珍哉

答张平父书

某去秋理行舫东去曾於蓬窗傲兀间草草书数行以酬赠言才出涪江望西山紫翠便觉日远虽欲采杜若摘兰苕以遗所思亦无从也平父志强而文赡才老而意新靴笏之林才试初武径登上幙连取荐书如斧破竹如丸投区青云可立致矣然朋友之望於平父者则更宜味含章之旨守居易之训缓轡长涂毋堕蹶趲之讥则心和气舒而禄亦在其中矣某自二月入修门本无留中之望延审政堂躡丞外府较之前此之珍则叨觐过望也立朝最难侃然正色者动为时所忌而平平无甚高论者人却以不物待之如某辈山野之人安能改化为此市朝之様明春才得一对则便乞一障以还素心所期只是如此平父袖手观棋枰岂无一着可以下教耶天下之宝当为天下惜之更冀讲学珍重

答徐公发书

某六十三翁矣每诵邵子六十三吟有云耻把精神虚作弄肯将才力妄施为此其时也岂其崇情笃雅访劳始生賁之锦字之书投以阳春之曲褒拂过甚末章所谓雷声半夜起洛波龙则不复有此梦矣嘉定海邦得贤令尹慈以恺悌镇以静谧度其必晏然无事每笑南冠谓西州人士不谙晓东南狱讼财赋不知孔门称言游季路宓子贱之贤汉循吏传述鲁恭卓茂虞诩之治亦以才论耶尚勉之哉以张吾军幸甚偶山行方归占答草率余冀以天下之宝为天下珍哉

答郑子辩书

某厌伏大名於縉绅之林旧矣登朝十年半交天下士独一面未识荆州华臧惠赐如垂露在手春风拍怀其有德之言形於笔墨遥望之可知也袖云锦机制花锦地诗书中流出惠政不缓不迫源流自大小郑公来者固自与流俗不同也要略宠贖博学甚多风檐披读帙简而纲宏词约而事尽用功深者其传必远当於此书见之间者鄉里范洁斋作长编举要李悦斋作十朝纲要又有眉山杨明叔者纂成长编纪事流传世间本末粗为详备同先世一书参错互见後学者何其有幸耶某旧学荒落新知又不长进今此冒为东嘉之行凜然未知攸济蒙惠问感荷高情经行使邑自得捧刺以抒愿见之怀岁序匆匆作此不谨愿言护芟制精琼糜径归含香握兰之选

答涂安礼书

某一自帆落浙江之南望西方美人却如在天上每得朋友书乃以天上人相目何取义之不相侔也向蒙惠教蜀砭三十篇莫非切时之论两序亦平正无毛病但细观古人论序所以名世而可传者不用如此之繁贾谊只是政事一疏诸葛亮只是出师一表王朴只是安边一策陆宣公已自多了然所言致八利除六失又只是缘边事宜一书?结到得国朝范仲淹论时务十一事蔡襄言国论十二事渡江诸贤或七或八或九或十大抵皆体宣公规模独林珣者条四十七事各为之目一术纪二师心直至四十六利器四十七明决而後已使其果有切於利害则条分类析不以为瀆如其不然但恐浮文妨要尔不审高明以为何如某常爱文公先生语一学者云公议论中譬如常有一条线子纏缚所以无那精密洁白底意思至哉斯言安礼若有志共学则常讽诵而深玩味之可也某登朝六载轮对者三上封事者三每録副本寄归常语岳甥转呈度必澄澈书月然无一番不与文公门人商量盖文字毛病如春草渐生旋剗旋有不厌朋友切磋也欲言不尽意切乞讲学珍重

答胡彦肯书

岁序匆匆又熟羊胛矣不审风雨对床近履何似比舍侄来奉双璧帖辞丰谊渥仰见耐久之情所谕书传考订六年未脱藁盖前乎望刊定之圣人而不可见後乎顾习传之学者而未有得兀兀於残蒲朽竹间而欲上窥姚姒殷周周公仲尼之蘊亦已难矣且以其大者言之言天

文者莫精於尧典言地理者莫详於禹贡言五行者莫邃於洪范土戴天履地抱负阴阳而上不知经星常宿之度下不察九州山川之理中不究名位体性气味之别则何贵乎为人哉如司马子长纪班孟坚志则载书之本文而不释其义刘更生传则析洪范之大法而傅会其义所以义理玄微而窥测难规模宏阔而参订难衆说淆乱而折衷难负此三难终未有春融水释处安得有温柔笃厚之士而与之商略其蕴哉草草复来教不宣

答王次点书

某浩别丰神今跨二除矣每怀巾川旧游朋友衔杯酒叙平生谈今说古未有如髯翁之豪岸絕羣也舍侄来蒙缄示周礼订义四十卷遂足前日春官以下之书昼窗繙读手之不置因以是窥见次点真好个右里经塾之师盖自成周教法隳坏田不井授土不自食其食贫无常产因无常心故秦以客汉以侠晋以清谈唐以华竞循至於今驰名鹜利者周游四出更无安土践修之实遂使三物八刑五礼六乐十二教不复兴行於世是可惧也六官皆经世之典而地官之职尤为该备诸儒释之详矣然意翻空而易奇事证实而难巧祇如司徒掌教而多载山林陵麓之事掌教象之法何其多目也属民读法读邦法散见族党州闾之官不知读者又何法也其目可得而闻欤孟子於爵禄之制仅言尝闻其略则想籍去而法亡者不但此一事也次点更为鈎深纂要以莹所疑不胜至幸

答潘周卿书

某江心执袂摻别三见薰风矣每怀良友无日不起参月在门之想便中忽奉瑶帖辞谊亹亹绎绎度越笔墨畦畛之外手之不置所教书传大节目工夫浩浩顾何以窥圣经之藩但此书极难看又难全解缺文当考疑义当考分章断句当考今文与古文当考小序与大序当考帝王之辞与史氏之辞当考注疏有直见理者有极害义者诸家解有造平易者有伤太巧者当考其如天文地理岁月日时又不可不细考也林少穎解只到洛诰而终吕伯恭解只自洛诰而始朱文公解只有虞书三篇周书三篇今人解书盈箱满笥此某之所深惧也所以历年滋久而藁未脱用心益劳而功弗就安得与诸兄共订此千古之疑哉某万里流落居无子云一区之宅耕无苏子二顷之田每爱中州佳山水郡乃多士渊薮亦岂不欲希膏溉润必图一枝之安比西水達夫叔方及彦隆兄弟各相遗书亦勉其于焉定居今契兄又谆谆及此殆有洛中诸贤延留康节之意感藏亡已秋凉游鴈荡诸山就为侄辈了婚聘事或有会晤之期更几为门人自厚

答刘成道书

某逖违海色三见荻花秋矣每诵月落参横之句尝怀宾友在门之思值便中惠寄瑶帖四诗宠教絕不道烟火语想游思翰墨圃所造益平澹矣某近来看诗觉得须是以三百五篇为标本以汉苏李枚生建安诸子晋宋陶谢等诗为风骨然後能长一格盖词之华者易工趣之澹者难诣故退之每爱张文昌只称其学古澹每喜僧无本但谓其往往造平澹则词语抑扬之间是犹未纯乎澹也成道若用心科举外当直以古人自期更勿从晚唐诸人脚下做起生活

此则朋友之望也近作三篇姑録请教幸赐标月之指会旧游诸丈一转似之无妨也余祈以天下之宝自爱

答唐生书

吾行天下半矣独未能如太史公上会稽登龙门探禹穴虽徧交南州之士独未识足下比蒙垂访抵掌谈时事动以坡公相期且辱垂示所着史论五首网罗旧闻笔力亹亹不倦未易得也但首篇谓蜀汉之不能成功者三似若以成败利钝言孔明者孔明以区区三分天下之一而经纬十分之九使其不死擒操馘懿必矣看孔明须是看他与昭烈朝夕以兴复汉室为己任一片忠诚对越天地即是夏少康以一旅祀夏配天之本心魏人尝谓其主将畏蜀如虎敌岂可谓无隙之可窥耶向来鄉里南轩先生专为武侯作一传已发先贤未发之秘想足下未见本否姑答来教余容面见倾倒

答唐广夫书

某旧游鹤山知其门有明春秋者於大义数十悉能通之问焉乃鄉人也岂期道合志同获联姻好目其书耳其论论虽莫得展奉从容大略过所闻矣圣学失传道术分裂一人挽之不若衆人挽之之为易但醇慤者拘於记诵敏秀者又銜於辞章间有自拔於流俗则遂以学问骄人外粗慤而不密内颠实而不虚此吾道之所以孤行而有志於斯者所贵乎求助也姻兄资稟浚明自处冲退受道之地已寬进进不已实心靠将去何忧不溃於成若某辈则伉俪如游骑出愈远而亡所归是则可怜也倘有疑义不妨互相启发其如世俗之书阳浮相尊非所望耳叔兴弟孝友而廉谨器质自良更时与商论大令加切磨玉汝之道亦不能无待亲友也

聘饶伯与书

某西州晚学幼读洙泗圣贤诸书每闻沈潜理学用心科举外之士未尝不耸慕倾敬兄弟南来徧求文公之书之徒如叶知道张德元钱子山陈器之皆得与往来质问而五峯先生则亡弟於汉阳又尝师之靖惟堂长徵君讲学有本末制行有渠度内明外齐静专动直於先老凋落之後惟若原隐君子一人而已某被命出守於此亦欲以平日所得於圣贤者施之教化而求所以友事师事者颇难其人俗敝教衰殊未易振起辄欲延屈长者一临敝州讲论经理不独使国人有所矜式而某朝夕得以问政问学亦不至冥行为俗吏之归也恭敬之实不可虚拘辄遣车币薄礼惠肯命驾不胜幸愿春寒尚峭中涂更为吾道自爱

上曹太傅书

窃尝谓学问之源流未尝不相接也虽托之於人或絶或续见之於斯世者有明有晦而义理之在人心微言之诏来世炳炳若揭必将有神会而心得之者曾不以人之存亡世之治乱风俗之升降而为之间断也春秋之季诸大人不说学夫必多有是说也而後及其大人也则学将落矣然以其时考之鲁之闵子騫则知道齐之晏子婴则知礼冀之郤缺则知敬晋之胥

臣曰季則知仁之則周之劉康公則知天地之中穆姜一婦人耳筮易而知四德曰元善之長也亨嘉之會也利義之和也貞事之干也曾不待夫孔子之文言也穆叔一使人耳誦詩而知五善曰訪問於善為諮咨親為詢咨禮為度咨事為諏咨難為謀也初不用夫毛鄭之訓詁也意者當時去聖未遠風氣濡染而聞見正義理浹洽而源流長其間豈無秀民茂士相與護持苗脉扶堯舜禹湯文武周公之澤於未墜者哉嗚呼貞元不常會大賢不世出後之學者受胎不正則血氣偏枯而脉理不相屬矣下種不實則根苗秕稗而生理不腴暢矣憤悱启发之功少則所見皆軀殼之私潛體密察之味不深則所得不免囿於簡冊之內蓋亦泝源尋流求堯舜禹湯文武周公所傳者何學孔子子思孟子所學者何事玩辭而知味因事而推理則蓋有默會於心者矣洙泗之學非洙泗之學堯舜三代之學也河洛之學非河洛之學孔子子思孟子之學也蓋自濂溪周氏伊川二程氏上接洙泗之傳下演河洛之學繇北方而盛行於南國者蓋亦有自來矣南軒受道於五峯於是乎有湖南之學呂公受經於三山於是乎有東萊之學象山兄弟自立於家塾又於是乎有江西之學惟永嘉陳氏之學則得於薛公持正建安朱氏之學接於周公行已許公景衡而實本伊川者也太傅崛起南方學問有源委行已有槩度甫年二十從止齋游則讀書講學已就事上窮究實體其後與晦翁往復問答剖析疑義則又欲從理上推致於事事物物之間其實元一法也惟其源委之正也故其為文也如水行地能普萬物之澤為道也如星麗天能回萬古之光蜀中何幸而乃得執事昌明正學以為斯文宗主哉占畢小儒濫叨蜀學平時非不知誦其書服其言有志於古儒先之學然粗得一知而不繇其統僅沾一溉而不窮其源燥乾枯涸之病多潤澤孚尹之功少有如太傅者則某所愿見而欲觀其的傳者也昔侯氏師聖初從伊川未悟後訪濂溪越三日而有得如見天之廣大世蓋有終年不能究其學而一夕之間氷釋理悟者執事幸教焉不宣

卷三十三

<集部,别集类,南宋建炎至德佑,鹤林集>

钦定四库全书

鹤林集卷三十三 宋 吴泳 撰策问

召试馆职策问

洪惟国朝以武戡乱以文致平以王道御军以儒术理国士马不如汉之强盐铁不如唐之富勲臣贵将不如云台凌烟九侯八叶之盛而国势隐然如泰山磐石之固者要必有道也论相人主之职我祖宗时斋居正虑先志後占或以德选或以才用或以器量学术取或从沿边帅臣及曾历三司诸路转运使而择故命下之日士庆于朝农歌于野夷人相戒不敢生事于边其勲业光明磊落如此近世以来何相才之难得也若以资论则筑岩钓渭之叟径登上相何必有扬历耶若以望言则削书操笔之吏遂冠列侯又岂必皆德望耶倭曰黜陟拜罢由於独断则罢者既免召者未至揆席其可久虚耶命将帅天子之事乾淳盛时或召对玉陛临遣或亲酌卮酒宠行每边帅缺则於近地监司郡守选差制置使阙则於诸路安抚使内推择故有自姑孰而镇金陵者有自静江而开襄阆者有自长沙而移荆州者有自山阳而留帅维扬者有自兴沔梓遂而备除益帅者将帅之才随取随足如此比日以来何临事而乏使也若取之出入边关经历事任则舍耒投笔之夫岂不能将上军护絶塞耶若选之亲履行阵躬冒矢石则雅歌缓带之士岂不能征强兵挫坚敌耶若谓荐举选用必须实才则夸者似勇诞者似忠帅才又何能得实耶国初养兵仅有十二万太祖南征北伐乃有百万之用孝宗中兴虽曾至四十余万然一年拣军兵二年拣效用三年拣使臣甚至欲省江池一军以寛民力初不患兵少也今内而三衙外而江上远而蜀口连营列竈数夥於昔而又创游击增忠义招刺北人请益兵不已曾未闻俘一级斩一馘以献其病安在国初赋入仅一千六百余万而征行调度未尝有乏兴之忧淳熙岁计较之先朝虽多然罢献羨却寛剩不科降度牒而封桩之积至于贯朽建康京口江上诸处寄桩率数百万未闻其财乏也今版曹所入朝廷所储四總领所分拨窠名色额不减於旧而增印诸料更易钞法科敷仕牒僧符议生财不已曾未见上用足而下不匱厥敝何繇夫相国之良医也帅民之司命也兵社稷之卫而财人之心也必欲开诚布公经事综物镇拊夷夏统一宫府则任相之道何以集思广益绥远折冲保安三边调御诸将则储帅之方何先淮之兵分而趨戍新边蜀之兵敛而退屯内郡或分或合欲使部分归一攘却劲敌则理兵之务何急甲言战则弃资粮如丘山乙言和则捐金帛如粪土或敛或散欲使用度均节实利国家则裕财之策何上昔人有言欲济世务譬犹同舟涉海一事不牢俱受其败今天下所同忧者非但一事而已而四事为尤大子大夫以俊杰自命岂无高识宏论裨补于时况给劄玉堂非弄翰科場比也其悉陈之以备上采择

经筵翰苑策问

问经学帝王之轨范文章政化之黼黻有天下以来扶持三纲緝熙五纪与天地相为经纬而不容一日阙者其所关系者大也我宋受命五星聚奎首开人文尊尚儒学故横经列侍与天子朝夕讲论则有经筵分院更直代王言以敷告四方则有翰苑选任亦不轻矣其班秩则侍读次学士下其禄赐则经筵与翰林等其进见则数对便殿为天子亲密之人其勅设燕会则尽出特恩虽执政大臣有所不与故先儒每以陪侍经幄得近天威为荣而顾瞻玉堂如在天上为叹者厥有由也汉唐不足进矣独考国史与诸君评之旧典侍从以上则为讲读秩卑资浅则为说书然祖宗时盖有以着郎为侍读侍御为说书者岂官秩之崇卑有时而不问耶故事宰相拜罢则翰林院降制余官迁谪则舍人院草词然祖宗时盖有罢一枢密而不宣制麻出一副使而特降手诏岂恩数轻重有时而不同耶谓劝讲多领别官则免修国子监条制何谓恳辞之严谓诏书当不出位则访以时政得失何谓召见之数呜呼是犹以职事言也天下治乱在宰相君德成就责经筵则所以涵养气质薰陶德性宁非讲官责耶讲治不讲乱读存不读亡恐非劝戒之义知言治而不知正君知正过而不知养德恐非辅道之实伊川醇儒也而自度乏温润之气温公洽闻也而犹恐失记忆之详吕正献公语约而义明可以为当世之冠而讲及论语乱臣十人同职者犹有子无臣母之义岂讲官果难其人耶抑进止密勿之间有不容以疾辞遽色感动之耶宰相之重容可杂以他官处之惟翰林学士非文章不可然则宣示上意感发人心非文字之职耶草除宰相麻而事或废亡草答高丽诏而语多不工杨公亿淹博如此而邻壤交讎之书不免以字嫌陈公襄直谅如此而水不润下之诏不免於理误范蜀公镇世掌丝纶者也宜其所长在文字之间而批答不称旨至欲谕之使去岂文字果难其职耶抑诏书旁午之际有不经思虑者耶或曰讲解未尽许令退归讨论命词舛误亦容论奏贴正可乎不可也或又以为涉猎书史不可该以学问骈四俪六不可谓之文章当乎不当也隐逸而起为说书者凡几人不试而命知制诰者凡几士讲读之所有迹英有延和有崇政殿在古为何如词翰之官有阁老有翰长又有员外学士在今为何官坐讲立讲之制何以分召对奏对之名何以异要必有成说订正於此方今经筵劝讲既不专官学士草制率多寓直意者为官搜择以天下真儒硕才之选岂无能以道学辅人主文章施朝廷毕书生之志愿者乎其茂明之母忽

圣学时政策问【乙酉成都漕试】

问道不本诸三王则无善治学不根诸六艺则无成法自昔人主出而为亿兆之君师岂其无英明才智可以度越於人然而功利之说常胜道德之意常薄昏闇之日常多清明之时常少何也古治寢远而风气浇圣文芜灭而师承异上莫得明大道之指要下莫得遵至治之成法汉唐之治所以不能尧舜三代是则有繇矣抑不知未有六经以前尧舜禹汤文武汲汲其所学者何事耶圣宋受命五星聚奎文明之化焜耀史册方皇业初基日不暇给而我艺祖皇帝於即位之月首以幸学为事其造端立本之地盖已异於前代矣历圣相承嗣守家法羣儒环列宏阐大猷於改元之初而命臣颐正讲书内苑此咸平之制也於禋祭之後而命臣奭等讲经便殿此乾兴之典也於祔庙甫毕之日而亲御迹英召侍臣讲读此又嘉佑治平故事也祖宗盛际无一非典学之时无一日非亲儒之日深宫燕处不废观书隆暑祈寒未尝辍讲向使亲儒务学之意不为崇观羣邪所挠乱则可以回崇观为元佑居丧罢讲之议非绍兴诸君子抗疏争之则何得有南渡中兴之功学之有益乎天下国家盖如此其懿也皇上嗣服龙德

进升储神古训既赫缉熙之功增置说书又多聚辩之益翕受以蓄其德敷施以達於事举而措之天下岂不光明盛大矣哉然犹有可言者皇极之建所以消朋比也职守求以相凌议论求以相胜则安得有同寅协恭之风学校之设所以疏化原也侮慢以为常佻達以为俗则安得有亲师视学之意生财以大道而州里凋敝廩司单乏旋以为计财亦未易生也立武以常德而田不营屯士不素练苟日无事武亦未易立也况世讎之敌新兴之元常伺隙於其外而吾三边将吏被介胄不得卧塞上居民闻角弓之声则拊心而惊问学之强如此治效之迟乃如彼岂先致其知而未見於行欤抑作新於上者已至而四方犹未丕应欤修齐治平之道固有远模辟闢转移之机端在初服今欲以学问销朋党以儒术美教化修饰孝弟以强军旅兴行礼义以足财用武臣使之知书弓冶之子使之为士以凝庶绩以恢中兴将何道而济登于兹也书曰王人求多闻时惟建事诸君毋谓皇帝之学与经生学士不同其悉言之无隐

江淮兵策问

问天地温厚之气始於东北而盛於东南天地严凝之气始於西南而盛於西北一气周流於天地间固未尝界南北而限之也而鍾温厚之多者则为阳为文明为寬柔以教不报无道而得严凝之多者则为陰为肃杀为衽金革死而不厌自昔论衣冠礼乐必归之东南而选将募兵必取之西北者盖以是也然考之三代则有所不然且以兵言之兵乘之制无一国而非兵牙璋所起无一方而不调汉晋以来犹兼四方之兵不偏废也高祖尝用闽粤兵矣孝景尝用东瓯兵矣武帝尝用会稽兵矣光武尝用江夏兵矣昭武尝用武陵兵矣刘表尝用荆州兵矣诸葛恪尝用丹阳兵矣而未闻取之西北也周瑜以江上之师破老瞞於赤壁谢玄以淮壖之衆荡狂士於淝水虞潭以东方兵共平僭叛刘牢之以北府兵屡挫强敌其如临灞上入长安又皆吾水军步骑也则亦未尝募之西北也惟我国朝南渡之初扈从六飞者率多元帅府之兵而屯於江上者又皆夙将麾下带行之士如王彦一军则河北土人也如吴玠一军则关西部曲也韩曰背嵬军张曰铁山军刘曰赤心骑兵二军皆山东陕西河北诸处精銳其军中所谓克敌弓所谓驻队矢所谓銳首小枪则又萃集四方良工而制焉者也而独不用东南之一旅何也夫都於江南而用江南之人可也汉都关中洛阳而下取吴粤之士本朝驻蹕吴会而用关西河北山东之人此又何耶或曰北人之长技以鞍马素闲而便於驰突吾之马弗如也风俗劲悍而勇於格鬪吾之卒弗及也果如是说则饮江之骑掠塞之兵可以驱驾全吴矣高宗皇帝慨然发愤每谓取胜不必北方士马而它日顺昌之战敌之诸酋乃谓南朝之兵非昔之比则彼自畏吾南兵也而昔所谓自陕西山东河北来者反不足畏欤今天下非少兵也上而巴蜀中而荆襄下而淮甸连营相属也而使敌窥淮甸则将上流之衆便可沿荆鄂而东敌犯蜀关则率中权之师便可依均房而北此首尾俱至之势而今一方有变自应不给所恃以称雄於天下者独江东淮西两军尔第一二年来闽中盗起则调某军江西寇作则调某军逆全称叛则调某军三衢窃发则又调某军近者襄阳告急则亦欲调某军岂天下劲兵处更无可调而仅有游奕武定宁淮强勇雄关飞虎数州之人耶幸而蜀道渐夷襄州奏功不烦援师之行若其未也提军远征脱有缺折则又将从何所调遣耶昔人谓每一发兵髮为之白言其不可不谨重也诸君俱自学古试为我溯源寻流穷天运之始观风气之宜览汉晋三国之地势稽国朝诸大将之战功究今日襄蜀江淮之兵力参之於古而可信用之於今而可行详着於篇毋谓经生学士不知兵略

四京守御策问【甲午太学解试】

问光武披舆地图以示邓禹而禹以为其兴在德艺祖皇帝出幽燕图以示赵普而普以为其难在守盖规模宏远者帝王高世之略而议论深密者英雄超物之见二者可以相成而不可以偏废也且以图籍所识与诸君商之南曰应天凡陈颍诸郡皆应天控馭之也东曰开封凡曹滑等州皆开封临制之也西曰河南北曰大名凡自洛以西河以北皆洛阳大名襟带聯絡之也国朝建都於汴维以三京实辅车相依之势不幸而数逢阳九王室不竞遂以四京形胜落于穹庐者百有余年皇上出圣入神中原在梦越我友邦冢君暨于貔虎熊罴之士亦莫不欲殄殲乃讎以光复境土乃六月丙子复宋城丙申收汴都又一月甲子径取洛阳天威所临如疾风扫残叶虽汉澄三河唐复两京殆不过此则是京邑之四今已有其三矣然而陈?当天下冲四通五達无山溪之险无藩篱之限所恃者特以兵为守太祖时已虑兵冗至谓不出百年民力殫矣则今得东京将以何道理之耶睢阳城不高池不深封域不广且无山川之饶以实守备当中兴时廷臣建议每虑金人或以数千骑猖獗而南其於国家不能无警则今有南京将以何策御之耶或曰西洛帝王之宅里山表河左伊右瀍大谷通其前盟津達其後上可以联属关陕下可以援接东京形制之势强于开封应天矣然晋尝表镇西将军镇洛留河南太守戍洛又尝诏遣散骑长侍修复五陵而终不能长有中原之土何也或曰河北天下根本定为右臂沦为左臂瀛为腹心京为头角得魏则河南山东重失魏则河南山东轻是东西京非得河北又不能以自固也然裕尝命冠军将军渡河遣北直队主上北岸以左将军为北青州刺史而终不能争守河北之地又何也岂兼并易能而坚凝之道为难坎岂寇难既平时会之来不接与今露布星驰我疆日辟揆之理势似难中止若进而远攻耶则资用单敝恐鞭长有不及马腹之忧若退而歛戍耶则豪杰生心恐渔者因以得蚌鹬之利若画河而自守耶则天寒地净安能保敌骑之不来若争关以据要害耶则塞险断路彼岂能无谋臣之深计若分为三大屯使之与民杂耕则敌兵践蹂终无可耕之丁若析为三大镇使之有兵自调有财自足耶则江上风寒宁无他盗之虑新复州军华戎杂处或未能扰习于教条麾下将士参以南北或未能洞照于肝胆守孰重孰轻攻孰缓孰急经理处置之宜孰得孰失四京之名起于何代四钜镇之策建于何人此皆所当讲明者若魏元忠以御吐蕃之策献于唐曰今言文者以辞华为首而不及经纶言武者以骑射为先而不知方略旨哉言乎其有益於人之国也如此元忠自太学出也诸生幅巾奋袖谈词如雪岂欠一元忠哉愿书其对有司将以复於上

蜀师与夏人夹攻金人策问

问自昔中兴创业之君其所以图维天下非有素养之兵夙任之将旧抚之民而为之用也裒荆之旅高宗所以兴有商微卢彭濮之人武王所以抚中夏虽以成周太平之盛兵满天下而卫九畿者乃取於蕃夷之籍搏羣盗守内列者乃进於蛮貊之隶何昔之圣人虚怀大受直不以异域之人而疑之可诿曰我有以制之而不专倚之共功也汉氏之兴则援四夷之兵为中国之用矣籍之未平则用闽粤兵凖之未戮则用东瓯兵或许致貉北梟骑以助汉或请将湟中义从以讨羌或假胡兵数千分道以击先零或率南单于之衆并力以破鲜卑黄支之南大夏之西控弦之骑四方之人率为汉用而期门羽林材官骑士三辅十二城之屯殆拥虚器矣岂料远敌平大难不取於常胜之师耶抑贵仁慕义者喜身为犄角之助耶犹曰未即与之共

约也上书侃府共议北伐燕於是乎有请封之约矣表乞亮等齐力江沔凉於是乎有请战之约矣若能共讨者可遣军来魏於是乎有乞师之约矣遥指河北自常山以东属宋常山以西属夏赫连与刘宋又於是乎有分地之约矣约既成则应之也宜不缓而今也天台之议不行临江之告不答敌境往来之使竟为逻者所获而连鷄不能俱飞之语不出於谋臣之料或谓晋宋君臣屡失大机者以此其然乎其不然乎我国家有兵自养有将自御有金穀自制圣祖神宗之懿识先正老成之长虑未尝不深思而熟计之也然泾原熟户曹武惠曾用之以制蕃族环庆族类范文正曾用之以拓边界而航海夹攻之盟不能止乱而反有以养乱抑何欤今夏人欲定夹攻之议而我师亦起而应之应之诚不得已也兵应之後将长驱席卷而前邪将画地分疆而守邪得之则四塞之地备多而力分不得则退师之後招轻而纳侮或谓进守可以固吾圉羈縻可以得敌心然逃彼夏土大邦为讎万一窥我之无备而反戈以相攻将何以待之耶今出师未几计所告匮其或兵连祸结不可卒解生券之粮犒劳之钱远戍之衣装器械又於何而取之耶诸生在泮久矣愿言周汉所以用属国之道晋宋所以结异域之策与夫国家之所以待蕃族待敌人之异有益於时无负所学者愿条陈之毋略

州兵土丁策问

问晋以撤州郡之备而单虚唐以籍雄边之丁而强实凡矫世救敝譬犹行舟於川岂可横截迅流而不思所以平济之道哉世之望空谈兵者类曰羽林天仗之屯如拥虚器也棘门霸上之军如养骄子也伍符为具文尺籍为乌有也而兵之所以受敝之处则实未尝深知也国家盛时诏诸道兵为长吏之所役着为令厢禁军敢占为工技者论如法销患未形之意远矣嘉佑以来又有教閱土丁格治平元丰间又有团结土丁条搜拣益精而武备严激犒加厚而兵计密异时西边用兵羌人每出闻多土人则辄相戒不敢轻犯兵之足以立国其功效章明乃如此哉今日兵法之敝莫敝於内郡之兵边卒之骄莫骄於雄边之丁三陲晏清虽无风寒不备之虞而一面受病若有蜂蛰含毒之虑脱或蔡蒙之下狮子一逸而蹈吾中州之境则将何以何道堤御之欲倚官军为用欤则羸卒执器仗无异编民代直但曰占数春秋都试既不能使之閱习恐动之言妄至则望寇先溃不待接风尘交旗鼓也将以土丁为用耶则散处村堡卒未可以招集各持鋤耰非复有於节制平日恩信又无以素结其心重译者因以利诱之则环寇不战不但入其巢穴为之向导也或曰用土丁不如用州兵然一禁军之廩给足以贍土丁三人而三禁兵之材力不足当土丁一人苏黄门尝有是说矣禁军之不足倚仗乃如此或曰募官军不如募土着然部伍上下不如官军之整肃土豪奸杰必待官军之牵制富郑公尝有是论矣土兵之不可专用又如此无已则从两相制御之说然隶尺籍者薄田夫身白徒者忌禁旅又安得使之豫附而入吾驾馭笼络之内哉伊欲严按閱程技击如乾德天圣之令可得而行之乎厚抚其豪长略汰其犴豪如治平元丰之格可得而用之乎彻桑土者当於未雨今疆陲多事之时而方议简兵之制不几於後时乎指画山川之图口占屯兵之数诸君岂无识时务者幸条陈其事如曰我甲在心彼甲在外则非有司之所欲闻也

卷三十四

钦定四库全书

鹤林集卷三十四 宋 吴泳 撰碑

褒忠庙碑

岁嘉熙丁酉天子制诏故成都守臣副四川制置使丁黼赐谥立庙谥以恭愍庙以褒忠旌死事也其子熔拜手稽首祇服厥事且申控于朝曰先君以北兵之难身膏原野若庙于益州则万里隔絕夙夜难堪祀欲躬自度材营建於其家以致孝享奏曰可遂景廼冈瞰日庀徒於九华峯之侧两石埭之陰新作閼宫前几盖山背枕湔溪阅三门环两庑奕奕其中以妥神位後寢曰王考像曰王母像居左恭愍公宜春夫人居右其司兵隶仆及仓庾氏或瘞于閼或绘于庙之壁皆一时在行者庙既成春秋二分陈牲合乐以祭适子服官政则家宗人掌之亦可谓奉之以礼矣而其心忧焉犹有不能自己者廼移书潼川吴某曰子蜀人也请识其事余尝谓古者公庙不设私家乃祖父之有勲劳德善者止与享太室汉兴以来野祀巷祭皆瀆而不典虽诸葛忠武侯德范遐迩勲盖季世成都之民欲求为立庙议者以礼秩不聽後因习步兵向中郎上表始许其近墓立祠于沔县使所亲属以时祭祀礼从宜也今褒忠之建距宅兆犹未远岂其遗意欤客有难余曰忠武侯以开济之才治戎讲武以图大举恭愍公以镇守之规画圻分地以抚一方汉创业未半而侯遽薨於营犹能退走生贼蜀连年俶扰而公与受其败卒至与民偕死其事势盖有不相侔者余曰客过矣士固有见危致命出於其心之本然而扞患御变制於其力之所不及君子当谅其心不当以成败利钝言也当敌骑犯关其来气骍甚大将以轻尝寇元戎以玩延敌羆虎熊罴之士望旗沮溃曾无有一人敌王所忤者公抗守太少城飞山移屯尽拔隶文龙帐犀牌丁不满七百以就尽之疲卒当新至之梟骑公数日逆知其死处矣先是公累疏於朝为衆请命至公血诚炳若观火暨遣其子诣堂白西事每语人曰吾为副元帅死其职分不可使丁氏无後且留馆甥以收吾骨此即孔明鞠躬尽力死而後已之本心也矧公生平忠雅端靖立朝持论侃然有劲气宁避乌台之官而不肯一毫作欺天之事宁婴黄阁之怒而未尝一日无护善类之心於义利界限盖已辨之甚明安有处危难之间复言而爱死者乎公卒未几制府参谋翊雍容就义而死文南守相銳汝臯慷慨血战而歿其英风义魄犹足以厉羣僚而羞偷生之辈也虽死於蜀土者其体魄也游於湔溪者其魂气也公之祖武德尝梦山神告之曰若死葬於寺之右三纪必生异人公後三十六年而生又七十二年而庙食于此是殆有天数者余既斷词纪实并作迎送神诗俾歌而祀焉石连甍兮如埭山泼翠兮孔盖庙奕奕兮维新皇剡剡兮其灵在春露兮灩灩草木兮载芳常干离而未遂兮筮巫合乐以求诸阳神游兮八极西瞻太白兮使我心惻铜梁兮道斷石笋兮峯折左骖殪兮雾暗右劒埋兮花蚀魂无西兮来於此乎宅钟簴在堂醴醖在户俨像设兮室中燎萧光兮庭下帝子矼兮鱼肥谪仙之台兮白鹤自飞公生斯世而奇不耦兮死尚友古人而同归春禴兮藉兰秋祠兮荐菊子若孙千万春兮永承兮受福

别少师改葬墓碑

古不修墓不改葬盖谓葬者藏也一藏之後虽万子孙莫能改也然尝读仪礼至丧服乃云改葬緦子思之荅司徒文子又从而释之曰礼父母改葬不忍无服送至亲也穀梁氏郑玄氏韩愈氏互有发明以识其事是改葬之说礼经有之矣文王之葬王季也以墓於栒水故出棺而更葬焉孔子之葬徵母开官氏也以殡在五父通衢故迁柩而合葬焉是改葬之礼大圣人也尝行之矣近世鸿儒钜公盖有以虫之孽而改者魏公之迁於大洩是也有以水之啮而改者濂溪之母之迁於庐阜是也有以卜宅之不祥而改者文公之父之迁於白水鹅峯是也谁谓改葬非礼之经欤然未有因师旅而迁者按春秋传惠公之薨世子尚少会时有宋师弗克以礼奉襄事暨隐元年冬十月始亟图改葬焉不惟悼礼之不备盖亦虞幽宅之有後艰也今大资政别公之杰葬亲於荆之上泉至是廿有三年矣忽一日以书抵延州来示吴子泳曰二尊之丧鹤山魏公已铭诸甫窆今不幸荆州以北戎马驿骚卜地之不审以危其亲实人子之大痛用负其丧徧营改卜得地协吉葬有期矣终以处其事之变不得安於礼之常为憾子盍为识其迁之故余抚书太息曰父母子孙一气而分形亲之体魄安则此心亦安亲之宅兆危则此情亦危一拳石之毁一抔土之伤见者尚为之心恻况丘垄隣於戎马仁人孝子可坐视而弗之改欤礼缘人情而制有经而等者有曲而当者其实皆礼之常而非礼之变也少师讳湜字景甫生荆楚间少负奇气靖重寡言笃实敏行长益降心学问非洙泗关洛之书不好也其文章古雅尤精於射意谓可以鼓行秀造之林而三请能书晚仅以特恩补官夫人田氏柔嘉淑明克相夫子澹如也二子长曰之英季曰之杰家事巨细悉传之长男而季子则程励课督使之大肆于学每党庠序郡国校试必偕焉之杰遂以明经登戊辰进士第顷在朝以同知枢密院事兼参知政事恩加赠先公少师夫人郢国其诸子孙皆以京职官任於戲盛哉将以淳佑丙午七月望日辛未定迁于安吉州德清县金鰲山之原山旧名金鹅改名金鰲者皇上特书也在丧葬令凡诸赠官得同正官之制奎画昭回襚章炳焕则今之葬也踰有光於前矣泳虽不及识少师获拜郢国於江陵袞归堂下且与公第同年寓同里知其衔恤卜兆祈请於上方甚哀故谱系享年门外内之治更不详载特志夫所迁月日而系之以辞曰

人生之初兮天依形地附气人歿之後兮还精於天返魄於地何地不可藏形兮岂必故乡是怀纷楚氛之未靖兮望郢门而长哀黄沙漠漠兮白榆夹路魂母归兮於此乎安处伤哉北邙兮下边於夷累侯王之冢兮碣兽之旧题封不厚兮草木凄止坎不深兮狐狸扣之奸窥鬼瞰兮玉不泣金不嘒魂母归兮於此乎安栖鰲之山兮鹅之水後谿如带兮前山如几鹅初鸣兮田实好实褒牛勿践兮草方苞方体青烽不到兮赤蚁皆徙魂母归兮於此乎安止画翼兮轻輶紫书兮蜜章置守兮冢人相仪兮职丧易土葬以公礼兮转蒿里兮薤露非後踰於前兮以爵等为丘封之度魂其来兮胡为乎中露古不祭墓兮周官为尸古不改葬兮仪礼曰緦宪言之垂後兮人莫之师乃神青鸟白鹤兮决兆於枯骨朽蓍彼不思奉先之孝兮反营遗後之利魂其来兮请眎予之志

墓志

周侍郎墓志铭

有宋六君子曰周公端朝子静真天下士也当庆元初韩?胄盜权右正言李沐朋奸诬宗相汝

愚罢政事於是侍臣穎以显諫黜祭酒臣祥博士臣简以危言去太府丞臣祖俭以上封事激烈贬公曰六馆士不言孰当言者遂与杨宏中等诣阙上书辨宰臣之忠勤指諫官之邪佞乞窜李沐以谢天下乞还祥简以收士心卓乎黻哉盖尝读李元礼嵇叔夜阳亢宗传每叹太学诸生扣阁陈义越千百年仅一见我国家涵养士气自宣靖汔于庆元不知阁几扣书几上也公虽坐言斥而英风义烈盖与日月争明矣既擢上饶读书精舍益励志古学疑义有未莹则请益于武夷朱文公虽白道而冥穷不问也会皇子生赦还随使者陈益之入蜀蜀之耆儒夙望如後谿刘德修符谿薛仲章皆深所器重旣归试礼部仲章偶以中秘书为参详官每爱诵王逢原世网挂士如朱丝之诗谓小缀大遗不足以笼络人物至是欲得一奇杰士压榜读公文异甚遂白知举定为第一号揭乃公也朝论大厌服策嘉定四年进士第教授桂阳军秩满旧比应召当路扼之复浮湛里閤者弥年因史馆袁和叔荐用为太学录一年迁博士裘盖卿忽除小司成两学甚喧季考入直乃欲以守气不如守约命题公进曰难矣气不是与约字对两守字着略点晦翁注下分明开说论辨颇久同列有过公者公则曰国家建学聚十数科目英俊岂可破句读孟子貽笑四方闻者渐恨忌者又从而下石焉公之迹益不得安於上庠矣用御史疏出通判严州居母丧不赴服除授隆兴添倅关决平处藹有治行宝庆二年冬上始御紫宸殿号召一时名德之彦公其选也除国子博士太常丞兼庄文府教授权司封郎官历秘书丞著作郎将作少监军器兼国子司业秘书少监兼国史实录院编修检讨官时宰相病不能入朝政事笔多出房闕中书之务山压川壅重以边垂外骚寇贼内讐鬱攸煽虐怪星昼见壬辰闰十八日彗竟天诏求言谘访阙失余始转为丞与校书黄诚父朴白监长曰是不可以无言也夫专攻上身而不及辅相指切宫禁而不斥权幸此汉儒之巧於言灾异者岂宜不反之昔韩献子将老必使知罃稟焉以为政郑子皮已贵犹能以其政授子产今三十年宰相名位已极若不及精神之未衰预拟一贤者为之代玩愒既久国事日非上依依然莫适与谋近习捷出而乘之则後患余祸终未歇也遂同述此意径上焉相得书忿憾甚执政者谓余言曰诸公过矣辛苦燥烈彼能茹纳也冲撼击撞彼能顺受也若使之避权去位则深犯其所讳耳公曰毋忧也直道以事人焉往而不三黜哉居亡何相薨上亲擢公兼侍讲此更化第一笔也翌日又除太常少卿端平改元四月权刑部侍郎陞同修撰九月二十七日卒享年六十有三初得病後洋馆皆未有知者忽一夕逝来往之人如愕如疑士吊于位大夫唁于寝君使人褰于室平日所亲厚复祖于道哀哉敬夫公秉行端壹纯心事道根本乎经术错综乎史传法度乎文献诸老其为辞章也学博於止斋学奇於水心又於其间别驱横鹜煅炼精粹所以言论实奏议雅表出人上更事两朝前後几十疏大抵嘉定之言简而直宝庆之言和而壮绍定之言忠而侃端平之言辨而裁大之天德帝学孝治国本详之民力事俗时政边防诸所敷陈更不能悉数也余每慨念端平更化後若徐崇父真希元魏华父叶知道洪舜俞蒋良贵袁广微吴季永陈和仲与子静诸贤各能分道植节掎挈当世共争名教於衰灭之中今其亡也虽不幸而不得宗礼义之盟犹幸而不及见兵戎之祸於此亦可以观世道之盛衰矣其子延世已於卒之明年葬公于建牙乡渚浦山之原今七稔矣而未有志既遣书又介其门人胡堂以请其世谱家乘女男事已详行述兹论譔其美者而为之铭曰

黯然其若幽维德之华讷然其若拙维言之嘉懿有德有言兮胡壽之不遐愈厄於命之斗牛玄終於岁之龙蛇谁令然邪抑偶然邪学孜孜而毙兮则又何嗟

惠寺丞墓志铭

叙之初为大司农主簿余丞外府府与农寺共屋而中通故得相游以熟每春秋佳日花靚竹香则缘翠崖俯清泉淪茗池亭上徜徉竟夕不能去叙之雄辩博闻能杂记经史成诵尤嗜左氏常常讽道之余固已奇叙之矣退而察其所安则金玉其相表里无伪寒抄暑讲手不停披虽僦居湫隘常置图史轻舟往还必携数笈自随逮其卧疾河滨客有问者则犹执业而起呻痛咏言杂莫能知甚哉叙之之好学也忽一日语余曰子知日月之所以为易者乎曰阳也而毕月乌居之阳含陰也月陰也而房日兔居之陰含阳也二用无爻位周流行六虚非乾用九坤用六不足当之则其讲贯劈析之精於老师宿儒所闻能守之不失盖如此惜乎艺益工而病牢志逾励而年嗇方望其有所传习者次第出之而叙之则死矣叙之字也疇名也惠姓家江陰曾祖讳子明韬晦弗耀祖讳坚以忠义死建炎间父讳焕赠朝奉郎母蒋氏乃乾道宰相家女娶史氏故太师丞相越王之孙今太传丞相鲁国公之子方叙之生母梦苍玉虬蜿蜒遶室颇负以为瑞既长质灵性迈崢然有場屋声时鲁公望临缙绅既任以官而叙之躬自督励弗改其度贡于礼部铨于吏部三以春秋冠经寻第庚辰进士人以是才之初辟为提领所干属改浙东安抚司干办公事两监西京中岳庙三易乐平余姚常熟县宰倅平江未行主管佑神观绍定改元被旨为内职事官越三年除簿又一转为丞请外知武陵以直宝章阁朝请大夫致其事叙之虽历十二官而仅书常熟令三考扈正簿一考澹然亡营职思其居常熟故子游里息弦辍响者不知几百年而叙之至其间劭农以时美士以学擢良摘奸以政政成鲁公遂即其所居阁榜曰景言不虚美也九扈掌仓储委积事簿勾检稽失率以晨出夜归为常昔之为此官者佩玉长裾不乐於走趋而叙之弗懈于位蟠奸错蠹尽洗刷而爬梳之盖与其践扬之多分毫无及物之利则宁若计考之少所至皆惠人之实也若夫心经意纬唱义役於乡饭饥薪寒櫟死药疾与比隣鄢鄙共其休戚此又叙之之所优为者死之日享年止五十识与不识皆嗟悼焉其淑人史氏柔嘉淑明先十九年卒而叙之义弗复醮尝曰鲁公之德何可忘也男一人启孙文林郎监临安府都税务女一人游学浮屠法不嫁为尼孙男女六人尚幼将以某年某月葬於凤戈之乡与淑人合圻前事之某月启孙乃状其爵谱行年乞铭于潼川吴某是安敢以固陋辞铭曰

玉虬之苍苍何梦之祥于飞之凤锵锵乃合葬于凤戈之乡既予之以厚兮胡不畀之以其昌天乎人乎卒莫可知兮尚倚梧竹以漱遗经之芳也

段圣可墓志铭

岁嘉定辛未冬予自鹤山归憩于连山段光叔之馆雪中燎薪夜半压酒摘露菜煮豆花相与商论皇王帝伯事诸子森森侍其侧各以经质问鼎年甫冠已通周官大义矣後八年余为成都教官时刺史王恭叔每语及广汉周礼一经颇有传授自张无隐而下冠蜀省凡四人教敝文衰先王致太平之迹後莫窥其髣髴有得其皮者有得其骨者独子段子得经之髓是可望也余跃然起曰岂非鼎其名圣可其字者乎是家兄弟皆踈秀而癯惟圣可充悦磊落耳萃萃神谔谔运笔飒飒动书数千言奔逸豪放如劲马入阵不可遏逮其嗒然下帷则寒抄暑讲能下缜密深潜之功其资稟可入道也东走飞鸟西走大峨担簦负粮不远数百里从二先生游

其所与交叉皆一时之彦持论傥不合则气涌如山辩翻如河必欲好己之道胜其识趣可尚也每石室月书季考辄加诸人先岁大比论秀有司欲第其所试文为上等羣言嘈嘈遂为之易置其声闻可畏也如是者积有年意其必至於成矣乃绍定壬辰圣可之兄昂之弟震午来京师忽袖出长公辛书以告徐眎之则圣可死已二年矣惜乎痛哉死生之大故则昼夜之常经也所贵於生者谓其不苟生也所无憾於死者谓其不遂死也唐人柳公惟深年十余岁有诬告之曰若骨相当天幸而为释可以缓而死公不可曰就使从之而生去圣人之教为异术不若速死之愈圣可幼年力不肯舍儒而之佛其事其语大略仿此则其辨志盖已不苟矣独奈何才与时不相遭年与人不相并负其所以魁?崛奇者而竟賫志以没是犹有遗憾也圣可四娶两严氏皆武江人武江去连山不两舍近故得世为婚姻子五男曰石曰壽曰革壽继从父女在室以辛卯八月六日葬于圣可所自择之兆曰艮山之原其弟兄必欲属铭于余且谓厥考曾得秘书书其墓而子今不以铭是负丞也呜呼文章公器也岂必馆中之儒而後为轻重哉以其谊不可辞故为之铭铭曰

古港有梅兮一本而六葩生则同生兮花亦共花或飘之玳筵锦茵或槁落于沧江之枯槎谁令然耶其偶然耶则鼎之不实又何嗟

王立言墓志铭

眉山王立言叔子天下士也号为天下士而天不为天下惜何也物肖形天地间韬灭黯晦不愿为材者尝壽而佩美负奇?然着於外者未有不毁性伤生故文木自寇也文雉自翳也文豹自罟攫?阱也不但草木鸟兽之文为然灵於物秀於万灵者尤造物所深忌回夭於学谊殇於才机瘞命於文贺短折於诗昔之圣人所以於坤之卦曰含章丰之诗曰尚綱盖为君子虑亦深矣立言髮未燥已刻意肄业与伯氏世起各专一经伯受诗季传春秋讲贯砉错日诣精到载笔入都俊造之林莫敢为矫先是学春秋者率以伯者事业横於胸臆故说利害强弱较巧而於公义人心上抉出疑伯之说独立言唱之厥後冠里选第南宫上第者皆其膏馥所沾溉也立言虽明经不同一艺之士仅有偏长精微朗畅尤长於论每一篇出人竞传之皆口自讽吟以熟亦可谓雄於文矣余尝谓文章固士之末而因末可以探其本盖君之学问家有渊源如浚井得美泉愈汲而愈不尽博物洽闻号经史笥名朝隐者君五世祖也中制科异等名当号红带老人名淮奇者君之高祖从兄弟也礼部侍郎直学士院兼侍讲修国史始终不附京桧号玉台先生名赏者君曾祖也订唐五代国朝故实承议公【原本缺】东都事略吏部公名偁者君之王父从祖父也早习博学宏词晚放情於一觴一咏号寸畊居士名养心者君考也王氏自嘉佑迄嘉泰百四十余年世称为文章家君又逮事诸祖生长食息不离典训之内门地人物固已高世老师宿儒尤加器重谓天必玉于成矣而一第不满能一官不及禄父垂老祖母肺病君亦蘊劳成疾死矣呜呼天既予之才以绍五世之美而不复假之年以营一日之养意何为哉君卒年四十四环乡大夫士哭于野于室于寝门外皆恸遗文有春秋折衷会解周官说题千金敝箒文章正宗典故十钜编藏於家两娶马氏唐氏女男二孙一子濬仲避蜀难与余同侨寄吴兴忽一日袖其家乘行义年状泣而告曰先君子合祔于鱼 山旧矣而未有述先生赐之铭则是欧老为曾书志而巩不死其亲苏公为陈作传而慥克终其孝嘻子过矣然亦何可不慰其心铭曰

隰有桑 荡有荷 君终於无禄 伤如之何 为子式歌 落霞残日 西山阿

卷三十五

<集部,别集类,南宋建炎至德佑,鹤林集>

钦定四库全书

鹤林集卷三十五 宋 吴泳 撰墓志

潘知县墓志铭

永嘉潘叔牙葬其亲之二十有二年追述前懿哀综遗事乞铭於潼川吴某曰铭所以示不忘也岁渐远哀渐平宰上之木且拱矣而未有述几无以盖终天之痛隐哉孝子之心乎既葬慨然如不及者斯之谓也余尝考诸仪礼士丧礼无铭周官司勲戴记卫孔悝特着铭于鼎然皆自上焉者诏之非若後世自刻於石也不但此耳少不谏长而子率谏父之行以为崇孝諡必及爵而士各制师之諡以为尊名志所以章旌饰柩而传经者以为记碑所以丽牲绕紼而斲辞者以为文陟岵之诗亡而蒿里薤露矣臯复之辞散而大招小招矣冢人墓大夫之图弗辨而比干铜盘志灵公石椁铭反认以为古矣今之志铭尤承讹袭误未有正其非者叔牙曰先生之教固厚矣抑中心所欲言诚不能自己也盖昔者吾先君子起自儒家淳泊坦厚幼入小学诵诗肄简谅诸老已器其能暨冠升上庠文名籍籍出衆右绍兴龙飞遂举进士主相陰簿都临安盐仓新邑社建学宫籍流徙之民以招徕计乱丧之户以赙补凡所兴为详缙周密令莫能出其治尹莫敢侵其守也後入蜀主利州路帐司文字兵财器用簿吏士马牛食靡不申讨而究其实时敌兵大散袭皂郊直犯天水庸将王大才战衄愧死制府以刘昌祖代领其衆官军与义兵合转战夹击遂梟其将人尚有鬪志也帅区处失宜轻放散忠义榜一张下四州复为盗区昌祖弃西和保七方关以外内骚动会總领王鈇与制置董居谊不咸鈇檄先君偕出先君曰均王事也躬自攀缘栈道抚辑义旅进至杀金平溃散复集因间语制臣曰大才身死而佚罰昌祖罪大而慢命张政张虎才可用樊青董炤过可使若不亟议施置人谁死敌卒用其议边遽寢宁两司睦如初先君未尝自以为功语人也既通籍知隆兴府新建县未赴里中以旱告邑令谗先君忠信诚慤共请祷斋者弥月因得疾以歿是可痛哀也已夫痛莫痛於追远哀莫哀於没世而名不称况先君与先生之弟工侍俱为曹昌谷所知而益昌旧闻熏聒於友义之堂者必审盍不为叔牙识之余作而曰孝敬祥顺善行也惻怛忠爱仁政也廉不沽名姱节也勇不避难達德也先机料敌卓识也临阵易将忠计也忧国而病勤民而死笃诚也郑之罕宋之乐彼有一善史不絶书岂备衆善而莫之铭哉君名惟一字景参三代之讳之行若父若子若孙之氏之名自有论撰陈公畏行实在姑评隲其美系之以诗曰

陵上之栢蟠虬枝墓门有梅鶡萃之海风不载白鹤归岩花漠漠黄鸟悲体魄在下魂何依岚销土蚀十字碑英规高嶷不可追欲知夫君视铭诗

黄虎墓志铭

诸暨会稽大县也黄邑着姓也虎公名子文其字也宪朱氏曾大父母也瑀赠忠训郎吴赠孺人大父母也祖登仕皇考也鲁氏皇妣也生而颖悟庄重如成人公之幼也刻苦植学取友四方遂登戊辰进士第公之壮也调归安尉主淳安簿司霅川狱知永嘉丞归安以忧永嘉以病俱不赴历任虽四而仅言六考公所閱官也唱第授初秩荐举陞从政覃恩转文林致仕改宣教褫褐几三十年浮沉选调至若告老始得通直公所积阶也淳安赋籍漫不可考吏因为奸已输者复催公私交病公曰勾稽吾职也出纳有令销印有时邑计始裕吏无所措手而民安之乃相邑长大飭乡校羣士之秀者肄业于中士竞兴学登于俊造者眎昔为多迨其去也民怀公之惠士德公之教攀留祖饯充於道周此公之所以供簿正也安吉狱市放纷圜扉无茂草公素明审味心诚求之之训有隶于刑者以身亲之既得其情则曰此所谓庶戮之不辜也盛暑给水浆隆冬给衣被病则药之死则槥之流徙则计道里远近资之皆取诸饬廩虽桁杨拷掠之余无怨言此公之所以为司理参军也平居燕处每有常度家人不见有惰容训子弟如严师待交友如同气恤乡邻如家人里之孤贫者嫁娶之如子女凶年饥岁以赈以贷泥涂断港必甃必梁故邑无流殍而行者不病涉此公之处乡也自安吉罢归屏居丘园十年不调以书史自娱邑多佳山水暇日与亲朋盘食榼酒游适其间神气冲澹一毫无荣进意端平更化今参预郑公於公为同年亟称其贤欲荐进之而公倦游之志已弗可夺一日谓其子曰穷达命也吾未六十非不堪事诸公贵人非不我知然此心已在泉石间矣明日遂上章致其事越三年而後卒此公之知命也甲子三百四十公所享年也丙午三月十三卒之年月日也是年十一月朔葬之日也邑之高岭公所藏也杨氏先公二十七年卒元配也陈氏後公四旬歿继室也嗣孙免解进士子也许适衢州教授周甫女也状其世系行谊年者庐陵通守林宋伟也介参预郑公之命俾志其墓而为之铭者同年生潼川吴某也铭曰

耨之易而未获兮筑之勤而未落兮高山之陰陰已合莫兮

郭县尉墓志铭

曹谿郭仁甫兄弟能尊贤友善为王恭叔高才卿所与余官成都尝遣二子之西巽东就学後归自五花泉上过溪於仁甫乎馆仁甫置酒作乐张甚谈论亹亹外若驰使而中实不糊涂一乡之杰也退揖清甫则慈祥逊悌冲然若不能言又扣其二子进学浅深之候之酉粹而文巽东魁岸有英气真称其家儿也後半年余以路机再游成都清甫死焉後一年余在小益制幙震东又死焉後八年余为中都官震东之父仁甫又死焉自始至今不满十年哭其弟若兄三人人世何如也仁甫讳荣之事亲孝居家友少通春秋颇能为竹林清明繁露之学屡试不偶抚遗经而叹曰釜?本以养亲而不得朝夕暨也宁输东园钱受比部尉遂载锦輿隐於九峯山下方春花香鸟鸣怡愉豫悦日以色养为娱未几而亲丧则不复事王侯矣墓之侧筑室榜曰终礼其家燕处之堂题曰虚白民病涉则驾两桥於屋之东西以济不通军以乏食告则自捐家资以纾国之难孺寒饭饥槥死药疾春赈岁贷率有常度余尝病今世之士实讳贫而文诋富抑不知富所以为善之资也洪范曰既富方穀盖有既富之实而後可以强於善也毕命曰资富能训盖有资富之地而後可以迪於教也一乡之中而有富於一乡者则乡党资其仁一国之中而有富於一国者则国家利其义此岂毁檐隈巷败衣缕褐者之所能为乎彼诋富者所是非往往失事理之平余於仁甫之亡重有叹也葬之明年犹子之酉以书来谄曰伯父治

命必欲之酉之子坤珍为震东後又为之请铭且谓二孔君皆韩吏部所志也子既能为父铭矣伯也奚辞乃摭其事状而为之铭铭曰

天仓不可以峙粮玉井不可以给浆腰金佩璜和鸾锵锵而我居园卒荒然则能为善於一乡一国者何可忘

郭隐君墓志铭

去旌阳四十里曰曹溪沿谿上下田高水深过桥之东南宅於平衍松杉相望杂种桃杏花一目几数百家是曰曹庄庄故以曹名而郭实自曹出也隐君讳洗字清父与其兄县尉俱以好礼闻尉高堂大厦充然自怡而君不广门巷不华第宅劬劳自课如未尝富者然每四节之会社某日鸡腊某日酿内之合族承祭外之延宾留客其调度实与兄等至乡邻有急则以财赴之游士过其门意无不自满去真可谓一乡之善士矣君少不天继以陟岵之戚与祖母曹相依为命已而曹亦下世家事无钜细必自厘飭对妻如宾役僮如倩字其弟之孤男婚女嫁无懈色为人极简朴口期期未尝以疾声遽色加人而人亦莫欺也独严於教子训励程督无分陰放假出游庠校则储粮办履不限之以方岁乙酉之酉遂贡於乡族姻世旧湊门争贺乐饮几句人不荣其子而荣其父曰此庄百年未之见也余神泉戍满之酉以疇昔游从之旧延至其家尚获与君夷犹溪上弄水浇花於林樾间不两月而君死未死前一日尝告其家人曰余始生在旦劬劳之辰而张酒设乐窃不自为安遂斋戒具冠带乘小竹輿亟往罗浮以避方夜漏下廿九刻参斗阑干急呼童点烛整襟危坐童莫晓其故而君已溘然逝矣呜呼死生大事也不疾而死几於寂灭不之正寝而之真人之庐几於羽化死之日当生之朝而犹孝思不匮弗敢以父母遗体于逸于乐则又几於得正而毙矣之酉领诸孤稟之母氏张孺人已於绍定改元十月十九日葬君於仁义乡计善里兑冈之原谱系有记行述有编而犹请铭不置累书到中都且以危语撼余曰华阳之聚吾子尝坠言焉今墓木之华六易矣奈壤下何余愧不能答也乃为之铭铭曰

生曹溪死罗浮非佛子非道流家好善身好修本仁义尊轲丘子力穡今有秋铭不磨閼诸幽

蒋知县墓志铭

孔氏之门富有百官而尤以长民之官为重孔子大圣人也为中都宰由圣人而下闵损治费仲由治蒲言偃治武城卜商治莒父端木赐治信阳高柴治成宓不齐巫马期治单父其不着所治之邑圣人特许其可以为之宰者又不在兹选也夫以数子之品质才分皆卿材也皆将相器也而独以治邑称何哉盖一邑者天下之式也有地可居则规模之施置易去民弥近则教化之流行速非若後之冠进贤紆墨绶者反不屑於亲民也蒋君叔舆少韩其近世良令欽方其摄永新也县经峒寇後赋入鲜少未免预贷於民君曰此弊政也廼鋤奸摘佞以德以法宁先除害本以寬民力不忍促输期以奉公上郡督邮旁午於县不顾也用郡将部使者荐擢知弋阳先是江东诸邑重困於月桩钱绍兴中始减十之一乾淳间复减十之二至绍熙则通减十之三四然上饶一郡仅捐缗钱一万而弋阳凿空桩办之数犹故弗减也则缩泉增料内

緝酒政以課之羨補之歛不及民而邦用亦濟登矣如墮社稷以報本廩常平以振乏清獄市以澤冤正版籍表戶畝以差第其力役邦條吏約每張下民咸有愜志嘗指心謂人曰滿腔子無圭撮欺偽隱哉仁夫君自以不欺則人烏得用其欺哉然心學之苗裔則亦有自來矣蓋程氏之學傳於袁溉道洁袁公之學傳於薛常州季宣君雅與常州游又嘗接聞道洁之遺風緒論故其國中所施行者皆羣居講摩充而達之者也居亡何以忧民病以勤事死卒不能大用於時是亦可哀矣君之曾祖曰扶祖曰惇贈中大夫父曰行簡階得奉朝議贈中奉大夫曾守常德有遺愛於人君實象賢也少負奇氣於書靡不博習歷策星文鍾律地理五診上下經八陣奇正法太一臨守行犯之數皆能心籌指畫不留神也歷官自維揚戶曹監仁和買納場授岳陽推官轉永新丞具有佳政然治縣之譜尤其著也以嘉定十六年正月二十六日卒于位以寶慶元年正月十二日與孺人劉氏合葬于瞿嶼山享年仅六十一男女五子曰熒焚焱熒皆孝弟祥順各能謹家法某守中川焱以士禮見袖出其先君子存齋行治官世狀句余銘郡方詔掾政不暇述則又貽書吳興寓所曰先君用止百里未究所長不借潤詞不足以達其志嗚呼古所謂士之達者以民不失望為達不以官之尊榮富貴為達也今君治弋陽壤地虽偏小而能使居官大民又不失望焉則是達也遂為發揮孔門愛人之道與君試邑之法書而志諸石復取水心叶公適語為之銘曰

壯矣弋陽藿竹青蒼厥壤甚夷水廣山長上迫征求下憐愁苦依其永存以作民怙水心揭此銘君之齋鶴林持此銘君之墓

待制侍郎弟圻志

有宋正臣吳昌裔以直道黜以力学病以忧民死生于淳熙癸卯卒於嘉熙庚子歛以士服奠以家禮引以侯度嫠之分則其死所也越一月負喪于東嘉郡又八月卜兆于荆谿山后於十月辛卯祖於癸巳於己酉其未亂也呼二子概米而語之曰吾之病病矣不復有起色矣汝宜依道理行概問所歸則曰依伯父行哀夫敬夫君子曰終吾知弟之能以禮自終也余少孤與弟共學食則同案坐則同席出游則同方非古之道古之文不好也弟後余舉進士贏糧撰屨從黃直卿先生授文公諸書以歸即書窮理克己就義朝講暮習寢食盡廢以故得瘡疾虽榮宦四方泊如也為御史言論侃侃諤諤彈劾不避宰相嘗諗同列曰台比以課考月成吾當言而言何用課故察事才六閱月而奏疏已三十三通言漸廣仇者愈衆遂奉命贊西事至丹陽病建邺又病從我於宣城及退居苕谿病益牢每病作床頭猶置書冊少間則執業以興呻痛誦言雜莫能辨蓋將以是老焉會朝家予郡出節不拜浙東以旱告始佩金華綬至之日訪序事詔求政首以生齒登耗籍于版以飢貧困厄筆於書圻分井画丁給戶散少不獲濟則忧心怲怲而不得愒焉民正賴以宅生而邦侯死矣侯西州人家在天之涯葬在海之角囊者兄中川太守吊者祖者皆中川賢大夫士茲殆非偶然者惟是歷十有五官致位法从而無宅一區無田一?攢地請於朝喪具取於賻贈抔土寸椁皆君之賜斯榮也抑可哀也已官世行治二子已哀次其事求之當代銘筆且以橫渠之志天祺為請嗚呼後乎吾來先乎吾往叔也既不及志其兄則伯子某敢不屬辭以納於弟之圻十月既望兄某志

抚机弟墓志

不吊昊天崇降禍於我家何其酷也先是高祖彥翼首筑書樓以保艾爾後我世父仲勉仲叔父申之翼隼皆貢於鄉至玄孫泳昌裔象明有成中孚連三人比五登進士科直叢叢如桂樹林立論業而未及成者耆孫與昌辰而止耳人謂吳氏種德藝學至四世滋大也生不逢辰適與禍會或死於兵或死於疫或死王事故泳自嘉熙以來元年四月哭中孚十二月哭象明哭昌辰三年四月哭耆孫八月哭有成四年二月又哭昌裔無歲不為哀無月不為位無朔不望喪者之鄉而哭其間冠衣純采才數月而已嗚呼天乎以孤露之舅弟不四載間而哭同胞同堂同從祖者六人如吾之衰反久存乎世豈吳氏三世以來若祖若父若泳之身皆代為冢嗣天亦不忍更弱一個以頽其緒業也曩者泳以天子命召諸弟皆祖于江上時汝在安康未及別既列官于朝尋以罪去國出守宣城又罷顧瞻四方莫知所適歸遂挈兩院僑寄于吳興邑下雖一瓦之覆一壠之植咸無焉以庇其生然構堂聚族之志純始終弗變也汝與兄書首以弱妻幼子為托兄亦念汝獨留于西固吾土也而汝與吾則皆高祖之精神氣血也一氣不屬百骸皆病故莫如南下來此伴吾庶相與共學不壞我高祖寡命豈謂汝遽遠吾而沒乎死之處所及逝日月初皆罔聞知亮孫扶旅櫟來始信寢疾于洛磧奄終於涪陵其疾也醫無所問其病也藥無所醫其將死也禱祠無所質徵其含其殮也又無壯子弟無強近之親相其事退不能返諸故鄉進莫能葬諸中墅孤舫傲兀旌杠搖搖曠一年僅達兄所吁汝不幸死矣而又遭此不幸也寧不使我三曲而哀哉又四年實淳佑三年也其子常孫奉孀母命欲以九月丙午于武康大寨丁山之原丐余志其圻余已志荆溪矣何可辭從弟諱有成字叔立蚤有能文聲才涉俊造之場便兩與舉選其居家極孝弟祥順其莅官極廉介庄恪其臨患極沈毅忠勇初調彭門崇寧簿繼嘉定司理榮州戶曹金州記室通籍宰遂寧蓬溪縣尋共二府事人跡之殆布衣諸生耳然其式遏北敵調集潰兵白刃如霜赤羽如日毅然以身當之不少懼寇平有崖刻石以誦其功者堂除江西路機幕而不及赴矣悲夫痛夫曾王父曰覺王父曰良翰考即貢士申贈承事郎母文氏贈孺人娶涂山氏五子常孫亮孫守孫學孫寔孫守孫後耆弟一女隸娘未笄吾與汝婦子相依于此雖別不能治生以資贍汝之家然持育教示如汝存焉獨恨余老且怠不能偕孝子送柳車遂之於墓故抒其中情之至隱矢辭以內諸幽

盛宜人墓志銘

余友洪舜俞昔同直紫薇省嘗與余上下商論人物則曰有章君鑑者隱於北酒庫沈潛而藝方雅而飭他日會有立也後三年章君為余不宰余適祠官僑寄百寮山下觀其野桑土辟問其國民數登退而眎其修於家庭者則父慈而教弟敬而友厥母侍祖母柔而則余以是知監為良士而舜俞不我欺也居無何其大母下世又三年母亦以哭踊悲傷之極感疾而逝哀子監稽顙授使者狀以帀走山間乞銘於學士吳某曰當代鴻筆惟子是屬若哀而賜之銘是子遺吾母不朽也余既諾之而病病彌月不愈監又累書迫趣則怏然而嘆曰文章以神志為主今神衰志耗筆路已荒惟恐詞之不令以為神羞得挂名書丹幸矣監曰不然昔東萊先生之病病矣猶力而銘番陽王君安之母今吾母之葬雖筮日已從而子之志未得寧舍龜策別卜遠日以待嗚呼孝子之情至此豈但辟不懷而已哉謹以其所來狀叙其事宜人姓盛氏在父母家莊靜謹約言不出閭閻不踰閭簪不飾華麗衣不被奇邪盡女事年十有八而嫔於章氏共祭祀必齋事舅姑唯謹服非手出不荐饋非躬具不陳盡婦職每客至惟酒食是議炮羊脰鯉羹鶉醢雖卒具必精潔芸翁雅好琴且豪於詩弦急則承之以柔興逸則聚之以敬盡

妻道辟塾於家延师教子入则问所业进减出则眎其友损益少仪内则之言时薰其耳於是长子监第癸未进士次子铸第庚辰进士兄之子盛如杞早孤字养几二十年亦复取儒科华外族尽母教夫古之女士有一节片行动侈其美登载於彤史宜人四德备矣表而扬之亦岂为过哉宜人以乾道壬辰正月十八日生以淳佑辛丑正月十八日死死之日廼生之日殆非偶然者但佛氏好说因果动以知生了死为大事而儒家只言感应独以积善流庆为究竟法子监既陞朝子铸亦贤大夫孙男二女六俱慧爽皆积善之报也铭曰

春不蚕兮被僮僮在公岁无褐兮手掺掺以缝夜弦暗识兮堂百琴壽廼翁嗟媛之亡兮輶颓案空国风声熄兮管未彤緝为铭诗兮賁幽宫

吴令人墓志铭

昔者先王之世礼修义明不独教化行于学士大夫而室家妇人亦各能勉大夫以正劝君子以义王泽既竭姆仪嫔则不见于後世如齐之孟姬楚之贞姜共公之伯姬虽号能以一节自名而沽廉眩恠壹志不改反遗良人以羞兹岂性情之正哉有宋集英殿修撰大理少卿徐公之妻则闲于诗而度于礼矣方公之典司臬事也当路讽之使蔓其狱则可立致通显公曰杀人以媚人吾不为也惟有去而已令人曰去之而後之人如公之平则已脱吏持巧心曲文以内之则是公貽後祸也深乎懿哉令人之性识明知道理乃如此公既得罪谪道州继又谪象迨其再谪也令人谓道犹哿矣象滨絶岛岂君子所宜独居耶遂斥卖簪珥挈其子偕往至则庐于櫓巢营窟之间食于蜃酒瘴茅之地佐纫奉饁恬不以忧戚婴怀閱二年公竟死其所则又复扶柩以归妇哭其夫子哭其父莫不咨嗟叹惜善公以义终而嘉令人以礼相也昔李安简公忤秦桧谪岭外荣国家居不肉食者十年人皆难之今以令人视荣国则尤人之所难矣令人姓吴氏生本儒家父通直时英秉德尚义见闻所薰习不待母傳之而良及女于徐每以不逮事舅姑为恨故凡在舅党者无不敬焉凡在姑党者无不爱焉恭大慈小色庄气仁每春秋之事眎滌濯羞簠簋劳以待旦必齐必洁性雅俭约副珈之饰弗改其旧所被服者皆嫁时之衣集撰公无媵妾令人左琴右书事之惟谨所以卒能成夫子之志者亦其素也自南归得风痺疾卒于嘉熙己亥八月戊午葬于庚子十二月某适守东嘉其三子猷子文子巽子论撰其行以相告曰先君出处大节帅臣文伯甫发之台臣颢叔甫直之词臣舜俞甫润色之而墓之有铭又得子之乡先生华甫以识其竊今无憾矣独先令人言不出閩所以相警戒之道世未有深知者非子志将谁属呜呼孝子之心亦可哀也已于是志其行之大者系之以铭曰

兰结于衿玉韞于匱胡言之出能折我狱昼不游庭夕不下堂曷命之奇奔走南荒亦既至止亦既见止胡然而天复俾遐弃象台云靡鹿城草萋生不同还死则共归有芳其猷有亮其节作为铭诗以诏来哲

卷三十六

钦定四库全书

鹤林集卷三十六 宋 吴泳 撰序

送王昌巽序

岁绍定壬辰临邛进士王昌巽东父访余於秘馆之寓舍嗒然其形峭然其容袖出一纸之书以相告曰太学首善之地而夫子冕服之章全不如古是可惧也先是蜀珍来贡京师谨愿者问禁修姱者问俗鋭於决科者问时务问套类子独味衆人之所不味方且周旋乎名物度数之间则子之问其大矣哉古者天子十有二章日月星辰山龙华虫六章在衣宗彝藻火粉米黼黻六章在裳至周而设日月星辰於旗登龙与火於山宗彝之上衣绘裳绣仅有九章而已孔子周人也自宜服周之服而今乃被之以有虞氏之章此则东父之所疑也然东父亦尝上下古今出入经传而细考之欤易言黄帝尧舜氏垂衣裳取诸乾坤礼言黄帝黼黻衣大带书予欲观古人之象作服所谓观古云者则象服十二章盖自黄帝以来有之不但为有虞氏之制也周冕服九章经无明文郑康成注司服独援三辰旗旗之说厥後遂以为定制杜注左氏贾疏周礼范志汉舆服皆本康成而不知康成实自叛其说也按礼记郊特牲云王被袞以象天康成於其下释之曰谓有日月星辰之章则是三代衣服亦十二章矣若以三辰专绘於旗而龙以下皆绘於服则仪礼曰天子载大旗升龙降龙周礼曰交龙为旗礼记曰旗有十二旒龙章而设日月则龙亦画於旗矣审如此说则十二章之物缋於衣服亦缋於旌旗也其可以康成之说為準乎康成又谓天子有升龙降龙公衮无升龙有降龙是又不然公之服自衮冕而下如王之服则公衮亦有升龙矣大抵天子与天地参上衣下裳天地之制也玄衣纁裳天地之色也自日至星辰在天成象者也自山至黼黻在地成形者也九章去其三登其二恐於法象之间犹未备也国朝上自虞周下及汉唐崇礼考文订讹刊误於夫子冕服之制尤为加详但大中祥符间则欲用上公之制熙寧崇观间则欲用天子之服衣服令所载与议礼局所定章数又各不同焉圣远言湮礼文残缺寓诸记载者皆不可得而详不但冕服然也古者主位东向配位南向而今之先圣先师则位向皆相背矣古者席地而坐用簋而飧而今之塑象簠簋则高下不相接矣大晟合乐纯用伶官非颁乐之意也谒庙焚香杂用礼物非燎苴之义也曾子子思不曾侑食濂溪横渠诸子不及从祀而王弼王安石其祀犹故也胡安定置治道斋曾未讲行程伊川立观光法略不遵用而蔡京所定三舍法则牢守之不易也南渡以前士大夫皆不用轿故温公云不以人代畜也而今则无一人不乘轿矣宣和末京师士人行道间犹着冠带龟山初仕亦以此行礼而今则出门便从省服矣书啓代赅今下谀其上也制诰代言今君谀其臣也甚至衫以紫靴以皂拜以舞蹈燕以歌吹上而宗庙朝廷下而庠校党塾莫不恬於耳目之陋以为当然东坡尝谓今之礼官皆自牛背上来晦翁亦谓以今人律之先王之礼则今人为山麋野鹿予方依依然无所质正故因冕服之问试举其略请归而问之鹤山

沈宏甫齐瑟録序

昔尝闻善言诗者谓从神来气来何言之易也孟子平旦养气湛如止水而直而不倨仅得二雅之正言屈原中夜存神周游八极而伤而不怨止知国风之变体诗岂可以易言哉风雅声息礼义泽亡两汉四百年独园客十九首诗近古唐山夫人所制乐十七章类颂瑟之澹而音之希乃如此宏甫独抱朱弦号鸣千百载之下七歌诽而章八哀悲而则三古风大而婉其咏瑟师有云宇宙浩浩谁诗鸣遗响閤寂如英莖更无高谈细论者唐末婀娜江西清则亦可谓放於古而豪於诗矣宏甫则自知之而叙者乃谓祖之以黄陈则殆未深知宏甫者夫三百五篇诗之祖也离骚十六章诗之宗也文选所载自补亡而下诗旁支别????也今舍上世谱牒不论而认幼子童孙为之祖几何不堕於倒学哉宏甫已矣厥子中行亦蚤有能诗声乃袖出齐瑟一编求余出语为序曰手泽尔某何敢辞因与辨正其本且语之云春风咏归千载同赏吾孔门自有乐处无若尔父之落落於齐门也

刘靖文文集序

科举之士末也而文章之兴丧人物之盛衰系焉世道将废而之治则文物亦从而盛世运日降而趋薄则人才亦从而衰非人才文物自为之变也天也故尝谓政宣之际策上第者多佞臣绍兴以来擢高科者多奇士如张子韶汪圣锡王龟龄则又其魁伟奇杰真足以开南渡之中兴而绍北方之绝学者也每得其书常冠带而读之乃知养气厚者其立言也确用功深者其收名也远视彼之谀言佞舌立收富贵而终与枯骨朽竹化为野土者殆相十百千万也余生西州寡闻浅识实未知有刘靖文者生乎横浦玉山之後而出乎梅谿之前也属假守东嘉与其曾孙赉同官为寮暇日以一编之书见示曰此先状元补过斋稿也子其序之因谛翫数过文有劲气奇骨诗有儒言雅旨最是王充作刺孟乃作刺刺孟柳子厚作非国语乃作非非国语又以三朝国史有道术符瑞两志非春秋法乞申命史官删而去之自非卓识之懿安能破千古是非如此分明哉孟子尝曰我知言我善养吾浩然之气韩子亦曰气水也言浮物也气盛则言之短长与声之高下皆宜盖公平日守正秉谊养熟道凝不戚於贫贱不淫於富贵虽以老桧之气焰熏灼喉言者摈之於外而公如雪中松柏愈坚而愈不挫斯其所以昌於文坎若夫荣进素定不自爱重而曳裾沓沓於他门者亦枉矣

陈侍郎文集序

离文明之象也而曰黄离元吉贲文柔之卦也而曰白贲无咎矜词章以为富负言语以为奇皆文人之病也古之人抱道含章閤鸿音於窈窕宿至味於澹泊未尝务为炳炳烺烺求以眩俗惊世如邵馨沮楚吕相绝秦子产对晋臧孙辰告齐乐毅报燕皆沛然如肝肺中流出一片议论当其放言援笔时曷尝有意於祈当世之知卜後世之传哉亦不过曰辞达而已矣今之为文者略无古人舒暇之态一字之不工一言之不文则日煨月砺不妍不止非惟提数寸之管敷盈尺之纸书其所为文献於王公大人而名未成盖棺之事未定往往编蒲钁梓已徧满於书坊经肆矣君子为己之学果如是耶昔樊上公谓富贵而名磨?者不可胜纪我有类百首文章嘱裴延翰为序庶千百年不随樊川之一禽鱼一草木磨?予窃陋之彼固知富贵之不可恃而不知文章之丽言语之工亦与草木禽鱼同一归於腐坏渐尽而已卓然与天地日月相为长久者盖有在也东嘉文字之海无相居士不肯相表露家集所存仅十有六卷张忠简公

极称道之谓其浑厚高远如其为人呜呼其庶几尚絅之君子闇然而日章者也

东臯唱和集序

学诗者须是有夙根有记魄有吟骨有远心然後陶咏讽诵即声成文脱然颖异於衆咸无焉则虽穷日诵五千卷援笔书数百言殆如跛羊上山盲龟入谷终不能望其至也吴兴沈平澹然浙民之秀焉者也当嘉熙初从乌戍呼櫂舡郎载笔床提酒罍袖破古锦囊访我於百寮山下曰吾东臯子也形貌古怪颀然鹤骨谈词绮辩粲其象齿自言骑竹马年已习歌咏少长便能背诵後山简斋诸诗每啸傲湖山镇日忘返擡贴梅月一尘不着其题静斋稿云斯道在人心如蚌藏圆珠散作明月光敛则止水虚题吾何画柳手轴云还君此画不忍觑怕忆当年分手处则是根慧魄强吟骨亦高矣然听鸣凤於律中与送飞鸿於弦外其心声之近远固自不同不知子亦留神乎此否也余每叹唐人刘白皮陆盛山韦侯花下娄二十四秀才每有酬唱则连标共轴或自序或倩人序皆非无意於为诗者矧近时坡门唱和又岂能越唐人窠臼哉尝闻吴中有沈恭子者秦汉间隐君子也风流词翰极为清远道士所推服既同游虎丘则清远有唱而恭子无和恭子岂嗇於和者哉辞繁则真力减音澹则古意完此正所以为诗之妙也然则安知非东臯鼻祖耶为语澹然试归而求之某年某月某日鹤林吴泳序

又後序

歌曲古也曰歌永言律诗古也曰律和声赓和亦古也曰扬言曰乃赓载歌曰又歌皆虞诗也至周则衆体备矣振振鹭鹭于飞此三言体也谁谓鼠无牙谁谓雀无角此五言体也五月斯螽动股六月莎鸡振羽此六言体也交交黄鸟止于桑营营青蝇止于棘此七言体也既曰螻蛄在东又曰鸳鸯在梁则叠韵起矣既曰莫赤匪狐莫黑匪乌又曰鸢飞戾天鱼跃于渊则俚偶兴矣至若周公为诗以遗成王吉甫作诵以赠申伯即衍建安投赠之体召康公穆公之戒凡伯芮伯之刺即开贞元讽谕之章盖三百五篇中无一物之不体无一理之不贯无一字一句一格之不由此出先儒多以五言出于汉杂律起于唐今东臯子亦谓其唱酬之集祖于坡门是犹未之深考也予好读诗者於三百五篇尤所深好盖以其得性之正情之真也独怪退之序韦侯盛山二诗达官应而和者皆集阙下子厚序娄秀才花间唱和集得与於编辞者皆太平不遇人岂辞章亦为人而为穷达耶东臯子笑曰试为我识之

记

钱塘县学记

王畿首善天下有辟雍有頖宫皆所以尊教治达邦法也钱塘在五代时斗僻一方其国险其民暑船车戢马轻死好剑率以武力竞维袞封君长缘饰儒术置择能院以笼络吴中之士汔未有闻人我艺祖皇帝迅扫区夏挈钱塘舆地尽归职方列圣丕承陶以诗书风之礼义而後贤良方正之士兴焉然学犹未暇建也庆历以来诏天下郡县皆立学两浙路独杭与苏越得置郡博士增弟子员如县无校官则命令佐主学事至是江以南彬彬多文学之士矣然附郭

之邑犹未置也六龙渡江驻蹕於此戎事才息崇礼考文内兴太学外设庠序大抵皆眎开封而钱塘为邑至绍熙间令昉建夫子庙简肃李公祥识之正朔欵谒春秋奠祀则有其地矣而黉宇尚阙无以为属民读法?校比之所顷赵侯兴懽来尹京兆喟然作曰临安赤县二先忠宪宰仁和已建其一岂斯邑有社有民而不知教耶迺景冈相基取日庀徒於县之东得承旧寺徙他所遂建学其上命宰与丞巩耕及簿正王梦得相其役越三年有成宫雍雍在左庙肃肃在右廷殖殖在中门臯如也殿邃如也明伦堂旷如也池疏为二斋列为六宿直之庐公养之廩靡不严备像设礼器稍不应图法则又仿京校取正焉士於是可以藏修游息也是役也簿正实始终之则贻书潼川吴某愿有述某谢曰春秋不书修顿宫之义何敢书则又曰今徧州县皆先民记矣某既不得辞乃以得诸圣贤者而谗多士昔毕命之训殷士曰虽收放心闲之维艰不由古训于何其训孟子亦曰学问之道无他求其放心而已矣圣贤设教千条万目只要人将已放之心敛而归诸已而学者悻悻然率驰鹜於外因物有迁而失其本心者多矣矧囿於衆大之区哉利欲之薰心也奇巧之荡心也纷华之悦心也淫乐愿礼之接心也宫室妻妾之动心也一旦昼之间知诱物化牛羊之牧鷄犬之放其所存仁义之良盖无几矣资质敏慧者不过竞习科举而亢志於高明者又不免蘧庐孔孟而归宿老释也然则何以长善救失而新美其俗哉毕命所谓收有德义之训焉孟子所谓求有学问之道焉非必取成於心尊奉其精神屏除其意见絶学捐书不稽古不论业而径以为是也为语邑之秀民更请择於斯二者

演教堂记

盘古开辟宇宙天先成而地後定故都天之号柱於八极者三不周以北存而勿论可也惟瀛山之东杭山之南积气温厚有双柱峙焉以其上通太微之室故曰洞天以其中伏三辰之根故曰天柱道家者流好言天与帝而不以地对盖维持主宰者在上地不过承之而已洞霄旧号天柱观而演教堂则又接天柱之乳而流出道德者也先是堂列大门外传者曰神营化造不类目巧之室殆未可知也後遭兵毁更创於正殿後绍兴肇其迹开禧免其宇端平又峻其基室虚而白楹广而闲雌霓抱梁阳乌承檐堂之背叠石作巘曰聚仙亭翼步櫺而上曰方丈室耽耽乎广厦真可谈混元论黄虞矣矧惟我高宗皇帝曾手书度人经以镇清真之场孝宗皇帝御制古涧松诗以尊不老之道玉字扁於宁考金钱锡於慈皇今主上又勅命冲妙师文明董集斯事列圣修道崇教何其盛也堂甫成文明羽化而师孙处道与监宫大年及大钦述师之志综其本末求记於潼川吴泳泳曰汝知所谓堂者因教而有堂耶所谓教者因堂而有教耶向者堂弊教亦弊耶今者堂新教亦新耶吾与子言堂有成坏而教无新故仙圣之所重惟教耳然圣人以身教也真人以神听也以身教故不悦道之华以神听故不逐言之迹今营一亩之宫筑环堵之室既勤朴斲又涂墍茨轮焉奐焉惟欲其美而身有玉庐心有绛宫脾有黄室肺有皓庭面有赤宅耳有三门喉有十二楼两肩有紫户青房七窍有金关玉钥皆自己之堂也而不能?也指三洞十二部为教母综五筭七十笈为道枢勃勃出於珠口团团走於环中便以口之所授为演妙耳之所闻为证真而自有此山以来陰阳之浸昏晓之割日月之相辉云雷之相荡飘风暴雨卒敛於无雕烟缕霞复归於朴鸟啼而林幽则动中有静龙蛰而雾滃则寂中有感变通而为四序流形而为品物不宰之宰不神之神皆自然之教也而莫之悟也处道曰若尔吾记则历劫以至於今千圣之户庭荒矣虽然吾复为子通之老氏之学与佛

者笼罩诞漫之说不同根以清淨虚明行以慈俭忠孝其无为也无不为也近於易不爭也莫之爭也近於谟谷神之说近於虚受嬰兒之喻近於若保修养而引年近於祈天永命真誥謂性与道合由道之体近於中庸王子謂一气孔神於中夜存近於孟子若夫淮南原道之极至於和与性便父无喪子之忧兄无哭弟之哀童子不孤婦人不孀兽胎不殯鸟卵不殯则又吾孔門家法也作是堂已玉眸洗洗岂无望道而欲見者傥能味法如蜜調心如弦淶神識如鏡为善无近名为学不躐等虽有拱壁駟馬不能易吾進道之心則聖真在己不必問鄰矣霞子研之哉云孫莹之哉

退齋記

昔李伯陽學商容見舌而知守柔矣列御寇學壺子觀影而知持後矣守柔持後皆退之说則不但翳然山林往而不返者为退也老氏之門大抵要鞭辟从退步上入然有術焉故欲上民也必以言下之欲先民也必以身後之以靜勝壯以弱屈強以不爭挫其銳方其收斂而不欲放也則若冲若嗇若畏与事物接逮其发达而不可御也則有奇有正直欲以无事取天下也此真是以退为進者而揚子云乃属之顏子岂不厚誣吾聖門之大賢哉夫仲尼天地顏子具天地而小者也一歲之運其中有信有屈陰進則陽減陽長則陰退進退交相養而歲功成焉然天地實无心也聖賢進退之道即天地陰陽之理知而不失其正則為聖學而不踰其度則為賢若進止行違一有系吝之情則非孔氏家法也吾友張直夫道韵冲澹旧号拙軒今又以退名齋且自叙其历官狀为之記於名利雜糅之关而猛歇焉是亦難矣然猶惧夫退之夙而未至於履而安也故复着孔老之辨使之明有所决擇焉

徑山寺記

國家駐蹕臨安自西天目龍翔鳳舞舒岡布麓盤結而為帝王之都者錢塘也自東天目熊騰馬奔凌深拔峭發越而為梵釋之宮者徑山也山以徑名乃天目之徑路其地尊故鬼神不敢宅其境勝故凡庶不得居必也建大道場作大佛事然後能儲精會秀接光景而納於其中始國一禪師卓錫於此興廢逮今蓋已四百余年矣先是慶元己未冬龍王殿災精廬佛宇一夕而燼住持僧元聰治故而復新之後三十五年夏再毀無準師范慨然嘆曰曩在育王時曾夢一神人偉衣冠盛儀衛馳騎而前迎疇昔之夜又夢前神人者持二十一寶珠以相授曰謹勿訝或謂夢之神即山之龙珠之數則火之日也豈住止成坏皆數耶師於是精進心轉不退輪以勇健力撻無畏鼓披榛塞穹高深度材於山視昔所封植可以為榱為梁為桷為杙者飽厥用則鳩工聚糧命千方之僧相其役一念才起諸天响合上方頒賚甚渥公卿大夫士樂施舍南國之好善者不祈而獻力越三年考成曰殿曰堂曰門曰廊曰樓觀栖客之廬齋庖之所庫庾井廐靡不畢具最是龍游閣居翠峰之頂畫拱璇題承云納日而虛欄外曰凌霄之閣天空宇迴若與灝氣者游循而下曰殿曰寶所曰靈澤殿曰妙庄严閣不但如飛來涌出而宸奎麗畫寶鎮此山實振古所未有旧兩僧堂初學者居外久習者居內殆非不二法門今則統二為一楹七而九席七十有四而納千焉矧翼五鳳而??門之虛建万物而補艮山之缺皆以大用勝服之若夫乘金相水西奉多聞異僧所云更不道也比年以來歲數不登諸方寺宇兵殘火毀荒基斷礎相望百不能興一二師乃於艱棘之秋廉以克己勤以募衆竟乘愿力成就茲

事岂不谓释中之杰耶虽然予尝闻瞿昙氏之为教也旅泊三界木下一宿穴土为庐编茅为庵达磨之不屋也德山之无殿也包摄之不设佛像也杨岐之不盖僧堂也风穴之不葺破院也林洋泰布衲之不饰寺塔不占檀那地也瓦石击竹无非道山桃开花无非禅地上水庭下栢无非佛安得有宫殿楼阁之华哉无準曰否也了性者真幻皆性证实者权假皆实一大宝藏半说庄严一部华严只言现量有是身非旅亭也有是物非寓宇也有是居处室庐非假观也有是宫殿楼阁非化城也於密屋可以识无陋於镜壁可以见因果於广大楼阁可以观三生立一枯木为像可以起人敬心以一团泥涂地可以使人不堕恶趣荃草建刹具足大智聚沙为塔皆成佛道安得为无范金合土墍茨丹雘之事哉予谓由前之说则一切为之事俱落虚无由後之说则诸祖无上之宗悉成断灭泥空则如盲人模像黑山窟里修行堕有则犹跛鳖困泥浊海波中起没二说皆非也道有则一尘不立道无则一法不舍於真空而不着顽空於妄有而转归妙有信圆而不偏念活而无弊合体性名貌融乎一源其庶乎道哉师曰兹事且止普乐院火永邦建之记者张无尽也圓通寺焚师序复之记者周益公也已未之厄聪亦求记於楼学士子旧词臣也盍为我识之岁丁酉登山师首请守宁国又请奉祠龟溪请益勤且曰上累盼金币赐御书复赉范以金襴法衣佛监师号盖自灵山付嘱以来未有如今天子神圣慈武清心寡欲笃行善道扶立教门如此之力子尚可得而辞耶某不尝醞醐不嗅薈卜枯藤败笔何能铺述盛美然学自孔氏所求乎子以事父臣以事君尝恐不尽其分无以报国汝等舍世俗家出形色界辞亲割爱不拜君父饭以珍厨栖以大厦将於何所求以报国恩持经诵咒不足以报谈空说妙不足以报殫子之力尽未来世以无量宝聚无量庄严不足以报惟敷扬大旨警悟羣迷具如来眼踏毗卢顶掘二祖髓印大梅心标俱胝指破马师欽师惑使一切衆生成等正觉此真是报国恩处监曰唯乃为之记

卷三十七

<集部,别集类,南宋建炎至德佑,鹤林集>

钦定四库全书

鹤林集卷三十七 宋 吴泳 撰杂着

论克己复礼

洙泗之门问仁者多矣诸弟子之问圣人不过指之以求仁之方顔子之问圣人直语以体仁之实何以知其为体仁之实人之一身上下统体浑是惻隐浑是忠厚上则与天地同气下则与百物同产无一事之不该无一端之不体也人惟梏於有己之私不复思夫上帝所降之衷天秩天叙当然之则哆然以吝骄自封而眎彼之疾痛痼痒邈不相及则人理於是乎息矣克己者所以胜其私而去其害仁者也复礼者所以反其约而本之以仁者也先儒讲解多说克己所以为仁其於复礼之说则大纲举而条目未备因取顔渊问仁一章潜玩密察则见礼之与仁严列森布流行贯通未尝一息之间也父子闺门之间懽然有恩以相爱宾主上下之间温然有文以相亲是礼也亦所以为仁也礼用於射乡所以仁郷党也用於尝禘所以仁昭穆也用於馈奠所以仁死丧也尊高年以长吾长慈孤弱以幼吾幼吾之礼絜乎天地之间而仁不可胜用矣其曰一日克己复礼天下归仁者实有此功效也夫子告顔子以礼必使之躬行四勿之目而异时顔子之得於夫子亦曰博我以文约我以礼是知为仁必以复礼为主哉或曰克己所以复礼非克己之外别有所谓复礼之功果以是说则割遗体之爱而甘寂?屏有身之患而常清静如佛老二氏絶?礼乐是果得以为仁乎哉程子曰人虽无邪心苟不合正理乃邪心也学者岂可以克去己私之後而遂无所事於礼哉虽然仁实包义礼智故施於事则为宜发於情则为文见於中心则为知觉亦犹天地间阳春之气亨达於夏流注於秋而宿藏於冬者也尧舜洞见此理故性仁孔子真知此理故安仁顔子实践此理故不违仁然则尧舜孔子其太极而顔子如春矣诸君羣居终日岂无学顔子之所学者试与商略之

论诚

诚者纯是天理更无纖毫作为故曰天之道诚之者行乎天理而不免参以人事故曰人之道勉涉于用力思涉于用心不勉不思则从容整暇无行而不中礼无入而不自得也此圣人之事也周子所谓性焉安焉者也未至於圣人则择善而後可以明善执德而後至於达德此贤者之事也周子所谓执焉复焉者也然而贤者得一善则固执之可也复何所用夫择哉呜呼天下有至善不可不明也久矣申生之孝荀息之忠於陵仲子之义彼非不欲为善而要未得为纯粹至善者皆择焉不精讲学不明之过也盖择善固执者为学之纲学问思辨行者择善固执之目有弗学学之弗能弗措以下则学然後知不足者也人一能之己百之以下则困然後能自强者也致知之分数常多于行故学必欲其博问必欲其审思欲其谨辨欲其明皆所以致知也行之笃者所以力行也在己之工夫常倍于人故人以一能已则百之人以十能已

则千之谓当倍用其力也非谓以己之多能而欲求胜於人也此又诚之之道也苟能此道矣则虽愚者克之可至於明柔者勉之可进於强向也扞格而今则脱然悟矣向也苦其难而今则卓然有立矣书曰惟狂克念作圣此之谓也或曰上智与下愚不移而此言必明必强何也盖天下惟学问可以变化气质学问胜气质则愚柔可变而强明若不能胜则虽高明者亦将陷溺於邪暗否塞矣孔子之所谓不移盖谓上智就学者与夫下愚之自暴自弃者设耳愚尝反覆中庸一书之始末而观之然後知无一理不原於诚无一事不繇乎学曰天之命曰上天之载曰鬼神之为德曰鸢鱼之飞跃皆实理也曰谨独曰明善曰笃恭曰尚絅皆诚之学也然则诚也不独中庸言之而易之乾已言之矣大哉乾元万物资始诚之原也乾道变化各正性命诚之通也刚健中正纯粹精也诚之緼也君子学以聚之问以辨之仁以行之寬以居之诚之复也吁易其至矣学者欲知入德之方则自中庸始可也

论三纲

舜命契敷五教孟子以为君臣父子夫妇兄弟朋友是也左氏传晏子曰君令臣共父慈子孝兄爱弟敬夫和妻柔姑慈妇听去朋友而言妇姑又曰君令而不违臣共而不贰父慈而教子孝而箴兄爱而友弟敬而顺夫和而义妻柔而正姑慈而从妇听而婉五者之中惟兄弟妇姑专主於和顺至於君虽得以令臣不可违於理而妄作臣虽所以共君不可二於道而曲从父慈其子必教以义方子孝其父必箴其阙失夫以和倡妇尤当制之以义妻以柔从夫尤当自守以正盖三者乃三纲也所系尤重故於睦雍敬爱之中必有检防规正之道庶几各尽其分而三纲立矣

论斩马谡

诸葛孔明征蛮马谡曰攻心为上攻城为下心战为上兵战为下其论高矣街亭之败用秦穆宥孟明故事可也蜀執曰倾蜀才日少而乃流涕斩谡过矣夫法立必诛而不权以古人八议之仁此申韩之所为也前辈谓子房之学出於黄老孔明之学出於申韩信矣近世如张魏公之斩曲端赵哲乃倣孔明所为尤非也

七辩【阙二】

太极动而有生之元二五凝而有生之形人之与物莫不有太极二五之性也然气质交运参差不齐而稟生之始或有受其正者或有得其偏者人惟气稟之异于羣生也故肖於天地则谓之灵鍾於五行则谓之秀命於其躬则曰明命得於其性则曰懿德虚灵贯彻万理咸备未尝有欠缺不满之处则吾之一身盖有可乐可贵者在而无所慕於外也昔荣启期告於夫子曰天生万物惟人为贵吾既得为人一乐也而周子之学於洙泗亦曰天地间至尊者道至贵者德至难得者人夫以至难得者之身而又为万物之贵则人之生岂可不自爱重哉今人好说无好人三字吁是不知自爱重於身也是不知尧舜与人同也是不知天地与我并列三也天地与我同体大圣贤与我同气而乃自桎於形体之小则非惟与天地圣贤不相似而去物不远矣余既幸而得为人也每窃自谓为士而不知讲学则为凡民既仕而不知读书则为

俗吏用是悉取古圣贤之书讲明问辩省验体察求其所以无负於天之子我者则知吾一身之所有无非天理而曰情曰才曰权曰物曰欲曰力曰意七者亦未可以不善看也某自疏为七辩复以人之一说冠於篇首若夫以善论性以仁论心以一论志气河洛言之已尽更不复叙

情辩

人函天地陰阳之性则有喜怒哀乐之情人而无喜怒哀乐则天下之达道废矣今持一叶与婴儿与之则笑夺之则啼此喜怒哀乐之端也正情之所发也发乎情本民之性而世之论者则曰情妄也私也私彻而後天理见妄息而後本性明於是有去情灭情之论吁使情而可去可灭则性亦可去而生亦可灭也是并圣人於木石之伦栖学者於枯槁之地也易之一书有天地万物之情有鬼神之情有圣人之情岂人而可无情乎子思子善言情者於喜怒哀乐特论其中节与不中节而已至孟子则又直以情为善也先儒多以乃若其情之说谓顺其情然後可以为善愚意若字亦不须费讲解也今人乍见则皆有怵惕惻隐之心一乍字便是情曷常待安排哉使果如其情则有子之不能去丧皆其情之所在果非其情则乐正子春之不食乌得而用吾情此圣人所贵乎尽情伪也作情辩

物辩

天命流行造化发育凡有声色貌象盈於天地之间者皆物也夫既有是物则莫不各有是道非道之外复有物而物之外复有道也且以人之一身言之视之明听之聪貌之恭言之顺体之安佚人知其为性也令而不违共而不貳慈而教孝而箴爱敬而友顺柔和而婉从人知其为善也然而离耳目鼻口四肢百体而求性则性无以成离父子君臣兄弟夫妇长幼而求善则善无以继天而无是物也则可牖而窥地而无是物也则可俄而度故曰其为物不貳则其生物不测也然则物也者是乃上帝所降之衷烝民所秉之彝晏子所谓礼之善物子思所谓诚之终始孟子所谓形色天性邵子所谓道之形体周子所谓无极之真二五之精妙合而凝者也学者其可离物而语道耶故大学曰致知在格物又曰格物而後知至盖欲使人即事以观理理既穷尽则知无不到也而释氏者之说则以事为障以理为碍以天地人生为幻化以无一物为真知此遁天倍情者所为孰谓老师宿儒而亦沦胥於此哉昔司马文正公作致知在格物论曰格犹扞也能扞御外物然後能知至道呜呼天之生民有物必有则物与道元未始相离今日御外物而後知至道则是犹舍渊而求珠去山而采玉此必无之理也作物辩

欲辩

惟天生民有欲父乾母坤分陰分阳於是乎有男女之欲物生必蒙蒙穉不可不养於是乎有饮食之欲形既生矣五性感动而万事出矣又於是乎有臭味声色安佚之欲然是数者亦岂其性之所能无哉传曰人生而静天之性也感於物而动性之欲也夫既谓之性则不当以言欲而曰性之欲者盖有生则有欲有感则有应今不即性以穷其原而徒恶物之感於己乃欲一切屏而去之则是必闭口枵腹然後可以得饮食之正絕?种类然後可以全夫妇之别弃而

形色黜而肢体然後可以见真性之本此佛老者之流而圣人大中至正之道不如是也然圣人亦岂混天理人欲为一体哉但其间自有可者与不可者而已可欲之谓善天理也元者善之长也无欲其所不欲人欲也好恶无节而人化物者也人能於其所可欲者而欲焉乐善如贪好德如色悦理义如刍豢则吾之一身万物皆备何欲而不善哉学者殆未可以欲字作人欲看也作欲辩

力辩

天以力故行健地以力故持载日月以力故常久人岂不力於天地日月哉目之不力为不用明也耳之不力为不用聪也手足之不力为不思用掉也心岂不力於耳目手足哉然人或能竭力於耳目手足而不能竭其力於心思心之力宅於隱微发而为精神用而为礼义充而为尧舜皆此心之推也才有一息间断焉则神明无舍而四肢有不仁者矣此圣人所以欲其一日用力於仁者谓人心也孔氏之门顏氏之外力於此者盖鲜有日月至焉者有中道而画者独曾子以道自任如负一重担於己其曰士不可以不弘毅此其用力处也於是而力於事亲则不匱力於交友则忠信力於自反则虽千万人吾往矣力於死生则曰得正而毙斯已矣子思以是传孟子以是受所谓力行所谓其至尔力者皆一法也故尝谓顏子力於仁曾子力於孝子思力於中孟子力於圣数大贤者其儒流之实获乎彼知贵以德而贱以力者未足与议也作力辩

意辩

中庸理性命之书也大学体心意之学也然大学所论者心意两条而必以诚意为首曰欲正其心者先诚其意又曰心广体胖故君子必诚其意盖人之一身主宰操存者心也发见运用者意也火宿之则晦引之则燃用之则壮其本体然也然使火宿於中而非发之以光则不能传火心实於内而非达之以意则不能运心心其宿火之体而意其火光之发见者乎或曰圣人毋意也愚则曰诚意不可无也三百五篇之诗以意逆也六十四卦之象以意尽也谓圣人毋私意则可毋自欺则可而并取诚意而絕之则是天下都无事而心亦无所用矣昔董子举曾子之言则以高明光大不在乎它在乎加之意而已扬子援孟子之说亦谓有意而不至者有矣未有无意而至者也观诸此则意亦是志学之端而向道之机也学者於此而有得焉则存意勿忘可也加意勿正可也偏於着意则不可也故曰正是着意忘则无物斯言至矣作意辩

西陲八议【阙四】

口占屯戍之数不如习见其事而後知兵数之精指示輿地之图不如亲履其间而後识地形之要泳蜀人也其於江淮襄汉间事则不敢望空而言如蜀之险厄边防之要害则粗能知之而亦粗能言之往岁蜀之备边惟金人耳自元人拉夏摧金举熙河洮巩之地而墟之而吾边城一带亦复例遭蹂藉战士被甲胄不得卧编氓望烽燧不得息耕夫荷戈红女执饷於是乎又益元人之备矣今观其用兵大率志在中原而所以倏往忽来於吾之境内者特不过如汉

时匈奴以胡骑兵驰禾稼五代时契丹纵番兵入打草谷而已然不思预为之防则亦恐俱受其弊保蜀之策其可一日不讲明耶丁亥之春某自成都檄至军前驰驱戎马间者几閱半载虽智识卑闇不能洞晓军务而观迹於旧墟咨问於故老不为无闻知事定之後记成一编而复取其事之尤切於时者析为八条如帅权之分合军屯之聚散兵籍之所以增减粮储之所以虚实编民之生齿登耗吏士之禄廩厚薄人材消长之机国马亏盈之故因为文以达其事命之曰西陲八议以备忧边思职者采择焉

分帅

天下之势必有偏重之处伏於人所不虑之间故善持势者如操舟入海必随水道以徇其偏而不善於审势者如胶柱鼓瑟憚於解弦而莫知变往岁西陲用兵国之门户莫重於汉与沔也郑公刚中首建分帅之议东自剑门利阆巴蓬大安而上为汉杨襄毅政统之西自天水西和岷凤阶成而下为沔吴武顺璘统之纪律既壹而军心定声援相接而兵势张当敌人蹂躪之余而能自立国隐然为蜀金城之重亦以其处置得宜故也乾淳绍庆之後或分或合盖互有不同焉合之者则以为蜀中劲兵西路为最州城守帅多任武臣故不得不统於汉中以削武兴之权分之者则以为关表四郡遥制一方设有缓急恐失机会故不可不兼设沔阳以接四州之援是二说者不为无见於当时之务也然以今日之理势言之则武兴之权重非所忧也兴元之遥制非所虑也所可畏者金方与我相安而蒙古之焰已炽熟蕃之道未塞而生寇之衅已开元兵自丁亥之春繇铎龙桥径犯旧州登摩云岭直捣西和游骑偏师时复出没於七方之下则利西一路在今日诚要害也沔为利西之钜镇既无城郭可以保民又无财赋可以募士布米之政不足以贍衆丁夫之脆不足以抗敌拥之以节制之虚名而不能行节制之实事脱或一骑落於关头而空城之守其力恐不能支矣为今之计莫若仍分置帅臣以重其权帅权重则兵计密生聚教训攻战守御益得以展布其略汉中居左沔阳居右为之制阨者坐筹握胜於中权虽黑白部之强不能动矣不然则遵用嘉定二年指挥移利州之漕臣兼沔阳之帅守闲则缉理边备急则供给馈饷是或一策也

并屯

吴之备长江也据守险要不过数四纪陟曾用此说以伐司马之谋汉之屯夷陵也列栅连营动七百里魏文帝曾语羣臣以策昭烈之必败盖好合恶离者兵势之常而包山川险阻为军者兵法之所忌也蜀口之屯亦可言矣八万之师虽统之以四大将之屯四大将之屯实分之於数千里之地以数千里之边疆分一二万之卒旅殆不啻散棊之布於盘而欲周满画路亦难乎其为守矣盖尝目览山川身历险阻得一老兵而问之直以为今日之势不当置戍太繁设备太简一舍之地戍守近数十区卷石之山列栅凡五六所犹之可也在寨之外其所分拨之兵多不上二三百人少不过四五十人夫四五十人者以战守则不足以斥堠则有余有余者不及裁不足者不能并多其部以分其力少其数以弱其心如或敌人拥数万之骑倍道疾驰而吾所屯之兵如连鸡之栖卒未能以必合则几何其不为敌之所易也敌自入中国以来尝犯吾饶风矣尝犯吾仙人矣又尝犯吾武休矣彼之所以越国长驱如涉无人之境而不顾者亦以吾备守之多而兵卒之寡也向使祖谿之败黄牛之岵复有人焉以重兵扼於两关之

间则敌必不敢深入纵使金平之胜不得诸将相与并兵合力於平土则敌亦未必却走尝因是论川蜀之形胜固不可不厚三关之屯而三关之门户又不可不设一重之卫衣必托里而後可以御寒风户必重扃而後可以待暴客今一军屯西和而西和以上更分一大屯於摩云一大屯於崖石则三方之势牢一军屯成州而成州以上更拨一大屯於白环湫池则仙人之守固一军屯凤州而凤州以上更分一大屯於兴赵隔穿则武休之备密经理宕昌以障武阶谨固上津以保安康所屯之处必须全将全军所援之师不妨首击尾应其他小关狭隘不过置堠望以伺其动曲径支涂仍复用间探以索其情如此则静必守其所固动必成其所欲安边保胜之策莫强於此

广余

蜀之困於粮道其来旧矣陈仓之役以粮尽而还祁山之役以粮乏而退武功五丈原之役以粮运不继而行分屯之策夫以孔明天下奇才加之经事综物何有遗筭而连年退师三以匱告流马不能神木牛不能智非有他也依山险阻而转输之路艰絶水诘曲而搬载之力倍地之不便於运故也救漕运之敝莫若行广余之法夫绵劔汉中金洋及关外四州则余之土地所产者也由利阆大安沔鱼关沿江上下则余之商旅所贩者也绍兴间议臣常欲置场和余以桩之沿流州县矣淳熙中朝廷又欲捐金增余而贮之劔外十州矣夫桩之沿流州县则丰凶有準而邦计强贮之劔外十州则缓急有备而夫运省一年和余之数可以当漕运二年一斗漕运之资可以办和余五斗良法之便於官便於民盖如此何憚而不即行耶庆元初计所岁余犹四十万石泰禧以来则失余甚矣有一年三十万者有初年二十五万者有次年二十七万者有数月八万者却又有眛事一年有半官余至十七万客贩六十余万者彼财非天降鬼输只存乎人之所以措置何如耳今戎马蹂践之後四野麦禾率多损伤诸仓积聚未免耗散其间岂无栖亩之粮贮厥之粟而强胥黠吏夤缘为奸伪指困仓巧申簿帐槩目之曰焚荡求以苟免一时此则其敝在官而不在余也广余之法有三其上就余其次招余其下桩余就余者就於边而省漕运之烦招余者通於商而免官买之弊桩余者储於州县而有军旅缓急之须行之一月当有一月之效行之一岁当有一岁之劳以讨则有齎以守则可久舍是弗图而惟敛民是急则愚恐今日之忧不在四夷不在三边而在穷民也

互市

互市博买之权当使操之在中国不当使专之在四夷夫中国者夷狄之主也使蕃夷仰我之心常重而汉人藉彼之力常轻则置场市易以质剂相往来亦在所不问今也彼以骑兵为强常有易我之心我以茶利为贵不能动彼之欲甚至关市之不讥山林之无禁私商贸易之路荡如通達甌脱饮酪之区俱食细茗彼见吾土产之珍可以易致而西产之乘卒难必得则往往厚其资给以诱我之商人以其美茶而博马於蕃族金人之置场於洮者率用此术则是中国所操之柄彼盖得而执之矣为公家忠计者岂不虑及於此乎今夫秦司之马取於西道强壮阔大可备战陈者谓之战马宕昌峰贴峡文南三场所买是也川司之马取於西南诸蕃格尺短小不堪披带者谓之羈縻之马黎叙长寧南平等六州所出是也战阵之马隶於三衙岁凡百二十纲羈縻之马拨於江上仅五十八纲而止夫较博买之额则秦司为重而川司为轻

论排发之纲则三衙为多而江上诸军为少又有在边之马军随帐之後乘率皆取给於西边之产万一北兵乘破竹之势而扫荡诸蕃孳生之种未蕃牧养之驹殆尽则又将何所博买乎欲听百姓自蓄而陰损敌骑之强则其敝也未免抑配於齐民欲纵官兵招诱而深入蛮夷之腹则其久也未免引动边衅欲用市马於六胡州之策率三十疋酬一将军则其所以为赏格也亦未免有时而穷权衡於经久之可行而斟酌於公私之两利则莫若严鬻茶之禁而高估马之直茶禁严则商人重於犯法不敢越国而私贩估直厚则蕃人动於微利亦将捐马而争卖历观前代马政之修无出於此二策之善若司樵牧者更得廉洁愿实之人经理宕昌一带推此策而行之则不惟可补国马之乏虽以是壮军声而空敌资可也

卷三十八

钦定四库全书

鹤林集卷三十八 宋 吴泳 撰杂着

御书经武阁跋记【代宰臣撰】

臣恭惟国朝以仁立国以文致平以武禁暴整乱圣祖神宗不能改也肆我艺祖皇帝肇造区夏四征不庭北汉契丹犹未宾服讲武除戎之事无岁不申儆国人而训之正月壬寅幸造船务观水战二月丙寅幸飞山营閱炮车四月庚寅选卒於朱明门九月己巳閱兵於讲武殿两大閱於西郊七临幸於教船池蒐苗猕狩着为通礼击刺骑射悉为精艺用能南征北伐罔有敌于我师孝宗皇帝纘成祖武光济中兴虽强敌悍帅屡书请和而我之武备益自飭谨乾道淳熙间于白石于茅滩于龙山凡五大閱亲登将台鼓作士气燕射玉津兴复旷典武艺有掌记拍试有赏格铁帘之射有迁转补授六师既肃四方无侮所以金人始终未尝渝盟犯塞皇帝陛下惟二祖是承惟七德是经圣化甫更国威大竞东亡涟海徐邳闚户之寇西亡蔡息亳邓抄塞之敌商丘之南大梁之北蕃侯首将降执系道亦莫不愿归职方王师载班北使踵至向者陵轹边吏甚鹜今兹被我衣冠杂以绮裘綉袷仆仆罗拜于殿庭下盖亦我武惟扬有以动悟之也臣备位宰府共贰枢庭目此武功惧无论述乃者清燕游藝以御书经武之阁四大字宣付臣某俾为宥府之镇臣切惟建隆以来本兵大计先後厘革条章登载于简册者其目凡十总命之曰经武要略则有其书矣而未有阁也南渡中兴记嘉定癸酉剏阁于本院之北北枕胥山南拱象阙中以所裒书藏于金匱则有是阁矣而未有斯榜也今杰阁丽宏宝书充牣奎翰昭揭云汉动而日星垂也观是阁者知武经在焉则知烈祖之德见心画在焉则见吾皇之圣臣于是肃容拜手跪而言曰风雨之润也雷霆之威也此天之经也山岳之镇静也江河之澎湃也此地之经也春作夏长秋冬变而肃杀之此四时之经也朝气锐暮气归中夜之气又从而收敛之此昼夜之经也其动也如风其止也如山其变化也如陰阳鬼神之不测进则兼弱攻昧退则和衆安民广运之以神布昭之以武奋赫之以怒耆定之以功此帝王之经也圣人於易之习坎诗之常武明着其义曰常德行以习教事曰有常德以立武事盖兵象水也水洊至为坎而君子于教民即戎之事不洊习焉是弃民也王旅如雷霆也雷霆震惊为武而人主于四方既平之後不敬戒焉是究武也皆非其常也所谓常者即经也随变而施宜者权也用之于战战所以立和之基用之于和和所以寬守之备体立于不可胜之地用行于和战守之间其为武经莫善于此彼汉儒之说乃谓反经可以合道若尔则权谋十三家技巧百九十九篇皆是也岂吾帝王之懿哉臣既以模写御书刊之翠琰复明辨经之说以对扬天子之威命

御书宗濂精舍跋记

臣尝考国朝建立书院隶于今职方者三潭曰岳麓衡曰石鼓南康曰白鹿洞皆繇上方表赐勅额盖所以揭圣范崇道规也道术既裂圣真无统士各阿其所好而立之师门各尊其所授

而名其学刊山结庐互相标榜书院精舍之名几徧郡国殆失古者天子命之教然後为学之义前江西漕臣万里思南昌故郡濂溪周子尝两仕其邑既景乃冈崇设精舍又力请于上定之曰宗濂奎画烂垂宸光下烛奕奕黉宇岿然若揭於秋屏列岫间至是学不为私学矣郡守臣泳与转运判官臣颢茂祇拜云章奉惟谨青衿之子相与咏陶游息其中不亦盛欤夫营道之有濂溪书院本其所生之地名之也康庐之有濂溪书堂指其所乐之处名之也今南昌之有宗濂精舍即其所仕之邦名之也然以臣管见窥测圣意所谓宗濂者岂但以官业吏道为宗哉春台熙和风光而月霁其粹行可宗也夜堂澄寂玉振而金声其令仪可宗也水花净植可望而不可亲其洒落襟度可宗也庭草交翠可观而不可尽其一般意亦可宗也若夫图披剥陰阳画分动静以演河图之生数书辩诚几德原理性命以发大传之精蘊此又斯道之宏纲大用学者尤当详玩密察而宗师之也圣上考文稽古游思理学祖尧舜而宗仲尼且谓周惇颐实继往圣絶学故肆笔大书札赐方国由濂溪以邇洙泗由洙泗以乡唐虞之闕道此则君师所以宠绥四方之志也臣职在宣化敢不拜手稽首答扬光训题于下方淳佑丙午夏四月朔

御书赐翰林院跋记

臣窃闻倬彼昊天日月星辰丽焉尧之文也域彼四海江河淮汉别焉禹之画也叙圣文神翰而不以经天纬地言之何足以形容其大哉恭惟国朝以火德绍天统以奎躔开人文列圣承休尤重词翰金门夜赐之札玉堂飞白之篆上昭三光下饰万物自淳化以来直翰林者莫不夸言盛事以至今日皇帝陛下包罗五经之郭游衍六艺之圃虽朝听昼问日决万几而清闲之燕未尝顷刻弗亲笔研故一言之出四方式以为典一字之传万世宝之为训臣曩者待罪禁从职掌文墨两闻帝制五被宣鎖因得以末学謏闻管窥制作之盛旧有一御札二御批三御笔臣既以其副留于院中正本袭藏罔敢失坠每读罪己之札丁寧恳至汤诰泰誓无此文章而臣所上明堂疏随奏画可与汉武帝受公玉带汶上图采魏相月令说不啻霄壤若夫命一相之麻既予告而复召除四节度制问当夕而後宣藐焉微臣当此隆遇皆前此所未有也臣自去国今更四秋顾瞻玉堂真在天上属所领郡城有楼榜曰拱北臣以北之义未安遂易之曰拱极模勒宝奎共奉其上不惟侈儒生被遇之荣抑所以示臣子尊君之义也谨拜手稽首书于下方

度郎中乡会诗跋

牵俪偶以为律剽声病以为工诗之下也今起部郎合阳度周卿以乡会冠纓之盛赋诗纪事有曰选入周官未厌多真可谓一篇警策矣而客有访余者则曰多字不与家韵叶且非进退体岂其误耶余曰古人有之客曰古诗有之而律则亡也余曰子岂不尝读白乐天春去之诗乎一从泽畔为迁客两度江头见暮春白发更添今日鬓青衫不改去年身百川未有回流水一老终无却少人四十六时三月尽送春争得不殷勤勤与春二韵也又岂不观邵尧夫首尾吟耶尧夫非是爱吟诗为见帝王俱有时日月星辰尧则了江河淮济禹平之皇王帝伯经褒贬雪月风花入品题岂谓古人无缺典尧夫非是爱吟诗题与诗异音也间有天字韵押言字饶字韵押豪字陈字韵押论字如此类例弗可枚举虽文公老先生密庵分韵郷社次韵亦多

取旁韵通押皆律诗也而子独何以谓之亡哉夫嫖姚校尉师古训姚字本从去声而老杜後出塞曲则押入四宵雌霓连蜷沈约用霓字元从入韵而蜀公试学士院则押入十二齐若以诗格论之则子美为背律景仁为失韵而学者至今不以为误厥有由也文章合为时而着歌诗合为事而作善观诗者但观其旨趣之深厚词脉之和畅有补於风俗教化而关於君臣上下朋友长幼之伦斯亦可以为诗矣正律背律之分本韵旁韵之别无庸多较也虽然是又不可不考也鱼丽于罍鱣鲨君子有酒旨且多此小雅诗也丰屋蔀家好富贵忧患多此乐府词也流声馥秋兰辞藻艳春华徒美天姿茂岂谓人爵多此又选体也古人押多字率通九麻陶渊明拟古阮嗣宗咏怀谢叔源游西池亦然盖古自有通韵而举于礼部者少能知之倪更以古音押今韵则世岂不惊恠而譁笑矣哉矫今人之所怪酌古人之所通时复以三百五篇乐府骚选之曾经采用者引入於律体之间此又非子之所知也客退遂以答客之语书其後

张仁溥诗藁跋

古人作诗无一篇无源流无一字无法度退之虽豪健奔放絕少刀尺而缘情寄兴依声用韵未尝不本诸古南山诗则司马相如上林赋也圣德诗则太史公龟策传也秋怀拟枚乘十九首别元協律效李少卿苏子卿七篇若南谿始泛暮行河堤上重云赠李观江汉答孟郊则纯是学建安诸子晋宋齐梁而下更不道也故无古人胸襟不能读退之诗无退之笔力不能作古人语风气日降边幅窘窄竞趋晚唐以为鲜好抑下矣张仁溥早有能诗声近攜一编见过古律杂奏粲莫可耘问其所嗜何诗则曰退之也子其得之矣虽然得于退之而复求退之之所以自得于古人者则余犹有望也

李忠愍琴研铭跋

右琴研铭二十七字或谓忠愍公书之以遗王文正之子贻永详其所题旧名犹是未出使云中时作也公平生所为文以理为体以气为辅以忠为骨以义为干诗如杜甫感义鹘文如韩愈逐鳄鱼书如陆贄论裴延龄疏如柳伉请诛郭元振及临难骂贼将絕而为之歌曰矫首问天兮天卒无言忠臣効死兮死亦何愆壮哉悲乎盖与离骚争明於日月矣兹铭之作非其至也其子孙以其遗墨宝之殆若谟宝文贞公之故笏云耳

黄楼铭跋

熙丰间以文鸣国家之盛者不但一东坡耳黄楼既成子由太虚作赋履常作铭二赋坡自谓子由实胜仆又称曰夫子独何妙惟铭最古最有法度一时诸贤见者皆敛衽独坡偶不及之斯文遇不遇抑有时耶颛蒙大荒落维夏上澣日鹤林吴泳叔永甫书

怡怡斋跋

昔者先君子之远诸子尝辟室之东偏曰怡怡斋不令兄弟恪奉先志复书顏氏语于其壁曰兄弟者分形连气之人也方其幼也父母左提右挈前襟後裾食则同案衣则传服学则连业

游则共方虽有悖乱之人不能不相爱也及其壮也各妻其妻各子其子虽有笃厚之人不能不少衰也娣姒之比兄弟则踈薄矣今使踈薄之人而节量亲厚之恩犹方底而圆盖必难合矣今有诘吴子曰斋之名怡怡也何训仲尼父之所以语冠鸡佩玃者何事子曾无一词及之吴子俛焉遂歌如鼓瑟琴之诗而退今又弱夫季也廼以书吾斋者而书伯洗仲躬後

自警图跋

向见鞠坡以邵尧夫君子赢得做君子小人枉了做小人请刊语坐右每爱之为知道者之言後来读葵轩书却谓赢得一语犹有利心不若改作君子本分做君子至矣哉世间安有不本分而能为君子哉观此二字即是洙泗传道之精髓语孟扶世之命脉顏曾仲弓子思孟轲成德之门户入孝出弟忠信笃敬三斯【斯远暴慢以下】四勿【非礼勿视以下】五实【仁之实以下】之注脚循乎此则为正理离乎此则为非道君子小人之辨实判於此矣韦侯贵戚之胄而肯鞭辟从儒素中来可谓趣识之正若只依圣贤所教从本分上做起工夫为己者为之为人者不复为也则一图纲领尽在於是见月可以言指矣绍定重光单阙夏五日书於外府

乐山堂铭

籍溪入館文公朱先生以诗遗之有云瓮牖前头立画屏晚来相对静仪形浮云一任闲舒卷万古青山只麽青或传以语五峯五峯惜其有体无用因别赋一诗曰幽人偏见青山好为是青山青不老山中出云雨乾坤洗过一番山更好世遂以为此诗一体用该动静也吁文公岂无所本而言哉静者山之性壽者山之质文公之诗其仁者之所乐欤遂演其义为君举铭

澹然若虚凝然若峙窈然其深若伏隆然其高若起其真而静也似有道其敦而朴也倡闻礼阳变陰合春生秋靡滃然出云利物而致用者静中之动翳然内日收眎而反听者动中之止虽然主静者山之本体彼世方驾鹿车度羊肠九折而不肯休子试味此山之所不味

达斋铭【有序】

嘉定壬午某尝客於亨泉书院癸未岁子先亦於亨泉乎馆达斋之铭乃某去凌云後一年所作也圣人语言枝枝叶叶相对质直好义至虑以下人只是一滚说出务学之实到得色取仁而行违居之不疑方与上下文反对而言今铭之序引特於其中析而二之若谓察言观色过于夏畦之劳虑以下人甚于巽床之諂亨泉端人也其疾邪指佞有补于世教则大矣然先圣所以语子张必达之义惜乎其死而不共商之也因子先之请为发其义

古我先民为学自内伊今之人驰骛于外自内之学不求人知所主忠信随事之宜察言观色于以省己虑以下人更审其是学既精熟天理流动孝以事君慈以使衆放之四海行之九夷参前倚衡无所碍之彼外驰者名浮于实虚矫张大谓莫已敌矫情避兄要誉悦友遙观厥成竟亦何有惟仲尼氏诲人有方愚回鲁参而辟子张圣谟孔明气质终化翹翹升高俛俛自下

如谷始萌如泉始达良知之生莫之能遏子以斯义归而内省高车结驷为道之筭

玉斋铭

子齐摘横渠语以玉名斋可谓有志於自修矣故为之铭

人为物灵受天明命知诱物化匪磨弗莹淬以礼义琢以诗书明师良友礪而错诸与善人居未得为善不善相齟气质始变挫之横逆加之困衡疾疢内攻德慧乃生所以古人以石攻玉舜於陶渔说於版筑夷饿首阳子畏于匡一时之塞万世之光温润为仁缜栗为知岂伊今人无此良贵弃其在我珍其在人贵溢富极乃灾厥身子之进德莫如持敬无隳令名往迪乃训

嘉禾颂七章章四句

翼翼嘉禾在梁之亩九穗离离实栗实秀

其秀维何奕叶有雝春种秋实备时中和

中和既时重穎既垂自向其本岂不尔思

维昔唐叔实施王命伊今之人惟唐叔是景

惟唐叔是景献诸天子天子不有以归肇祀

芝生九茎不可以为杭狐生九尾不可以为袂

实为我嘉谷以谷我口腹以妥以侑式介多福

卷三十九

<集部,别集类,南宋建炎至德佑,鹤林集>

钦定四库全书

鹤林集卷三十九 宋 吴泳 撰杂着

劝士文

先王之制禄爵率以国之大小为差然试考其制禄之法则杀於上卿而优於下士何也盖卿之禄已厚若更以小国而受次国之廩则地之所出抑不足以供士之禄浸薄若不以下士而视上农夫之食则身之所养愈不能自给此廩禄之所以优於小吏自昔以来则然矣况仕於穷边荒絕之地耶况仕於戎马蹂踐之区耶夫以益梓夔而视利之东西路则地之相去若此其甚邈也以利劔阆而视关表之五州则禄之所班若此其弗侔也五县吏之俸不及中州之二三曹官之请仅当内郡之一重之以库帑之压支加之以银会之折阅小官之所得厘厘无几矣夫俸所以养廉也既廩厚然後可以激其赴功稍食优然後可以责其守节今禄既不足以代耕而平日之所以任使者又无至诚乐与之意至有荷戈共守而一纸之书不相及襁屨自随而十年之官不得代万一边符告警而欲望其仗节死义岂不难哉昔王文公上书言事有曰今之小官俸薄不足以养廉必当有以益之然今财用匱乏而复为此论人必以为不可行荆公此说未为不是然欲求理财以益之则非也赋歛有定数而不可以求赢仕禄有定品而不可以加益讨其源流而稽其功绪斯得之矣大率边吏之俸薄起於折会之太轻若使关外一券之楮亦如内郡一券之用优加供给以养其志时有匪盼以系其心忠信重禄而士之不劝者吾未之信也

宁国府劝农文

国家重农务穡应郡守授勅诰必以其职系衔大者为劝农使小者兼观农事示崇本也当使去年秋被命出守入境问农後三日与父老约曰太守特识字一农夫耳其所颁行条教不过论语孝经敬事而信节用而爱人使民以时此太守职也用天之道因地之利谨身节用以养父母此庶人事也太守知民生孔艰撙节财用减省徭役无妨汝穡事无夺汝农时每於先圣格言罔敢失坠汝独不念天显不服田穡不爱父母之身逐末好讼每阅词牒间有冒耕者有争役者有斩墓木伐墙桑者有借人耕牛不还者则是前日所劝诵孝经本文元不恪意遵守所以有此抵冒岂皆长吏劝民不明抑亦尔父老失於告戒耳汝亦当思沿淮之田敌马蹂踐麦不得播种而尔四郊之内则耕者泽泽而苗幪幪也滨江之宅赤地不毛桑不及艺植而尔十亩之间则桑者闲闲而蚕??也并塞以北之民壮者屠戮老者冻馁靡一日得安其居而汝等不生边界同尔妇子饁彼南亩室家各相保也一?之米向者百钱今九倍其直矣一疋之绢向者三千今五倍其价矣年岁屡丰而盖藏富雨雪既渥而耕作易不知修何福何行而受此快活也耆老高年固识理道其间後生子弟见一日之饱遂忘後日之饥见一岁之暖遂忘来

岁之寒饱暖则生逸乐逸乐则生慢易惰弃农桑崇纵饮博入不能孝养父母出不能顺事长上不信天道不畏王法将恐丰年不常逢嘉谷不屡硕大兵之後继以凶荒长吏易如传舍後來者又不畀矜汝则汝等安得长享今日之乐虽若祖若父所授产业亦不能保有矣今春气向中土脉渐起正是东作之时如谷之品禾之谱踏犁之式戽水之车辟蝗虫法医牛疫法江南秧稻书星子知县种桑等法汝生长田间耳闻目熟固不待劝也惟孝悌与力田同科廉逊与农桑同条太守惧尔未必能家孝廉而人逊悌也故躬率僚吏申劝于郊尔其修乃身顺乃亲睦乃隣逊乃畔既种既戒自此月中气至八月寒露谷艾而草衰西畴毕事则买羊豕酒醴以祀田祖以报丰年岂不为汝农夫之庆敬之哉勿懈

温州劝农文

劝农古也劝农以文亦古也三之日于耜四之曰举趾同我父子饁彼南亩此周公劝农文也用天之道因地之利谨身节用以养父母此孔子劝农文也五亩之宅树墙下以桑匹妇蚕之则老者足以衣帛矣百亩之田匹夫耕之八口之家可以无饥矣此孟子劝农文也今太守劝农于郊亦只是幽诗孝经孟子等语诏谕父老别无他文字也然古之劝农者一今之劝农者二方春东作土膏脉起负耒而往于田合耦而耘于野向也东瓠之俗率趋渔塩少事农作今则海滨广斥其耕泽泽无不耕之田矣向也涂泥之地宜植粳稻罕种粳麦今则弥川布壠其苗幪幪无不种之麦矣因荒旱而垦辟勤迫冻馁而耕作力若非去岁一歉则游手逐末安肯转而缘南亩哉是惰农自安者不容不劝也然地有肥饶农有上下溪乡与平原之壤不同上户与中人之产各异积穀之家擡价而莫知发储镬之室守钱而莫之贷丰年乐岁则资下农以自贍一遇荒歉则听其老弱转徙阡陌死亡而莫之掇岂天理也哉夫损上益下曰益寡多益寡曰平贫富相依自古常理知积而不知散亦岂大家之利抛荒田土无人耕锄一不利舍弃稼穡无人种艺二不利脱有乡井不虞无人保护救助三不利去其所以不利者就其所以为利者均通其有无赈贷其乏絕使有谷以掇饥而不至无钱以糴米则如上农之既富者又不容不劝虽然丰凶穰毁皆原於心一念之善则油云甘泽嘉谷瑞禾风灾灭息盗贼不起无非休徵一念之恶则痴风猛雨莠苗秕粟田莱多芜疫病并兴无非咎徵今太守与汝约不顺父母不友昆弟不調恤比閭族党不力田务本越其罔有黍稷则惟汝自生毒其或政令之不平刑罚之不中邦财侯度之不式夺尔时害尔功不恤不矜天用降威荐饥我百姓则兹惟有司之愆此太守不但劝民而又身自为之劝也虽有饥馑必有丰年太守与汝各勉之母忽

隆兴府劝农文

按隋书地理志载豫章之俗颇同吴中其男勤耕稼其女勤纺绩意谓田野辟蚕桑富民皆着於本无冻馁之患矣太守自吴中来入境问俗则不然吴中厥壤沃厥田腴稻一岁再熟蚕一年八育而豫章则襟江带湖湖田多山田少禾大小一收蚕早晚二熟而已吴中之民开荒垦洼种粳稻又种菜麦麻豆耕无废圩刈无遗陇而豫章所种占米为多有八十占有百占有百二十占率数日以待获而自余三时则舍穡不务皆旷土皆游民也所以吴中之农专事人力故谚曰苏湖熟天下足勤所致也豫章之农只靠天幸故谚曰十年九不收一熟十倍秋惰所基也勤则民富惰则民贫耕而卤莽之则其实亦卤莽而报耘而灭裂之则其实亦灭裂而报

此理的然安可厚诬哉汝等父老莫谓太守黄金装带朱衣引马与汝邈不相亲其实亦识字一耕夫耳况职在劝农朝夕思念惟恐岁一不登以病吾农故为汝占丙午太岁则有麻麦加倍之謡占正旦清明则有米贱蚕善之证占月朔遇辛则有五谷皆熟之兆占甲子不雨则无赤地千里之忧又为汝预占先分後社则犹恐夺汝之食俾汝不得挝田鼓赛社翁也又为汝占有闰之岁则又恐节气近後田收晚而谷米虚也太守心腹肾肠无一日不念汝汝等岂可不勤身从事以体太守劝劬之意哉太守与父老约汝归劝而邻里率而子弟不昏作劳不服田亩而鬪很喜讼不务本业不营生产而尊巫事鬼不顾父母之养不念妻子之爱而好饮酒博奕废农时违地利输王税不以期汝则有罚若夫刑法之不中以旱汝政事之不平以涝汝专聚歛以伤汝之财事兴作以困汝之力饰厨传称过使客而不恤汝之饥寒则太守当执其咎为此文者不但劝民而又身自为之劝也其听之母忽

神泉县劝农文

古者里宰之职常以岁时合耦于耒趣其耕耨盖无日而不在阡陌与民亲也今则否矣惟有仲春劝农尚仿古意令其敢视为具文耶於是若时祇率厥典有事于郊登进父老而告之曰令来长邑恰已暮年於汝土风亦熟悉矣地近山也故其俗静约无有侈心田多石也故其民勤苦不自暇逸疆井狭於邻封也故其事简少亦无盘错之讼令岂有他繆巧求异於人率惟平易近民视俗施教而已但自比岁以来雨雪时降年谷顺成物价之昂视昔加倍闾里末作者或有食贵之忧至於尔农则户有盖藏以养父母以饁妻子以享南亩之乐此岂令之凉德能致然耶皆尔孝弟力田以臻于兹令亦职有利哉然令尝闻天时靡常民事难缓尔以有干有年家食粗给也则力易怠有委有积生计颇优也则心易肆易怠则不昏作劳不服田亩必荒弃我穡事易肆则弗祇弗字弗恭弗友或恣纵于非彝服田不力而心念又差安知不以是拂至和而召乖气也令今以诚告尔尔归而乡诏而子弟及而邻里其所以服尔田或耘或耔以自尽於功力又思所以爱乃身睦乃亲相友相助以自尽厥心既勤敷菑又以暇日修其孝弟忠信迺续乃命于天则顺气所感和乐兴焉民其永孚于休毋忽

令尹出郊劝农故事也人皆指为故事而令尹独以为非故事也一雷土之田地之肥磽不同年之丰凶不同人事之勤惰不同为之令长者既不如古者县正里宰之职出入阡陌与诸父兄率而子弟朝夕从事於耘鋤耒耜之间而一年之内惟仲春一月耳又不丁宁告戒以趣其穡事则农将怠於用劝岂得陶陶然日新哉汝农之为生亦厚於他邦矣家有糗粮户有盖藏田有鸡豚狗彘之畜向也物贱引贵不免称贷而为之息今则米斗千钱生计颇优裕也向也僦屋赁田不免以身佣於人今则竞相求问而世业可长有也紫岩以西饥民间有嘯聚汝四境之内耕者闲闲桑者泄泄而无一尘之扰也万安以东雨泽不以时降汝田里之间既优既渥既沾既足而无一物之不遂其生也闾里之人贫而四隣富末作之民苦而三农逸汝抑亦念天显与民生之所以厚哉汝等父老或百年或九十年或七八十之年既勤敷菑以有今日不待楸劝汝家年少子弟不识耆旧典刑仅见一日之饱而忘後日之饥见一岁之煖而忘来岁之寒好勇鬪很以拒扞公上恣纵淫佚而大泯乱於民彝此则长民者之所深忧也今长吏与汝农二年相安不啻如父兄之诏其子弟或租赋愆期以讼丽於刑狱则亦不过承之威之未尝加一箠於尔之遗体也然令之更易犹传舍耳三年之後安知天时不变迁地脉不流转

上农之家不析而为下农之产长吏又不畀矜尔倚威为化则汝安静之福岂可长保如今日耶汝归而告诸子弟其楸乃功敏乃事礼义以闲其家而毋凌暴於其下忠爱以奉其上而毋疾眎於其长则民俗归厚髦士亦将出於农矣谨识之母忽

公主剃胎发祝壽文

伏以青炜熙和绛河烂明宝婺炳秀藁宫毓精帝子降兮?圃天孙下兮玉京如薜吐英如兰茁芽苑春柳其方萸粲穠桃其始华南薰入弦月良日吉夏簟清安夜衣芬苾宝刀具瑶席张涤犀钱兮泛璿果进輦輶兮沐兰汤云鬢兮削青螭首兮凝緑阿保抱持傅姆延祝宜君宜王兮万斯年宜兄宜弟兮百其祿更祈覃訃共燕馥谷

书水帝子对昌黎伯辞

单阏之岁洊九过二吴子卧疾苕溪之滨寒则洒洒淅淅然如负冰雪於背热则熇熇喝喝然如蒸火云於肉医诊之曰此鬼疟也宜禁避厌禳余辛丑秋尝遣子盘燎芎酏酒就水步诵韩子诗送之瘰今更命柴也送如故弗瘰岂故鬼痴新鬼黠欤何後剧之不如前差也已而凄风?然有啸於梁者曰子毋随声譴我为也阴阳分界絶不容杂扰彼韩子原鬼既谓之无形与气又安得有疟耶请先与尚论其世夫实沈之神高辛帝子也台骀之鬼金天氏孙也朱降于莘象祠于庠唐之胤虞之弟也羽渊以梦感桑林以卜见又皆黄帝玄王之胄也而崇於晋而祸於虢而淫瞽於道之民而崇降疾厉於悼平侯之身未必非人所召若尽以其恶归之数子岂知鬼神之道哉人之死也魂精爽则为神明魄沈毅则为鬼雄虽其间强死而忽为厉者亦未有久而不散之理矧吾祖轩父项实嗣水帝魄降而死且数千百年独不能露光景於春秋列国尚肯为鬼於唐乎盖斯人之所以致疾者则亦有自来矣暴以霜露寇以寒暑六淫浸髓五炁熏骨外热与金气相薄中黄与肾神交恶则必生疾喜怒拂其冲和悲乐殃其平粹积思成惫縕劳成衰自衰得白从白得老则必生疾炉金匱石鸿宝之蠹也山燉水鲜谷神之害也伤不必溺於色悦目者皆伐性之柯也困不必湎於酒爽口者皆腐肠之药也工书以辟於所好而妨道观碁以鹜於无益而丧志日务记覽以蚀其魄好为词章以铄厥灵训詁之癖巧於二竖之穴膏肓雕镌之病苛於三尸之啄肝肾含英而不吐咀华而不下又甚於七童十四女之络绎於肺腑凡此者非神非鬼皆君自益其疾耳君今而後使心王不妄动志帅不轻谋肝为将军不浪战伯桃守门子丹进饌泥丸百节之神截岳斩冈无客阴外邪伺间得入而又瘞破砚投败笔尽焚断藁残文守玄神庭尚白贲丘镇之以无名之朴则天不憎其盈满鬼不瞰其高明而其身亦保康宁之福矣言未既涣然寐觉豁然病已出户视之庭空月霁吾闻阮千里之门有一客善谭名理雄於才辩岂子乎遂书其对

太乙宫通真斋马高士酒榜

天下奇惟武林已贮乾坤之清气宫神贵曰太乙首斟道德之真源不滌世上尘安知此中趣太乙宫通真斋马高士龙台旧侣牛麓散仙链太清之露以抄书弃已陈之糟粕汲真一之泉而洗髓留不尽之菁华常惺惺从宝珠会上来还兀兀向白莲社中去拨雪披云几八千里搗

香筛辣者十五年瓢挂晨华常抱半床琴而偕往觴浮佑圣或携一只鹤以相随只思三杯大道之通不效五斗先生之癖白堕久藏于一室黄封忽下於九霄为醉经偿数岁之劳故前席置十斋之首昔延青城客逢对饮之二生今拂紫霞壶见独醒之一士清夜沈沈缓更酌好春拍拍都满怀瑠璃锺琥珀浓莫滴刘伶坟上土鸚鵡杯蒲萄绿且陪太白谪仙人更使金母荐桃月妃奠桂以穆上皇之祀以祈天子之年懽动龙颜不妨道士化为榼春生燕坐尽使山翁醉似泥更约高阳之徒同饯华胥之国

胡应桂字说

水陆草木之品春秋之大夫公子媚之以为名者衆矣宋以华椒楚以戢黎晋以解杨以州蒲卫以子荆秦以子桑郑以子兰兰香草也妃公子宜也余则不锡名也近世之士多取桂为名盖自郤诜对策东堂唱为桂林一枝之语世遂以士之决科者为折桂唐温庭筠诗云故人新折桂老杜亦谓礼闱曾折桂皆承讹袭谬冥迷於利禄之关而弗之悟也吁抑陋矣嘉南州之炎德兮丽桂树之冬荣其植也秉阳其生也好直其居处也不羣其芳洁似君子其偃蹇似幽人其丹心之自渥似忠臣义士吾以其德命桂则桂必领受无愧色科第何足以溷之耶东嘉胡产隆为其子应桂请字於余且曰吾证诸梦颇与公子兰之事相应是子也当志学之年口诵九经更相诂难不差一义则亦上根已余之意犹欲养之以德故字之曰德夫淳佑改元夏五月书

盘字说

墙屋门之始也冠礼之始也为宫室而不饰之以墙屋则无以居为士而不成之以冠礼则无以立美哉古人之重冠事也筮日可矣而又筮宾宿宾可矣而又宿赞宾请期宰告事洗于东荣服于西墉紒于房冠于阼醴于客位尊之以三加重之以三醺华且荣矣而又惧其实之不知也则责之以四者之行使知为人子而孝为人弟而弟为人臣而忠为人少而少容体正而天理之则定衣冠肃而内心之敬生然後始知吾之一身与天地并立为三而命之曰人可也自冠礼废而天下无成人唐之时有行於朝者而举朝笑之国朝元佑初有行於野者而城郭皆莫之行也夫礼始於冠士昏士丧士虞乡饮燕聘朝覲次之今礼之次者皆得而行礼之始者乃憚而不行抑何冠礼之不幸也宾曰子知冠礼之可行而卒莫之行何也呜呼是则有说十五至二十曰冠而某子之年则踰冠矣缁布至爵弁为三加而某子之冠则再加矣冠主已失於前而复欲强而行之则告庙之辞曰某之子某年渐长戒宾之辞曰某之子某日将加冠则是自欺也自欺而将以率诸宾恐非天理之节文人事之大端也然则不可不字之昔鲁襄公十二而冠或曰可以冠矣伊川先生则以为非其时周道幼名冠字五十以伯仲或曰五十乃加字也而文公先生则以为非其义礼以时为大未及年而冠则太早艾之年而加字则太迟乡俗先老盖亦有未昏前卜日会宾昭告尔字者是式可从也宾曰子之子既以盘名则当字之曰景硕考盘一诗而称硕人者三盖美贤者隐处涧谷陵陆之间而硕大寛夷无戚戚之意今子之生也子之居也则异是矣子能景慕硕人常如在涧在阿在陆时则不戚於贫贱不狃於逸乐其为气也不馁其为辞也不游其为士也洪毅而不隘责之以成人之道斯可以为成人矣既歌考盘彻章遂再歌椒聊之诗曰彼其之子硕大且笃又歌狼跋之诗曰公孙硕肤

德音不遐硕之义大矣哉字讫主人以宾之辞复自悼冠礼之既失者而为之说

赠风角富春子说

闻乌声闻班马声而知齐师之必遁歌北风又歌南风而知楚师之无功天地以虚为德门无声臭之可闻若非冯风云以表异役鸟兽以通灵则虽号明风角者精如京房密如翼奉智如任文公奥如谢夷吾博如樊英要眇如王琛閎深如刘孝恭探赜索幽如廖扶段翳世学如节宗家儿传业如李南女总干山立坐授诸子衔璧如管辂毕综羣书如陈训上蓬莱崑崙积石太室诸山得道如戴洋亦不能施其占候之工推测之巧也子之术则异於是常向予言岁在癸巳闻随州鼓声谓鼓云不久用兵某州某侯必出师三京予窃恠之鼓岂能自言哉因考佛图澄传澄听相轮铃音有云明旦食时当擒段末波又云军出捉得曜也则是亦澄之学也然澄能料胜子不能料败何邪今闻子自京师游帅府盍不於天清日静无阴云风雨之夜循江淮以北去九百步外持尺寸之管听三军之声表以八风中以五音端以六甲如天雷在前羽兵必破害气三合季龙当死试为我占之端平柔兆涒滩春社日鹤林吴泳书于玉堂

可大受说

数以倍言邵子法也不知可君所传得之何师而乃谓九倍为帝坐八倍为王公师相七六五为执政侍从其余卿监郎曹监司郡太守莫不积倍数以推测无一不灵予犹未之奇也既来京师策逆雒之必成觐劲敌之必退方国步斯频疾如疾首之时而得君指数勘定月日抑亦谓智於其大矣李国史书之信史也子犹谓蜀中明年饥又有兵变呜呼事将兆而献忠人反谓汝多凶更勿多言将恐人唾骂汝为灵鸟也於其西归也书此遗之

笔记二则

朱文公有足疾尝有道人为施鍼熨之术旋觉轻安公大喜厚谢之且赠以诗云几载相扶藉瘦筇一针还觉有奇功出门放杖童儿笑不是从前勃率翁道人得诗径去未数日足疾大作甚於未鍼时亟令人寻逐道人已莫知其所往矣公叹息曰某非欲罪之但欲追索其诗恐其持此误他人耳

有来苏渡云修水深山间有小溪其渡曰来苏盖子由贬高安监酒时东坡来访之经过此渡乡人以为荣故名以来苏呜呼当时小人媒蘖摧挫欲置之死地而其所经过之地渔翁野叟亦以为光华人心中是非之公其不可泯如此所谓石压笋斜出者是也

卷四十

钦定四库全书

鹤林集卷四十 宋 吴 泳 撰词

生日自述【沁园春】

鷓鴣鸣兮卉木萋止维暮之春笑憨翁渐老年加三豆猷郎多事诗记三星六十有三高吟勇退只有尧夫范景仁从今去且亭前放鹤溪上垂纶交亲散落如云仅留得樽前康健身有一编书传一囊诗藁一枰碁谱一卷茶经红杏尚书碧桃学士看了虚名都赚人成何事独青山有趣白发无情

又【摸鱼儿】

甚一般化工模子铸成一个拙底生来不向春头上却跨暮春婪尾蓦省记蚤冉冉花阴??循除水虽然恁地但笑咏春风闲推鸣瑟别自有真意【婪尾字或作蓝】从前看三十七年都未醉生声利场里浮云破处窻涵月唤得自家醒起别料理那玉燕石麟不当真符瑞彻头地位也须是长年闻些好话作个标月指

生日和蓬莱仙降词【沁园春】

春事阑斑桐花烂漫不堪凤栖叹交枰世道容容是福危航宦海了了成痴邵子豪情乐天狂态六十六年才觉非【邵尧夫有六十六岁吟白乐天有六十六岁诗】溪山畔要看承风月舍我其谁文章高下随时料织锦应须用锦机愧老无健笔高凌月脇病无佳句下解人颐君昔东坡我今韩愈【仙自云某即坡仙还以韩愈相戏】造化一炉如小儿都休管看龟翻荷露燕落芹泥

洪都生日不张乐自述【满江红】

手摘桐华怅还是春风婪尾按锦瑟一弦一柱又添一岁紫马西来疑是梦朱衣双引浑如醉较香山七十欠三年吾衰矣红袖却青樽止檀板住?杯废澹香凝一室自观生意事业不堪霜满镜文章底用花如绮笑江滨游女尚高歌滕王记【白乐天六十七岁诗云共把十千沽一斗相看七十欠三年】

壽范潼川并序

嘉定甲申之秋七月良夜梦归家山过鹤林之下见老鹤翩跹从西南来方瞳而朱顶玉立而长身其色内白其气孔神殆类有道者既悟作而曰岂絜庵老仙诞日之祥耶遂书此梦演成

满江红一阕为斯文壽

梦遶家山曾访问鹤林遗迹见老鹤翩跹蜚下方瞳如漆蕙帐香销形色静玉笙吹彻丰神逸
梦醒来忽记鹤归时翁生日南陌杖东山屐红楼酒青霄笛料中梁何似涪江今夕君不见洛
阳耆英会花前雅放诗间适独北都留守未归来七十一

壽李长孺【水龙吟】

清江社雨初晴秋香吹彻高堂晓天然带得酒星风骨诗囊才调沔水春深屏山月淡吟鞭俱
到算一生遶徧瑶阶玉树如君樣人间少未放鹤归华表伴仙翁依然天杪知他费几鴈边红
粒马边青草待得清夷彩衣花绶哄堂一笑且和平心事等闲博个千秋不老

壽崔菊坡【鹊桥仙】

二童一马素琴独鹤长与仙翁为伴自从分付益州来便蔚有隆中人望
边烽白羽军符赤籍弄得不成模樣愿公福德厚如山为扶起坤陲一半

壽吴毅夫【清平乐】

梅霖未歇直透菖华节荔子才丹梔子白擡贴诞弥嘉月
峩冠蝉尾翛翛整衣鹤骨影影闻道彩云深处新添弄玉吹箫

宣城壽季永弟【贺新凉】

碧嶂青江路近重阳不寒不暖不风不雨杜宇花残银杏过犹有秋英未吐但日对南山延竚
碧落仙人骑赤鲤渺风尘不上瞿塘去来伴我宛陵住西风画角高堂暮炙银灯踈帘影里笑
呼儿女爷作嘉兴新太守罔拜鹞书天府况哥共白头相聚天分从来鍾至乐更谁思野鸭鸳
鸯语提大斗酌寒露

壽季武博【渔家傲】

翠隐红藏春尚薄百花头上梅先觉清晓寒城闻画角云一握鸦翻诏墨天边落
碧眼棱棱言谔谔谏书犹自留黄阁世事翻腾谁认错休话着綠尊且举鸛鵒勺

壽魏鹤山【八声甘州】

又一番泸水出牂牁江声汹鸣鼙正南人争望转移虎节弹压鲸波未见元戎羽葆民气已冲
和不待禁中选李牧廉颇却顾边陲以北似乘航共济亡楫中河纵缆头襦尾其奈不牢何明
公一襟忠愤想誓江无日不酣歌当津者岂应袖手长燕江沱

壽季永弟【青玉案】

杏花时候匆匆别又欲迫黄花节过了三年经八月骊驹声里青鸿头畔几见刀头折
诸生立尽门前雪半偈重翻为渠说且莫从头烹瓠叶已呼童稚多藏酒秫共醉陶彭泽

宣城鹿鸣宴【谒金门】

将进酒吹起黄钟清调手按玉笙寒尚峭陇梅春已透蓝染溪光綠皱花簇马蹄红鬪尽使宛
陵人说道状

元今岁又

温州鹿鸣宴【谒金门】

金榜揭都是鹿鸣仙客手按玉笙寒尚怯倚梅歌一阕柳拂御街明月莺扑上林残雪前岁杏
花元一色马

蹄归路滑

孙园赏牡丹【柳梢青】

元九不回胡三不问花说与谁赖得东皇调停春住勾管花飞
庭前密打红围想孙子兵来出奇似恁丰神谁人刚道色比明妃

郫县宴同官【摸鱼儿】

倚南墙几回凝竚綠筠冉冉如故帝城景色缘何事一半花枝风雨收听取这气象精神则要
人来做当留客处且遇酒高歌逢场戏剧莫作皱眉事 那个是紫佩飞霞仙侶駸駸云步如许
清闲笑我如鸥鹭不肯对松覓句萍散聚又明日还寻锦里烟霞路浮名自误待好好归来携
筒载酒同访子云去

六月宴双溪【水龙吟】

修篁翠葆人家分明水监光中住就中得要危亭瞰渌小桥当路一榻桃笙半窗竹简清凉如
许纵武陵佳丽若耶深窈那得似双溪趣一夜檐花落枕想鱼天涨?新露多君唤我扫花坐晚
解衣逃暑鱸切银丝酒招玉友曲歌金缕愿张郎长与莲花相似朝朝暮暮

神泉春日赋【鱼游春水】

东里韶光早百舌枝头啼碎了溪梅开尽池水绿波还皱种柳先生觉意阑看花君子非年少
心似澹云梦随芳草满地松花不扫镇日春愁萦怀抱谁能击筑长歌吹笛清啸寄声玉关行人
人道未报君恩难便老鸡塞雨寒戍楼烟渺

春日感怀【祝英台】

小池塘闲院落薄薄见山影杨柳风来吹彻醉魂醒有时低按秦筝高歌水调落花外纷纷人
境猛深省但有竹屋三间莲田二顷便可休官日对漏壶永假饶是红杏尚书碧桃学士买不
得朱颜芳景

寿友人【千秋岁】

松舟桧楫苔雪溪头别秋後雨春前雪书凭湖鴈寄手把江蓠折人未老相看元侣来时节
芳草鸣鶗鴂野菜飞黄蝶时易去愁难说析波浮玉醴换火繡银叶醉也马蹄归踏梨花月

雪词【上西平】

似斜斜才整整又霏霏今夜里窗牖先知嫌春未透故穿庭树作花飞起来寻访剡溪人半压
桥低兔园册渔江画兰房曲竹丘诗怎模得似当时天寒堕指问谁能解白登围也须凭酒遣
拏担击乱鹅池

洪都病中闻计浣章成父读示刘?夫往岁辞建宁初命之词而壮之因和一首寄呈【沁园春】

夸说洪都西滕王阁北豫章台对雨帘半卷江横如旧沟亭欹压梯上无媒但有江山更无豪
杰拔脚风尘外一杯题千墨须杜陵老手太白天才力能笔走风雷人道是闽乡老万回把崇
天普地层胷荡出横今竖古信手拈来使翰墨场着伏波老上马犹堪矍铄哉今耄矣独尊鲈
在梦泉石萦怀

和吴毅夫【满江红】

伶俐聪明都不似阿奴碌碌渐欲买青山路隐白云同宿半醉尽教乌帟堕熟眠休管屏风触
算人生能有几时闲金乌速龊龊饭天仓粟浊浊酒天家禄更钓鲜采?有何不足君不见当
年金谷事绿珠弄笛椒涂屋到而今富贵一场空终非福

和史子威瑞梅【卜算子】

漠漠雨其蒙湛湛江之永冻压溪桥不见花安得杯中影
明水未登彝饰玉先浮鼎寄语清居山上翁驿使催归近

仓江分韵送晏钐干词【满江红】

元帅筹边谁肯办向前一着大丞相孙儿挺伟素闲兵略杨柳依依烟在眼檀车嘒嘒春浮脚
更何妨二十五长亭横水榭登剑栈怀关洛机易去愁难割岂而今全是从前都错鹿走未知
真局面兽穷渐近空篱落蚤经营勲业复归来江头酌

惜春和李元膺【洞仙歌】

翠柔香嫩乍春风庭院换却幽人读书眼澹鹅黄嫋嫋玉破梢头莺未啜绿皱池波尚浅王孙
才别後长负芳时碧草萋萋綉裯软海棠桃花雨红湿青衫春心荡不省花飞减半待持酒高
堂劝东皇且爱惜芳菲留春借煖

送陈舍人【上西平】

跨征鞍横战槊上襄州便匹马蹴踏高秋芙蓉未折笛声吹起塞云愁男儿若欲树功名须向
前头凤雏寒龙骨朽蛟渚暗鹿门幽閱人物渺渺如沅碁头已动也须高着局心筹莫将一片
广长舌博取封侯

送游景仁赴夔漕【贺新凉】

额扣龙墀苦对南宫春风侍女掉头不顾烽火连营家万里漠漠黄沙吹雾莽关塞白狼玄兔
如此江山俱破碎似输棋局满枰无路弹血泪迸如雨轻帆且问夔州戍俯江流桑田屡改阵
图犹故抱此孤忠长耿耿痛恨年华不与但月落荒州絶屿君与鹤山皆人杰倘功名到手还
须做平灤瀨洗石鼓

送张伯修赴宣府【青玉案】

玉骢已向关头路待携取功名去慷慨不歌桃叶渡囊书犹在剑花未落富有经纶处
从军缅想当年赋纵局局翻新祇如许但恐归来秋色暮薰炉茗椀葵根匏叶落莫灯前雨

送魏鹤山都督【满江红】

白鹤山人被推作诸军都督对朔雪边云上马龙光醲郁戍已营西连太白甲丁旗尾扞箕宿
倚梅花聽得凯歌声横吹曲船易漏柵难沃柯易烂棋难复阅勋名好樣只推吾蜀风撼藕塘
猩鬼泣月吞采石鲸鲵戮管明年缚取敌人回持钩轴

和吴穀夫送行【满江红】

倦客无家且随寓瞻乌爰止浪占得清谿一曲水鲜山嫩菡萏香浮书几上芙蓉月落吟窻里

纵结庐虽不是吾庐聊复尔 人似玉神如水歌古调传新意问老龐何日携家来此後着岂无
棋对待前锋自有诗当底若新秋京口酒船来仍命寄

和季永弟思归【八声甘州】

每逢人都道早归休何曾猛归来有邵平瓜圃渊明菊径谁肯徘徊底是无波去处空算一竿桅
富贵非吾事野马浮埃 况值清和时候正青梅未熟煮酒新开共倒冠落佩宁使别人猜满朱
檐残花败絮欲问君移取石榴栽青湖上低低架屋浅浅衔杯